

ଲୁକ ଲିଖିତ ଯୀଶୁ ଖ୍ରୀଷ୍ଟଙ୍କ ସୁସମାଚାର **ଲୁକ ରାସ୍ତାମାନି ଜିସୁ କ୍ରିସ୍ତଦି** **ନେଗିକାବୁର୍** **ଲୁକ ବଇ ବିସୟତାନ୍ ଏସ ମାଟା**

ଲୁକ ରାସ୍ତାମାନି ସୁସମାଚାର ଆଜିନାଡ଼, ଜିସୁ କ୍ରିସ୍ତଦି ଜିବନ୍ ଝେରସିମାନି ପୁନି ନିୟମତି ନାଲ୍‌ଗି ବଇଙ୍ଗା ମାଣ୍‌କୁ ଉନ୍‌ଶ୍ଟି । ଆୟାଞ୍ଜାନିକା ମାଣ୍‌କୁ ଝିନ୍ତୁ ବଇଙ୍ଗା “ସୁସମାଚାର” ଇନାର୍, ଆମାତାନି ଅର୍ତ୍ତ “ନେଗିକାବୁର୍” । ଆୟାଞ୍ଜିନ୍ତୁ ବଇଙ୍ଗା ଜିସୁ ସାତି ଝେନ୍‌କା, ମାଥୁର, ମାର୍କ, ଲୁକ ମାରି ଜୋହନଦି ମାଣ୍‌ନା ରାସାତେମାନେ । ଲୁକ ଜିସୁଦି ଜିବନ୍‌ତି ଗଟ୍‌ନେଙ୍ଗ ରାସ୍‌ନି ଖାଲେ, ଜିସୁଦି ସାତି ମାରି ମାରିତେସି ଜିବନ୍‌ଆଜି ନିଙ୍ଗା ଝେନ୍‌କା ଖାନି ସିସୁର୍ ଏମେ ବିସୟଞ୍ଜିନ୍ତୁ କିତାର୍, ଆକାବା ରାସ୍‌ତାମାନାର୍, ଆୟା ବଇଦିଙ୍ଗ ପ୍ରେରିତରି ପାଣିଦି ବିସୟ ଇଜି ଇନାର୍ । ଲୁକ ବଇ ଏସ୍ତିଖାଲେ ମାରି ଏମେମାନୁ ରାସ୍‌ତାମାନାଡ଼, ଆୟା ବିସୟତାନ୍ ପୁରା ଏନ୍‌ବା ନେସ୍‌ଏର୍, ମାତର୍ ଏସଲୋକ୍ ପଣ୍ଡିତକୁ ରାଜିଆନାର୍ ଜେ, ଇକା ଆନାଡ଼ସୁଗି, ଜିସୁ କ୍ରିସ୍ତଦି ଜନମ୍‌ତି ୭୦ ବାର୍ଷେକ୍ ଝେନ୍‌କା ରାସ୍‌ତାମାନାଡ଼ ।

ରାସ୍‌ତିକାନ୍ ଆଜିନାନ୍ ଲୁକ, ଏନ୍ ଅରେନ୍ ତାକ୍‌ତର୍ ମାର୍‌ଆନ୍ । ଖାନି ରାସ୍‌ତିକା ବଲ୍ ମାରି ବାସାଦି ଖାର୍‌ଗିନିକା ତରୁନାଡ଼ ଜେ, ଖାନ୍ ଅରେନ୍ ପଡ଼ାତି ଲୋକୁ ମାର୍‌ହାନ୍ । ଜିସୁଦି ଜିବନ୍‌ତି ଗଟ୍‌ନେଙ୍ଗ ଝିନ୍ତୁ ଏମେ ଗଟ୍‌ନେଙ୍ଗ ଝେନ୍‌କା ଏମେକା ଆତାଡ଼ ଆୟା ଇସାବ୍‌ତାନ୍, ରାସ୍‌ସୋ ଟିକ୍‌ତାନ୍, ଝେରତେଙ୍ଗ ବଦାକିନାନ୍, ଏଣ୍ଡେସ୍ ଆଇକାର୍ ଆକା ପଡ଼ାଜି ଲାବ୍ ପୟ୍‌ଦେଙ୍ଗ ଆଟ୍‌ନାର୍ ୧:୧-୩ । ଖାନ୍ ଅରେନ୍ ଜିହୁଦି ଲୋକୁ ଆଏନ୍ ମାର୍‌ହାନ୍ କଲ୍‌ସିୟ ୪:୧୦-୧୪ ମାରି ଖାନ୍ ଇୟାଞ୍ଜା ଇସାବ୍‌ତାନ୍ ରାସ୍‌ତାମାନାନ୍, ଅଣଜିହୁଦିରି ବୁଜାଦେଙ୍ଗ

ଆଚ୍ଚନାର । ଖାନ୍ ଜିହୁଦିରି ନିୟମକୁ ଖେରନିକା ଇକା ମାଡ଼
ନେଗେନ୍ତାନ୍ ସୁଡ଼ୁଦେଙ୍ଗ ଆଚ୍ଚନିକା ୧:୮ ।

ଲୁକ ରାସ୍ତିମାନି ସୁସମାଚାର୍, ମାଥୁର ମାରି ମାର୍କ ବଇଦି ଖାଲେ
ପୁରା ସାମାନ୍ ତରନାଡ଼, ଇରିଙ୍ଗ୍ ଖାର୍ ସାମାନ୍ ବିସୟ ମାରି
ସାମାନ୍ତାନ୍ ରାସ୍ନାର । ମୁନ୍ତ୍ର ବଇଙ୍ଗ୍ ଲୋଇ ଲୁକ ତୁବନ୍ସିନି
ଜୋହନତି ଜନମ୍ ବିସୟତାନ୍ ନାଣ୍ଡ ଖେରନାନ୍ । ମାରିବା ଲୁକ
ପାରତନା ବିସୟତି ମୁସକୁ ନାଣ୍ଡ ଖେରନାନ୍ ୩:୨୧, ୫:୧୭, ୬:୧୨,
୧୧:୧-୧୨, ୨୨:୩୨, ମାରି ଖାନ୍ କେମାସିନି ବିସୟତୁ ବା ଖେରନାନ୍
୩:୩, ୧୧:୪, ୧୭:୩-୪, ୨୩:୩୪, ୨୪:୪୭

ଇୟା ବଇଦୁ ମାନି ମୁକିୟ ବିସୟ

୧. ଲୁକ ସୁସମାଚାର୍ତ୍ତ ଇନିକା ମାନାଡ଼ ମାରି ରାସ୍ତି ଉଦେସ୍ତିଙ୍ଗ
ଖେରନାନ୍ । ୧:୧-୪
୨. ଜିସୁଦି ଜନମ୍ ନି ଖାନ୍ ଏଣ୍ଡେସ୍ ସେବାପାଣିଦି ଉଣ୍ଡିଙ୍ଗ୍ ତିଆର୍
ଆତାନ୍ । ୧:୫; ୪:୧୩
୩. ଜିସୁଦି ପାଣି ଖିଜୁ, ବିସେସ୍‌କିଜି ଖାନ୍ କିତିମାନି କାବାଆନି ପାଣି
ମାରି ଖାନି ସିକିୟା ବିସୟତାନ୍ ଖେରନାନ୍ । ୪:୧୪-୨୧:୩୮
ଇକା ଆଜିନାଡ଼ ସୁସମାଚାର୍ତ୍ତି ପେରି ବାଗ୍ ।
୪. ସାରାସାରି, ଖେନକା ବଇଦୁ ମାନି ମୁଣ୍ଡି ଅଦ୍ୟାୟତୁ, ଜିସୁ
ଏଣ୍ଡେସ୍ ସାତାନ୍, ମୁସାତାନ୍ ମାରି ସାତିମାଣ୍ଡକୁ ନିଙ୍ଗ୍ ତାନ୍ ।
ଅଦ୍ୟାୟ । ୨୨:୧-୨୪

ଜିସୁଦି ଜିବନ୍ତି ବିସୟତାନ୍ ଲୁକ ରାସ୍ତିମାନିକା

^୧ ଏ ତିୟପିଲ, ଏମେକାର୍ ମା ଲୋଇ କିତିମାନି ଗଟେନେଙ୍ଗ୍ତି
ନାଣ୍ଡ ମାଟେଙ୍ଗ୍ ସତ୍ତାନ୍ ରାସ୍ତିତେଙ୍ଗ୍ ବଦାକିତାର୍,

^୨ ଆୟା ନିଜେଦି କାଣ୍ଡାଦାନ୍ ସୁଡ଼ୁତିମାନିକା ମାରି ବାକ୍ୟ ପ୍ରଚାର୍
କିଜିମାନି ଲୋକୁ ମାଙ୍ଗ୍ ଖେରନି ଇସାବ୍‌ତାନ୍,

^୩ ଆରାମ୍‌ତାନ୍ ଖିଜୁ ବିସୟ ଇସ୍ତିମିସ୍ତିକା ଉଣ୍ଡା କିଜି ଦାଡ଼ିଦି ଖାଜା ମି
ଉଣ୍ଡିଙ୍ଗ୍ ରାସ୍ତିତେଙ୍ଗ୍ ନାନ୍ ବା ଟିକ୍ ଇଜି ଅଡ଼ବିତା,

^୪ ଏଣ୍ଡେସ୍ ନିନ୍ ଏମେ ଖିଜୁ ବିସୟ ସିକିୟା ପଇତିମାନି, ଆୟାଖିଜୁ
ବିସୟତାନ୍ ପୁରା ତାନି ବୁଦି ନେସ୍‌ନାର୍ ।

ତୁବନ୍ଧିନି ଜୋହନତି ଜନମ୍ ବିସୟତାନ୍ ଖେଙ୍ଗିତାତ୍

୫ ଜିହ୍ୱଦା ରାଜିଦି ରାଜା ହେରୋଦସି ସମୟତୁ ଅବିୟ ଜାଜକତି ଦଳ୍ଲୁ ଜିକରିୟ ଦର୍ତ୍ତି ଅରେନ୍ ଜାଜକ ମାର୍ହାତ୍; ଖାନି ଆଡ୍‌ସି ହାରୋଣ କୁଟୁମ୍‌ତିକାତ୍ ମାର୍ହାତ୍, ତାନେ ଦର୍ ଏଲିସାବେତ୍ ।

୬ ଜିକରିୟ ମାରି ଏଲିସାବେତ୍ ପ୍ରବୁଦି ଝିନ୍ନୁ ମାଟା ମାରି ନିୟମ୍‌ତାନ୍ ଇନି ଦୋସ୍ କିଏଶ୍ୱଗା ମାପୁରୁମାନୁ ଦାମ୍‌ଦିକାର୍ ମାର୍ହାତ୍ ।

୭ ମାତର୍ ଖାରିଙ୍ଗ୍ ଅରେନ୍‌ବା କଡ଼ ସିଲେତାନ୍, ଇରିଙ୍ଗ୍ ଏଲିସାବେତ୍ ବାଞ୍ଜି ମାର୍ହାତ୍, ମାରି ଖାର୍ ନାଶ୍ ଡକ୍ରା ଡକ୍ରି ଆତାମାର୍ହାତ୍ ।

୮ ଖାନ୍ ନିଜେଦି ଦଳ୍ଲତି ପାଲିଦାନ୍ ମନ୍ଦିରତୁ ମାପୁରୁଦି ପାଣି କିନିଝାଲେ,

୯ ଜାଜକତି ପାଣିଦି ନିୟମ୍‌ତାନ୍ କୁଡ଼କୁଡ଼ି ପକ୍‌ତାର୍ ଆକା ଖାନି ପାଲି ଖାତାତ୍ ପ୍ରବୁଦି ମନ୍ଦିରତୁ ଡଗ୍ଲୁଜି ଦୁପ୍‌ଣି ଆଡେକ୍‌ଡେଙ୍ଗ୍,

୧୦ ମାରି ଦୁପ୍‌ଣି ଆଡିକ୍‌ନିଝାଲେ ଝିନ୍ନୁ ଲୋକୁ ଆଡ୍‌ରେ ପାର୍‌ତନା କିଜିମାର୍‌ଆର୍ ।

୧୧ ଆୟାଝାଲେ ପ୍ରବୁଦି ଅରେନ୍ ଦୁଡ଼ ଦୁପ୍‌ଣି ଆଡିକ୍‌ନି ବାଡିଦି ଉଣେର୍ ତରିନ୍ ନିଲ୍‌ସି ଜିକରିୟଙ୍ଗ୍ ତରାୟ୍ ଆତାତ୍ ।

୧୨ ଜିକରିୟ ଦୁଡ଼ତିଙ୍ଗ୍ ସୁଡ଼କୁ ଡିରଗିତାନ୍ ମାରି ତିଲାତା ସର୍‌ଆନ୍ ।

୧୩ ମାତର୍ ଦୁଡ଼ ଖାନିଙ୍ଗ୍ ଇର୍ହାତ୍, “ଜିକରିୟ, ତିଲାମା, ମାତର୍ ନିନ୍ ଲସ୍‌ତିକା ଝେର୍‌ଆ ମାନାନ୍, ମାରି ନି ଆଡ୍‌ସି ଏଲିସାବେତ୍ ମି ଉଣ୍ଡିଙ୍ଗ୍ ଅରେନ୍ କଡ଼ ଜନମ୍ କିନାତ୍, ମିର୍ ଖାନି ଦର୍ ଜୋହନ ସିନିଦେର୍ ।

୧୪ ଖାନି ଉଣ୍ଡିଙ୍ଗ୍ ମିର୍ ନାଶ୍ ଝେଡିକା ଆନିଦେର୍, ମାରି ଖାନି ଜନମ୍ ଆତି ଉଣ୍ଡିଙ୍ଗ୍ ନାଶ୍ ଲୋକୁ ଝେଡିକା କିନାର୍ ।

୧୫ ଖାନ୍ ପ୍ରବୁଦି ଲାକ୍‌ତୁ ପେରିକାନ୍ ଆନାନ୍; ଖାନ୍ ଅଙ୍ଗୁର୍‌ରସ୍ ମାରି କାଡ଼ ୟସକାଙ୍ଗ୍‌ବା ଉଣ୍ଡୁଏନ୍, ମାରି ଯାୟା ପଟା ଲୋଇରାନ୍‌ନେ ପବିତ୍ରଆମ୍‌ାଦୁ ପୁରା ତେବାନାନ୍,

୧୬ ମାରି ଖାନ୍ ଇସାଏଲ୍‌ତି କଡ଼ରି ମାଣ୍‌କୁ ଝିନ୍ନୁଲୋକାଙ୍ଗ୍ ପ୍ରବୁ ଖାରି ମାପୁରୁମାନୁ ଡେସି ତାନାନ୍ ।

୧୭ ବୁଢ଼ାରି ଜିବନ୍ କଡ଼ରି ଉଣ୍ଡିଙ୍ଗ ମାରି ମାନାଈଝାରିଙ୍ଗ ଦାମ୍ଭୁଲୋକ୍ତି ବୁଦ୍ଧିଦୁ ସାଲାଇବିସ କିଜି ଡେପ୍‌ସିତାତେଙ୍ଗ ମାରି ପ୍ରବୁଦି ଉଣ୍ଡିଙ୍ଗ ନେଗେନ୍‌ତିଆରକିତି ଉନ୍‌ଣ୍ଡି ଲୋକ୍‌ଦଲ୍‌ତିଙ୍ଗ ତିଆର କିଦେଙ୍ଗ ଖାନ୍ ଏଲିୟଦି ଆମ୍ବା ମାରି ସାକ୍ତିଦାନ୍ ଖାନ୍ ଆଗ୍ତି ବୁଲାନାନ୍ ।”

୧୮ ଆବେଟ୍ ଜିକରିୟ ବୁଡ୍‌ତିଙ୍ଗ ଇର୍‌ଆନ୍, “ନାନ୍ ଏଣ୍ଡେସ୍ ଇକା ନେସ୍‌ତେଙ୍ଗ ଆଟ୍‌ନା ? ଇରିଙ୍ଗ ନାନ୍ ତୋ ଡକ୍ରା, ମାରି ନା ଆଡ୍‌ତିଙ୍ଗ ନାଣ୍ଡ ବାସେକ୍ ଆଡାଡ୍‌ନି ।”

୧୯ ଦୁଡ୍ ଖାନିଙ୍ଗ ଇର୍‌ଆନ୍, “ନାନ୍ ଗାବ୍‌ତିଏଲ,” ନାନ୍ ମାପୁରୁ ଲାକ୍‌ଡୁ ନିଲ୍‌ସିମାନି ଦୁଡ୍, ମାରି ନିଙ୍ଗ ଇନ୍‌ଡେଙ୍ଗ ମାରି ଇୟା ନେଗି କାବୁର୍ ଝେର୍‌ତେଙ୍ଗ ନାନ୍ ମାପୁରୁ ମାଣ୍‌କୁ ଖାତାମାନା ।

୨୦ “ସୁଡ୍‌ଆ, ଇୟାଝିଜୁ ଗଟାଈ ଦିନ୍ ସାନ୍ଦି ନିନ୍ ଗୁଲା ଆଜି ଖାର୍‌ଗିଦେଙ୍ଗ ଆଟ୍‌ଇ, ଇରିଙ୍ଗ ନା ଏମେ ଝିଜୁ ବାକ୍ୟ ଟିକ୍ ସମୟଡୁ ସଡ୍ ଆନାଡ୍, ଆୟାଝିଜୁ ନିନ୍ ବିସ୍‌ବାସ୍ କିଈତି ।”

୨୧ ଇୟାଝାଲେ ଲୋକୁ ଜିକରିୟଙ୍ଗ କାପ୍‌କିଜି ମାର୍‌ଆର୍, ମାରି ମନ୍ଦିର୍‌ଡୁ ଖାନି ଝେଡା କିନିକା ସୁଡ୍‌ଜି ଖାର୍ କାବାଆଜି ମାର୍‌ଆର୍ ।

୨୨ ମାଡର ଖାନ୍ ସହସି ଖାଜି ଖାରିଙ୍ଗ ଖାର୍‌ଗିଦେଙ୍ଗ ଆଟ୍‌ଏତାନ୍; ଆବେଟ୍ ଖାନ୍ ମନ୍ଦିର୍‌ଡୁ ଦର୍‌ସନ ପଇତାମାନାନ୍ ଇଜି ଖାର୍ ବୁଜାତାର୍, ମାରି ଖାନ୍ ଖାରିଙ୍ଗ ଜୁବସି ଇନ୍‌ଡେଙ୍ଗ ଆସ୍‌ତାନ୍ ମାରି ଗୁଲା ଆଡା ଡେବାତାନ୍ ।

୨୩ ଝେନ୍‌କା ଖାନି ସେବା ପାଲିଦି ଦିନ୍‌ଝିଜୁ ଝିଜିତାଡ୍, ମାରି ଖାନ୍ ଖାନି ଇନ୍‌ଡୁ ସର୍‌ଆନ୍ ।

୨୪ ତାନେ ଝେନ୍‌କା ଖାନି ଆଡ୍‌ସି ଏଲିସାବେଟ୍ ପଟାବୁ ଆଡାଡ୍, ମାରି ଖାଡ୍ ପାସ୍‌ଗୋଟା ଲେଜ୍‌କୁ ସାନ୍ଦି ଏଙ୍ଗ୍‌ବା ଇନ୍‌ଏଣ୍‌ଗା ମାର୍‌ଆଡ୍,

୨୫ ଆବେଟ୍ ଖାଡ୍ ଇର୍‌ହାଡ୍, “ଲୋକା ମାଣ୍‌କୁ ନା ଅପ୍‌ମାନ୍ ଆକ କିନି ଉଣ୍ଡିଙ୍ଗ ପ୍ରବୁ ନାଙ୍ଗ୍ ସୁଡ୍‌ଜି ନା ଉଣ୍ଡିଙ୍ଗ ଇୟାଝାଜା କିତାମାନାନ୍ ।”

ଜିସୁ କ୍ରିସ୍ତଦି ଜନମ୍‌ତି ବିସୟତାନ୍ ଝେଙ୍ଗ୍‌ତାଡ୍

୨୬ ଏଲିସାବେଟ୍ ସଗୋଟା ଲେଜ୍‌କୁ ଝେନ୍‌କା ଗାବ୍‌ତିଏଲ ଦୁଡ୍ ମାପୁରୁ ମାଣ୍‌କୁ ଗାଲିଲିଦି ନାଜରିତ ଦର୍‌ତି ଗାଡ୍‌ଡୁ ଅରେଡ୍ ରିପା ଆଇଲି ଲାକ୍‌ଡୁ ଖାତାନ୍;

୨୭ ☆ଦାଉଦତି କୁଟୁମ୍ବତି ଜୋସେପ ଦରତି ଅରେନ୍ ମେମାରି
 ଝାଲେ ତାନିଙ୍ଗ୍ ପେଡି କିଦେଙ୍ଗ୍ ଲସ୍ତା ମାର୍ଥାଆର୍; ଆୟା ଆଇଲିଦି
 ଦରୁ ମରିୟମ୍ ।

୨୮ ମୁସ୍‌କୁପୁରତି ଦୁଡ୍ ଇନ୍‌ଶୁ, ଡ଼ରୁତାଦୋ ତାନେ ଲାକ୍‌ତୁ ଝାଜି
 ଇର୍ହାଡ୍, “ମାଡିସ୍‌ନା, ଏ ଆଇଲି, ନିନ୍‌ ନେଗେନ୍ ମାନାଆ, ପ୍ରବୁ ନି
 ଝାଲେ ମାନାନ୍ ।”

୨୯ ମାତର୍ ଦୁଡ୍‌ତି ମାଟା ମରିୟମ୍ ଝେନ୍‌ଞ୍ଜି ନାଶୁ କାବାଜି ଇକା
 ଏଣ୍‌ସ୍‌ମାରି ମାଟା ଇଜି ମନ୍‌ତୁ ଅଡ୍‌ବିଦେଙ୍ଗ୍ ଆସ୍‌ତାଡ୍ ।

୩୦ ଆବେଟ୍ ଦୁଡ୍ ତାନେଙ୍ଗ୍ ଇର୍ହାଡ୍, “ଏ ମରିୟମ୍, ତିଲାମା, ମାତର୍
 ନିନ୍‌ ମାପୁରୁମାନ୍‌ ଦୟା ପଇତିମାନି ।

୩୧ ☆ମାରି ସୁଡ୍‌ଆ, ନିନ୍‌ ପଟାଦୁ ଆନିନୋ ଅରେନ୍ କଡ୍ ଜନମ୍ ସିନି
 ମାରି ଝାନି ଦର୍ ଜିସୁ ସିନିଦେର୍ ।

୩୨ ଝାନ୍ ପେରିକାନ୍ ଆନାନ୍ ମାରି ମାପୁରୁ ମାରିନ୍ ଇଜି
 ଝେଙ୍ଗ୍ ାନାନ୍; ମାରି ପ୍ରବୁ ମାପୁରୁ ଝାନିଙ୍ଗ୍ ଝାନି ଡକ୍ତାଦାଦା ଦାଉଦଦି
 ଝାଜା ରାଜା କିନାନ୍,

୩୩ ଝାନ୍ ଜାକୁବରି କୁଟୁମ୍ବତି ମୁସ୍‌କୁ ଜୁଗ୍ ଜୁଗ୍ ସାନ୍‌ ସାସନ୍
 କିନ୍‌ନାନ୍, ମାରି ଜିସୁଦି ରାଜି ଏସ୍‌କାଙ୍ଗ୍‌ବା ଝିଜେଏଡ୍ ।”

୩୪ ମାତର୍ ମରିୟମ୍ ଦୁଡ୍‌ତିଙ୍ଗ୍ ଇର୍ହାଡ୍, “ଇକା ଏଣ୍‌ସ୍‌ ଆନାଡ୍ ?”
 ନାନ୍ ତୋ ମେମାରିଙ୍ଗ୍ ନେସେଏ ।

୩୫ ଦୁଡ୍ ତାନେଙ୍ଗ୍ ଇର୍ହାଡ୍, “ପବିତ୍ର ଆମ୍ବା ନି ମୁସ୍‌କୁ ଝାନାଡ୍ ମାରି
 ପେରି ମାପୁରୁଦି ସାକ୍ତି ନିଂଇ ଆସ୍‌ନାଡ୍, ଏନ୍ ଜନମ୍ ଆନାନ୍, ଝାନ୍
 ପବିତ୍ର ମାରି ମାପୁରୁଦି ମାର୍‌ସି ଇଜି ଝେଙ୍ଗ୍ ାନାନ୍ ।

୩୬ ମାରି ସୁଡ୍‌ଦୁ, ମି ଲୋକ୍‌ବାକ୍ ଏଲିସାବେଡ୍ ବା ଡକ୍ତି ଆତି
 ଝାଲେନେ ଉଣ୍ଡି କଡ୍‌ଦିଙ୍ଗ୍ ପଟାଦୁ ଆସ୍‌ତା ମାନାଡ୍ । ଏଡ୍ ବାଞ୍ଜି
 ଇଜି ଝେଙ୍ଗ୍ ାତା ମାର୍ଥାଆଡ୍, ତାନେଙ୍ଗ୍ ଇଲେଇ ସଗୋଟା ଲେଜ୍‌କୁ
 ଆଜିନାଡ୍;

୩୭ ମାତର୍ ମାପୁରୁଦିମାଣକୁ ସୋନି ଝିଜୁ ବାକ୍ୟ ସଡ୍ ଆନାଡ୍ ।”

୩୮ ଆବେନୁ ମରିୟମ୍ ଇର୍ହାଡ଼, “ସୁତୁ, ନାନୁ ପ୍ରବୁଦି ସେବାକିନିକିନ୍ଧା; ନି ବାକ୍ୟଦି ଖାଜା ନା ଉଣ୍ଡିଙ୍ଗ ଗଟାପିଡ଼ ।” ତାନେ ଖେନ୍ଦକା ଦୁଡ଼ ତାନେ ଲାକ୍ତୁରାନ୍ ସର୍ଆଡ଼ ।

ମରିୟମ୍ ଏଲିସାବେଡ଼ତି ଲାକ୍ତୁ ସର୍ଆଡ଼

୩୯ ଆୟା ସମୟତୁ ମରିୟମ୍ ନିଙ୍ଗି ଗରନ୍ ରାଜି ତରିଟି ଜିହୁଦା ଦେଶ୍ତି ଉଣ୍ଡି ଗାଡ଼ତୁ ବେଗି ସର୍ଆଡ଼,

୪୦ ମାରି ଜିକରିୟରି ଇଲୁ ଲୋଇ ଡ଼ଗୁଡାଦୋ ଏଲିସାବେଡ଼ତିଙ୍ଗ ମାଡ଼ିସ୍ କିତାଡ଼ ।

୪୧ ମାରି, ଏଲିସାବେଡ଼ ମରିୟମ୍ତି ମାଡ଼ିସ୍ନିକା ଖେରଇଦାପ୍ରେ ଇସ୍ତି କଡ଼ ତାନି ପଟାଦୁ ଗାଡ଼ିସ୍ ନିଙ୍ଗିତାନ୍, ଏଲିସାବେଡ଼ ପବିତ୍ର ଆମ୍ବାଦୁ ପୁରା ତେବାଜି

୪୨ ନାଣ୍ଡ ଆଉଲି ଆଜି ଇର୍ହାଡ଼, “ଆଇମେକା ମାଣ୍ଡକୁ ନିନ୍ଦୁ ଦନ୍ୟ, ମାରି ଦନ୍ୟ ନି ପଟାଦି ପଲ୍ ।

୪୩ ମାରି, ନା ପ୍ରବୁଦି ଯାୟା ଜେ ନା ଲାକ୍ତୁ ଖାନାଡ଼, ନା ଇୟା ନେଗିକା ଏମେଣ୍ଡକୁ ଆତାଡ଼ ?

୪୪ ମାତର୍ ସୁତୁ, ନି ମାଟାଦି ବଲୁ ନା ଗିତଣିଦୁ ଇତି ଦାପ୍ରେ ଇସ୍ତି କଡ଼ ନା ପଟାଦୁ ଖେଡ଼ିକାଦାନ୍ ଗାଡ଼ିସ୍ ନିଙ୍ଗିତାନ୍ ।

୪୫ ଏନ୍ ବିସ୍ବାସ୍ କିତାନ୍, ଖାନ୍ ଦନ୍ୟ, ଇରିଙ୍ଗ ପ୍ରବୁମାଣ୍ଡକୁ ଖାନିଙ୍ଗ ଆମା ଆମାକା ଖେରତାମାନାର୍, ଆୟାଞ୍ଜିଦୁ ପୁରା ଆନାଡ଼ ।”

ମରିୟମ୍ ମାପ୍ପୁରୁଙ୍ଗ ଦନ୍ୟବାଦ୍ କିତାଡ଼

୪୬ ଆବେଟ୍ ମରିୟମ୍ ଇର୍ହାଡ଼,
“ନା ଜିବନ୍ ପ୍ରବୁଙ୍ଗ ପ୍ରସଂସା କିଜିନାଡ଼,

୪୭ ମାରି ନା ଆମ୍ବା ନା ରକିୟା କିନି ମାପ୍ପୁରୁମାନ୍ ଖେଡ଼ିକା କିଜିନାଡ଼;

୪୮ ଇରିଙ୍ଗ ଖାନ୍ ନିଜେଦି ଦାସିଦି କାକୁତ୍ ଦିଙ୍ଗ୍ ସୁଡ଼ତୁମାନାନ୍ ।

ମାରି ସୁଡୁଆ, ଇଲେରାନ୍ ଜୁଗ୍ ଜୁଗ୍ ସାନ୍ଦି ଖିଜେରେ ନାଙ୍ଗି ଦନ୍ୟ ଇଜି ଇନାର୍,

୪୯ ମାତର୍ ସାକ୍ତିମାନି ମାପ୍ପୁରୁ, ଖାନ୍ ନା ଉଣ୍ଡିଙ୍ଗ ପେରି ପାଣି କିତାମାନାନ୍;

ୱାନି ଦରୁ ପବିତ୍ର ।

୫୦ ମାରି ଏର ୱାନିଙ୍କ ମାନାନାର ୱାନ ୱାରିଙ୍କ ଦୁର୍ ଲୁର୍ ସାନ୍ଦି
ଦୟା କିନାନ୍ ।

୫୧ ୱାନ ୱାନି କିୟୁଦି ସାନ୍ତି ତରତାମାନାନ୍,
ଆକାରୁଆନିୱାରିଙ୍କ ୱାରି ମନ୍ତୁ ଅଡ୍‌ବିତିମାରୁଇ ମାଟାଦିଙ୍କ
ଇନିଙ୍ଗା ଆନିଙ୍ଗା କିତାମାନାନ୍;

୫୨ ୱାନ ରାଜାରିଙ୍କ ବାସୁନି ବାତିଦାନ୍ ଆଡ୍‌ଗି ରେପ୍‌ତାମାନାନ୍,
ସିଲିସାତିୱାରିଙ୍କ ମୁସୁକୁ ନିକ୍‌ତାମାନାନ୍,

୫୩ ୱାନ ବାଙ୍ଗାଆତିୱାରିଙ୍କ ନେଗି ନେଗି ବିସୟ ସିଜି ପାଜିସ୍
କିତାମାନାନ୍,
ମାରି ମାଜନ୍ ଲୋକାଙ୍କ ୱାରୁଇ କିୟୁଦାନ୍ ପୋକ୍‌ତାନ୍ ।

୫୪ ମା ପୁର୍ବେଦିତକ୍ରାଦାଦାରି ଉଣ୍ଡିଙ୍କ ରାସ୍‌ତିମାନି ୱାରି ବାକ୍ୟଦାନ୍
ଆୟା ଅବ୍ରାହାମ ମାରି ଇସ୍ରାଏଲ୍‌ତି କଡ୍‌କକ୍ରାରି ଉଣ୍ଡିଙ୍କ,

୫୫ ଲୁର୍ ଲୁର୍ ସାନ୍ଦି ଦୟା ଏଡ୍‌କିନି ଉଣ୍ଡିଙ୍କ ନିଜେଦି ଦାସ୍ ଅବ୍ରାହାମ ନି
ଇସ୍ରାଏଲ୍‌ତିଙ୍କ ନେଗିକା କିତାମାନାନ୍ ।”

୫୬ ମରିୟମ୍ ପୁରା ମୁଣ୍ଡି ଲେଜୁକୁ ଏଲିସାବେଡ୍ ୱାଲେ ମାନ୍‌ଞ୍ଜି
ନିଜେଦି ଇନ୍‌ଶୁ ଡେସି ସର୍‌ଆଡ୍ ।

ଡୁବନ୍‌ସିନି ଜୋହନତି ଜନମ୍

୫୭ ୱେନ୍‌କା ଏଲିସାବେଡ୍‌ତି ଜନମ୍‌କିନି ଦିନ୍ ଇଗା ୱାତାଡ୍, ୱାଡ୍
ଅରେନ୍ କଡ୍ ଜନମ୍ କିତାଡ୍,

୫୮ ମାରି ପ୍ରୁ ଜେ ତାନି ଉଣ୍ଡିଙ୍କ ନାଣ୍ଡ ଦୟା କିତାମାନାନ୍, ଇକା
ୱେନ୍‌ଞ୍ଜି ତାନି ଲାକ୍‌ଡୁରି ଲୋକୁ ମାରି ନିଜେଦି ଲୋକୁ ତାନି ୱାଲେ
ୱେଡ୍‌କା କିଦେଙ୍କ୍ ଆସ୍‌ତାର ।

୫୯ କଡ୍‌ଦି ଜନମ୍ ଆତି ଆଡ୍‌ଦିନ୍‌ଡୁ ୱାର୍ କଡ୍‌ଦିଙ୍କ୍ ସୁନ୍‌ଡ*
କିଦେଙ୍କ୍ ତାତାର ମାରି ୱାରି ବୁବାସି ଦର୍ ଇସାବ୍‌ତାନ୍ ୱାନି ଦର୍
ଜିକରିୟ୍ ସିଦେଙ୍କ୍ ବଦା କିତାର ।

୬୦ ମାତର୍ ୱାନି ଆଇସି ଇର୍‌ହାଡ୍, “ସିଲେ, ୱାନି ଦର୍ ଯୋହନ
ଆନାଡ୍ ।”

* ୧:୫୯ ସୁନ୍‌ଡ କଡ୍‌ଦି କୁସିନି ଡିପୁଦି ଆଗ୍‌ଡିରି ତଲ୍ କୟନିତାନେଙ୍କ୍ ବୁଜାକିନାଡ୍ ।

୭୧ ଖାର ଏଲିସାବେତ୍‌ଙ୍କୁ ଖେରତାର, “ମି ଲୋକାମାନୁ ତୋ ଇୟା ଦର୍ ଏଙ୍ଗ୍‌ବା ସିଲେଡ଼ ।”

୭୨ ଆବେଟ୍ ଖାନିଙ୍ଗ୍ ଏମେ ଦର୍ ସିନାଟ୍ ଇଜି ଖାନି ବୁବାସି ବଦା କିଜିନାନ୍, ଆକା ଖାର ଖାନିଙ୍ଗ୍ ସିନା ସିଜି ଖେନ୍‌ବାଦେଙ୍ଗ୍ ଆସ୍‌ତାର ।

୭୩ ଆବେନ୍ନୁ ଖାନ୍ ଉଣ୍ଡି, ରାସ୍‌ନି ପାଟା ଲସ୍‌ସି ଇକା ରାସ୍‌ତାନ୍, “ଖାନି ଦର୍ ଜୋହନ ।” ଆବେଟ୍ ଖିଜେରେ କାବାଆତାର ।

୭୪ ମାରି, ଆୟାଦାପ୍ରେ ଜିକରିୟଦି ଖେୟୁ ରେଆତାଡ଼ ମାରି ଖାନ୍ ମାରିଡେସି ମାଟା ଖାରଗିଜି ମାପୁରୁଦିଙ୍ଗ୍ ଦନ୍‌ଏବାଦ୍ କିଦେଙ୍ଗ୍ ଆସ୍‌ତାନ୍ ।

୭୫ ଆବେନ୍ନୁ ଖାରି ଲାକ୍‌ତୁରି ଲୋକୁ ଖିଜେରେ ତିଲାତାର, ମାରି ଇୟାଖିଜୁ ମାଟା ଜିହୁଦା ଦେସ୍‌ତି ଗରନ୍ ରାଜିଦି ଖିଜୁ ତରିଣ୍ଡି ଲୋକୁ ଇନ୍‌ଞ୍ଜି ସାତାର୍,

୭୬ ମାରି ଖେନି ଲୋକ୍‌ତର୍ ଆୟାଖିଜୁ ନିଜେ ନିଜେଦି ମନ୍‌ତୁ ଇଡ଼ଜି ଇର୍ହାର୍, “ଇୟା ଇସି କଡ଼ ଆତିଙ୍ଗ୍ ଇନିକା ଆନାନ୍ ?” ଇରିଙ୍ଗ୍ ଇକା ସଡ଼ ମାର୍‌ଆଡ଼ ଜେ ପ୍ରବୁଦି କିୟୁ ଖାନି ମୁସ୍‌କୁ ମାର୍‌ହାଡ଼ ।

ଜିକରିୟଦି ବାବବାଣି

୭୭ ମାରି, ଜୋହନଦି ବୁବା ଜିକରିୟ ପବିତ୍ର ଆମ୍‌ାଦୁ ପୁରା ତେବାଜି ଇୟା ବାବବାଣି ଇର୍ହାନ୍,

୭୮ “ଦନ୍‌ଏ ପ୍ରବୁ, ଇସ୍‌ଏଲ୍‌ତି ମାପୁରୁ,

ଇରିଙ୍ଗ୍ ଖାନ୍ କାର୍ମୁ ସୁଡ଼ଜୁ ନିଜେଦି ଲୋକା ଉଣ୍ଡିଙ୍ଗ୍ ରକିୟା କିତାମାନାନ୍;

୭୯ ଖାନ୍ ନିଜେଦି ଦାସ୍ ଦାଉଦଦି କୁଟୁମ୍‌ତି ଅରେନ୍ ସାକ୍ତିମାନି ରକିୟା କିନିଖାନିଙ୍ଗ୍ ମାଙ୍ଗ୍ ସିତାମାନାନ୍

୮୦ ପୁର୍ବେ କାଡ଼ାଦାନ୍ ନିଜେଦି ପବିତ୍ର ବାବବାଦିରି ଖେୟୁଦାନ୍ ଏଣ୍ଡେସ୍ ଇର୍ହା ମାର୍‌ଆର୍,

୮୧ ଆୟାଖାଜା ମା ସାତୁରିମାଣ୍‌କୁ ମାରି ମାଙ୍ଗ୍ ଖିଜୁ କାଡ଼୍‌ନିଖାରି କିକାଣ୍‌କୁ ରକିୟା କିତାମାନାନ୍,

୭୨ ଏଣେସ୍ ଖାନ୍ ମା ପୁର୍ବେଦିତକ୍ରାଦାଦାରି ଉଣ୍ଡିଙ୍ଗ ଦୟା ତରନାନ୍ ମାରି ଖାରି ଖାଲେ କିତିମାନି ନିଜେଦି ଆୟା ନିୟମ୍ ଏଡକିନାର୍ ।

୭୩ ଆମାକା ଖାନ୍ ମା ବୁବା ଅବ୍ରାହାମତି ଲାକ୍ତୁ ପାର୍ମାଣ୍ କିତାମାର୍ହାନ୍,

୭୪ ମାରି ମାପ୍ ମା ସାତୁରିକିୟୁଦାନ୍ ରକିୟା ପୟତାମାନାପ୍,

୭୫ ଏଣେସ୍ ମାପ୍ ଜିନି ସାନ୍ତି ତିଲାଏଣ୍ଗା, ପବିତ୍ରଦାନ୍ ମାରି ଦାର୍ମୁଦାନ୍ ଖାନି ସେବା କିଦେଙ୍ଗ୍ ଆଟ୍ନାପ୍ ।”

୭୬ “ଏ ମାରିନ୍, ନିନ୍ ଓଜେରିଙ୍ଗ୍ ପେରି ମାପୁରୁଦି ଅରେନ୍ ବାବବାଦି ଇଜି ଖେଙ୍ଗ୍ନି । ନିନ୍ ପ୍ରବୁଦି ଅରେନ୍ ଦୁଡ୍ ଖାନି ଉଣ୍ଡିଙ୍ଗ୍ ଖାନି ସାରି ତିଆର୍ କିନାଡ୍ ।

୭୭ ପାପ୍କେମା ପଇନି ମାଣାନ୍ ଖାର୍ ଜେ ରକିୟା ପୟନାର୍, ଖାନି ଲୋକାଙ୍ଗ୍ ଇୟା ମାଟା ଇଣ୍ଡେଙ୍ଗ୍ ସନାର୍ ।

୭୮ ମାରି ମା ମାପୁରୁ କାର୍ମୁସୁଣିକାନ୍ ମାରି କଡକିଜିବନ୍ ଖାନ୍ ମା ଉଣ୍ଡିଙ୍ଗ୍ ରକିୟାଦି ଖେଡା ସପ୍ନାନ୍,

୭୯ ଏମେକାର୍ ସାନିଖାଜା ସିକାଟିଦି ସିତିଡିଦୁ ବାସାନାର୍, ସାନ୍ତି ସାରିଦୁ ଖାରିଙ୍ଗ୍ ତରସି ଅନିଉଣ୍ଡିଙ୍ଗ୍ ଖାନ୍ ଓଜେରି ମୁସ୍କୁ ଜାୟ୍ ସିନାନ୍ ।”

୮୦ ମାରି, କଡ ପିରଜି ଆମ୍ବାଦୁ ବପୁ ଆଦେଙ୍ଗ୍ ଆସ୍ତାନ୍ ମାରି ଇସ୍ରାଏଲ୍ ଲୋକା ଲାକ୍ତୁ ତରାଇ ସାନ୍ତି ସୁନ୍ସାନ୍ ବାଡିଦୁ ତେବାତାନ୍ ।

୨

ଜିସୁଦି ଜନମ୍

(ମାତିଉ ୧:୧୮-୨୫)

୧ ଆୟାଖାଲେ ରୋମିୟ ଦେସ୍ତି ପେରିରାଜା ଅଗସ୍ଟ କାଇସର୍ ମାଣ୍ଡୁ ଦେସ୍ତି ଓଜୁ ଲୋକା ଦର୍କୁ ରାସାନି ଉଣ୍ଡିଙ୍ଗ୍ ମାଟା ଖେରଡାର୍ ।

୨ ସିରିଆଦି ସାସନକିନି କୁରିଣିୟଦି ସମୟତୁ ପାର୍ତୁମ୍ତୁ ଇୟା ଲୋକ୍ସୁ ଲେକିସ୍କିନିକା ଆତାମାର୍ଆଡ୍ ।

୩ ଆୟା ଉଣ୍ଡିଙ୍ଗ ଝିଜେରେ ଦର୍ ରାସ୍ନି ଉଣ୍ଡିଙ୍ଗ ନିଜେ ନିଜେଦି ଗାଡ଼କାଙ୍ଗ ସର୍ଆର୍ ।

୪ ମାରି, ଜୋସେପ ବା ଦର୍ ରାସ୍ନି ଉଣ୍ଡିଙ୍ଗ ମରିୟମତି ଖାଲେ ଗାଲିଲିଦି ନାଜରିତ ଗାଡ଼ତାନ୍ ଜିହୁଦା ଦେସ୍ତି ବେତଲିହିମ୍ ଦର୍ଦି ଦାଉଦତି ଗାଡ଼ତୁ ସର୍ଆର୍, ଇରିଙ୍ଗ୍ ଖାନ୍ ଦାଉଦତି କୁର୍ମୁ ମାରି କୁଦାଦି ଲୋକୁ ମାର୍ଆର୍;

୫ ଜୋସେପ ପେଡ଼ି ଆଦେଙ୍ଗ୍ ଲସ୍‌ସାୟାତି ମରିୟମତି ଖାଲେ ଦର୍ ରାସ୍‌ତେଙ୍ଗ୍ ସର୍ହାନ୍ । ମାରି ମରିୟମ୍ ପଟାଦୁ ମାର୍ଆଡ଼ ।

୬ ଜୋସେପ ମାରି ମରିୟମ୍ ବେତଲିହିମ୍‌ତୁ ମାର୍‌ଇ ଖାଲେ ମରିୟମତି ଜନମ୍‌କିନି ବେଡ଼ା ଇଗା ଖାତାଡ଼,

୭ ଖାଦ୍ ନିଜେ ପର୍‌ତୁମ୍ କଡ଼ଦିଙ୍ଗ୍ ଜନମ୍ କିତାଡ଼ କଡ଼ଦିଙ୍ଗ୍ ଖାତିଦୁ ତେରପସି ଡାକ୍ ଏରଉଣି ଟଙ୍ଗାଦୁ ତେରପ୍‌ତାଡ଼, ଇରିଙ୍ଗ୍ ତେବାନି ଇନ୍‌ଡ୍ର ଖାରି ଉଣ୍ଡିଙ୍ଗ୍ ବାତି ସିଲେତାଡ଼ ।

ମେଣ୍ଟେଙ୍ଗ୍ ସାରାକିନି ଗୋଡ଼ଙ୍ଗ୍ ଜିସୁଦି ଜନମ୍ ଆତି କାରୁର୍ ଝେର୍‌ଆର୍

୮ ଆୟା ରାଜିଦି ଏସ ଗୋଡ଼ଙ୍ଗ୍ ଆଡ଼ରେ ମାନ୍‌ଞ୍ଜି ନାଡ଼ା ଖାରି ମେଣ୍ଟେଙ୍ଗ୍ କାପ୍‌କିଜିମାର୍‌ଆର୍ ।

୯ ପ୍ରବୁଦି ଉଣ୍ଡି ଦୁଡ଼ ଖାରି ଲାକ୍‌ତୁ ଖାତାଡ଼, ମାରି ପ୍ରବୁଦି ଗୌରବ୍‌ତି ଜାୟ୍ ଖାରି ସାର୍‌ବେଡ଼ତି ତରିତାଡ଼, ମାରି ଖାର ନାଣ୍ଡ ତିଲାତାର୍ ।

୧୦ ଆବେର୍ ଦୁଡ଼ ଖାରିଙ୍ଗ୍ ଝେର୍‌ତାଡ଼, “ତିଲାମାଟ୍, ସୁଡ଼ୁ, ନାନ୍ ଝିଜୁ ଲୋକା ନାଣ୍ଡ ଝେଡ଼ିକାଦି ନେରି କାରୁର୍ ମିଙ୍ଗ୍” ଝେର୍‌ସିନା,

୧୧ ଇରିଙ୍ଗ୍ ନେର୍ ଦାଉଦତି ଗାଡ଼ତୁ ମି ଉଣ୍ଡିଙ୍ଗ୍ ରକିୟାକିନିକାନ୍ ଜନମ୍ ଆତାମାନାନ୍, ଖାନ୍ କ୍ରିସ୍ତ ପ୍ରବୁ ।

୧୨ ମାରି, ମି ଉଣ୍ଡିଙ୍ଗ୍ ଇକା ସିନାଦି ଖାଜା ଆନାଡ଼, ମିର୍ ଅରେନ୍ କଡ଼ଦିଙ୍ଗ୍ ଖାତିଦାନ୍ ତେରେପସି ସାଡ଼ାଦି ଟଙ୍ଗାଦୁ ଡର୍‌ନିମାନିକା ସୁଣିଦେର୍ ।”

୧୩ ମାରି, ଆୟାଦାପ୍ରେ ଆୟା ଦୁଡ଼ତି ଖାଲେ ମୁସ୍‌କୁପୁରତାନ୍ ଉଣ୍ଡି ଦୁଡ଼କା ଦଲ୍ ଇଗାଖାତେନୋ ମାପୁରୁଦିଙ୍ଗ୍ ପ୍ରସଂସା କିବୁ କିବୁ ଇରେଏ,

୧୪ “ମୁସ୍‌କୁପୁରତୁ ମାପୁରୁଦିଙ୍ଗ୍ ମହିମା ଆପିଡ଼,

ମାରି ଇୟାଞ୍ଜିକୁ ଦୁନିଆଦି ଏମେ ଲୋକା ମୁସକୁ ମାପରୁ
 ଝେଡ଼ିକା ମାନାନ୍ ଆୟା ଲୋକାମାନୁ ସାନ୍ତି ରାପ୍ତି ।”

୧୫ ଦୁଡ଼କୁ ଖାରିମାଣାନ୍ ମୁସକୁପୁରତୁ ସରଇ ଝେନ୍‌କା ମେଣ୍ଡେଙ୍ଗ
 ସାରାକିନିକାର ନିଜେ ନିଜେଦି ମାନୁ ଖାରିଗିଦେଙ୍ଗ ଆସ୍‌ତାର୍, “ରାଦୁ,
 ମାଡ଼ ବେତଲିହିମ୍ ସାନ୍ତି ସନାଟ୍ ମାରି ପ୍ରବୁ ମାଙ୍ଗ୍ ଇୟା ଏମେ
 ଗଟନା ବିସୟ ଝେରତାନ୍, ଆକା ସୁଡ଼ନୁଟ୍ ।”

୧୬ ଆବେଟ୍ ଖାରି ଦାପ୍ରେ ସଲ୍‌ସି ପଇଜି ଅସି ମରିୟମ୍ ମାରି
 ଜୋସେପତିଙ୍ଗ ପଇତାର୍, ମାରି ସାଡ଼ାଦି ଟଙ୍ଗାଦୁ କଡ଼ଦିଙ୍ଗ
 ଡରିତିମାରଇକା ସୁଡ଼ତୁାର ।

୧୭ ଖାରି ଖାନିଙ୍ଗ୍ ସୁଡ଼ଜି ଆୟା କଡ଼ଦି ବିସୟତାନ୍ ଦୁଡ଼ ଏମେ ମାଟା
 ଇର୍ହାମାର୍‌ଆଡ଼, ଆକା ଖାରିଙ୍ଗ୍ ଝେରତାର୍,

୧୮ ମାରି ଏମେ ଲୋକୁ ମେଣ୍ଡେଙ୍ଗ୍‌ସାରାକିନିଖାରି ମାଣାନ୍ ଆୟାଞ୍ଜିକୁ
 ମାଟା ଝେରଆର୍, ଖାରି ଝିଜେରେ କାବା ଆତାର୍ ।

୧୯ ମାଡ଼ର୍ ମରିୟମ୍ ଇୟାଞ୍ଜିକୁ ମାଟା ମନ୍‌ତୁ ଇଡ଼ଜି ନାଣ୍ଡ
 ଏଡ଼କିଦେଙ୍ଗ୍ ଆସ୍‌ତାଡ଼ ।

୨୦ ମାରି, ମେଣ୍ଡେଙ୍ଗ୍‌ସାରା କିନିଖାରିଙ୍ଗ୍ ଦୁଡ଼ ଏଣ୍ଡେସ୍ ଇର୍ହାମାର୍‌ହାଡ଼,
 ଆୟାଞ୍ଜା ଖାରି ଏମେ ଏମେକା ଝେରଆର୍ ମାରି ସୁଡ଼ତୁାର୍,
 ଆୟାଞ୍ଜିକୁ ଉଣ୍ଡିଙ୍ଗ୍ ମାପରୁଦି ଗୌରବ୍ ମାରି ଦନ୍‌ ଦନ୍‌ସବାଦ୍ କିରୁ କିରୁ
 ଡେସିଞ୍ଜାତାର୍ ।

ଜିସୁଙ୍ଗ୍ ମନ୍ଦିରତୁ ଅତାର୍

୨୧ ଆଟ୍‌ଦିନ୍ ଝେନ୍‌କା ସୁନ୍ନତ କିଦେଙ୍ଗ୍ ଜିସୁଙ୍ଗ୍ ମନ୍ଦିରତୁ ଅତାର୍,
 ଖାନି ଦର୍ ଜିସୁ ଇଟ୍‌ତାର୍, ଇୟା ଦର୍ ଖାଦ୍ ଗାର୍‌ବୁଡ଼ ତେବାଇ
 ଆଗ୍‌ଡ଼ିରାନ୍‌ନେ ମୁସକୁପୁରତି ଦୁଡ଼ ଇୟା ଦର୍ ସିତାମାର୍‌ହାଡ଼ ।

୨୨ ଝେନ୍‌କା ଏସ୍ତିଞ୍ଜାଲେ ମୋସାଦି ନିୟମତାନ୍ ତାନି ଶୁତି ଆନି
 ସମୟ ପୁରା ଆତାଡ଼, ନାସ୍ତିଞ୍ଜାଲେ ଖାରି କଡ଼ଦିଙ୍ଗ୍ ମାପୁରୁମାନୁ
 ସିଦେଙ୍ଗ୍ ଜିରୁସାଲାମ୍ ମନ୍ଦିରତୁ ଅତାର୍

୨୩ ନାସ୍ତିଞ୍ଜାଲେ ଝିଜେରେ ପାର୍‌ତୁମ୍ ଜନମ୍ ଆତି କଡ଼ର୍ ପ୍ରବୁଦି
 ନିୟମତାନ୍ ପବିତ୍ର ଇଜି ଝେଙ୍ଗ୍ ମାର୍,

୨୪ ପ୍ରଭୃତି ନିୟମତାନ୍ ରାସ୍ତିମାନି ଇୟା ମାଟାଦାନ୍ ଖାର୍ ଖାନିଙ୍ଗ୍ ପ୍ରଭୃତି ନିୟମତାନ୍ ସର୍ପେକିନି ଉଣ୍ଡିଙ୍ଗ୍ ମାରି ପ୍ରଭୃତି ନିୟମତା ସାସ୍ତ୍ରଦାନ୍ ରାସ୍ତିମାନି ନିୟମତାନ୍ ରୁଣ୍ଡି ପାରୁଖାପିଲେକାଙ୍ଗ୍ ପୁଜା କିନି ଉଣ୍ଡିଙ୍ଗ୍ ଖାନିଙ୍ଗ୍ ଜିରୁସାଲମତୁ ଅତାର୍ ।

ସିମିୟୋନ୍ ମାରି ହାନା ଜିସୁଙ୍ଗ୍ ସୁଡ଼ତୁର୍

୨୫ ମାରି ସୁଡ଼ତୁ, ଜିରୁସାଲମତୁ ସିମିୟୋନ୍ ଦରତି ଅରେନ୍ ଦାମ୍ ମାରି ସାଦୁ ଲୋକୁ ମାର୍ଆନ୍; ଖାନ୍ ଇସ୍ରାଏଲ୍‌ତି ରକିୟାକିନିଖାନିଙ୍ଗ୍ ସୁଡ଼ଦେଙ୍ଗ୍ କାପ୍‌କିଜି ମାର୍ଆନ୍, ମାରି ପବିତ୍ର ଆମ୍ବା ଖାନିଖାଲେ ମାର୍ହାତ୍ ।

୨୬ ପ୍ରଭୁ କ୍ରିସ୍ତଙ୍ଗ୍ ସୁଡ଼ିକତିଙ୍ଗ୍ ଖାନ୍ ଜେ ସାଏନ୍, ପବିତ୍ର ଆମ୍ବା ଖାନିଙ୍ଗ୍ ଇୟା ମାଟା ଖେର୍ତା ମାର୍ହାତ୍ ।

୨୭ ଖାନ୍ ପବିତ୍ର ଆମ୍ବା ଖେର୍ତି ଇସାବତାନ୍ ମନ୍ଦିରତୁ ଖାତାନ୍, ମାରି କଡ଼ ଜିସୁଦି ବୁବାୟାୟା ଏସ୍ତିଖାଲେ ଖାନି ବିସୟତାନ୍ ଜିହୁଦିରି ନିୟମ ଇସାବତାନ୍ ପାଣି କିନି ଉଣ୍ଡିଙ୍ଗ୍ ଖାନିଙ୍ଗ୍ ମନ୍ଦିର ଲୋଇ ତାତାର୍,

୨୮ ନାସ୍ତିଖାଲେ ସିମିୟୋନ୍ କଡ଼ଦିଙ୍ଗ୍ ଗାତୁ ଆସସି ମାପୁରୁଦିଙ୍ଗ୍ ଦନ୍ୟବାଦ୍ କିଜି ଇହାନ୍,

୨୯ “ଏ ପ୍ରଭୁ, ଇଲେଇ ନିନ୍ନୁ ନିଜେଦି ବାକ୍ୟଦାନ୍
ନିଜେଦି ଗତିମୁରୁଲିଙ୍ଗ୍ ସାନ୍ତିଦାନ୍ ସଣ୍ଡେଙ୍ଗ୍ ସିଜିନି;

୩୦ ଇରିଙ୍ଗ୍ ନା କାଣୁକୁ ନି ରକିୟା ସୁଡ଼ତୁ ମାନାତ୍,

୩୧ ଆମାକା ନିନ୍ନୁ ଖିଜେରି ଲୋକା ଆଗ୍ତି ତିଆର୍ କିତିମାନି ।

୩୨ ମାରି ଅଣଜିହୁଦି ଲୋକା ଉଣ୍ଡିଙ୍ଗ୍ ସଡ଼ ସାରି ତରୁନି ଜାୟ ଆନାନ୍,
ମାରି ମି ଲୋକା ଇସ୍ରାଏଲ୍‌ତି ଗୌରବ୍ ଖାଜା କିତିମାନି ।”

୩୩ ଇସ୍ତି କଡ଼ଦି ବିସୟତାନ୍ ଖେର୍ତିମାନି ଖିଜୁ ମାଟା ଖେନ୍‌ଜି ଖାନି ବୁବାସିଆଇସି କାବାଆତା ସର୍ହାତ୍ ।

୩୪ ମାରି, ସିମିୟୋନ୍ ଖାରିଙ୍ଗ୍ ଆସିର୍ବାଦ୍ କିଜି ଖାନି ଆଇସି ମରିୟମ୍‌ତିଙ୍ଗ୍ ଖେର୍ତାନ୍, “ଇୟା କଡ଼ ଇସ୍ରାଏଲ୍‌ତି ଲୋଇ ନାଣ୍ଡ ଲୋକା ନାସ୍ତୁ ମାରି ନାଣ୍ଡ ଲୋକା ରକିୟା ଉଣ୍ଡିଙ୍ଗ୍ ମାପୁରୁ ମାଣାନ୍ ବାସେଆତା ମାନାନ୍ । ଖାନ୍ ମାପୁରୁମାଣାନ୍ ସିନାଦି ଖାଜା ଆନାନ୍ ।

୩୫ ଏସୋ ଲୋକୁ ଖାନିଙ୍କ ବିରଦ୍ଧ କିଛି ନିଜେଦି ଜିବନ୍ତୁ ଆଡ଼ାକନିମାନି ମାଟେଙ୍କୁ ଝିକୁ ଖେରନାନ୍ । ଦୁକ୍ ନାନି ଉଣ୍ଡି ଦାରାଦି କୁଡ଼ାମ୍ ମି ନିଜେଦି ଜିବନ୍ତିଙ୍କୁ ଗୁଡ଼ନାଡ଼ ।”

୩୬ ମାରି, ଝାଦ୍ ଆସେର୍ କୁଟୁମ୍ବି ପିନ୍ନୁୟେଲଦି ଗାଡ଼ସି । ହାନା ଦରଡି ଅରେଡ୍ ଅସେ ନାଲ୍ଗି ବାର୍ଦ୍ଧେକ୍ତି ତକ୍ତି ମାର୍ଆଡ୍, ଝାଦ୍ ଅରେଡ୍ ବାବବାଦିନି ମାର୍ଆଡ୍ । ପେଡି ଆତାଦ ସାଡ଼ବାର୍ସୁ କନ୍ଲି ଝାଲେ ମାର୍ଲ ଝେନ୍କା ରାଣ୍ଡି ଆତାଡ୍ ।

୩୭ ଝାଦ୍ ମନ୍ଦିରତିଙ୍କୁ ଡିସ୍ସି ସଲ୍ଏଜି ମାର୍ଆଡ୍, ଉପାସ୍ କିଛି ମାରି ଝେଡେନାଡ଼ା ମାପୁରୁମାନୁ ପାର୍ତନା କିଛିମାର୍ଆଡ୍ ।

୩୮ କଡ଼ ଜିସୁ ମନ୍ଦିରତୁ ସିଆଇ ଆନିଝାଲେ ହାନା ଆବେନ୍ ଇଜି ମାପୁରୁଙ୍କୁ ଦନ୍ୟବାଦ୍ ସିତାଡ଼ ମାରି ମାପୁରୁ ଜିରୁସାଲମ୍‌ଡିଙ୍କୁ ରକିୟା କିନାନ୍ ଇଜି ଏମେକାର୍ ବିସ୍ସବାସ୍ କିଛି କାପୁକିଜି ମାର୍ଆଡ୍ ଆୟା ଝିଜେରିଙ୍କୁ କଡ଼ଦି ବିସ୍ସତାନ୍ ଝେରଡାଡ଼ ।

ଜୋସେପ ମାରି ମରିୟମ୍ ନାଜରିତ୍ତୁ ଡେସି ସର୍ଆର୍

୩୯ ☆ଝେନ୍କା ଜୋସେପ୍ ମାରି ମରିୟମ୍ ପ୍ରବୁଦି ନିୟମତାନ୍ ଝିକୁ ପାଣି ଝିସ୍ତାର୍ ଗାଲିଲିଦୁ, ଝାର୍ ନିଜେଦି ଗାଡ଼ଡି ନାଜରିତ୍ତୁ ଡେସି ସର୍ହାର୍ ।

୪୦ ମାରି, କଡ଼ ଦିରେ ଦିରେ ପିରଦେଙ୍କୁ ଆସ୍ତାନ୍ ମାରି ବୁଦିଦାନ୍ବା ପିରଜି ସାକ୍ତି ଆତାନ୍, ମାରି ମାପୁରୁଦି ଆସିର୍ବାଦ୍ ଝାନି ମୁସ୍କୁ ମାର୍ହାଡ଼ ।

ମନ୍ଦିରତୁ କଡ଼ ଜିସୁ

୪୧ ଜିସୁଦି ବୁବାୟାୟା ଝିକୁ ବାର୍ଦ୍ଧେକ୍ ନିସ୍ତାର୍ ପଣ୍ଡୟ ସମୟତୁ ଜିରୁସାଲମ୍‌ଡୁ ସଲ୍ସି ମାର୍ଆଡ୍ ।

୪୨ ଜିସୁଙ୍କୁ ବାର ବାର୍ଦ୍ଧେକ୍ ଆଡିଝାଲେ ଝାର୍ ଝାରି ରିତିଦାନ୍ ଜିରୁସାଲମ୍‌ଡୁ ପଣ୍ଡୟକିଦେଙ୍କୁ ସର୍ଆର୍ ।

୪୩ ମାରି ପଣ୍ଡୟତି ଦିନ୍ ଝିସ୍ତାରୁରୋ ଏସ୍ତ୍ରିଝାଲେ ଝାର୍ ଡେସିସଲ୍ସିମାର୍ଆଡ୍, ନାସ୍ତ୍ରିଝାଲେ କଡ଼ ଜିସୁ ଜିରୁସାଲମ୍‌ଡୁ ତେବାତାନ୍, ମାରି ଝାନି ବୁବାୟାୟା ଆକା ନେସ୍ତେଙ୍କୁ ଆଡ଼ଏତାର୍ ।

୪୪ ମାତର ଜିସୁ ସଙ୍ଗ ଲୋକାଞ୍ଚାଲେ ଅରସେ ମାନାନ୍ ଇଜି ଅତ୍ତବିତାର ଖାର ଅରନେଟି ସାରି ସର୍ଆର, ମାରି ଇଣ୍ଡାଣି ଲୋକାମାନୁ ମାରି ନେସତି ଲୋକାମାନୁ ଜିସୁଙ୍କୁ ପଇଜି ଅତାର,

୪୫ ମାରି ଜିସୁଙ୍କୁ ପଏତାରନୋ ପଇଜି ପଇଜି ଜିରୁସାଲମତୁ ମାରିଡେସି ସର୍ଆର ।

୪୬ ମୁନେଟି ଝେନ୍‌କା ଖାର ଜିସୁଙ୍କୁ ମନ୍ଦିରତୁ ପଇତାର; ଖାନ୍ ଦାମ୍‌ଗୁରୁରି ଖାଲେ ବାସତାନନୋ ଖାରି ମାଟା ଝେନ୍‌ଜି ମାର୍‌ଆନ୍ ମାରି ଖାରିଙ୍ଗ ପ୍ରମ୍ମ ଝେନ୍‌ବାଜି ମାର୍‌ଆନ୍ ।

୪୭ ମାରି ଏସଲୋକ୍ ଖାନ୍ ମାଟା ଝେନ୍‌ଜି ମାର୍‌ଆର, ଝିଜେରେ ଖାନ୍ ବୁଦିଦିଙ୍ଗ ମାରି ମାଟାଦିଙ୍ଗ କାବାଆଜି ମାର୍‌ଆର ।

୪୮ ଜୋସେପ ମାରି ମରିୟମ୍ ଜିସୁଙ୍କୁ ସୁଡ଼ୁଜି କାବା ଆତାର, ମାରି ଖାନ୍ ଆଇସି ଖାନ୍‌ଙ୍ଗ ଇର୍ହାଡ଼, “ଏ କଡ଼, ମା ଉଣ୍ଡିଙ୍ଗ ଏନ୍‌ ଇୟାଞ୍ଜା କିତି ? ସୁଡ଼ୁଆ, ମି ବୁବା ମାରି ନାନ୍ ନାଣ୍ ସିନ୍ତା କିଜି ନିଙ୍ଗ ପଇଜିନାପ ।”

୪୯ ଆବେନ୍ ଜିସୁ ଖାରିଙ୍ଗ ଇର୍ହାନ୍, “ଏନ୍‌ ମିର୍ ନାଙ୍ଗ ପଇଜି ମାହ ଦେର୍ ? ନା ବୁବାଦି ଇଣ୍ଡା ମାଣ୍ଡେଙ୍ଗ ଯେ ନାଙ୍ଗ ଅଦିକାର ମାନାଡ଼, ଇକା ଇନିକା ମିର୍ ନେସ୍‌ଇ ମାହ ଦେର୍ ?”

୫୦ ମାତର ଖାନ୍ ଖାରିଙ୍ଗ ଏମେ ମାଟା ଝେର୍‌ତାନ୍, ଆକା ଖାର ବୁଜାଦେଙ୍ଗ ଆର୍‌ଏତାର ।

୫୧ ଝେନ୍‌କା ଜିସୁ ଖାରିଞ୍ଚାଲେ ଡେସି ନାଜରିତଦୁ ଖାତାନ୍ ମାରି ଖାନ୍ ଖାରି ଝିଜୁ ମାଟା ମାନାତାନ୍; ମାରି, ଖାନ୍ ଆଇସି ଇୟାଞ୍ଜିଜୁ ମାଟା ନିଜେଦି ମାନ୍ ଲୋଇ ଇଡ଼ଜି ସିନ୍ତା କିତାଡ଼ ।

୫୨ ମାରି, ଜିସୁ ବୁଦିଦୁ ମାରି ମେନ୍‌ଲତୁ, ମାରି ମାପୁରୁମାନୁ ମାରି ଲୋକା ଦୟାଦାନ୍ ପିର୍‌ଦେଙ୍ଗ ଆସତାନ୍ ।

୩

ଡୁବନ୍‌ସିନି ଯୋହନତି ପ୍ରଚାର

(ମାତିଡ ୩:୧-୧୨; ମାର୍କ ୧:୧-୮; ଜୋହନ ୧:୧୯-୨୮)

୧ ଡିବିରିୟା କାଇସର୍‌ଦି ସାସନ୍‌କିଜି ମାର୍‌ଇ ଖାଲେରି ପନ୍‌ର ବାର୍‌ସେକ୍‌ତି ମାଟା, ଏସ୍ତିଞ୍ଚାଲେ ସାସନ୍‌କିଜି ପନ୍ତିୟ ପିଲାଡ଼ ଜିହୁଦା

ଦେସକୁ ପେରିରାଜା ମାର୍ଥାନ୍ ମାରି ହେରୋଦ ଗାଲିଲିଦି ପେରିରାଜା, ମାରି ୱାନି ତଡ଼ାନ୍ ପିଲିପ୍ପ ଇଡୁରିୟା ମାରି ଡ୍ରାକନିଦି ଦେସକୁ ପେରିରାଜା ମାର୍ଥାନ୍, ମାରି ଲୁସାନିୟା ଅବିଲିନି ଦେସକୁ ପେରିରାଜା ମାର୍ଥାନ୍ ।

୨ ମାରି ହାନାନ ମାରି କୟାପା ଝିଜେରିଙ୍ଗପେରି ଜାଜକର୍ ମାର୍ଥାନ୍, ନାସିଝାଲେ ମାପୁରୁଦି ବାକ୍ୟ ସୁନ୍ସାନ୍ ବାଡ଼ିବୁ ଜିକରିୟଦି ମାରିସି ଜୋହନ ଲାକ୍ତୁ ଇଗା ଝାତାଡ଼ ।

୩ ଆବେଟ୍ ଡୁବନ୍ ସିନି ଜୋହନ ଜର୍ଦନ ଗାତାଦି ଲାକ୍ତୁରି ଝିଜୁ ରାଜିତରିଶୁ ସଲ୍ସି, “ପାପ୍ତାନ୍ ମନ୍ତିଙ୍ଗ୍ ଡେପ୍ସି ଡୁବନ୍ଅଡୁ ଇଜି ଝେର୍ଡେଙ୍ଗ୍ ଆସ୍ତାନ୍,”

୪ ଏଣେସ୍ ଜିସାଇୟ ବାବବାଦିଦି ସାସ୍ତୁ ରସ୍ତାମାନତା,
“ସିମ୍ରାବାଡିବୁ ନାଶ୍ ଆଉଲିଆଜିମାନି ଅରେନ୍‌ଝାନି ବଲ୍,
ପ୍ରବୁଦି ସାରି ତିଆର୍ କିବୁ,

ଝାନି ସାରି ସାଡ଼କୁ କିବୁ;

୫ ଝିଜୁ ରିଆଙ୍ଗିଦି ଗରନ୍ତି ଗୁଟାଦି ବାଡ଼ିବୁ ବର୍ତ୍ କିଆନାଡ଼,
ମାରି ଝିଜୁ ପେରି ଗରକ୍ ମାରି ଇସି ଗରକ୍ ସାର୍ଦିନେ,
ବାକୁଲି ସାରିଝିଜୁ ସାଡ଼କୁ ଆନାଡ଼,
ମାରି ଗୁଟାଟେମୁଦି ବୁମି ସାର୍ଦିଜି ସାରିଦି ଝାଜା ଆନାଡ଼;

୬ ମାରି, ଝିଜୁ ଲୋକୁ ମାପୁରୁଦି ରକିୟା ସୁଡ଼ନୁଟ୍ ।”

୭ ☆ମାରି, ଝାନିମାନୁ ଡୁବନ୍ ଅଡେଙ୍ଗ୍ ଇଜି ସସି ଝାଜିମାନି ଝିଜୁଲୋକାଙ୍ଗ୍ ସୁଡ଼କୁ ଇରୁଆନ୍, “ଏ ବିସ୍ମାନି ସାରାସ୍ତି କୁଟୁମ୍, ମାପୁରୁଦି ଝାଜିମାନି ରିସାଦାନ୍ ଉର୍କୁଡେଙ୍ଗ୍ ଇଜି ଏନ୍ ମିଙ୍ଗ୍ ଝେର୍ଡାନ୍ ?

୮ ☆ମିର୍ ପୁରା ଜିବନ୍ତିଙ୍ଗ୍ ସଡ଼ତାନ୍ ପାପ୍ ପାଣିଦାନ୍ ମନ୍ ଡେପ୍ତି ମାନିଦେର୍, ଇକା ମି ନେଗି ପାଣିଦାନ୍ ତରୁଡ଼; ମାରି, ଅବ୍ରାହାମ ମା ବୁବା, ମୋନ୍‌ଡୁ ମୋନ୍‌ଡୁ ବା ଇୟାଝାଜା ଇନ୍‌ମାଟ୍; ଇରିଙ୍ଗ୍ ନାନ୍ ତୋ ମିଙ୍ଗ୍ ଇଜିନା, ମାପୁରୁ ଇୟା କାଲ୍‌କାଣକୁ ବା ଅବ୍ରାହାମତି କୁଟୁମ୍ ତିଆରକିଦେଙ୍ଗ୍ ଆବ୍‌ନାନ୍ ।

୯ ☆ମାରି, ମାରାକା ମଦଲ୍‌କୁ କାଡ଼ଡେଙ୍ଗ୍ ଇଜି ପାଡ଼ିସି ତିଆରକିତା

ଇଡ଼ାମାନାର; ମାରି, ଏମେ ମାରାନ୍ ନେଗି ପଲ୍ ଆସ୍‌ଏଡ଼, ଆୟାଞ୍ଜିନ୍ନୁ ମାରାକାଙ୍ଗ କାଡ଼ନାର ରୋ ସିସୁଦୁ ପୋକ୍ନାର ।”

୧୦ ଆବେଟ୍ ଲୋକ୍ ଝିଜେରେ ଝାନିଙ୍ଗ୍ ଝେନ୍‌ବାତାର, “ଆରିଙ୍ଗ୍ ମାପ୍ ଇନିକା କିନାପ୍ ?”

୧୧ ଜୋହନ ଝାରିଙ୍ଗ୍ ଇରୁଆନ୍, “ଆମାଝାନିଙ୍ଗ୍ ରୁଣ୍ଡି ଆଙ୍ଗ୍‌ଙ୍ଗ୍ ମାନେ, ଝାନ୍ ଆମାଝାନିଙ୍ଗ୍ ଇନିକା ସିଲେଟ୍, ଝାନିଙ୍ଗ୍ ଉଣ୍ଡି ସିପିନ୍ ମାରି ଆମାଝାନିଙ୍ଗ୍ କାଦି ମାନାଡ଼, ଝାନ୍ ଆଇଝାନିଙ୍ଗ୍ ଆବେ ମସାକିପିନ୍ ।”

୧୨ ☆ମାରି ଏସ ସିସୁଟୁ ଲୋସ୍‌ନିକାର୍ ବା ତୁବନ୍ ଅଡେଙ୍ଗ୍ ଇଜି ଝାତିକାର୍ ଝାନିଙ୍ଗ୍ ଝେନ୍‌ବାତାର, “ଏ ଗୁରୁ, ମାପ୍ ଇନିକା କିନାପ୍ ?”

୧୩ ମାରି ଜୋହନ ଝାରିଙ୍ଗ୍ ଝେରୁତାନ୍, “ମି ଉଣ୍ଡିଙ୍ଗ୍ ଏସୋ ଲୋସ୍‌ନି ନିୟମ୍ ମାନାଡ଼ ନାସ ଲୋସ୍‌ତୁ, ତାନି ବାଦୁଲ୍ ନାଣ୍ଡ ଲସ୍‌ମାଟ୍ ।”

୧୪ ସନ୍‌ୟର୍ ବା ଜୋହନତିଙ୍ଗ୍ ଝେନ୍‌ବାତାର, “ମାରି ମାପ୍ ଇନିକା କିନାପ୍ ?”

ଝାନ୍ ଝାରିଙ୍ଗ୍ ଝେରୁତାନ୍, “ସାକ୍ତିଦାନ୍ ନି ସାଲାକିଦାନ୍ ଏ ଦନ୍ ରେଲ୍‌ଜ ଅମାଟ୍, ମାରି ମି ଦରମା ତାବୁଙ୍ଗ୍ ଏସ ପଇଜିନିଦେର୍ ନାସଦାନ୍ ଝେଡ଼ିକା ମାଣ୍ଡୁ ।”

୧୫ ଝିନ୍ନୁ ଲୋକୁ କାପ୍‌କିଜି ମାର୍‌ଆର୍‌ଆକା, ଜୋହନ ଏମୋ କ୍ରିସ୍‌ ଆନାନ୍, ଇକା ଜୋହନତି ବିସ୍‌ୟତାନ୍ ଝିଜେରେ ନିଜେ ନିଜେଦି ମୋନ୍‌ତୁ ଅଡ଼୍‌ବିଜି ମାର୍‌ଆର୍ ।

୧୬ ଆୟାଉଣ୍ଡିଙ୍ଗ୍ ଜୋହନ ଝିଜେରିଙ୍ଗ୍ ଇରୁଆନ୍, “ନାନ୍ ତୋ ମିଙ୍ଗ୍‌ ଏରୁତୁ ତୁବନ୍ ସିଜିନା, ମାତର୍ ନା ମାଣ୍ଡନା ଏନ୍ ପେରିକାନ୍, ଝାନ୍ ଝାଜିନାନ୍, ଝାନି ଜୁଡେଙ୍ଗ୍‌ତି ଗାଟି କୁଡ଼ଡେଙ୍ଗ୍ ବା ନାନ୍ ଜର୍ ସିଲେ; ଝାନ୍ ମିଙ୍ଗ୍‌ ପବିତ୍ର ଆମାଦୁ ମାରି ସିସୁଦୁ ତୁବନ୍ ସିନାନ୍ ।

୧୭ ଝାନି କିୟୁଦୁ ସେରିଇ ମାନାଡ଼, ଆବେଟ୍ ଝାନ୍ କାଡ଼ାତୁମାନି କୁଲିଙ୍ଗ୍ ଟୁଟ୍‌ନାନ୍ ମାରି ନିଜେଦି କଲ୍‌କିଦୁ ଉଣ୍ଡାକିନାନ୍ ମାରି କୁଲିଙ୍ଗ୍ ପଟ୍ଟ ଏସକାଙ୍ଗ୍ ନାମ୍‌ଇ ସିସୁଦୁ ଆଡ଼ାକ୍‌ନା ପୋକ୍‌ନାନ୍ ।”

୧୮ ଜୋହନ ଇୟାଞ୍ଜା ନାଣ୍ଟ ମାଟା ଝେରସି, ମାରି ରକମ୍ ରକମ୍ତି ଝେଡ଼ିକାଦି ବାକ୍ୟ ଇଜି ଲୋକା ଲାକ୍ତୁ ନେଗିକାବୁର୍ ଝେରତାନ୍ ମାରି ମନ୍ ଡେପ୍‌ଡେଙ୍ଗ୍ ଲୋକାଙ୍ଗ୍ ବୁଜାକିତାନ୍;

୧୯ ☆ମାତର୍ ଜୋହନ ରାଜା ହେରୋଦତିଙ୍ଗ୍ ଆର୍‌ଝାଦାନ୍ ଇଜିମାର୍‌ଆନ୍ ଇରିଙ୍ଗ୍ ଖାନ୍ ଖାନି ତଡ଼ାନ୍ତି ଆଡ଼ସିଙ୍ଗ୍ ହେରୋଦିଆଦିଙ୍ଗ୍ ପେଡ଼ି ଆତାମାର୍‌ଆନ୍ ମାରି ନାଣ୍ଟ ତାଗିଇ ପାଣି କିତାମାର୍‌ଆନ୍ ।

୨୦ ଆୟାଞ୍ଜା ହେରୋଦ ଜୋହନତିଙ୍ଗ୍ ଜଇଲ୍‌ତୁ ଇଟ୍‌ଟାନ୍‌ନୋ ନିଜେଦି ଝିଜୁ ତାଗିଇ ପାଣିଦି ଖାଲେ ଇକାବା ମିସାକିତାନ୍ ।

ଜୋହନ ଜିସୁଙ୍ଗ୍‌ ଡୁବନ୍ ସିତାନ୍

(ମାତିଉ ୩:୧୩-୧୭; ମାର୍କ ୧:୯-୧୧)

୨୧ ଝିଜୁ ଲୋକୁ ଡୁବନ୍ ଅତି ଝେନ୍‌କା ଜିସୁ ବା ଡୁବନ୍ ଅତାନ୍ । ମାରି ଖାନ୍ ପାରତନା କିନିଞ୍ଜାଲେ ବାଦଡ଼ ରେଆତାଡ଼,

୨୨ ☆ମାରି ପବିତ୍ର ଆମ୍ବା ପାର୍‌ଝାଦି ଖାଜା ଖାନି ମେନ୍‌ଲ୍ ମୁସ୍‌କୁ ଖାଜି ବାସ୍‌ତାଡ଼; ମାରି, ବାଦଡ଼ତାନ୍ ଇୟା ବଲ୍ ଖାତାଡ଼, “ନିନ୍‌ ନା ଲାଡ଼ତି ମାରିନ୍, ନିବାନ୍‌ ନାନ୍ ନାଣ୍ଟ ଝେଡ଼ିକା ।”

ଜିସୁଦି କୁଟୁମ୍

(ମାତିଉ ୧:୧-୧୭)

୨୩ ଜିସୁ ପାଣି ଆରାମ୍ କିତି ସମୟତୁ ଖାନିଙ୍ଗ୍ ପୁରା ତିରିସ୍ ବାର୍‌ସେକ୍ ଆତାମାର୍‌ଆଡ଼; ଲୋକୁ ଅଡ଼ବିନି ଇସାବ୍‌ତାନ୍ ଜିସୁ ଜୋସେପତି ମାରିନ୍, ଜୋସେପ ଏଲିତି ମାରିନ୍,

୨୪ ଏଲି ମଡ଼ତାତତି ମାରିନ୍; ମଡ଼ତାତ ଲେବିତି ମାରିନ୍, ଲେବି ମଲ୍‌କିତି ମାରିନ୍, ମଲ୍‌କି ଜନୟତି ମାରିନ୍, ଜନୟ ଜୋସେପ୍‌ତି ମାରିନ୍,

୨୫ ଜୋସେପ ମତିତ୍ୟାତି ମାରିନ୍, ମତିତ୍ୟା ଆମୋସତି ମାରିନ୍, ଆମୋସ ନାହୁମତି ମାରିନ୍, ନାହୁମ ହେଲ୍‌ସିତି ମାରିନ୍, ହେଲ୍‌ସି ନଗୟତି ମାରିନ୍,

☆ ୩:୧୯ ମାତିଉ ୧୪:୩,୪; ମାର୍କ ୬:୧୭,୧୮. ☆ ୩:୨୨ ମାତିଉ ୩:୧୭; ମାର୍କ ୧:୧୧; ଲୁକ ୯:୩୫.

୨୬ ନାଗାୟି ମହତତି ମାରିନ୍, ମହତ ମତିତ୍ୟାତି ମାରିନ୍, ମତିତ୍ୟା ସିମିୟତି ମାରିନ୍, ସିମିୟ ଜୋସେକତି ମାରିନ୍, ଜୋସେକ ଜୋଦାତି ମାରିନ୍,

୨୭ ଜୋଦା ଜୋହନତି ମାରିନ୍, ଜୋହନ ରେସାଦି ମାରିନ୍, ରେସା ଜିରୁବ୍ବାବେଲତି ମାରିନ୍, ଜିରୁବ୍ବାବେଲ ସଲ୍ତିୟେଲତି ମାରିନ୍, ସଲ୍ତିୟେଲ ନେରିଦି ମାରିନ୍,

୨୮ ନେରି ମଲ୍କିଦି ମାରିନ୍, ମଲ୍କି ଅଦିଦି ମାରିନ୍, ଅଦି କୋସାମତି ମାରିନ୍, କୋସାମ ଏଲମ୍ବାନତି ମାରିନ୍, ଏଲମ୍ବାନ ଏରଦି ମାରିନ୍,

୨୯ ଏର ଜିହୋସୁୟଦି ମାରିନ୍, ଜିହୋସୁୟ ଏଲିୟେଜରତି ମାରିନ୍, ଏଲିୟେଜର ଜୋରିମତି ମାରିନ୍, ଜୋରିମ ମତ୍ତାତଦି ମାରିନ୍, ମତ୍ତାତ ଲେବିତି ମାରିନ୍,

୩୦ ଲେବି ସିମିୟୋନତି ମାରିନ୍, ସିମିୟୋନ ଜିହୁଦାଦି ମାରିନ୍, ଜିହୁଦା ଜୋସେପ୍ତି ମାରିନ୍, ଜୋସେପ୍ ଜୋନାମତି ମାରିନ୍, ଜୋନାମ ଏଲିୟାକିମତି ମାରିନ୍,

୩୧ ଏଲିୟାକିମ ମଲାହତି ମାରିନ୍, ମଲାହ ମନାଦି ମାରିନ୍, ମନା ମତତାତି ମାରିନ୍, ମତତା ନାତନତି ମାରିନ୍, ନାତନ୍ ଦାଉଦଦି ମାରିନ୍,

୩୨ ଦାଉଦ ଜେସିଦି ମାରିନ୍, ଜସିୟ ଅବେଦତି ମାରିନ୍, ଅବେଦ ବୟଜତି ମାରିନ୍, ବୟଜ ସେଲହଦି ମାରିନ୍, ସେଲହ ନହସନଦି ମାରିନ୍,

୩୩ ନହସନ ଅମିନାଦବତି ମାରିନ୍, ଅମିନାଦବ ଅଦମିନଦି ମାରିନ୍, ଅଦମିନ ଅର୍ଣ୍ଣୁଦି ମାରିନ୍, ଅର୍ଣ୍ଣୁ ହେସ୍ରଣତି ମାରିନ୍, ହେସ୍ରଣ ପେରସତି ମାରିନ୍, ପେରସ ଜିହୁଦାତି ମାରିନ୍,

୩୪ ଜିହୁଦା ଜାକୁବଦି ମାରିନ୍, ଜାକୁବ ଇସ୍ହାକ୍ତି ମାରିନ୍, ଇସ୍ହାକ୍ ଅବ୍ରାହାମତି ମାରିନ୍, ଅବ୍ରାହାମ ତେରହଦି ମାରିନ୍, ତେରହ ନାହରଦି ମାରିନ୍,

୩୫ ନାହର ସରୁଗଦି ମାରିନ୍, ସରୁଗ ରଗୁଦି ମାରିନ୍, ରଗୁ ପେଲଗତି ମାରିନ୍, ପେଲଗ ଏବରତି ମାରିନ୍, ଏବର ସେଲହତି ମାରିନ୍,

୩୬ ସେଲହ କେନାନତି ମାରିନ୍, କିନାନ୍ ଅରପକେଦତି ମାରିନ୍,

ଅରପକେଦ ସେମନ୍ତି ମାରିନ୍, ସେମ ନହତି ମାରିନ୍, ନୋହ
ଲେମକତି ମାରିନ୍,

୩୭ ଲେମକ ମିତୁସେଲହତି ମାରିନ୍, ମିତୁସେଲହ ହନୋକଦି
ମାରିନ୍, ହନକ ଜେରଦତି ମାରିନ୍, ଜେରଦ ମହଲଲେଲତି ମାରିନ୍,
ମହଲଲେଲ କେନାନତି ମାରିନ୍,

୩୮ କିନାନ୍ ଏନସତି ମାରିନ୍, ଏନସ ସେତତି ମାରିନ୍, ସେତ
ଆଦମ୍ତି ମାରିନ୍, ଆଦମ୍ ମାପୁରୁଦି ମାରିନ୍ ।

୪

ଜିସୁଙ୍କୁ ସୟତାନ୍ ପରିକା କିତାଡ଼

(ମାତିଉ ୪:୧-୧୧; ମାର୍କ ୧:୧୨-୧୩)

୧ ଜିସୁ ପବିତ୍ର ଆମ୍ବାଦୁ ପୁରା ମାନଜି ଜର୍ଦ୍ଦନ୍ ଗାଡ଼ତାନ୍ ଡେସି
ଝାତାନ୍ ମାରି ପବିତ୍ର ଆମ୍ବା ଝେରତି ଇସାବ୍ତାନ୍ ସିମ୍ବା ବାଡ଼ିତୁ
ସରଥାନ୍ ମାରି ସାଲିସ୍ ଦିନ୍ ସାନ୍ ସୟତାନ୍ ଝାନିଙ୍ଗ୍ ପରିକା
କିଜିମାରଥାଡ଼ ।

୨ ଆବେନ୍ ଝାନ୍ ସୟତାନ୍ ମାଣାନ୍ ସାଲିସ୍ ଦିନ୍ ସାନ୍ ପରିକା
କିଆୟ ଆତାନ୍ । ଆୟାଝିଜୁ ଦିନ୍ତୁ ଝାନ୍ ଇନିକା ବା ଉଣୁଏଣଗା
ତିନ୍ଏଣଗା ମାରଥାନ୍, ମାରି ଆୟାଝିଜୁ ନାଣ୍ଡିଙ୍ଗ୍ ଝିଜିତି ଝେନ୍କା, ଜିସୁ
ନାଣ୍ଡି ବାଙ୍ଗାଁ ସାତାନ୍ ।

୩ ଆବେଟ୍ ସୟତାନ୍ ଜିସୁଙ୍କୁ ଇର୍ହାଡ଼, “ନିନ୍ ଜଦି ମାପୁରୁଦି ମାରିନ୍,
ତୋ ଇୟା କାଲୁଦିଙ୍ଗ୍ ରୁଟି ଆଦେଙ୍ଗ୍ ଆଦେସ୍ ସିଆ ।”

୪ ଜିସୁ ତାନିଙ୍ଗ୍ ଇର୍ଥାନ୍, “ଦାମ୍ବୁସାସ୍ତ୍ରୁ ରାସାତାମାନାଡ଼, ଲୋକୁ
ଆବ୍‌କା ରୁଟିଦାନ୍ ଜିଏନ୍ ।”

୫ ମାରି, ସୟତାନ୍ ଝାନିଙ୍ଗ୍ ଉନ୍‌ଶ୍ଟି, ନିରଇ ଗରନ୍ତି ଟିପୁଡୁ
ଅତାଦୋ ସାଣେକ୍‌ତିଙ୍ଗ୍ ସାରାଦୁନିଆଦି ଝିଜୁ ରାଜିଙ୍ଗ୍ ଝାନିଙ୍ଗ୍
ଡରତାଡ଼ ।

୬ ମାରି, ସୟତାନ୍ ଝାନିଙ୍ଗ୍ ଇର୍ହାଡ଼, “ନାନ୍ ନିଙ୍ଗ୍ ଆୟାଝିଜୁଦି
ଅଦିକାର୍ ସିନା ମାରି ଦନ୍ ସିନା, ଇରିଙ୍ଗ୍ ଇୟାଝିଜୁ ନାଙ୍ଗ୍ ଆକା
ସର୍ପେଆତା ମାନାଡ଼, ମାରି ନାନ୍ ଏଙ୍ଗ୍ ବଦା କିନା, ଝାନିଙ୍ଗ୍ ଆକା ସିନା
।

୭ ମାରି, ନିନ୍ ମେଣ୍ଟେଙ୍ଗ୍ ଗଟକିଜି ନାଙ୍ଗ୍ ମାଡ଼ିସକିନି, ଆଦେଙ୍ଗ୍ ଇୟାଞ୍ଜିନ୍ ନିଦି ଆନାଡ଼ ।”

୮ ଜିସୁ ଇର୍ହାନ୍, “ଦାମ୍ବୁସାସ୍ତ୍ରୁ ରାସାତାମାନାଡ଼, କେବଲ୍ ନି ପ୍ରବୁ ମାପୁରୁଙ୍ଗ୍ ମାଡ଼ିସ କିଆ ମାରି ଖାନି ସେବା କିଆ ।”

୯ ମାରି, ଖାନ୍ ଖାନିଙ୍ଗ୍ ଜିରୁସାଲମାତୁ ଅତାଦୋ ମନ୍ଦିରତି ସାଡ଼ ମୁସକୁରି ଟିପୁଦୁ ନିଲ୍ପସକିଜି ଖାନିଙ୍ଗ୍ ଖେରଡ଼ାଡ଼, “ନିନ୍ ଜଦି ମାପୁରୁଦି ମାରିନ୍, ଆତିଙ୍ଗ୍ ଇବେଣ୍ଟକୁ ଆଡ଼ଗି ଗାଡ଼ଆ ।

୧୦ ଇରିଙ୍ଗ୍ ଦାମ୍ବୁସାସ୍ତ୍ରୁ ରାସାତାମାନାଡ଼, ନିଙ୍ଗ୍ ଜିପିସ୍ କିଦେଙ୍ଗ୍ ମାପୁରୁ ନି ସାକା ଅତେଙ୍ଗ୍ ମୁସକୁପୁରତି ଦୁଡ଼କାଙ୍ଗ୍ ଆଦେସ୍ ସିନାନ୍ ।

୧୧ ମାରିବା ରାସାତା ମାନାଡ଼, ଏସ୍ତ୍ରୁଖାଲେ ନି ପାଦାମ୍ କାଲୁଦୁ ଆଟନାଡ଼, ଇୟାଉଣ୍ଟିଙ୍ଗ୍ ଖାକ୍ ନିଙ୍ଗ୍ କିକାଣ୍ଟକୁ ପେରଜିଆସ୍ନେ ।”

୧୨ ମାରି, ଜିସୁ ତାନିଙ୍ଗ୍ ଇର୍ଆନ୍, “ଦାମ୍ବୁସାସ୍ତ୍ରୁ ରାସାତାମାନାଡ଼, ନିନ୍ ପ୍ରବୁ ନିଜେଦି ମାପୁରୁଙ୍ଗ୍ ପରିକା କିମା ।”

୧୩ ଜିସୁଙ୍ଗ୍ ସୟତାନ୍ ଓଜୁଜାତିଦି ପରିକା ଓସ୍ତି ଖେନ୍କା ଏସ୍ ବେଡ଼ା ସାନ୍ ଖାନିଙ୍ଗ୍ ଡ଼ିସ୍ତା ସର୍ହାଡ଼ ।

ଜିସୁଦି ସେବାକିନିପାଣି ଆରାମ୍

(ମାତିଉ ୪:୧୨-୧୭; ମାର୍କ ୧:୧୪-୧୫)

୧୪ ତାନେ ଖେନ୍କା ଜିସୁ ପବିତ୍ର ଆମ୍ବାଦି ସାକ୍ତିଦାନ୍ ଗାଲିଲିଦୁ ଡେସିସର୍ହାନ୍, ମାରି ଗାଲିଲି ସାରିବେଡ଼ିତିଦି ଓଜୁ ରାଜିଦୁ ଖାନି ବିସୟତାନ୍ କାବୁର୍ ଖେଙ୍ଗ୍ ତାନ୍ ।

୧୫ ମାରି, ଜିସୁ ଖାରି ପାରତନାକିନି ଇଲ୍‌କାଙ୍ଗ୍ ସିକିୟା ସିଜି ଓଜେରି ମାଣାନ୍ ଦନ୍ୟବାଦ୍ ପଇଦେଙ୍ଗ୍ ଆସ୍ତାନ୍ ।

ଜିସୁଙ୍ଗ୍ ନାଜରିତ୍ତୁ ମାନାଏତାର୍

(ମାତିଉ ୧୩:୫୩-୫୮; ମାର୍କ ୬:୧-୬)

୧୬ ଜିସୁ ଏମେ ନାଜରିତ ଗାଡ଼ତୁ ପରିତା ମାହାନ୍, ଆୟା ବାଡ଼ିଦୁ ଆୟା ଦାପ୍ରେ ସର୍ଆନ୍ ମାରି ନିଜେଦି ରିତିଦାନ୍ ରମ୍‌ନିନାଣ୍ଟିଙ୍ଗ୍ ପାରତନା କିନି ଇଲୁଦୁ ଓରୁତାନ୍, ମାରି ସାସ୍ତ୍ର ପଡ଼ାଦେଙ୍ଗ୍ ନିର୍ଆନ୍ ।

୧୭ ନାସ୍ତିସ୍ତାଲେ ଜିସାଇୟ ବାବବାଦିରି ବଇ ଖାନିଙ୍ଗ୍ ସିତାର, ମାରି
ଖାନ ଆକା କୁଡ଼ତାନ, ଏମେ ଜାଗାଦୁ ଇୟା ବାକ୍ୟ ରାସ୍ତା ମାର୍ଥାତ୍,
ଆକା ପଇତାନ,

୧୮ ପ୍ରବୁଦି ଆମ୍ବା ନା ମାନୁ ମାନାତ୍,

“ଇରିଙ୍ଗ୍ କାକୁତ ଲୋକା ଲାକ୍ତୁ ନେଗିକାବୁର୍ ଖେର୍ନି
ଉଣ୍ଡିଙ୍ଗ୍ ମାପୁରୁ ନାଙ୍ଗ୍ ଆସକିତାମାନାନ୍,
ଜଇଲୁତୁ ମାନିକାର ମୁକ୍ତାନାର ମାରି
କାଶାରି ଲାକ୍ତୁ ସୁଡ଼ନ୍ତି ବିସୟତିଙ୍ଗ୍ ଖେର୍ତେଙ୍ଗ୍,
ମାରି ଦୁଃକୁକାସୁ ପଇତି ଲୋକାଙ୍ଗ୍ ମୁକ୍ତା କିଦେଙ୍ଗ୍,

୧୯ ମାରି ପ୍ରବୁ ଖାନି ଲୋକାଙ୍ଗ୍ ରକିୟା କିନି ସମୟ ଜେ ଇଗା
ଖାତାମାନାତ୍ ଇକା ଖେର୍ତେଙ୍ଗ୍
ଖାନ ନାଙ୍ଗ୍ ପୋକ୍ତାମାନାନ୍ ।”

୨୦ ଖେନକା ଖାନ ବଇ ବୟ କିଜ ସେବାକିନିଖାନିଙ୍ଗ୍ ତେପ୍ପସିସିତାନ୍
ନୋ ବାସତାନ୍, ମାରି ପାର୍ତନା କିନି ଇଲୁଦି ଓଜେରେ ଖାନିଙ୍ଗ୍ ସୁଡ଼୍ତି
ମାର୍ଥାତ୍ ।

୨୧ ମାରି, ଜିସୁ ଖାରିଙ୍ଗ୍ ଖେର୍ତାନ, “ନାନ୍ ବଇଦି ଏମେ ବିସୟ
ଇଲେଇ ପଡ଼ାତା, ଆମାକା ମିର୍ ଖେରିଦେର୍ ଦାମ୍ବୁସାସ୍ତଦି ଇୟା
ବାକ୍ୟ ଇଲେଇ ନେକ୍କା ଆତାତ୍ ।”

୨୨ ମାରି, ଓଜେରେ ଖାନି ବିସୟତାନ୍ ସାକି ସିଦେଙ୍ଗ୍ ଆସ୍ତାର
ମାରି ଖାନି ଖେୟୁଦାନ୍ ଏମେ ନେଗି ମାଟା ସୋସି ମାର୍ଥାତ୍ ଆବେନ୍ତୁ
ଓଜେରେ କାବାତା ସର୍ହାର, ମାରି, ଖାର ଇଣ୍ଡେଙ୍ଗ୍ ଆସ୍ତାର,
“ଇକାନ୍ ଇନିକା ଜୋସେପ୍ତି ମାରିନ୍ ଆଏନ୍ ?”

୨୩ ଆବେଟ୍ ଖାନ ଖାରିଙ୍ଗ୍ ଖେର୍ତାନ, “ମିର୍ ସତେନେ
ନାଙ୍ଗ୍ ଇୟା ପାଡ଼ିଇ ବିସୟତି ବାକ୍ୟ ଇନିଦେର୍, ଏ ତାକ୍ଟର୍,
ଆଗିତି ନିଜେଦିଙ୍ଗ୍ ନେଗେନ୍ କିଆୟଆଆ, ମାରି ବା ଇନିଦେର୍
କପର୍ନାହୁମ୍ତୁ ଏମେ ଏମେକା ଗାତାମାନାତ୍ ଇଜି ମାପ୍
ଖେର୍ଆମାନାପ୍, ଆୟାଓ୍ବୁ ଇୟା ବାଡ଼ିଦୁ ନିଜେଦି ବୁବାୟାୟାଦି
ଗାଡ଼ୁ ବା କିଆ ।”

୨୪ ☆ମାରି ଜିସୁ ଖାରିଙ୍ଗ୍ ଇର୍ହାନ୍, “ନାନ୍ ମିଙ୍ଗ୍ ସଡ଼ ଇଜିନା, ଆମା
ବାବବାଦିଦିଙ୍ଗ୍ ନିଜେଦି ବୁବାୟାୟାଦି ଗାଡ଼ୁ ମାନାଏର୍ ।”

୨୫ ମାତର୍ ନାନ ମିଙ୍ଗଁ ସଡ଼ ଇଜିନା, “ଏଲିୟଦି ସମୟଦୁ ଇସ୍ରାଏଲତୁ ଏସ୍ତ୍ରାଝାଲେ ମୁଣ୍ଡି ବାସେକ୍ ସୋଗୋଟା ଲେଜକୁ ସାନ୍ଦି ବାଦଡ଼ତାନ ପିରୁ ଆଏତାଡ଼ଆକା ଝିନ୍ନୁ ଦେସ୍ତୁ କାଦି ଉଣ୍ଡେଙ୍ଗ୍ ପୁଟ୍‌ଏତାଡ଼, ନାସ୍ତ୍ରାଝାଲେ ଇସ୍ରାଏଲତୁ ନାଣ୍ଡି ରାଣ୍ଡି ଆଇମେକ୍ ମାର୍‌ଏ;

୨୬ ମାତର୍ ମାପୁରୁ ଏଲିୟଙ୍ଗ୍ ଆୟାଝାନିକା ଲାକ୍‌ତୁ ପୋକ୍‌ଏଶଗା କେବଲ୍ ସିଦନ୍ ଦେସ୍ତି ସାରିପଡ଼ତୁମାନି ଅରେଡ଼ ରାଣ୍ଡି ଆଇମାଦି ଲାକ୍‌ତୁ ପୋକ୍‌ତାନ ।

୨୭ ମାରି, ବାବବାଦି ଇଲିସାୟତି ସମୟତୁ ଇସ୍ରାଏଲତୁ ନାଣ୍ଡି କୁସୁରୋଗ୍ ଲୋକୁ; ମାରି ଝାରି ମାଣକୁ ଏନ୍ ନେଗେନ୍ ଆଏର୍, କେବଲ୍ ସୁରିଆ ଦେସ୍ତି ନାମାନ ନେଗେନ୍ ଆତା ମାର୍‌ଆନ୍ ।”

୨୮ ପାର୍‌ତନା ଇଲୁଦୁ ଇୟାଝିନ୍ନୁ ମାଟା ଝେନ୍‌ବୁ ଝେନ୍‌ବୁ ଝିଜେରେ ଲୋକୁ ରିସାଆତାର୍,

୨୯ ମାରି ଝାର୍ ନିଙ୍ଗଁଜି ଝାନିଙ୍ଗ୍ ଆୟା ଗାଡ଼ତାନ ସୋପ୍‌ତାର୍ ମାରି ଝାରି ଗାଡ଼୍‌ଏମେ ଗୋରନ୍ ମୁସ୍‌କୁ ତିଆର୍ ଆତାମାର୍‌ଆଡ଼, ଝାର୍ ଗରନ୍‌ତି ଟିପୁଦାନ୍ ଆଡ଼ଗି ପେଲେକିଦେଙ୍ଗ୍ ଝାନିଙ୍ଗ୍ ଆବେନ୍‌ ଅତାର୍;

୩୦ ମାତର୍ ଝାନ୍ ଝାରି ନାଣ୍ଡିରାନ୍ ସତା ସୋର୍‌ଆନ୍ ।

ଜିସୁ ଦୁବାଆସ୍ତି ଝାନିଙ୍ଗ୍ ନେଗେନ୍ କିତାନ୍

(ମାର୍କ ୧:୨୧-୨୮)

୩୧ ଜିସୁ କପର୍‌ନାହୁମ୍ ଇନି ଗାଲିଲିଦି ଉଣ୍ଡି ଗାଡ଼ତୁ ଝାତାନ୍, ମାରି ରମ୍‌ନିନାଣ୍ଡିଙ୍ଗ୍ ଲୋକାଙ୍ଗ୍ ସିକିୟା ସିଦେଙ୍ଗ୍ ଆସ୍‌ତାନ୍,

୩୨ ☆ମାରି ଝାର୍ ଝାନି ସିକିୟାଦୁ କାବାଆତାର୍, ଇରିଙ୍ଗ୍ ଝାନ୍ ବାକ୍ୟ ଅଦିକାର୍‌ତି ଝାଲେ ମାଟା ଇଜିମାର୍‌ଆନ୍ ।

୩୩ ଅର୍‌ଲେନ୍ ପାର୍‌ତନା ଇଲୁଦୁ ଅରେନ୍ ଦୁବାଆସ୍ତିମାର୍‌ଇ ଲୋକୁ ମାର୍‌ଆନ୍, ଝାନ୍ ପେରି ଝେୟୁଦାନ୍ ଆଉଲିଆତାନ୍,

୩୪ ଏ, ନାଜରିତ୍‌ୟଦି ଜିସୁ, “ମା ଝାଲେ ନି ଇନିକା ମାନ୍‌ତା ? ନିନ୍‌ ନୋ ମାଙ୍ଗଁ ସାପିସ୍ କିଦେଙ୍ଗ୍ ଝାତିମାନି ? ନିନ୍‌ ଏନ୍, ଆକା ନାନ୍ ନେସ୍‌ନା; ନିନ୍‌ ମାପୁରୁଦି ଆୟା ପବିତ୍ର ଲୋକୁ ।”

୩୫ ଜିସୁ ତାନିଙ୍ଗ୍ ଆଦ୍‌ରିସ୍ କିଜି ଇର୍‌ହାନ୍, “ଆଲ୍‌ଜ ମାନ୍‌ଆ, ଝେନିମାଣ୍ଡୁ ସହସି ସାଙ୍ଗ୍‌ଆ ।” ଆବେର୍‌ ଆୟା ଦୁବା ଝାନିଙ୍ଗ୍ ଝିଜେରି

ଆଗିତି ଆରାପ୍ତାଦୋ ଖାନିଙ୍ଗ୍ ଇନିକା କିଏଣ୍‌ଗା ଖାନିମାଣ୍‌କୁ ସତା ସରଆଡ଼ ।

୩୬ ଆବେଟ୍‌କୁ ଝିଜେରେ କାବାତାରୋ ନିଜେ ନିଜେଦିମାନୁ ଇନିଞ୍ଜି ସାତାର୍, “ଇକା ଇନି ମାଟା ? ଖାନ୍ ଅଦିକାର୍ ମାରି ସାକ୍ତିଦାନ୍ ଆଦେସ୍ ସିନାନ୍ ତାଗ୍‌ଇ ଦୁବେଙ୍ଗ୍ ମାରି ଖାକ୍ ସଅନେ ସନେ ।”

୩୭ ଆବେଟ୍ ଜିସୁ ବିସୟତାନ୍ ଇୟା କାବୁର୍ ଝିଜୁତରିଟି ରାଜିଦୁ ଝେଙ୍ଗ୍ ତାଡ଼ ।

ଜିସୁ ନାଣ୍ଟ ଲୋକାଙ୍ଗ୍ ନେଗେଣ୍ଟୁ କିତାନ୍

(ମାତିଉ ୮:୧୪-୧୭; ମାର୍କ ୧:୨୯-୩୪)

୩୮ ଝେନ୍‌କା ଜିସୁ ପାର୍ତନା ଇଲୁଦାନ୍ ନିଙ୍ଗ୍ ଝିସିମୋନକା ଇଣ୍ଟୁ ସୋର୍‌ଆନ୍ । ସିମୋନକା ମିମିସିଙ୍ଗ୍ ନାଣ୍ଟ ନବ୍ ଆତାମାରାଡ଼, ମାରି ଖାର୍ ତାନି ବିସୟତାନ୍ ଖାନିଙ୍ଗ୍ ଝେର୍‌ତାର୍ ।

୩୯ ଆବେଟ୍ ଖାନ୍ ତାନି ଲାକ୍‌ତୁ ନିର୍‌ଆନ୍‌ନୋ ନବ୍‌ତିଙ୍ଗ୍ ଆଦରିସ୍‌ତାନ୍, ମାରି ତାନିଙ୍ଗ୍ ନବ୍ ଡିସ୍‌ତାଡ଼, ମାରି ଖାଦ୍ ଆୟାଦାପେ ନିଙ୍ଗ୍ ଝି ଖାରି ସେବା କିଦେଙ୍ଗ୍ ଆସ୍‌ତାନ୍ ।

୪୦ ଝେଡ଼ା ସନିଖାଲେ, ଏମେଝାରି ଲାକ୍‌ତୁ ଆଇ ଆଇ ରୋଗ୍ ଆସ୍‌ତିମାରଇ ଲୋକୁ ମାର୍‌ଆର୍, ଆୟାଝିଜେରେ ଖାରିଙ୍ଗ୍ ଖାନି ଲାକ୍‌ତୁ ତାତାର୍ ମାରି ଖାନ୍ ଝିଜେରି ମୁସ୍‌କୁ କିୟୁ ଇଡ଼ଜି ଖାରିଙ୍ଗ୍ ନେଗେଣ୍ଟୁ କିତାନ୍ ।

୪୧ ମାରି, ଦୁବେଙ୍ଗ୍ ବା ଆଉଲି ଆଜି ଆଜି ନିନ୍‌ ମାପୁରୁଦି ମାରିସି ଇଜି ଇନ୍‌ଞ୍ଜି ନାଣ୍ଟ ଲୋକା ମାଣ୍‌କୁ ସୋତେ ସର୍‌ଏ । ମାରି, ଜିସୁ ଖାରିଙ୍ଗ୍ ଆଦରିସ୍ କିଜି ଖାର୍‌ଗିଦେଙ୍ଗ୍ ସିଏତାନ୍, “ଇରିଙ୍ଗ୍ ଖାନ୍ ଜେ କ୍ରିସ୍, ଇକା ଖାକ୍ ନେସ୍‌ତେ ମାର୍‌ହେ ।”

ପାର୍ତନା ଇଲ୍‌ତୁ ଜିସୁ ପ୍ରଚାର୍ କିତାନ୍

(ମାର୍କ ୧:୩୫-୩୯)

୪୨ ସାଲ୍‌ଦି ଆତାଡ଼‌ଆକା, ଜିସୁ ଗାଡ଼‌ତାନ୍ ସୋଅସି ଉଣ୍ଟି ସୁନ୍‌ସାନ୍ ବାଡ଼ିତୁ ସୋର୍‌ଆନ୍; ମାରି, ଲୋକୁ ଝିଜେରେ ଖାନିଙ୍ଗ୍ ପୟ୍‌ଜି ପୟ୍‌ଜି ଖାନି ଲାକ୍‌ତୁ ଖାତାର୍, ମାରି ଖାନ୍ ଏଣ୍ଟେସ୍ ଖାରି ଲାକ୍‌ତୁରାନ୍ ସୋଲ୍‌ଏନ୍, ଆୟାଉଣ୍ଟିଙ୍ଗ୍ ଖାନିଙ୍ଗ୍ ତେବାକିଦେଙ୍ଗ୍ ବଦାକିତାର୍ ।

୪୩ ମାତର ଖାନ୍ ଖାରିଙ୍ଗ ଇରଥାନ, “ଆଇ ଆଇ ଗାଡ଼କାଙ୍ଗ ବା ନାଙ୍ଗ ମାପୁରୁଦି ରାଜିଦି ନେଗିକାବୁର ଖେରତେଙ୍ଗ ଆନାଡ଼, ଇରିଙ୍ଗ ଆୟାଉଣ୍ଡିଙ୍ଗ ମାପୁରୁ ନାଙ୍ଗ ପୋକ୍ତା ମାନାନ୍ ।”

୪୪ ମାରି, ଖାନ୍ ଜିହୁଦା ଦେସ୍ତି ପାର୍ତନାକିନି ଇଲ୍‌କାଙ୍ଗ ପ୍ରତାର କିଦେଙ୍ଗ ଆସ୍ତାନ ।



ଜିସୁ ପାରତୁମ୍ ସିସୁରିଙ୍ଗ କୁକ୍ତାନ

(ମାତିଉ ୪:୧୮-୨୨; ମାର୍କ ୧:୧୭-୨୦)

୧ ✧ ଅର୍ଲେନ୍ ଜିସୁ ଗିନେସରତ ଗାଡା ପାଡ଼ି ନିର୍ଥା ମାର୍ହାନ୍, ମାରି ଲୋକୁ ମାପୁରୁଦି ବାକ୍ୟ ଖେନ୍‌ଶ୍ଟେଙ୍ଗ ଖାନି ମୁସକୁ ମାଟ୍‌ସିଆଜି ମାର୍‌ଆର୍ ।

୨ ମାରି, ଜିସୁ ଗାଡାପାଡ଼ି ରୁଣ୍ଡି ତଙ୍ଗେଆଙ୍ଗ ମାନିକା ସୁଡ଼ତୁନ୍; ମିନୁକୁଆସନିକାର ଆବେଟ୍‌କୁ ରେସିଝାଜି ଜାଡ଼ି ନରଜି ମାର୍ହାନ୍ ।

୩ ଆୟା ତଙ୍ଗେଆଙ୍ଗ ମାଣ୍‌କୁ ଏମେମାନୁ ସିମୋନ୍‌ତିଦି ମାର୍ହାଡ଼, ଆବେନ୍ ଜିସୁ ଏକ୍‌ସି ଆଡ଼ଗିରାନ୍ କାଣ୍ଡେକ୍ ଆକ ସନି ଉଣ୍ଡିଙ୍ଗ ଖାନିଙ୍ଗ ଖେରତାନ୍; ମାରି, ଖାନ୍ ତଙ୍ଗାଦୁ ବାସ୍‌ସି ଲୋକାଙ୍ଗ ସିକିୟା ସିଦେଙ୍ଗ ଆସ୍ତାନ ।

୪ ଜିସୁ ମାଟା ଇଣ୍ଡେଙ୍ଗ ଝିସ୍‌ସି ସିମୋନ୍‌ତିଙ୍ଗ ଇର୍ହାନ୍, “ନିର୍‌ଇଗୁମିଦୁ ସୋଲ୍‌ସ ମିନ୍‌କୁ ଆସ୍‌ନି ଉଣ୍ଡିଙ୍ଗ ମି ଜାଡ଼ି ପୋକ୍‌ତୁ ।”

୫ ✧ ସିମୋନ୍ ଇର୍ଥାନ୍, “ଏ ଗୁରୁ, ମାପ୍ ନାଡାଝିଗିଜି ଖାନ୍‌ଜି ଏସୋବା ଆସ୍‌ଏତାପ୍; ମାତର୍ ନି ମାଟାଦାନ୍ ନାନ୍ ଜାଡ଼ି ପୋକ୍‌ନା ।”

୬ ✧ ମାରି, ଖାନ୍ ଜାଡ଼ି ପୋକ୍‌ସି ନାଣ୍ଡ ମିନ୍‌କୁ ଆସ୍‌ତାର୍, ମାରି ଖାରି ଜାଡ଼ି ତେତଦେଙ୍ଗ ଆସ୍‌ତାଡ଼ ।

୭ ଆବେନ୍ ଖାରି ଏମେ ସାଙ୍ଗର୍ ଆଇ ତଙ୍ଗାଦୁ ମାର୍‌ଆର୍, ଖାନ୍ ଏଣ୍ଡେସ୍ ଖାଜି ସାହାଜ୍ୟ କିନାର୍, ଆୟା ଉଣ୍ଡିଙ୍ଗ ଖାନ୍ ଖାରିଙ୍ଗ କୁକ୍‌ତାର୍ । ଆବେଟ୍ ଖାନ୍ ଖାଜି ରୁଣ୍ଡି ତଙ୍ଗେଆଙ୍ଗ ଇୟାଝାଜା ମିନ୍‌କୁ ଆସ୍‌ସି ବର୍ତ୍ କିତାର୍ ଜେ, ରୁଣ୍ଡି ତଙ୍ଗେଆଙ୍ଗ ମୁଡ଼ଗୁଡ଼ି ଖାଜା ଆତେ ।

✧ ୫:୧ ମାତିଉ ୧୩:୧୨; ମାର୍କ ୩:୯,୧୦; ୪:୧.
ଜୋହନ ୨୧:୭.

✧ ୫:୫ ଜୋହନ ୨୧:୩.

✧ ୫:୭

୮ ମାତର ସିମୋନ ପିତର ଇକା ସୁତକୁ ଜିସୁଦି କାଲକା ଆଡ଼ଗି ପାଡ଼ଗିଜି ଇର୍ହାର, “ଏ ପ୍ରବୁ, ନା ଲାକ୍ତୁରାନ୍ ନିନ୍ ସାଙ୍ଗାଆ, ଇରିଙ୍ଗ ନାନ୍ ଅରେନ୍ ପାପି ଲୋକୁ ।”

୯ ଇରିଙ୍ଗ ଖାର ଆୟା ଦାପ୍ରେ ନିସା ମିନ୍କୁ ଆସତାମାର୍ହାର ଜେ, ଆକା ସୁତକୁ ଖାନ୍ ମାରି ଖାରି ତଡ଼କୁ ଓଜେରେ କାବାତା ସର୍ହାର;

୧୦ ମାରି, ଜେବଦିରି ରିଏର୍ ମାରସିର୍ ଜାକୁବ ମାରି ଜୋହନ, ଏର୍ ସିମୋନତି ଖାଲେ ମାର୍ହାର, ଖାନ୍ ବା ଆୟାଖାଜା କାବାତା ସୋର୍ଆର୍ । ମାରି, ଜିସୁ ସିମୋନତିଙ୍ଗ ଇର୍ହାନ୍, “ତିଲାମା, ନେରହାନ୍ ନିନ୍ ମିନ୍କୁ ଆସନ୍ ବାଦ୍‌ଲୁ ଲୋକାଙ୍ଗ ମାପୁରୁ ଲାକ୍ତୁ ତାନି ।”

୧୧ ତାନେ ଖେନ୍‌କା ଖାର ତଙ୍ଗେଆଙ୍ଗ ପାଡ଼ିତାସି ଓଜୁ ଡିସସି ଜିସୁଖାଲେ ଖାଲେ ସର୍ହାର ।

ଜିସୁ ଅରେନ୍ କୁସ୍‌ରୋଗ୍ ଲୋକ୍‌ତିଙ୍ଗ ନେଗେଶୁ କିତାନ୍

(ମାତିଡ ୮:୧-୪; ମାର୍କ ୧:୪୦-୪୫)

୧୨ ଅର୍ସୁ ଜିସୁ ଉଣ୍ଡି ଗାଡ଼ତୁ ମାନିଖାଲେ, ସୁତବୁ, ଅରେନ୍ କୁସ୍‌ରୋଗ୍ ଲୋକୁ ଆୟା ବାଡିଦୁ ମାର୍ହାନ୍, ଖାନ୍ ଜିସୁଙ୍ଗ୍ ସୁତକୁ ମୋକମ୍ ପାଡ଼କସି ଜିସୁଙ୍ଗ୍ ମାଡିସ କିଜି ଇର୍ହାନ୍, “ଏ ପ୍ରବୁ, ନିନ୍ ଜଦି ବଦା କିନି, ଆତିଙ୍ଗ ନାଙ୍ଗ୍ ନେଗେଶୁ କିଦେଙ୍ଗ ଆର୍‌ନି ।”

୧୩ ଆବେନ୍ ଜିସୁ କିନ୍‌ରୁ ପେରଜି ଖାନିଙ୍ଗ ମୁର୍ସି ଇର୍ହାନ୍, “ନାନ୍ ବଦା କିଜିନା, ନେଗେଶୁଆଆ ।” ଆୟାଦାପ୍ରେ କୁସ୍‌ରୋଗ୍ ଖାନିମାଣୁକୁ ଆକ ଆତାଡ ।

୧୪ ମାରି, ଜିସୁ ଖାନିଙ୍ଗ ଆଦେସ ସିଜି ଇର୍ହାନ୍, “ଏଙ୍ଗବା ଇନିକା ଇନ୍‌ମା, ମାତର ସିଦା ସୋଲ୍‌ସ ଜାଜକଦି ଲାକ୍ତୁ ସାଙ୍ଗାଆ ମାରି ଖାନ୍ ନିଙ୍ଗ୍ ପରିକା କିଜି ସୁଡିନ୍, ତାନିଖେନ୍‌କା ନିନ୍ ନେଗେନ୍ ଆତିମାନି ଇଜି ଆଇଖାରି ଲାକ୍ତୁ ସାକି ସିଦେଙ୍ଗ ଇଜି ମୋସାଦି ସିତିମାନି ନିୟମ୍‌ତାନ୍ ପୁଜା ସିଆ ।”

୧୫ ମାତର ଖାନି ବିସୟତି ମାଗା ମାରି ନାଣ୍ଡ ଖେଙ୍ଗ୍‌ତାଡ, ମାରି ନାଣ୍ଡ ଲୋକୁ ଖେନି ଉଣ୍ଡିଙ୍ଗ ମାରି ନିଜେ ନିଜେଦି ରୋଗ୍‌ତାନ୍ ନେଗେନ୍ ଆନି ଉଣ୍ଡିଙ୍ଗ ଉଣ୍ଡେ ମାନ୍ ଆଦେଙ୍ଗ ଆସ୍‌ତାର;

୧୬ ମାତର ଜିସୁ ସୁନ୍‌ସାନ୍ ବାଡିଦୁ ମାନ୍‌ଞ୍ଜି ପାର୍‌ତନା କିଜିମାର୍ହାନ୍ ।

ଜିସୁ ଅରେନ୍ ପକ୍‌ୟାଗାତି ରୋଗ୍ ଲୋକ୍‌ତିଙ୍ ନେଗେନ୍ କିତାନ୍
(ମାତିଉ ୯:୧-୮; ମାର୍କ ୨:୧-୧୨)

୧୭ ଅରେଲେନ୍ ଜିସୁ ସିକିୟା ସିଜି ମାର୍ହାନ୍, ମାରି ଗାଲିଲିଦି ଖିଜୁ ନାରକୁ, ମାରି ଜିହୁଦା ଦେସ୍ ମାରି ଜିରୁସାଲମତାନ୍ ଖାତି ମାହୁ ପାରୁସି ମାରି ଜିହୁଦି ଦାମ୍‌ଗୁରୁରି ଲାକ୍‌ତୁ ବାସ୍‌ତା ମାର୍ହାର୍, ମାରି, ଖାନ୍ ଏଣ୍ଡେସ୍ ରୋଗିରିଙ୍ ନେଗେନ୍ କିନାନ୍, ଇୟାଉଣ୍ଡିଙ୍ ପ୍ରବୁଦି ସାଲ୍ ଖାତା ମାନାଡ଼ ।

୧୮ ମାରି ସୁଡ଼ୁ, ଏସ୍ ଲୋକୁ ଅରେନ୍ ପକ୍‌ୟାଗାତି ରୋଗ୍ ଲୋକ୍‌ତିଙ୍ କାଟେଲ୍‌ତୁ ପିଣ୍ଡି ତାତାର୍ ଖାନିଙ୍ ଲୋଇ ଅତେଙ୍ ଇଜି ମାରି ଜିସୁ ଆଗ୍‌ଡି ଇଡ଼ଦେଙ୍ ଇଜି ବଦା କିଜିମାର୍ହାର୍ ।

୧୯ ମାତର୍ ନାଣ୍ ଲୋକୁ ଗୋଲି ଉଣ୍ଡିଙ୍ ଖାନିଙ୍ ଲୋଇ ଅତେଙ୍ ଇଜି ସାରି ପଇଏତାରଆକା ଖାର୍ ଇଲୁ ମୁସ୍‌କୁ ଏକ୍‌ତାରୋ ରେକାମ୍‌ତି ଟାଇଲି କୁଡ଼ତାରୋ ବର୍ କିତାର୍ ଆୟା ବର୍ଦି ସାରିସିଜି କାଟେଲ୍‌ତି ଖାଲେ ଖାନିଙ୍ ନେଗିନାଣ୍‌ମି ବାଡ଼ିଦୁ ଜିସୁଦି ଆଗିଡି ରେପ୍‌ତାର୍ ।

୨୦ ଖାନ୍ ଖାରି ବିସ୍‌ବାସ୍ ସୁଡ଼ୁ ଇର୍ହାନ୍, “ଏ ମାରିନ୍, ନି ପାପ୍‌ଖିଜୁ କେମା ଆତାମାନାଡ଼ ।”

୨୧ ଆବେଟ୍ ସାସ୍ତ୍ରର୍ ମାରି ପାରୁସିର୍ ନିଜେ ନିଜେଦିମାନୁ ଖାର୍‌ଗିଜିସାଜି ଇର୍ହାର୍, “ଇକାନ୍ ଜେ ମାପୁରୁଙ୍ ନିଦା କିଜିନାନ୍, ଇକାନ୍ ଏନ୍ ? କେବଲ୍ ମାପୁରୁଙ୍ ଡିସ୍‌ତିଙ୍ ମାରି ଏନ୍ ପାପ୍‌କେମା କିଦେଙ୍ ଆଟ୍‌ନାନ୍ ?”

୨୨ ମାତର୍ ଜିସୁ ଖାରି ଖାର୍‌ଗିଜିସାନିକା ନେସ୍‌ସି ଖାରିଙ୍ ଇର୍ଆନ୍, ମିର୍ ନିଜେ ନିଜେଦି ମନ୍‌ତୁ ଇନିକା ଖାର୍‌ଗିଜି ସାଜିନିଦେର୍ ?

୨୩ ଇନିକା ଉସାସ୍ ? ନି ପାପ୍‌ଖିଜୁ କେମା ଆତାଡ଼ ଇଜି ଇନିକା, ମାରି, ନିଙ୍‌ଆ, ବୁଲାଆ ଇଜି ଇନିକା ?

୨୪ ମାତର୍ ସାରାଦୁନିଆଦୁ ପାପ୍‌କେମା କିଦେଙ୍ ମନୁସ୍‌ପୁତୁଦିଙ୍ ଜେ ଅଦିକାର୍ ମାନାଡ଼, ଇକା ଏଣ୍ଡେସ୍ ମିର୍ ନେସ୍‌ତେଙ୍ ଆଟ୍‌ନିଦେର୍ ଇୟାଉଣ୍ଡିଙ୍ ଆୟା ପକ୍‌ୟାଗାତି ରୋଗିଙ୍ ଇର୍ହାନ୍, “ନାନ୍ ନିଙ୍ ଇଜିନା, ନିଙ୍‌ଆ, ନିଜେଦି ଟାଟି ଆସ୍‌ସି ମି ଇଣ୍ଡୁସାଙ୍‌ଆ ।”

୨୫ ଆବେଟ୍‌ତାନ୍ ଖାନ୍ ଆୟାଦାପ୍ରେ ଖାରି ଆଗିଡ଼ିରାନ୍, ନିଙ୍ଗ୍‌ଜି, ଏମେ କାଟେଲ୍ ମୁସ୍କୁ ଖାନ୍ ଡରିତା ମାହାନ୍, ଆୟା କାଟେଲ୍ ଆସ୍‌ଇ ମାପୁରୁଙ୍ଗ୍ ଦନ୍ୟବାଦ୍ ପ୍ରସଂସା କିଜି କିଜି ନିଜେଦି ଇଣ୍ଡୁ ସୋହାନ୍ ।

୨୬ ଆବେଟ୍ ଓଜେରେ କାବାତାରୋ ମାପୁରୁଙ୍ଗ୍ ଦନ୍ୟବାଦ୍ ପ୍ରସଂସା କିଦେଙ୍ଗ୍ ଆସ୍‌ତାର୍ ମାରି ନାଣ୍ଡ ତିଲାତାରୋ ଇହାନ୍, “ନେରୁ ମାପ୍ କାବାଆନି ଗଟ୍‌ଣା ସୁଡ଼ତ୍ତାପ୍ !”

ଜିସୁ ଲେବିଙ୍ଗ୍ କୁକ୍‌ତାନ୍

(ମାତିଡ ୯:୯-୧୩; ମାର୍କ ୨:୧୩-୧୭)

୨୭ ତାନେଝେନ୍‌କା ଜିସୁ ସୋତା ସହାନ୍‌ନୋ ଲେବି ଦରତି ଅରେନ୍ ଖାନିଙ୍ଗ୍ ସିସ୍‌ଟୁ ଲସ୍‌ନି ବାଡିଦୁ ବାସ୍‌ତି ମାରିକା ସୁଡ଼ତ୍ତୁ ଖାନିଙ୍ଗ୍ ଇହାନ୍, “ନା ଝେନ୍‌କା ରାଆ ।”

୨୮ ଆବେଟ୍ ଲେବି ଓଜୁ ଡିସ୍‌ତାନ୍‌ନୋ ନିଙ୍ଗ୍‌ଜି ଖାନି ଝେନ୍‌କା ସଣ୍ଡେଙ୍ଗ୍ ଆସ୍‌ତାନ୍ ।

୨୯ ମାରି, ଲେବି ନିଜେଦି ଇନ୍‌ଡ୍ରୁ ଖାନି ଉଣ୍ଡିଙ୍ଗ୍ ଉଣ୍ଡି ପେରି ବଜି କିତାନ୍, ମାରି ନାଣ୍ଡଲୋକୁ ସିସ୍‌ଟୁ ଲସ୍‌ନିକାର୍ ମାରି ଆଇ ଆଇ ଲୋକୁ ଖାରି ଖାଲେ ଉଣ୍ଡେଙ୍ଗ୍ ବାସ୍‌ତାର୍ ।

୩୦ ☆ଆବେଟ୍ ପାରୁସିର୍ ମାରି ଖାରି ଦଲ୍‌ତି ସାସ୍‌ସିର୍ ଜିସୁଦି ସିସ୍‌ଟୁ ବିରଦ୍‌ତାନ୍ ବାସେ କିଜି ଇଣ୍ଡେଙ୍ଗ୍ ଆସ୍‌ତାର୍, “ମିର୍ ଏନ୍‌ଆ ସିସ୍‌ଟୁ ଲସ୍‌ନିକାର୍ ମାରି ପାପିଲୋକା ଖାଲେ ଉଣ୍ଡୁଞ୍ଜିତିଞ୍ଜିନିଦେର୍ ?”

୩୧ ଜିସୁ ଖାରିଙ୍ଗ୍ ଝେରତାନ୍, “ନେଗି ଲୋକାଙ୍ଗ୍ ଡାକ୍‌ତରମାନୁ ଦରକାର୍ ସିଲେ, ମାତର୍ ରୋଗ୍‌ତି ଲୋକାଙ୍ଗ୍ ଡାକ୍‌ତରତି ମାନୁ ଦରକାର୍ ମାନାଡ୍ ।

୩୨ ନାନ୍ ଦାମ୍‌ଲୁ ଲୋକାଙ୍ଗ୍ କୁକ୍‌ନି ଉଣ୍ଡିଙ୍ଗ୍ ରେଏ, ମାତର୍ ମୋନ୍‌ଡିଙ୍ଗ୍ ଡେପ୍‌ନି ଉଣ୍ଡିଙ୍ଗ୍ ପାପି ଲୋକାଙ୍ଗ୍ କୁକ୍‌ତେଙ୍ଗ୍ ଇଜି ଖାତାମାନା ।”

ଉପାସ୍‌କିନି ବିସ୍‌ୟତାନ୍ ପ୍ରସ୍ନ

(ମାତିଡ ୯:୧୪-୧୭; ମାର୍କ ୨:୧୮-୨୨)

୩୩ ଏସୋଲୋକ୍ ଜିସୁଙ୍କୁ ଖେନ୍ଦବାଡାର, “ତୁବନ୍ ସିନି ଜୋହନତି ସିସୁର୍ ମାରି ଅର୍ସୁ ମାରି ଉପାସ୍ ମାରି ପାର୍ତନା କିନାର୍, ପାରୁସିର୍ ସିସୁର୍ ବା ଆୟାଝାଜା କିନାର୍, ମାତର୍ ନି ସିସୁର୍ ଉଣାର୍ତନାର୍ ।”

୩୪ ଆବେଟ୍ ଜିସୁ ଖାରିଙ୍ଗ୍ ଇର୍ଆନ୍, “କାନ୍ୟାମୁରୁଲିରି ଖାଲେ ମୁରୁଲି ମାନିଝାଲେ ମିର୍ ଇନିକା ଖାରିଙ୍ଗ୍ ଉପାସ୍ ତେବାକିଦେଙ୍ଗ୍ ଆର୍ନିଦେର୍ ? ମୁଡ଼ୁକ୍ ସିଲେ ।

୩୫ ମାତର୍ ସମୟ ଖାନାଡ଼, ମାରି, ଏସିଝାଲେ ଖାରିମାଣାନ୍ ମୁରୁଲିଙ୍ଗ୍ ଖେର୍ସ କିନାର୍, ନାସିଝାଲେ ଆୟାଝାଲେ ଖାର୍ ଉପାସ୍ କିନାର୍ ।”

୩୬ ମାରି, ଖାନ୍ ଖାରିଙ୍ଗ୍ ଉଣ୍ଡି କାତାବା ଇର୍ଆନ୍, “ଏନ୍ ପୁନି ଖାତିଦି ଇସି ଅଟିଦିଙ୍ଗ୍ ଅସି ପାଡ଼ିଇ ଖାତିଦୁ ଗୁଡ଼ଏନ୍; ଗୁଡ଼ତିଙ୍ଗ୍ ଆୟା ପୁନି ଖାତିଦି ଅଟି ପାଡ଼ିଇ ଖାତିଦିଙ୍ଗ୍ କିଜିସ୍କିନାଡ଼, ମାରି ପୁନି ଖାତିଦି ଅଟି ବା ପାଡ଼ିଇ ଖାତିଦି ଖାଲେ ମିସାଏଡ଼ ।

୩୭ ମାରି, ଏନ୍ ପୁନି ଅଙ୍ଗୁର୍ ରସତିଙ୍ଗ୍ ପାଡ଼ିଇ ସାଟିଦୁ ଇଡ଼ଏନ୍; ଜଦି ଇଡ଼ତିଙ୍ଗ୍ ପୁନି ଅଙ୍ଗୁର୍ରସ୍ ସାଟିଦିଙ୍ଗ୍ ପାଡ଼ିସ୍ କିଜି ପଗ୍ନାସୋନାଡ଼, ମାରି ସାଟିବା ନାସ୍ ଆନାଡ଼ ।

୩୮ ମାତର୍ ପୁନି ଅଙ୍ଗୁର୍ ରସତିଙ୍ଗ୍ ପୁନି ସାଟିଦୁ ଇଡ଼ନିକା ମାନାଡ଼ ।

୩୯ ମାରି, ଏନ୍ ପାଡ଼ିଇ ଅଙ୍ଗୁର୍ ରସତିଙ୍ଗ୍ ଉଣାନ୍ନୋ ପୁନି ଅଙ୍ଗୁର୍ ରସତିଙ୍ଗ୍ ଉଣ୍ଡେଙ୍ଗ୍ ବଦା କିଏନ୍, ଇରିଙ୍ଗ୍ ଖାନ୍ ଇନାନ୍, ପାଡ଼ିଇ ଅଙ୍ଗୁର୍ ରସନ୍ ନେଗିକା ।”



ରମନିଦିନ୍ତି ବିସୟତାନ୍ ପ୍ରସ୍ନ

(ମାତିଉ ୧୨:୧-୮; ମାର୍କ ୨:୨୩-୨୮)

୧ ଅର୍ଲେନ୍ ରମନିଦିନ୍ତି ଜିସୁ ପାସି କିଡ଼ିଇ ସିଜି ସନି ଖାଲେ ଖାନି ସିସୁର୍ ସେରେନ୍କୁ ତେଉଜି ତେଉଜି କିୟୁଦୁ ରାସ୍ ଡିନିଜି ମାର୍ହାର୍ ।

୨ ମାତର୍ ପାରୁସିର୍ ମାଣକୁ ଏସ ଲୋକୁ ଇର୍ହାର୍, “ରମନିଦିନ୍ତି ଏମେକା କିଦେଙ୍ଗ୍ ନିୟମ୍ ସିଲେଡ଼, ଆକା ମିର୍ ଏକା କିଜିନିଦେର୍ ?”

୩ ଜିସୁ ଖାରିଙ୍ଗ ଇର୍ହାନ, “ଦାଉଦ ମାରି ଖାନି ସାଙ୍ଗର ବାଙ୍ଗା ଆତିଖାଲେ ଖାନ ଇନିକା କିତାମାର୍‌ଆନ୍, ଆକାବା ଇନିକା ମିର୍ ପଡ଼ାଇଦେର୍ ନୋ ?

୪ ଦାଉଦ ଏଣ୍ଡେସ୍ ମାପୁରୁଦି ଇଲୁଡୁ ଡଗ୍ରିତାନନୋ, ଆମା ପୁଜାସିନି ରୁଟି ଜାଜକରିଙ୍ଗ ଡିସ୍‌ତିଙ୍ଗ ମାରି ଏନ୍‌ବା ତିଶ୍ଟେଙ୍ଗ ନିୟମ୍ ସିଲେଡ୍, ଆକା ଅତାନନୋ ତିରାଆ ମାର୍‌ଆନ୍, ମାରି ଖାନି ତଡ୍‌ଲୋକାଙ୍ଗ ବା ସିତା ମାର୍‌ଆନ୍ ।”

୫ ମାରି, ଜିସୁ ଖାରିଙ୍ଗ ଇର୍‌ଆନ୍, “ମନ୍‌ସ୍ୟପୁତ୍ର ରମ୍‌ନିଦିନ୍‌ତି ପ୍ରତୁ ଆନାନ୍ ।”

କିୟୁ ଖାର୍‌ତିସରି ଲୋକୁ ନେଗେଶୁ ଆତାନ୍

(ମାତିଡ ୧୨:୯-୧୪; ମାର୍କ ୩:୧-୬)

୬ ଜିସୁ ମାରି ଅର୍‌ଲେନ୍ ରମ୍‌ନିନାଣ୍ଡିଙ୍ଗ ପାରତନା ଇଲୁଡୁ ଡଗ୍ରିତାନନୋ ସିକିୟା ସିଜି ମାର୍‌ଆନ୍, ଆବେଟ୍ ଅରେନ୍ ଲୋକୁ ମାର୍‌ଆନ୍, ଖାନି ଉଣି କିୟୁ ଖାର୍‌ତା ମାର୍‌ଆଡ୍ ।

୭ ମାରି, ଖାନ ଏଣ୍ଡେସ୍ ରମ୍‌ନିନାଣ୍ଡିଙ୍ଗ ନେଗେଶୁ କିନାନ୍‌ନୋ ସିଲେ, ଇକା ସୁଡ୍‌ବୁଦଙ୍ଗ ଇଜି ସାସ୍ତ୍ରି ମାରି ପାରୁସିର୍ ଖାନିଙ୍ଗ ସୁଡ୍‌ଜି ମାର୍‌ଆର୍, ଏଣ୍ଡେସ୍‌କି ଖାର୍ ଖାନି ବିରୁଦ୍‌ତାନ୍ ଦୋସ୍ କିଦେଙ୍ଗ ଆର୍‌ନାର୍ ।

୮ ମାତର୍ ଖାନ ଖାରି ମନ୍‌ତୁ ଅଡ୍‌ବିନିକା ନେସ୍‌ତାନନୋ, ଏମେ ଲୋକ୍‌ତି କିୟୁ ଖାର୍‌ତା ସୋରଆ ମାର୍‌ଆଡ୍, ଖାନିଙ୍ଗ ଇର୍‌ଆନ୍, “ନିଙ୍ଗ ଆ, ନାଣ୍‌ମି ନିଲ୍‌ଆ ।” ମାରି, ଖାନ ନିଙ୍ଗ୍‌ଜି ନିର୍‌ଆନ୍ ।

୯ ଆବେଟ୍ ଜିସୁ ଖାରିଙ୍ଗ ଇର୍‌ଆନ୍, “ନାନ୍ ମିଙ୍ଗ୍ ଝେନ୍‌ବାଜିନା, ରମ୍‌ନି ନାଣ୍ଡିଙ୍ଗ ଇନିକା କିଦେଙ୍ଗ ନିୟମ୍ ସିଲେଡ୍ ? ନେଗେନ୍ କିଦେଙ୍ଗ ନୋ ସେଏଶୁ କିଦେଙ୍ଗ ? ଜିବନ୍ ରକିୟା କିନିକା ନୋ ସାପିସ୍‌ନିକା ?”

୧୦ ମାରି, ଜିସୁ ସାରିବେଡ୍‌ଡ୍‌ଡ୍ ଝିଜେରିଙ୍ଗ ସୁଡ୍‌ଜି ଖାନିଙ୍ଗ ଇର୍‌ଆନ୍, “ନି କିୟୁ ପେର୍‌ଆ ।” ଆବେଟ୍ ଖାନ ଖାନି କିୟୁ ପେର୍‌ତାନ୍, ମାରି ଖାନି କିୟୁ ନେଗେନ୍ ଆତାଡ୍ ।

୧୧ ମାତର ଖାର ନାଶ୍ତ ରିସା ଆତାର, ମାରି ଜିସୁଦି ବିରଦ୍‌ତାନ୍
ଇନିକା କିଦେଙ୍ଗ ଆବ୍‌ନାର, ଆୟା ବିସୟତାନ୍ ନିଜେ ନିଜେଦିମାନୁ
ଖାରଗିଜି ସାତାର ।

ଜିସୁ ବାରଲୋକ୍ ସିସୁରିଙ୍ଗ୍ ଆସକିତାନ୍

(ମାତିଉ ୧୦:୧-୪; ମାର୍କ ୩:୧୩-୧୯)

୧୨ ଆୟାଖାଲେ ଜିସୁ ଅରଲେନ୍ ପାରତନା କିଦେଙ୍ଗ ଇଜି ଗରନ୍‌ତୁ
ସର୍‌ଆନ୍ । ଆବେ ମାପୁରୁଦିମାନୁ ପାରତନା କିବୁ କିବୁ ନାଡ଼ାଞ୍ଜିଗ୍‌ଜି
ତେବାତାନ୍ ।

୧୩ ମାର୍‌ନାଶ୍ତିଙ୍ଗ୍ ସାଲ୍‌ଦି ଆତାର, ଜିସୁ ନିଜେଦି ସିସୁରିଙ୍ଗ୍ ଲାକ୍‌ତୁ
କୁକ୍‌ସି ଖାରି ମାଣାନ୍ ବାରଲୋକାଙ୍ଗ୍ ଆସକିତାନ୍, ଖାନ୍ ଖାରିଙ୍ଗ୍
ପ୍ରେରିତ ଦର୍‌ ସିତାନ୍;

୧୪ ଖାର ଆତାର, ସିମୋନ, ଆମାଞ୍ଜାନିଙ୍ଗ୍ ଖାନ୍ ପିତର୍‌ ଇଜି ଦର୍‌
ସିତାନ୍, ମାରି ଖାନି ତଡ଼ାନ୍ ଆନ୍ଦ୍ରିୟ, ଜାକୁବ ମାରି ଜୋହନ, ପିଲିପ୍
ମାରି ବାର୍ତ୍‌ଲମି,

୧୫ ମାତିଉ ମାରି ତୋମା, ଆଲପିତି ମାରିସ୍‌ ଜାକୁବ ମାରି ସିମୋନ,
ଆମାଞ୍ଜାନିଙ୍ଗ୍ ଖେଡ଼ିକାକିନିକାନ୍ ଇଜି ଇନାର୍‌,

୧୬ ଜାକୁବଦି ମାର୍‌ନି ଜିହୁଦା ମାରି ଇସ୍‌କାରିୟୋତିୟ ଜିହୁଦା, ଏନ୍
ଜିସୁଙ୍ଗ୍‌ ସାତୁରି କିୟୁଦୁ ସପ୍ରେକିତା ସିତାନ୍ ।

ଜିସୁ ସିକିୟା ସିତାନ୍ ମାରି ନେଗେନ୍ କିତାନ୍

(ମାତିଉ ୪:୨୩-୨୫)

୧୭ ମାରି, ଜିସୁ ସିସୁରି ଖାଲେ ଗରନ୍‌ତାନ୍ ରେସି ଖାତାନ୍ । ମାରି
ସାର୍‌ଦିତି ବୁମିଦୁ ନିଜେଦି ନାଶ୍ତ ଲୋକୁ ସିସୁରି ଖାଲେ ନିର୍‌ଆନ୍ । ମାରି
ଞ୍ଜିଜୁ ଜିହୁଦା ଦେସ୍‌, ଜିରୁସାଲାମ୍‌, ମାରି ସାମ୍‌ଦୁରତିପାଡ଼ିଦି ସୋର୍‌ ନି
ସିଦନ୍‌ ଗାଡ଼ତି ନାଶ୍ତ ଲୋକୁ ଖାନି ଲାକ୍‌ତୁ ଖାତାର ।

୧୮ ଖାର ଖାନି ବାକ୍ୟ ଖେନ୍‌ଡ୍ରେଙ୍ଗ୍ ମାରି ନିଜେ ନିଜେଦି ରୋଗ୍‌ତାନ୍
ନେଗେନ୍‌ ଆଦେଙ୍ଗ୍ ଖାତା ମାର୍‌ଆର୍‌, ମାରି ଏର୍‌ ତାରିଇଦୁବେଙ୍ଗ୍
ମାଣ୍‌କୁ କାସ୍‌ ପଇଜି ମାର୍‌ଆର୍‌, ଖାରିଙ୍ଗ୍ ଖାନ୍ ନେଗେନ୍‌ କିତାନ୍;

୧୯ ମାରି ଲୋକୁ ଝିଜେରେ ଖାନିଙ୍ଗ୍ ମୁଟ୍‌ତେଙ୍ଗ୍ ଇଜି ବଦାକିଜି ମାର୍‌ଆର୍, ମାତର୍ ଖାନିମାଣାନ୍ ସାକ୍ତି ସୋସି ଲୋକାଙ୍ଗ୍ ନେଗେଣ୍ଡୁ କିଜିମାର୍‌ଆର୍ ।

ସୁକ୍ ନି ଦୁକ୍

(ମାତିଉ ୫:୧-୧୨)

୨୦ ଆୟାଝାଲେ ଜିସୁ ନିଜେଦି ସିସୁରି ତରିଣ୍ଡୁ ସୁଡ଼ୁଲ୍ଲି ଇର୍‌ଆନ୍, କାକୁତ୍ ଲୋକୁ ଜେ ମିର୍, ମିର୍ ଦନ୍‌ୟ, ଇରିଙ୍ଗ୍ ମାପୁରୁଦି ରାଜି ମିଦି ।

୨୧ ଇଲେଇ ବାଙ୍ଗାଦୁ ମାନିଦେର୍ ଜେ ମିର୍, ମିର୍ ଦନ୍‌ୟ, ଇରିଙ୍ଗ୍ ମିର୍ ପଟା ପାଜ୍‌ନିଦେର୍, ଇଲେଇ ଆଡ଼ବାଜିନିଦେର୍ ଜେ ମିର୍, ମିର୍ ଦନ୍‌ୟ, ଇରିଙ୍ଗ୍ ମିର୍ ସିକ୍‌ନିଦେର୍ ।

୨୨ ☆ ଲୋକୁ ଏସକାଙ୍ଗ୍ ମନ୍‌ସ୍ୟପୁତ୍ର ଉଣ୍ଡିଙ୍ଗ୍ ମିଙ୍ଗ୍ କାଡ଼ନାର୍ ମାରି ଝେର୍‌ଏ କିନାର୍, ମାରି ନିନ୍‌ଆ କିନାର୍, ମାରି ମି ଦର୍‌ଡିଙ୍ଗ୍ ତାଗିଇକା ଇଜି ମାନାଏର୍, ଆରିଙ୍ଗ୍ ମିର୍ ଦନ୍‌ୟ ।

୨୩ ☆ ଆୟା ନାଣ୍ଡିଙ୍ଗ୍ ଝେଡ଼ିକା କିଜି ଗାଡ଼ୁ, ମାତର୍ ସୁଡ଼ୁ, ମି ଉଣ୍ଡିଙ୍ଗ୍ ମୁସକୁପୁର୍‌ତୁ ମି ପୁରସକାର୍ ନାଣ୍ଡୁ ମାନାଡ଼, ମାରି, ଆୟାଝାଜା ତୋ ଖାରି ପୁର୍ବେଦି ଡକ୍‌ବାଦାର୍‌ରି ବାବବାଦିରି ଉଣ୍ଡିଙ୍ଗ୍ କିଜିମାର୍‌ଆର୍ ।

୨୪ ମାତର୍ ଚି, ଦଣ୍ଡ ପଇନି ମାଜନ୍ ଲୋକୁ ଜେ ମିର୍, ଇରିଙ୍ଗ୍ ମିର୍ ନିଜେ ନିଜେଦି ସୁକ୍ ପଇଜିନିଦେର୍ ।

୨୫ ଚି, ଦଣ୍ଡ ପଇନି ଲୋକୁ ଇଲେଇ ପଟାପାଜ୍‌ଜିନିଦେର୍ ଜେ ମିର୍, ଇରିଙ୍ଗ୍ ମିର୍ ବାଙ୍ଗା ଆନିଦେର୍,

ଚି, ଦଣ୍ଡ ପଇନି ଲୋକୁ ଇଲେଇ ସିକ୍‌ସିନିଦେର୍ ଯେ ମିର୍, ଇରିଙ୍ଗ୍ ମିର୍ ଏଡ଼କିଜିଆଡ଼ବାନିଦେର୍ ମାରି ଆଡ଼ବାନିଦେର୍ ।

୨୬ ଏସ୍ତ୍ରାଝାଲେ ଲୋକୁ ଝିଜେରେ ମିଙ୍ଗ୍ ଝେଙ୍ଗ୍‌ସ୍ କିନାର୍, ନାସ୍ତ୍ରାଝାଲେ ଚି, ମିର୍ ଦଣ୍ଡ ପଇନି ଲୋକୁ; ଆୟାଝାଜା ତୋ

ଝାରି ପୁର୍ବେଦି ଡକ୍ତାଦାଦାର ବଣ୍ଟ ବାବବାଦିରିଙ୍ଗ ବା ନେଗିକାର
ଇଜିମାରୁଆର ।

ସାତୁରିଙ୍ଗ ଜିବନ୍ନଦୁ

(ମାତିଉ ୫:୩୮-୪୮; ୭:୧୨)

୨୭ ମାତର ଝେନ୍‌ଞ୍ଜିନିଦେର୍ ଜେ ମିର୍, ମିଙ୍ଗ୍ ନାନ୍ ଇଜିନା, ମି
ସାତୁରିଙ୍ଗ ଜିବନ୍‌ନୋଦୁ; ଏର୍ ମିଙ୍ଗ୍ କାଡ୍‌ନାର, ଝାରିଙ୍ଗ ଆସ୍ ବାଦ୍
କିଦୁ;

୨୮ ଏର୍ ମିଙ୍ଗ୍ ଆନାଦୁରିଆ କିନାର, ଝାରିଙ୍ଗ ଆସ୍ ବାଦ୍ କିଦୁ;
ଏର୍ ମିଙ୍ଗ୍ ନିନ୍‌ଆ କିନାର, ଝାରି ଉଣ୍ଡିଙ୍ଗ ପାରତନା କିଦୁ ।

୨୯ ଏନ୍ ମିଙ୍ଗ୍ ଉଣ୍ଡି ବୁଗୁଲିଦୁ ଚାପଡ଼ା ଡାକ୍‌ନାନ୍, ଝାନି ଉଣ୍ଡିଙ୍ଗ
ଆଇ ବୁଗୁଲି ବା ତରସୋ ସିଦୁ; ମାରି, ଏନ୍ ମି ସାଦର୍ ଅନାନ୍, ଝାନିଙ୍ଗ୍
ମି ଆଙ୍ଗ୍ ବା ଅତେଙ୍ଗ୍ ମାନା କିମାର ।

୩୦ ଏନ୍‌ଆପିନ୍ ମିଙ୍ଗ୍ ଇନି ଜିନିସ୍ ଲୋସ୍‌ନାନ୍, ଝାନିଙ୍ଗ୍ ସିଦୁ;
ମାରି, ଏନ୍ ମି ଦନ୍ ଅନାନ୍, ଝାନିମାଣ୍‌ନା ଆକା ମାରିଡ଼େସି ଲସ୍‌ମାର
।

୩୧ ☆ଲୋକୁ ମି ଉଣ୍ଡିଙ୍ଗ ଏଣ୍ଡେସବା ମାନାପିର୍ ଇଜି ବଦା କିନିଦେର୍,
ମିର୍ ଝାରି ଉଣ୍ଡିଙ୍ଗ ଆୟାଝାଜା କିଦୁ ।

୩୨ ମାରି, ଏର୍ ମିଙ୍ଗ୍ ଜିବନ୍‌ନୋନାର, ମିର୍ ଜଦି ଝାରିଙ୍ଗ୍‌ନେ
ଜିବନ୍‌ନୋତିଙ୍ଗ୍ ମିର୍ ଇନିକା ଦୟା ପଇନିଦେର୍ ? ଇରିଙ୍ଗ୍ ପାପି
ଲୋକ୍ ବା ନିଜେ ନିଜେଦି ଲାଡ଼କିନିଝାରିଙ୍ଗ୍ ଲାଡ଼ କିନାର ।

୩୩ ମାରି, ଏର୍ ମିଙ୍ଗ୍ ଆସ୍ ବାଦ୍ କିନାର, ଜଦି ମିର୍ କେବଲ୍
ଝାରିଙ୍ଗ୍‌ନେ ନେଗେନ୍ କିନିଦେର୍, ଆରିଙ୍ଗ୍ ମିର୍ ଇନିକା ଦୟା
ପଇନିଦେର୍ ? ଇରିଙ୍ଗ୍ ପାପି ଲୋକ୍ ବା ଆୟାଝାଜା କିନାର ।

୩୪ ମାରି, ଏମେଝାରିମାଣ୍‌କୁ ମି ପଇନି ଆସା ତେବାତାନ୍,
ଝାରିଙ୍ଗ୍‌ନେ ରୁଣ୍ଟୁ ସିତିଙ୍ଗ୍ ମିର୍ ଇନିକା ଦୟା ପଇନିଦେର୍ ?
ପାପିଲୋକ୍ ଆକା ସାମାନ୍‌ତାନ୍‌ନେ ଡ଼େସି ପଇନି ଉଣ୍ଡିଙ୍ଗ୍ ପାପି
ଲୋକାଙ୍ଗ୍ ରୁଣ୍ଟୁ ସିନାର ।

୩୫ ମାତର ମି ସାତୁରିଙ୍ଗ ଜିବନ୍‌ନଦୁ ମାରି ଝାରିଙ୍ଗ୍ ଆସ୍ ବାଦ୍
କିଦୁ, ମାରିଡ଼େସି ପଇଦେଙ୍ଗ୍ ଆସ୍‌ଏଣ୍ଡା ରୁଣ୍ଟୁ ସିଦୁ; ଆଦେଙ୍ଗ୍

ମି ପୁରସ୍କାର ନାଶ୍ ଆନାତ୍ ମାରି ମିର୍ ପେରି ମାପୁରୁଦି ମାରିନ୍ ଆନିଦେର୍, ଇରିଙ୍ ଖାନ୍ ସାଲ୍ଲାକି ନି ତାରିଇଝାରି ଉଣ୍ଟିଙ୍ ବା ଦୟା କିନାନ୍ ।

୩୭ ମି ବୁବା ଏଣ୍ଟେସ୍ କାର୍ମୁଦିକାନ୍, ମିର୍ ଆୟାଝାଜା କାର୍ମୁଦିକାର୍ ଆଦୁ ।

ଆଇଝାରିଙ୍ ବିସାର୍ କିମାଟ୍

(ମାତିଉ ୭:୧-୫)

୩୭ “ମାରି, ବିସାର୍ କିମାଟ୍, ଆଦେଙ୍ ମିର୍ ବିଚାରକିଆୟ୍ ଆଇଦେର୍; ଏମେ ଲୋକତିଙ୍ ବା ଦସ୍ କିମାଟ୍, ଆତିଙ୍ ମିର୍ ଦସି କିଆୟ୍ ଆଇଦେର୍ । ଆଇଝାନିଙ୍ କେମା କିଦୁ, ଆଦେଙ୍ ମିଙ୍ ବା କେମା କିନାନ୍;

୩୮ ଆଇଝାନିଙ୍ ଦାନ୍ ସିଦୁ, ଆଦେଙ୍ ମିଙ୍ ଦାନ୍ ସିନାର୍; ମାପୁରୁ ଅତିଦୁ ପୁରା କିଜି ତାନିଙ୍ ତିଗ୍ଜି ଦୁକ୍ସି ବର୍ତ୍ କିଜି ମି ଅତିଦୁ ସିନାର୍; ଇରିଙ୍ ଏମେ ଅତିଦାନ୍ ଇସାବ୍ କିଜି ଇସାବ୍ କିଦୁ, ଆୟା ଅତିଦାନ୍ ମିଙ୍ ମାରି ଇସାବ୍ କିନାସିନାର୍ ।”

୩୯ ☆ଜିସୁ ଝାରିଙ୍ ଉଣ୍ଟି ମାଟା ବା ଝେର୍ତାନ, ଅରେନ୍ କାଣା ଇନିକା ମାରି ଅରେନ୍ କାଣାଦିଙ୍ ସାରି ତର୍ତେଙ୍ ଆଟ୍ନାନ୍ ? ଜଦି ଖାନ୍ ଆୟାଝାଜା କିନାନ୍, ଆରିଙ୍, ଝାର୍ ଇନିକା ରିଏର୍ବା ଗୁଟାଦୁ ଆର୍ଏର୍ ନୋ ?

୪୦ ☆ଗୁରୁମାଣାନ୍ ସିସୁ ପେରିକାନ୍ ଆଏନ୍; ଇରିଙ୍ ଝିଜେରେ ସିସୁ ସିକିୟା ଅଜାତି ଝେନ୍କା ନିଜେଦି ଗୁରୁଦି ସାମାନ୍ ଆନାନ୍ ।

୪୧ ମାରି, ଏନ୍ଦା ମି ତଡାନ୍ତି କାଣ୍ଗାଦୁ ମାନି ଇସିକାସାଦିଙ୍ ସୁଡ଼ୁଜିନିଦେର୍, ମାତର୍ ମି ନିଜେଦି କାଣ୍ଗାଦୁ ଏମେ ପେରି କାସ୍ତା ମାନାତ୍, ଆକା ଅଡ଼ବିଜି ସୁଡ଼ୁଦେଙ୍ ଆଟ୍ଏଜିନିଦେର୍ ?

୪୨ ନିନ୍ ନିଜେଦି କାଣ୍ଗାଦୁ ମାନି ଇସିକାସା ସୁଡ଼ୁଶୁଗା ଏଣ୍ଟେସ୍ ନିଜେଦି ତଡାନ୍ତିଙ୍ ଇଣ୍ଟେଙ୍ ଆଟ୍ନି, ତଡାନ୍, ରାଆ, ନି କାଣ୍ଗାଦୁ ମାନି ଇସିକାସା କୁଡ଼ନା ସିନା ? ଏ ପୁଲ୍ଲାପୁଲି କିନିକିନ୍ଦେର୍, ଆଗିଡ଼ି ନିଜେଦି କାଣ୍ଗାଦାନ୍ ପେରି କାସ୍ତା କୁଡ଼ସ ପୋକ୍ଆ, ତାନିଝେନ୍କା

ନିଜେଦି ତତ୍ତାନ୍ତି କାଣ୍ଡାଦୁ ମାନି ଇସ୍ରାକାସ୍ତା କୁଡ଼ି ଉଣ୍ଡିଙ୍ଗ୍
ନେଗ୍ରେଣ୍ଡା ସୁଡ଼ୁଦେଙ୍ଗ୍ ଆଡ଼ି ।

ମାରାନ୍ ନି ତାନି ପଲ୍ଲ

(ମାତିଉ ୭:୧୭-୨୦; ୧୨:୩୩-୩୫)

୪୩ ମାତର୍ ଇୟାଞ୍ଜା ମାରାନ୍ ସିଲେଡ଼, ଆମାକାକି ତାଗିଇ
ମାରାନ୍ ନେଗି ପଲ୍ଲ ଆସ୍‌ଏଡ଼, ବା ନେଗି ମାରାନ୍ ତାଗିଇ ପଲ୍ଲ
ଆସ୍‌ଏଡ଼ ।

୪୪ ☆ଇରିଙ୍ଗ୍ ଝିଜୁ ମାରାକା ନିଜେଦି ପଲ୍ଲଦାନ୍ ଚିନିସନାର୍;
ସାମ୍‌ମାରାନ୍‌ତାନ୍ ତୋ ଲୋକୁ ତଗା କୟ୍‌ଏର୍, ମାରି ସାମ୍ ଦୁପାଦାନ୍
ଅଙ୍ଗୁରକୋଡ଼ି କୟ୍‌ଏର୍ ।

୪୫ ☆ଅରେନ୍ ନେଗି ଲୋକ୍‌ଦି ମୋନ୍ ଲୋଇ ନେଗି ବିସୟ୍
ଉଣ୍ଡାତିମାନିକା, ଆଦେଙ୍ଗ୍ ଝାନି ମୋନ୍ ଲୋଇରାନ୍ ନେଗି ବିସୟ୍
ସୋନାଡ଼ । ମାତର୍ ଅରେନ୍ ତାଗିଇ ଲୋକ୍‌ଦି ମୋନ୍ ଲୋଇ
ତାଗିଇ ବିସୟ୍ ଉଣ୍ଡାତିମାନିକା, ଆଦେଙ୍ଗ୍ ଝାନି ମୋନ୍ ଲୋଇରାନ୍
ତାଗିଇ ବିସୟ୍ ସୋନାଡ଼, ଅରେନ୍ ଲୋକ୍‌ଦି ମୋନ୍ ଲୋଇ ଆମାକା
ତେବାତାନ୍, ଝାନ୍ ଆକା ଇନାନ୍ ।

ରୁଣ୍ଡି ରକମ୍‌ତି ଇଲ୍‌କୁ ତର୍‌ନିକାର୍

(ମାତିଉ ୭:୨୪-୨୭)

୨୭ “ମାରି, ମିର୍ ଏନ୍‌ ନାଙ୍ଗ୍ ପ୍ରବୁ, ପ୍ରବୁ ଇଜି କୁକ୍‌ସିନିଦେର୍,
ମାତର୍ ନା ମାଟା ମାନାଇଜିନିଦେର୍ ?

୨୮ ଏନ୍‌ଆପିନ୍ ନା ଲାକ୍‌ତୁ ଝାଜି ନା ମାଟା ଝେନ୍‌ଞ୍ଜି ଆୟାଞ୍ଜି
ମାନାନାର୍, ଝାନ୍ ଏଞ୍ଜାଆ ଆନାନ୍, ଆକା ନାନ୍ ମିଙ୍ଗ୍ ଝେର୍‌ନା ।

୨୯ ଝାନ୍ ଇୟାଞ୍ଜା ଅରେନ୍ ଇଲ୍‌ ତିଆରକିନି ଲୋକୁ ଝାଜା, ଝାନ୍
ନାଣ୍ଡ ଗୁଟା କିଜି କାର୍‌ନାନନୋ ମୁଲ୍‌କାଲ୍ ମୁସ୍‌କୁ ବାସାକିନାନ୍; ମାରି,
ପିରୁ ଝାଜି, ଏରୁ ଆୟା ଇଲ୍‌ଦିଙ୍ଗ୍ ଦେଲେପ୍‌ସୋ ଅତେଙ୍ଗ୍ ନାଣ୍ଡଦାନ୍
ଡୁକାତାଡ଼, ମାତର୍ ଆକା ଦୁକ୍‌ତେଙ୍ଗ୍ ଆଟ୍‌ଏତାଡ଼, ଇରିଙ୍ଗ୍ ଇଲ୍‌
ତାଟ୍‌ତାନ୍ ତିଆର୍ ଆତାମାର୍‌ଆଡ଼ ।

୪୯ ମାତର୍ ଏନ୍ ମାଟା ଝେନ୍‌ଞ୍ଜି ମାନାଏନ୍, ଝାନ୍ ମୁଲ୍‌କାଲ୍
ବାସାକିଏଣ୍ଡା ସିକ୍‌ଲା ମୁସ୍‌କୁ ଇଲ୍‌ ତିଆରକିନି ଲୋକୁ ଝାଜା; ଏରୁ

ଆୟା ଇଲୁଦିଙ୍କ ନାଣ୍ଡଦାନ ଡୁକାତିଙ୍କ, ଆୟାଦାପ୍ରେ ଇଲୁ ଝିରଜିତାତ୍ ମାରି ତାନି ଝିରଜିତିକା ବୟଙ୍କାର ଆତାତ୍ ।”



ଜିସୁ ଅରେନ୍ ରୋମିୟଦୁ ପାଣିକିନିଝାନିଙ୍କ ନେଗେନ୍ କିତାନ୍
(ମାତିଉ ୮:୫-୧୩)

୧ ଜିସୁ ଲୋକାଙ୍କ ନିଜେଦି ଝିଲୁ ମାଟା ଝେରତି ଝିସ୍ତି ଝେନ୍‌କା କପର୍‌ନାହୁମତୁ ସୋର୍‌ଆନ୍ ।

୨ ଆୟା ଝେଡାଦୁ ଅରେନ୍ ରମିୟ ନେତାଦି ଗତିମୁରୁଲି ନବ୍ ଆଜି ସାନି ଝାଜା ଆତାମାର୍‌ହାନ୍, ଝାନ୍ ଝାନିଙ୍କ ନାଣ୍ଡ ଜିବନ୍‌ନୋଜି ମାର୍‌ଆନ୍ ।

୩ ଝାନ୍ ଜିସୁଦି ମାଟା ଝେନ୍‌ଞ୍ଜ, ଝାନ୍ ଝାଜି ଝାରି ଗତିମୁରୁଲି ଜିବନ୍ ରକିୟା କିଦେଙ୍କ, ଇୟାଉଣ୍ଡିଙ୍କ ଝାରି ଲାକ୍‌ତୁ ଜିହୁଦିର୍ ଏସ ପେରି ନେତାରିଙ୍କ ପକ୍‌ସି ଝାନିଙ୍କ ଝାଦେଙ୍କ ଇର୍‌ହାନ୍ ।

୪ ଝାନ୍ ଜିସୁ ଲାକ୍‌ତୁ ସଲ୍‌ସି ଝାନିଙ୍କ ନାଣ୍ଡ ମାଡିସ୍ କିଜି ଇଣ୍ଡେ_ଙ୍କ ଆସ୍‌ତାର୍, ନିନ୍ ଜେ ଝାରି ଲାକ୍‌ତୁ ଇୟାକା କିନି, ଝାନ୍ ଆବେର୍ ଜଗ୍ ଆନାନ୍;

୫ ମାତର୍ ଝାନ୍ ମା ଜାତିଦିଙ୍କ ନାଣ୍ଡ ଜିବନ୍‌ନୋନାନ୍ ମାରି ନିଜେ ମା ଉଣ୍ଡିଙ୍କ ପାର୍‌ତନା ଇଲୁ ତିଆରକିତା ସିତାମାନାନ୍ ।

୬ ଆବେର୍ ଜିସୁ ଝାରି ଝାଲେ ସର୍‌ଆନ୍ । ଝାନ୍ ଇଡ୍ରଣାନ୍ ଅଡ୍‌ପ୍ ଆକ ଇତାନ୍‌ନୋ, ସତସେନାପତି ସଙ୍‌ରିଙ୍କ ପକ୍‌ସି ଝାରିଙ୍କ ଇର୍‌ହାନ୍, ପ୍ରୁ, କାସ୍‌କିମା, ମାତର୍ ନିନ୍ ଜେ ନା ଇଣ୍ଡେ_ ପାଦାନ୍ ଇଡ୍‌ଦେଙ୍କ ନାନ୍ ଇୟାଝାଜା ଜୋଗ୍ ସିଲେ;

୭ ମାରି ନାନ୍ ନି ଲାକ୍‌ତୁ ସନ୍‌ଡ୍ରେଙ୍କ ନିଜେଦିଙ୍କ ଜୋଗ୍ ଅଡ୍‌ବିଏତା; ମାତର୍ ଉନ୍‌ଡ୍ ପଦ୍‌ମାଟାଦି ଆଦେସ୍ ଇନ୍‌ଆଁ, ନା ପାଣିକିନିକାନ୍ ନେଗେନ୍ ଆନାସନାନ୍ ।

୮ ମାତର୍ ନାନ୍ ଅରେନ୍‌ଝାନି ଆଡ୍‌ଗିମାନି ମାର୍‌ରିଙ୍କ ବା ନା ଅଦିକାର୍‌ତାନ୍ ସନ୍‌ସ ଦଲ୍ ମାନାର୍; ମାରି, ଅରେନ୍ ଝାନିଙ୍କ ଜଦି ନାନ୍ ସାଙ୍‌ଆ ଇଜି ଆଦେସ୍ ସିତିଙ୍କ, ଝାନ୍ ସନାନ୍; ଆଇଝାନିଙ୍କ ରାଆ, ଇଜି ଇରିଙ୍କ, ଝାନ୍ ଝାନାନ୍; ମାରି, ନା ସାକର୍‌ତିଙ୍କ ଇକା କିଆ, ଇରିଙ୍କାଁ ଝାନ୍ ଆକା କିନାନ୍ ।

୯ ଜିସୁ ଇୟାସୁକୁ ମାଟା ଝେନ୍‌ଜି ଝାରି ବିସୟତାନ୍ କାବା ଆତାନ୍, ମାରି ମାର୍‌ଜି ଝାନି ଝେନ୍‌କା ଝାଜିମାରି ଲୋକାଙ୍ଗ୍ ଇର୍ହାନ୍; “ନାନ୍ ମିଙ୍ଗ୍ ସତ୍‌ଇଜିନା, ଇସ୍ରାଏଲ୍‌ତୁ ବା ନିସା ପେରି ବିସ୍‌ବାସ୍ ପାଏ ଆଏଡ଼ ।”

୧୦ ମାରି, ପୋକ୍ତି ମାର୍‌ଇ ଲୋକୁ ଇନ୍‌ତ୍ର ଡେସି ଝାଜି ଗତିମୁରୁଲିଙ୍ଗ୍ ନେଗେନ୍ ଆତିକା ସୁଡ଼ତୁର ।

ଜିସୁ ଅରେଡ଼ ରାଣ୍ଡି ଆଇମାଦି ସାତି କଡ଼ଦିଙ୍ଗ୍ ନିକ୍‌ତାନ୍

୧୧ ଆବେଟ୍‌କୁ ଜିସୁ ନାଇନ୍ ଦରତି ଗାଡ଼ତୁ ସର୍‌ଆନ୍, ମାରି ଝାନି ସିସୁର୍ ମାରି ନାଣ୍ଡ ଲୋକୁ ଝାନିଝାଲେ ସଲ୍‌ସି ମାର୍‌ଆର୍ ।

୧୨ ଝାନ୍ ଗାଡ଼ ଲାକ୍‌ତୁ ଇତାନ୍, ସୁଡ଼ତୁ, ଲୋକୁ ଅରେନ୍ ସାତି ଲୋକତିଙ୍ଗ୍ ଡାଣ୍ଡିଆଦୁ ପିଣ୍ଡଜୋ ତାସିମାର୍‌ଆର୍, ଝାନ୍ ନିଜେ ଆଇସିଦି ଅରେନ୍‌ନେ ମାରିସି, ମାରି ଆୟା ଆଇମା ରାଣ୍ଡି; ମାରି, ଗାଡ଼ତି ନାଣ୍ଡ ଲୋକୁ ତାନି ଝାଲେ ମାର୍‌ଆର୍ ।

୧୩ ତାନିଙ୍ଗ୍ ସୁଡ଼ତୁଜୋ ପ୍ରତୁ ତାନି ମୁସ୍‌କୁ ଦୟାକିଜି ତାନିଙ୍ଗ୍ ଇର୍‌ଆନ୍, “ଆଡ଼ବାମା ।”

୧୪ ମାରି, ଝାନ୍ ଲାକ୍‌ତୁ ସଲ୍‌ସି ଡାଣ୍ଡିଆଦୁ ମୁର୍‌ତାନ୍, ମାରି ପିଣ୍ଡିତି ମାହ୍‌କାର୍ ନିର୍‌ଆର୍, ଝାନ୍ ଝେର୍‌ତାନ୍, ଏ ମୁରୁଲି ନାନ୍ ଇଜିନା, ନିଙ୍ଗ୍‌ଆ ।

୧୫ ଆବେଣାନ୍ ସାତିଲୋକ୍ ନିଙ୍ଗ୍‌ଜି ବାସ୍‌ତାନ୍, ମାରି ଝାର୍‌ଗିଦେଙ୍ଗ୍ ଆସ୍‌ତାନ୍, ମାରି ଝାନ୍ ଝାନିଙ୍ଗ୍ ଝାନି ଆଇସି କିଦୁ ଆପିସ୍‌କିତାନ୍ ।

୧୬ ଆବେନ୍‌ ଝିଜେରେ ତିଲାତାର୍, ମାରି ମାପୁରୁଦି ଦନ୍‌ସବାଦ୍ କିଜି କିଜି ଇନ୍‌ଡ୍ରେଙ୍ଗ୍ ଆସ୍‌ତାର, ମା ଲୋଇରାନ୍ ଅରେନ୍ ପେରି ବାବବାଦି ସତାମାନାନ୍ ମାରି ମାପୁରୁ ନିଜେଦି ଲୋକାଙ୍ଗ୍ ରକିୟା କିଦେଙ୍ଗ୍ ଝାତାମାନାନ୍ ।

୧୭ ମାରି, ଜିସୁ ବିସୟତି ଇୟା ମାଟା ଝିଜୁ ଜିହୁଦା ଦେସ୍ ମାରି ଝିଜୁ ତରିନ୍ ଝେଙ୍ଗ୍‌ତାଡ଼ ।

ଡୁବନ୍‌ସିନି ଜୋହନତି ରିଏର୍ ସିସୁର୍
(ମାତିଉ ୧୧:୨-୧୯)

୧୮ ଝେନ୍‌କା ତୁବନ୍‌ସିନି ଜୋହନତି ସିସୁର ଇୟା ବିସୟ୍‌ ଖାନିଙ୍ଗ୍‌ ଇର୍ହାର ।

୧୯ ଆବେନ୍‌ ଜୋହନ ନିଜେଦି ସିସୁରି ଲୋଇ ରିଏରିଙ୍ଗ୍‌ ଲାକ୍‌ତୁ କୁକ୍‌ସୋ ମାଲିକ୍‌ ଲାକ୍‌ତୁ ଇକା ଇଜି ପୋକ୍‌ତାନ୍‌, ଆମାକାନ୍‌ ଖାଦେଙ୍ଗ୍‌ ଆତା ମାର୍‌ଆର୍‌, ଆୟା ଲୋକୁ ନିନ୍‌ନେ ନୋ, ନା ମାପ୍‌ ଆଇଖାନିଙ୍ଗ୍‌ କାପ୍‌କିନାପ୍‌ ?

୨୦ ଆୟା ଲୋକୁ ଜିସୁ ଲାକ୍‌ତୁ ସଲ୍‌ସି ଇର୍ହାର, “ତୁବନ୍‌ସିନି ଜୋହନ ମାଙ୍ଗ୍‌ ନି ଲାକ୍‌ତୁ ଇୟାକା ଇଜି ପୋକ୍‌ତାମାନାନ୍‌, ଆମାକାନ୍‌ ଖାନିକା ଆତାମାରାଡ୍‌, ଆୟା ଲୋକୁ ନୋ ନିନ୍‌, ନା ମାପ୍‌ ଆଇ ଲୋକ୍‌ତିଙ୍ଗ୍‌ କାପ୍‌କିନାପ୍‌ ?”

୨୧ ଆୟା ଝେଡାତୁ ଖାନ୍‌ ଏସୋ ରୋଗ୍‌, ବାଦା ମାରି ତାଗ୍‌ଲ୍‌ ଆମ୍‌ ମାଣକୁ ନେଗେଣ୍ଡୁ କିତାନ୍‌, ମାରି ଏସୋ କାଣାରିଙ୍ଗ୍‌ କାଣୁକୁ ସୁଡ଼ୁଦେଙ୍ଗ୍‌ ସାକ୍ତି ସିତାନ୍‌ ।

୨୨ ଜିସୁ ଖାରିଙ୍ଗ୍‌ ଇର୍ହାନ୍‌, “ମିର୍‌ ମିର୍‌ ଡେସି ସଲ୍‌ସି ଆମାକା ଖିଜୁ ଝେନ୍‌ଜିନିଦେର୍‌ ମାରି ସୁଡ଼ୁଜିନିଦେର୍‌, ଆୟାକାଖିଜୁ ଜୋହନତିଙ୍ଗ୍‌ ଝେର୍‌ତୁ; କାଣା ଲୋକୁ ସୁଡ଼ୁଜିନାର୍‌, ମାରି ସଟା ଲୋକୁ ବୁଲାଜିନାର୍‌, କୁସୁରୋଗ୍‌ ଲୋକୁ ନେଗେଣ୍ଡୁ ଆଜିନାର୍‌, ବଇରା ଲୋକ୍‌ ଝେନ୍‌ଜିନାର୍‌, ସାତି ଲୋକୁ ନିଙ୍ଗ୍‌ ଜିନାର୍‌, କାକୁତ୍‌ ଲୋକାମାନୁ ବା ନେଗି କାରୁର୍‌ ପ୍ରଚାର୍‌ କିଆଇଆଜିନାଡ୍‌;

୨୩ ମାରି, ଆମାକାନ୍‌ ନାଙ୍ଗ୍‌ ନାମ୍‌ଏନ୍‌, ଖାନ୍‌ ଦନ୍‌ଏ ।”

୨୪ ଜୋହନତି ସିସୁର ସରଇ ଝେନ୍‌କା ଖାନ୍‌ ଜୋହନତି ବିସୟ୍‌ତାନ୍‌ ଲୋକାଙ୍ଗ୍‌ ଇନ୍‌ଡେଙ୍ଗ୍‌ ଆସତାନ୍‌, ମିର୍‌ ଇନିକା ସୁଡ଼ୁଦେଙ୍ଗ୍‌ ସିମ୍‌ ବାଡିତୁ ସତିସରଇ ମାର୍‌ଇଦେର୍‌ ? ଇନିକା ଗାଲିଦାନ୍‌ ଦୁଙ୍ଗ୍‌ ଜିମାନି ଉଣ୍ଡି ଦେର୍‌ ନାଡା ?

୨୫ ଆୟାକା ଆଏତିଙ୍ଗ୍‌ ମିର୍‌ ଇନିକା ସୁଡ଼ୁଦେଙ୍ଗ୍‌ ସତିସରଇ ମାର୍‌ଇଦେର୍‌ ? ଇନିକା ଦାରାଦି ଆଙ୍ଗ୍‌ ଆରାତିମାନି ଅରେନ୍‌ ଲୋକ୍‌ତିଙ୍ଗ୍‌ ? ସୁଡ଼ୁଦୁ, ଆମାକାର ଦାରାଦି ଆଙ୍ଗ୍‌ ଆରାନାର୍‌ ମାରି ସୁକ୍‌ତାନ୍‌ ଜିନାର୍‌, ଖାର ରାଜାଦି ମେଡ଼ୁଡୁ ତେବାନାର୍‌ ।

୨୬ ନାଙ୍ଗ୍‌ ଇନ୍‌ଆଁ, ଆୟାକା ଆଏତିଙ୍ଗ୍‌ ଇନିକା ସୁଡ଼ୁଦେଙ୍ଗ୍‌ ସହସୋ ସରଇମାର୍‌ଇଦେର୍‌ ? ଇନିକା ଅରେନ୍‌ ବାବବାଦିଙ୍ଗ୍‌ନୋ ?

ନାନ୍ ମିଙ୍ଗୁଁ ସତ୍ତ୍ୱ ଇଜିନା, ବାବବାଦି ମାଣାନ୍ ନାଣ୍ଡ ପେରିଞ୍ଜାନିଙ୍ଗ୍ ।

୨୭ ଜୋହନତି ବିସୟତାନ୍ ସାସ୍ତ୍ରୁ ରାସାତାମାନାତ୍, ମାପୁରୁ ଇର୍ହାନ୍, ମାପ୍ ନିଜେ ଦୁତ୍ତିଙ୍ଗ୍ ମି ଆଗତି ପୋକ୍ତାମାନାପ୍, ଝାନ୍ ମି ଆଗତି ମି ସାରି ତିଆର୍ କିନାନ୍, ଇୟାକାନ୍ ଆୟା ଜୋହନ ।

୨୮ ନାନ୍ ମିଙ୍ଗୁଁ ସତ୍ତ୍ୱ ଇଜିନା, “ଆଇମାମାନ୍ ଜନମ୍ ଆତି ଲୋଇରାନ୍ ଜୋହନ ମାଣାନ୍ ଆମାକାନ୍ ପେରିକାନ୍ ସିଲେନ୍; ଆତିଙ୍ଗ୍ବା ମାପୁରୁଦି ରାଜିଦୁ ଆମାକାନ୍ ଇସ୍ତ୍ରକାନ୍, ଝାନ୍ ଜୋହନତି ମାଣାନ୍ ପେରିକାନ୍ ।”

୨୯ ☆ଆମାକାର୍ ଇୟାଞ୍ଜି ମାଟା ଝେନ୍ଜି ମାର୍ଆର୍, ଝାର୍, ବିସେସ୍ କି ସିସ୍ଟୁ ଲୋସ୍ତନିକାର୍, ମାପୁରୁଦି ଟକ୍ ଦାବିଞ୍ଜି ପୁରାକିଜି ଜୋହନତି ମାଣ୍ଡୁ ତୁବନ୍ ଅତାମାର୍ଆର୍ ।

୩୦ ମାତର୍ ପାରୁସିର୍ ନି ଦାର୍ମ୍ବଗୁରୁ ଝାରି ଜିବନ୍ ଉଣ୍ଡିଙ୍ଗ୍ ମାପୁରୁଦି ଉଦେସ୍ତିଙ୍ଗ୍ ମାନାଏଶ୍ୱା ଜୋହନ ମାଣ୍ଡୁ ତୁବନ୍ ଅଏତା ମାର୍ଆର୍ ।

୩୧ ଜିସୁ ମାରି ଇର୍ଆନ୍, ଆରିଙ୍ଗ୍ ନାନ୍ “ଇୟା ଆଜିକାଲ୍ତି ଲୋକାଙ୍ଗ୍ ଏମେତାନିଞ୍ଜାଲେ ତୁସ୍ତା, ମାରି ଝାର୍ ଏଞ୍ଜାଜା ?”

୩୨ ଏମେ କଡର୍ ସାତା ସାତକାଦୁ ବାସ୍ତସି ନିଜେନିଜେ କୁକ୍ସି ଇନାର୍, ମାପ୍ ମି ଲାକ୍ତୁ ପିରତି ଉକୁତାପ୍, ମିର୍ ଗାଡ୍‌ଏତିଦେର୍, ମାପ୍ ଦୁକ୍ତି ପାଟା ପାରିତାପ୍, ମିର୍ ଆଡାବାଇତିଦେର୍, ଝାର୍ ଝାରି ଞ୍ଜାଜା ।

୩୩ ଇରିଙ୍ଗ୍ ତୁବନ୍‌ସିନି ଜୋହନ ଞ୍ଜାଜି ରୁଟି ତିନ୍‌ଏତାନ୍ ମାରି ଅଙ୍ଗୁରରସ୍ ଉଣ୍ଡୁଏତାନ୍, ମାରି ମିର୍ ଇର୍ଇଦେର୍, ଝାନ୍ ଦୁବାକାସ୍ତ୍ରକାନ୍ ।

୩୪ ମନ୍ଦୁସ୍ୟପୁତ୍ର ଞ୍ଜାଜି ଉଣାନ୍ ତିନାନ୍, ମାରି ମିର୍ ଇଜିନିଦେର୍, ସୁତୁଦୁ, ଝାନ୍ ଅରେନ୍ ପେଟୁ ନି ମଦୁଆ, ସିସ୍ଟୁ ଲୋସ୍ତନିଞ୍ଜାରି ମାରି ପାପି ଲୋକା ତଡ୍ ।

୩୫ ମାତର୍ ଏମେକାର୍ ମାପୁରୁଦି ବୁଦିଦିଙ୍ଗ୍ ମାନାନାର୍, ଝାରି ଜିବନ୍‌ତୁ ତାନି ସତ୍ତ୍ୱ ବିସୟ ପାର୍ମାଣ୍‌ଆତାନ୍ ।

ପାରୁସି ସିମନ୍‌କା ଇନ୍‌ତ୍ର ଜିସୁ

୩୬ ମାରି, ପାରୁସିର ମାଣାନ୍ ଅରେନ୍ ଜିସୁଙ୍କୁ ଖାନିଝାଲେ ଉଣ୍ଡେଙ୍ଗ କୁକତାନ୍ । ଆବେନ୍ ଖାନ୍ ପାରୁସିର ଇନ୍ତ୍ର ଡଗ୍ଲୁଜି ଉଣ୍ଡେଙ୍ଗ ବାସ୍ତାନ୍ ।

୩୭ ☆ମାରି ସୁଡ଼ୁ, ଆୟା ଗାଡ଼ୁ ଅରେଡ଼ ପାପି ଆଇମା ମାର୍ଆଡ଼; ଜିସୁ ଆୟା ପାରୁସିର ଇନ୍ତ୍ର ଉଣ୍ଡେଙ୍ଗ ବାସ୍ତା ମାର୍ଆନ୍, ଇୟାକା ନେସ୍ସି ଖାଦ୍ ଉଣ୍ଡି ସାଟିବୁ ବାସ୍ତା ନିୟୁ ତାତାଡ଼ବୋ,

୩୮ ଝେନ୍‌କା ତରନ୍ ଖାନି ପାଦାମ୍ ଲାକ୍‌ତୁ ନିଲ୍‌ଜି ଆଡ଼ବାଜି ଆଡ଼ବାଜି କାଣେର ଏରତାନ୍ ଖାନି ପାଦାମ୍ ନୋରଜି ନିଜେ ତାଲାଦି କୁକୁଟିଦାନ୍ ତେଲ୍‌ଦେଙ୍ଗ ଆସ୍ତାଡ଼, ମାରି ଖାନି ପାଦାମ୍‌ତିଙ୍ଗ ନୋଣ୍ଡିଝାଲେ ଆୟା ବାସ୍ତା ନିୟୁ ଉସ୍‌ତେଙ୍ଗ ଆସ୍ତାଡ଼ ।

୩୯ ଆକା ସୁଡ଼ୁ, ଆମା ପାରୁସି ଜିସୁଙ୍କୁ କୁକତା ମାର୍ଆନ୍, ଖାନ୍ ମୋନ୍‌ତୁ ମୋନ୍‌ତୁ ଇର୍ଆନ୍, “ଇକାନ୍ ଜଦି ବାବବାଦି ଆନିମାନିକାଈରଙ୍ଗ, ଆରିଙ୍ଗ ଝେନିଙ୍ଗ ଜେ ମୁର୍‌ସିନାଡ଼, ଖାଦ୍ ଏଡ଼ ମାରି ଏଣ୍ଡେସ୍‌ମାରି ଆଇମା, ଖାଦ୍ ଜେ ପାପି ଲୋକ୍ ଇକା ନେସ୍‌ତାନ୍ ମାନ୍ତି ।”

୪୦ ଜିସୁ ଖାନିଙ୍ଗ ଇର୍ଆନ୍, ସିମୋନ୍, ନିଙ୍ଗ ଉଣ୍ଡି ମାଟା ଇନ୍‌ଡ୍ରେଙ୍ଗ ମାନାଡ଼ । ଖାନ୍ ଇର୍ଆନ୍, “ଗୁରୁ ଇନ୍‌ଆଁ ।”

୪୧ ଅରେନ୍ ପେରି ମାଜନ୍ ଲୋକୁ ଲାକ୍‌ତୁରାନ୍ ରିଏର୍ ଲୋକୁ ରୁଣ୍ଡୁ ଅତାମାର୍ଆର୍; ଅରେନ୍ ପାସ୍‌ସୋ ତାରୁଙ୍ଗ* ମାରି ଅରେନ୍ ପସାସ୍ ତିନାରି ରୁଣ୍ଡୁ ତାତାମାର୍ଆର୍ ।

୪୨ ଡେସି ରୁଣ୍ଡୁ ସିଦେଙ୍ଗ ଖାରିଙ୍ଗ ଇନିକା ସିଲେତିଙ୍ଗ ଖାନ୍ ରିଏରି ରୁଣ୍ଡୁ ଡିସ୍‌ତାସିତାନ୍ । ଏନ୍ ଖାରି ବାଣାନ୍ ଏନ୍ ଖାନିଙ୍ଗ ନାଣ୍ଡ ଜିବନ୍‌ନୋନାନ୍ ?

୪୩ ସିମୋନ୍ ଇର୍ଆନ୍, “ନାନ୍ ଅଡ଼୍‌ବିଜିନା,” ଖାନ୍ ଆମାଝାନିନ୍ଦି ନାଣ୍ଡ ରୁଣ୍ଡୁ ଡିସ୍‌ତାନ୍, ଖାନ୍ ଖାନିଙ୍ଗ ଇର୍ଆନ୍, “ନିନ୍ ଟିକ୍ ଝେରତି ।”

୪୪ ମାରି, ଖାନ୍ ଆୟା ଆଇମାଦି ଉଣ୍ଡିଙ୍ଗ ମୋକମ୍ ଡେପ୍‌ସି ସିମୋନ୍‌ତିଙ୍ଗ ଇର୍ହାନ୍, “ଇୟା ଆଇମାଦିଙ୍ଗ ସୁଡ଼ୁନି ? ନାନ୍ ମି ଇନ୍‌ତ୍ର ଖାତା ନିନ୍ନୁ ନା ପାଦାମ୍‌ତି ଉଣ୍ଡିଙ୍ଗ ଏର୍ ସିଏତି, ମାତର୍

☆ ୭:୩୭ ମାତିଉ ୨୬:୬; ମାର୍କ ୧୪:୩; ଜୋହନ ୧୨:୩.
ଲୋକ୍‌ତି ଅର୍ଲେତି କୁଲି ତାରୁଙ୍ଗୁ ସାମାନ୍ ।

* ୭:୪୧ ଉନ୍‌ଡ୍ରୁ ତାରୁଙ୍ଗୁ ଅରେନ୍

ଇୟାକାଡ଼ କାଣେର ଏରତାନ୍ ନା ପାଦାମ୍ବିଜ୍ ନୋରଜି ନିଜେ କୁକୁଟିଦାନ୍ ତେଲିତାଡ଼ ।

୪୫ ନିନ୍ ନାଙ୍ଗ୍ ନଶ୍ତି କୁକ୍ସୋ ଅଇତି, ମାତର୍ ନାନ୍ ଲୋଇ ଖାତିଖାଲେରାନ୍ ଇୟାକାଡ଼ ନା ପାଦାମ୍ବି ନଶ୍ତିଦେଙ୍ଗ୍ ଡିସ୍‌ଏଡ଼ ।

୪୬ ନିନ୍ ନା ତାଲାଦୁ ନିୟ୍ ଉସ୍‌ଏତି, ମାତର୍ ଇୟାକାଡ଼ ନା ପାଦାମ୍ବି ବାସନା ନିୟ୍ ଉସ୍‌ତାଡ଼ ।

୪୭ ଇୟାଉଣ୍ଡିଙ୍ଗ୍ ନାନ୍ ନିଙ୍ଗ୍ ଇଜିନା, ତେନି ଝିଜୁ ପାପ୍ କେମା ଆତାମାନାଡ଼, ଇରିଙ୍ଗ୍ ଖାଦ୍ ନାଶ୍ତି ଜିବନ୍ ନତାଡ଼; ମାତର୍ ଏଙ୍ଗ୍ ଅଲପ୍ କେମା ସିଆଇ ଆନାଡ଼, ଖାନ୍ ଅଲପ୍ ଜିବନ୍‌ନୋନାନ୍ ।”

୪୮ ମାରି, ଜିସୁ ଆୟା ଆଇମାଦିଙ୍ଗ୍ ଇରଥାନ୍, “ନି ପାପ୍ ଝିଜୁ କେମା ଆତାମାନାଡ଼ ।”

୪୯ ଆବେନ୍ନୁ ଖାନିଖାଲେ ଉଣ୍ଡେଙ୍ଗ୍ ବାସ୍ତି ମାର୍‌ଇ ଲୋକୁ ମୋନ୍‌ଡୁ ମୋନ୍‌ଡୁ ଇନ୍‌ଡେଙ୍ଗ୍ ଆସ୍‌ତାର୍, ପାପ୍ ବା କେମା କିଜିନାନ୍ ଜେ ଇକାନ୍ ଏନ୍ ?

୫୦ ମାତର୍ ଜିସୁ ଆୟା ଆଇମାଦିଙ୍ଗ୍ ଇରଥାନ୍, “ନି ବିସ୍‌ବାସ୍ ନିଙ୍ଗ୍ ରକିୟା କିତାମାନାଡ଼, ସାନ୍ତିଦାନ୍ ସାଙ୍ଗ୍‌ଆ ।”

୮

ଜିସୁଖାଲେ ବୁଲାଜିମାର୍‌ହି ଆଇମେକ୍

୧ ଇୟା ଝେନ୍‌କା ଜିସୁ ଗାଡ଼୍ ଗାଡ଼କାଙ୍ଗ୍ ମାରି ନାର୍ ନାର୍‌କାଙ୍ଗ୍ ଝେରସି ମାପୁରୁଦି ରାଜିଦି ନେଗିକାବୁର୍ ପ୍ରଚାର୍ କିଜି ବୁଲାଦେଙ୍ଗ୍ ଆସ୍‌ତାନ୍, ମାରି ବାରଲୋକ୍ ସିସୁର୍ ଖାନି ଖାଲେ ମାର୍‌ହାର୍,

୨ ☆ମାରି ଏମେ ଆଇମେକ୍ ମାଣାନ୍ ତାଗ୍‌ଇ ଆମ୍ବା ମାରି ରୋଗ୍‌ଦାନ ନେଗେଶ୍ ଆତେ ମାର୍‌ଏ, ଖାକ୍ ବା ଖାନିଖାଲେ ମାର୍‌ଏ, ମରିୟମ୍ ଆମାତାନିଙ୍ଗ୍ ମଗ୍‌ଦଲିନି ଇଜିମାର୍‌ଆର୍, ଏମେତାନି ମାଣ୍ଡୁକୁ ସାତଗୋଟା ଦୁବେଙ୍ଗ୍ ସପ୍‌ତା ମାର୍‌ହାର୍ ।

୩ ହେରୋଦି ଗୁମ୍‌ସ୍ତା କୁଜାଦି ଆଡ଼ି ଜୋହାନା, ସୋସନା, ମାରି ନାଶ୍ତି ଆଇମେକ୍ ଖାନିଖାଲେ ମାନଜି ନିଜେ ନିଜେଦି ସମ୍ପତ୍ତି ସିଇଜି ଜିସୁ ନି ଖାନି ସିସୁରି ସେବା କିଜିମାର୍‌ଏ ।

☆ ୮:୨ ମାତିଉ ୨୭:୫୫,୫୬; ମାର୍କ ୧୫:୪୦,୪୧; ଲୁକ ୨୩:୪୯.

ଓଡ଼ିଆ ଓଡ଼ିଆ କାତା

(ମାତିଉ ୧୩:୧-୯; ମାର୍କ ୪:୧-୯)

୪ ନାଶ୍ଟ ଲୋକ ଉଣ୍ଡେ ମାନୁ ଆଜିମାରି ଗାଡ଼ ଗାଡ଼କାଣ୍ଡକୁ ଲୋକ
ଝାନି ଲାକଡ଼ୁ ଝାଡ଼ାର, ଜିସୁ ଇୟା କାତା ଇର୍ହାନ,

୫ ଅରେନ୍ ଓଡ଼ିଆ ଓଡ଼ିଆକାନ ନିଜେଦି ଓଡ଼ିଆ ଓଡ଼ିଆତେଙ୍ଗ ସତାନ ।
ଝାନ ଓଡ଼ିଆ ଓଡ଼ିଆ ଏସଡ଼ ସାରଦୁ ଆରତେ ମାରି ପାଦାମ୍ ଆଡ଼ଗି
ମାଡ଼ତାର, ମାରି ବାଦଡ଼ି ପଟିଙ୍ଗ ଆୟାଓଡ଼ିଆ ତିରଏ ।

୬ ମାରି ଏସ ଓଡ଼ିଆ ଉଣା ସିକ୍‌ଲାମାନ ପିଡ଼ିପି ବୁମିଦୁ ଆରତାଡ଼, ମାରି
ଗାଜାଆଜି ସିକ୍‌ଲା ଅଲ୍ ସିଲେତାଡ଼ଆକା ଝାଡ଼ତାସରାଡ଼ ।

୭ ମାରି ଏସ ଓଡ଼ିଆ ସାମ୍‌କା ଦୁପା ଲୋଇ ବା ଆରତାଡ଼, ମାରି
ସାମ୍‌ମାରାକ୍ ତାନି ଝାଲେ ପିରିଜି ଆୟାଓଡ଼ିଆଦିଙ୍ଗ ତିରିତାଡ଼ ।

୮ ଆୟା ଏସ ଓଡ଼ିଆ ନେଗି ବୁମିଦୁ ଆରତାଡ଼, ମାରି ପିରିଜି ସୟେ
ଗୁଣ୍ଡ ପଲ୍ ଆସତାଡ଼ । ଝାନ ଇକା ଇନ୍‌ବୁ ଇନ୍‌ବୁ ନାଶ୍ଟ ଆଉଲି ଆଜି
ଇର୍‌ଆନ୍, “ଆମାଝାନିଙ୍ଗ ଝେନ୍‌ଡ୍ରେଙ୍ଗ ଗିତଣିଙ୍ଗମାନେ, ଝାନ୍ ଝେନ୍‌ନ୍
।”

କାତାଦି ଉଦେସ୍

(ମାତିଉ ୧୩:୧୦-୧୭; ମାର୍କ ୪:୧୦-୧୨)

୯ ଜିସୁଦି ସିସୁର୍ ଇୟା କାତାଦି ଅର୍ତ୍ତ ଇନିକା ଇଜି ଝେନ୍‌ବାଦେଙ୍ଗ
ଆସତାର ।

୧୦ ଆବେର୍ ଝାନ ଇର୍‌ହାନ, ମାପୁରୁଦି ରାଜିଦି ଓଡ଼ିଆ ବିସୟ
ନେସ୍‌ତେଙ୍ଗ ମିଙ୍ଗ୍ ବୁଦି ସିଆତାମାନାଡ଼, ମାଡ଼ର୍ ଆଇଝାରିଙ୍ଗ
କାତାଦାନ୍ ଇଣ୍ଡେଙ୍ଗ ଆନାଡ଼, ଏଣ୍ଡେସ୍ ଝାର ସୁଡ଼ୁ ସୁଡ଼ୁ ସୁଡ଼ୁଦେଙ୍ଗ
ଆର୍‌ଏର୍ ମାରି ଝେନ୍‌ବୁ ଝେନ୍‌ବୁ ବୁଜାଏର୍ ।

ଜିସୁ ଓଡ଼ିଆ ଓଡ଼ିଆ କାତାଦି ଅର୍ତ୍ତ ବୁଜାକିତାନ୍

(ମାତିଉ ୧୩:୧୮-୨୩; ମାର୍କ ୪:୧୩-୨୦)

୧୧ କାତାଦି ଅର୍ତ୍ତ ଇକା । ଓଡ଼ିଆ ମାପୁରୁଦି ବାକ୍ୟ,

୧୨ ମାରି ସାରି ଲାକଡ଼ୁରି ଓଡ଼ିଆ ଇୟାଝାଜା ଲୋକାଙ୍ଗ ବୁଜାକିନାଡ଼,
ଏମେକାର ବାକ୍ୟ ଝେନାର୍, ଆୟାଝେନ୍‌କା ସୟତାନ୍ ଝାଜି, ଏଣ୍ଡେସ୍

ଝାର ବିସବାସ କିଜ ରକିୟା ପୟଏର, ଆୟାଉଣ୍ଡିଙ୍ଗ୍ ଝାରି ଜିବନ୍ତାନ ବାକ୍ୟ ଡଙ୍ଗା କିନା ଅନାତ୍ ।

୧୩ ମାରି, ଏମେକାର୍ ବାକ୍ୟ ଝେନ୍‌ଜି ଝେଡିକାଦାନ୍ ମାନାନାର୍, ଝାର ପିଡିପି ବୁମିଦୁ ଆରତିମାନି ଝିଡୁଦି ସାମାନ୍ । ଆୟା ସିକିୟା ଝାରିମାନୁ ନାଣ୍ଡନେସ୍‌ନି ନେସ୍‌ଇ ମାନିଙ୍ଗ୍, ମାତର୍ ଝାର୍ ଲେଝା ସାଗଏଡାଡଆକା ଝାର୍ ଅଡପ୍ ସମୟ ବିସବାସ୍ କିନାର୍ ମାରି ପରିକା ଝେଡାଦୁ ଆରନା ସନାର୍ ।

୧୪ ମାରି, ସାମ୍ ମାରାକ୍ ଲୋଇ ଆରତି ଝିଡୁ ଇୟାଝାଜା ଲୋକାଙ୍ଗ୍ ବୁଜାକିନାଡ୍, ଏମେକାର୍ ବାକ୍ୟ ଝେନାର୍, ମାତର୍ ଦୁନିଆଦି ସିନ୍ତା ମାରି ଦନ ନି ସୁକ୍ ପୟଜି ଜିବୁ ଜିବୁ ତିଗାନା ସନାର୍ । ନେଗି ପଲ୍ ପାଣ୍ଡିସ୍ କିଏର୍ ।

୧୫ ମାରି, ନେଗି ବୁମିଦୁ ଆରତି ଝିଡୁ ଇୟାଝାଜା ଲୋକାଙ୍ଗ୍ ବୁଜାକିନାଡ୍, ଆମାକାର୍ ନେଗେଣାନ୍ ମାରି ନେଗି ଜିବନ୍ତୁ ବାକ୍ୟ ଝେନ୍‌ଜି ଆୟାକା ଆସ୍‌ସି ଇଡନାର୍ ମାରି ତାଟାମ୍‌ତାନ୍ ପଲ୍ ଆସ୍‌ନାଡ୍ ।

ଅତି ଆଡଗି ଦିଝା

(ମାର୍କ ୪:୨୧-୨୫)

୧୬ ☆ଆମାକାର୍ ଦିଝା କାସିସ୍ କିଜ ସାଟିଦାନ୍ ପିଡିକ୍‌ସ ଇଡେଏନ୍, ମାରି କାଟେଲ୍ ଆଡଗି ଇଡେଏନ୍, ମାରି ଦିଝା ଇଡନି ବାଡି ମୁସ୍‌କୁ ଇଡିନାନ୍, ଏଣ୍ଡେସ୍ ଡଗ୍‌ଗିନି ଲୋକୁ ସୁଡୁଦେଙ୍ଗ୍ ଆଟନାର୍ ।

୧୭ ☆ମାତର୍ ଆମାକା ନେସିଇକା, ଇୟାଝାଜା ନେସିଇ ବିସୟ ଇନିକା ସିଲେଡ୍, ମାରି ଆମାକା ଝେଙ୍ଗାଜି ତରାଇଆଏଡ୍, ଇୟାଝାଜା ନେସେଇ ବିସୟ ଇନିକା ସିଲେଡ୍ ।

୧୮ ☆“ମାରି, ଏଣ୍ଡେସ୍ ଝେନ୍‌ଜିନିଦେର୍, ଆୟା ବିସୟତାନ୍ ଜାଗାର୍‌ତା; ଇରିଙ୍ଗ୍ ଆମାଝାନିଦି ମାନାଡ୍, ଝାନିଙ୍ଗ୍ ସିଆଇ ଆନାଡ୍, ମାରି ଆମାଝାନିଙ୍ଗ୍ ସିଲେଡ୍, ଝାନ୍ ଆମାକା ନିଜେଦି ମାନାଡ୍ ଇଜି ମନେକିନାର୍, ଆୟାକା ବା ଝାନିବାଣାନ୍ ଅଆନାଡ୍ ।”

☆ ୮:୧୬ ମାଡିଉ ୫:୧୫; ଲୁକ ୧୧:୩୩.

☆ ୮:୧୭ ମାଡିଉ ୧୦:୨୬; ଲୁକ ୧୨:୨.

☆ ୮:୧୮ ମାଡିଉ ୨୫:୨୯; ଲୁକ ୧୯:୨୭.

ଜିସୁସ୍ ଯାଯା ନି ତଡ଼ାନ୍‌କୁ

(ମାତିଉ ୧୨:୪୭-୫୦; ମାର୍କ ୩:୩୧-୩୫)

୧୯ ଜିସୁସ୍ ଯାଯା ନି ତଡ଼ାନ୍‌କୁ ଖାନିଲାକ୍‌ତୁ ଖାତାର୍, ମାତର୍ ଲୋକାଗୋଲିଦି ଉଣ୍ଡିଙ୍ଗ୍ ଖାନି ଖାଲେ ବେଟ୍ ଆଦେଙ୍ଗ୍ ଆର୍‌ଏଜି ମାର୍‌ହାର୍ ।

୨୦ ଆବେଟ୍ ଖାନିଙ୍ଗ୍ ଏନ୍ ଅରେନ୍ ଇୟା କାରୁର୍ ସିତାନ୍, ମି ଯାଯା ନି ତଡ଼ାନ୍‌କୁ ନି ଖାଲେ ବେଟ୍ ଆଦେଙ୍ଗ୍ ବଦା କିଜି ଆଡ଼ରେ ନିଲ୍‌ତାମାନାର୍ ।

୨୧ ମାତର୍ ଖାନ୍ ଖାରିଙ୍ଗ୍ ଇର୍‌ଆନ୍, “ଆମାକାର୍ ମାପୁରୁଦି ବାକ୍ୟ ଖେନାର ମାରି ମାନାନାର୍, ଖାର୍ ନା ଯାଯା ନି ତଡ଼ାନ୍‌କୁ ।”

ଜିସୁ ଗାଲି ପିରୁଦିଙ୍ଗ୍ ତିର୍ କିତାନ୍

(ମାତିଉ ୮:୨୩-୨୬; ମାର୍କ ୪:୩୫-୪୧)

୨୨ ଆୟା ଖେଡ଼ାଦୁ ଅରନେଣ୍ଡେ ଜିସୁ ମାରି ଖାନି ସିସୁର୍ ଉଣ୍ଡି_ ତଙ୍ଗାଦୁ ଏକ୍‌ତାର୍, ମାରି ଖାନ୍ ଖାରିଙ୍ଗ୍ ଇର୍‌ହାନ୍, “ରାଦୁ, ସାମ୍‌ଦୁରୁତି ଆୟା ପାଡ଼ି ସନାଟ୍ ।” ଆବେଟ୍ ଖାର୍ ଏରଜାଜ୍ କୁତାରଡ଼ିସିତାର୍ ।

୨୩ ମାତର୍ ଖାର୍ ଏରଜାଜ୍‌ତୁ ସନି ଖେଡ଼ାଦୁ ଖାନ୍ ତରିତାମାର୍‌ହାନ୍ । ଆୟା ଖେଡ଼ାଦୁ ସାମ୍‌ଦୁରୁତୁ ଗାଲି ଆତାଡ଼, ମାରି ଖାରି ତଙ୍ଗାଦୁ ଏରୁ ପୁରୁନ୍ ଆଦେଙ୍ଗ୍ ଆରାମ୍‌ଆତେ ମାରି ଖାର୍ ବାଦାଦୁ ପଡ଼େଆତାର୍ ।

୨୪ ଆବେନ୍‌ ସିସୁର୍ ଲାକ୍‌ତୁ ଖାଜି ଜିସୁଙ୍ଗ୍ ନିକ୍‌ସି ଇର୍‌ହାର୍, “ଏ ଗୁରୁ, ଏ ଗୁରୁ ମାପ୍ ସାତାପ୍ ।” ଇବେନ୍‌ ଖାନ୍ ନିଙ୍ଗ୍ ଜି ଗାଲି ମାରି ନାଣ୍ ସାମ୍‌ଦୁରୁତି ଏରୁଦିଙ୍ଗ୍ ଆଦ୍‌ରିସ୍‌ତାନ୍, ମାରି ଆୟାଖିଜୁ ତିର୍ ଆଜି ସାଡ଼ି ଆତାଡ଼ ।

୨୫ ମାରି, ଜିସୁ ସିସୁରିଙ୍ଗ୍ ଇର୍‌ଆନ୍, “ମି ବିସ୍‌ବାସ୍ ଏମେଦି ?” ମାତର୍ ଖାର୍ ତିଲାଜି ମାରି ଚମ୍‌କେ ଆଜି ନିଜେ ନିଜେଦି ମାନ୍‌ ଇନ୍‌ଡ଼େଙ୍ଗ୍ ଆସ୍‌ତାର୍, “ଇକାନ୍ ଆଡ଼ିଙ୍ଗ୍ ଏନ୍ ଜେ ? ଗାଲି ନି ଏରୁଦିଙ୍ଗ୍ ବା ଆଦେସ୍ ସିଜିନାନ୍, ଗାଲି ନି ଏରୁଡ଼ର୍ ଖାନି ମାଟା ମାନ୍‌ଜିନେ ।”

ଦୁବା ଆସ୍‌ତି ମାରିକାନ୍ ନେଗେଣ୍ଡୁ ଆତାନ୍

(ମାତିଉ ୮:୨୮-୩୪; ମାର୍କ ୫:୧-୨୦)

୨୭ ଖେନକା ଜିସୁ ନି ଖାନି ସିସୁର୍ ଗାଲିଲିଦି ଆଗିଡିରି ଆୟାପାଡିଦି ଗରାସିୟରି ରାଜିଦୁ ଇତାର ।

୨୮ ଖାନ୍ ଏରୁଜାହାଜତାନ୍ ସହସି ପାଡିଦୁ ରେତାନ୍, ଆୟା ଗାଡିତି ଅରେନ୍ ଦୁବାଆସତି ଲୋକୁ ଖାନିଙ୍ ବେଟ୍‌ଆତାନ୍; ଖାନ୍ ନାଣ୍ଟ ଦିନ୍ ସାନ୍ ଆଙ୍ ଆରାଏଣ୍ଟା ମାରି ଇନ୍‌ତ୍ର ମାନ୍‌ଏଣ୍ଟା ଦୁକିଦୁ ମାନ୍‌ଜି ମାର୍‌ଆନ୍ ।

୨୯ ଖାନ୍ ଜିସୁଙ୍କୁ ସୁଡ଼ୁ ଆଉଲି ଆଜି ଖାନି ପାଦାମ୍ ଆଡ଼ଗି ଆରଜି ପେରି ଖେୟଦାନ୍ ଇହାନ୍, “ଏ ପେରି ମାପୁରୁଦି ମାରିନ୍ ଜିସୁ, ନି ଖାଲେ ନାଙ୍ ଇନିକା ମାନାଡ଼ ? ନାନ୍ ନିଙ୍ ମାଡିସକିଜିନା, ନାଙ୍ କାସୁ ସିମା ।”

୩୦ ଇରିଙ୍ ଖାନ୍ ତାଗ୍‌ଲ ଆମ୍‌ଦିଙ୍ ଆୟା ଲୋକାମାଣ୍‌କୁ ସହସ ସନି ଉଣ୍ଟିଙ୍ ଆଦେସ୍ ସିତା ମାହାନ୍ । ଆୟା ଦୁବା ନାଣ୍ଟ ଦେବେଙ୍ ଖାନିଙ୍ ଆସ୍‌ତାମାହାଡ଼, ମାରି ଲୋକୁ ଖାନିଙ୍ ସିକ୍‌ଣିଦାନ୍ ତରସି ଇଡ଼ଜିମାହାଡ଼, ମାତର୍ ଖାନ୍ ତରତିକାଞ୍ଜି ତେଉଜି ପୋକ୍‌ସି ମାର୍‌ଆଡ଼ ଦୁବା ଖାନିଙ୍ ସୁନ୍‌ସାନ୍‌ବାତିଦୁ ଅସିମାହାଡ଼ ।

୩୧ ଜିସୁ ଖାନିଙ୍ ଖେନ୍‌ବାତାନ୍, “ନି ଦର୍ ଇନିକା ?” ଖାନ୍ ଇହାନ୍, “ନା ଦର୍ ବାହିନି; ଇରିଙ୍ ନାଣ୍ଟ ଦୁବେଙ୍ ଖାନିଙ୍ କାସ୍‌ତେ ମାର୍‌ଏ ।”

୩୨ ମାରି, ଖାନ୍ ଏଣ୍ଟେସ୍ ଖାରିଙ୍ ପାତାଲୁଟୁ ସନି ଉଣ୍ଟିଙ୍ ଆଦେସ୍ ସିମାକିନ୍, ଆୟାଉଣ୍ଟିଙ୍ ଖାର୍ ଖାନିଙ୍ ମାଡିସ୍ କିତାର ।

୩୩ ଆବେନ୍‌ ଗର୍‌ନ୍ ଲାକ୍‌ତୁ ଉଣ୍ଟି ପେରି ପାନ୍‌ଣ୍ଟିଙ୍ ମାନ୍‌ସା ସାରାଜିମାର୍‌ଏ, ମାରି ଖାନ୍ ଏଣ୍ଟେସ୍ ତାଗ୍‌ଲ ଆଡ଼ମେଙ୍ ଆୟା ପାଣ୍ଟିଙ୍ ଲୋଇ ଡ଼ଗୁଦେଙ୍ ଉଣ୍ଟିଙ୍ ସାରି ସିତାନ୍, ଆୟାଉଣ୍ଟିଙ୍ ଖାର୍ ଜିସୁଙ୍କୁ ମାଡିସ୍ କିତାର ।

୩୪ ଖାନ୍ ଖାନିକାଙ୍ ସାରି ସିତାନ୍‌ଆକା, ଦୁବେଙ୍ ଆୟା ଲୋକ୍‌ତିବାଣାନ୍ ସହସି ପାନ୍‌ଡ଼ିଙ୍ ଲୋଇ ଡ଼ଗୁତେ; ଆବେନ୍‌ ଆୟା ପାନ୍‌ଡ଼ିଙ୍ ଖିନ୍‌ ଗରନ୍ ଟିପୁଦାନ୍ ଉରୁକ୍‌ସି ସଲ୍‌ସି ସାମ୍‌ଦୁର୍‌ତୁ ଆରଜି ମୁଡ଼ଗୁତେ ସାତେ ।

୩୫ ମିଜି ମାର୍‌ଲ ଲୋକୁ ଆୟା ଗର୍‌ନା ସୁଡ଼ୁ ଉରୁକ୍‌ସି ସଲ୍‌ସି ଗାଡ଼କାଙ୍ ନି ନାରକାଙ୍ ଆକା ଖେରତାର ।

୩୫ ଆବେନ୍ ଲୋକୁ ଗର୍ନା ସୁଡ଼ୁଦେଙ୍ଗ ସହସି ଖାତାର; ମାରି, ଖାର ଜିସୁ ଲାକ୍ତୁ ଖାଜି, ଏମେ ଲୋକାମାଣାନ୍ ଦୁବେଙ୍ଗ ସତେମାରଏ, ଖାନିଙ୍ଗ ନେଗି ଖାତି ପିଡ଼ିଗଜେ ନେଗି ମୋନ୍ତାନ୍ ଜିସୁଦି ପାଦାମ୍ ଆଡ଼ଗି ବାସତିମାରଇକା ସୁଡ଼ୁ ଡିଲାତାର ।

୩୬ ମାରି, ଆମାକାର ଇୟା ଗର୍ନା ସୁଡ଼ୁମାରଆର୍, ଖାର ଆୟା ଦୁବା କାସ୍ତି ଲୋକୁ ଏଣ୍ଡେସ ନେଗେନ୍ ଆତାନ୍, ଆକା ଖାରିଙ୍ଗ ଖେରତାନ୍ ।

୩୭ ଆବେନ୍ ଗରାସିୟରି ରାଜିଦି ଖିଜୁ ତରିଟି ଲୋକା ମାଣାନ୍ ଡିସସି ସନ୍ତେଙ୍ଗ ଜିସୁଙ୍ଗୁ ମାଡ଼ିସକିତାର, ଇରିଙ୍ଗ ଖାର ନାଣ୍ଡ ଡିଲାତାମାରଆର୍; ମାରି, ଖାନ୍ ଉଣ୍ଡି ଏରୁଜାହାଜୁ ଏକସି ଡେସିଖାତାର ।

୩୮ ମାତର୍ ଏମେ ଲୋକାମାଣାନ୍ ଦୁବେଙ୍ଗ ସତେସରଏ ମାରହେ, ଖାନ୍ ଜିସୁଖାଲେ ମାନ୍ତେଙ୍ଗ ମାଡ଼ିସ କିଦେଙ୍ଗ ଆସ୍ତାନ୍;

୩୯ ମାତର୍ ଖାନ୍ ଖାନିଙ୍ଗ ସାଙ୍ଗୁଆ ଇଜି ଇର୍ଆନ୍, “ମି ଇନ୍ତ୍ର ଡେସି ସାଙ୍ଗୁଆ, ମାରି ମାପୁର ନିଙ୍ଗୁ ଇନି ଇନି କାର୍ମୁ କିତାମାନାନ୍, ଆକା ଖିଜୁଖେରଆ ।” ଆବେଣାନ୍ ଖାନ୍ ସଲ୍‌ସି, ଜିସୁ ଖାନିଙ୍ଗ ଇନି ଇନି କାର୍ମୁ କିତାମାରଆନ୍ ଆୟାଖିଜୁ ଗାଡ଼ୁ ଖେରତେଙ୍ଗ ଆସ୍ତାନ୍ ।

ଜାଇରସ୍ତି ଗାଡ଼ସି ଜିନିକା ମାରି ରୋଗୁଆଡ଼ି ଆଇମା ନେଗେଣ୍ଡୁ ଆନିକା

(ମାତିଡ ୯:୧୮-୨୭; ମାର୍କ ୫:୨୧-୪୩)

୪୦ ଏସିଖାଲେ ଜିସୁ ଆୟାପାଡ଼ି ଖାତାନ୍, ନାଣ୍ଡଲୋକ୍ ଖାନିଙ୍ଗ ଖେଡ଼ିକାଦାନ୍ ମାନାତାର, ମାତର୍ ଖିଜେରେ ଖାନିଙ୍ଗ କାପକିଜିମାରଆର୍ ।

୪୧ ମାରି, ସୁଡ଼ୁ, ଜାଇରସ୍ ଦରତି ଅରେନ୍ ଲୋକୁ ଖାତାନ୍; ଖାନ୍ ପାରତନା ଇଲୁଦି ପେରିକାନ୍ ମାରଆନ୍ । ଖାନ୍ ଜିସୁଦି ପାଦାମ୍‌ଆଗଡ଼ି ନିଜେଦି ଇନ୍ତ୍ର ଖାଦେଙ୍ଗ ଖାନିଙ୍ଗ ମାଡ଼ିସ୍ତାନ୍,

୪୨ ମାତର୍ ଖାନି ବାର ବାରସ୍ତି ଅରେଡ଼ନେ ନା ଗାଡ଼ି ମାରଆଡ଼, ମାରି ଖାଦ୍ ସାତାମାରଆଡ଼ । ମାତର୍ ଖାନ୍ ସଲ୍‌ସିମାରଇ ଖେଡ଼ାଦୁ ଲୋକୁ ଖାନି ଖାନି ମୁସ୍‌କୁ ମାର୍‌ସି ସାଜି ମାରଆର୍ ।

୪୩ ନାସ୍ତିଖାଲେ ବାର ବାରସ୍ତୁ ସାନ୍ତି ସୁତୁକ ରୋଗଦି ଅରେଡ୍ ଆଇମା ମାରଆଡ୍, ଏଦକି ନିଜେଦି ଝିନ୍ନୁ ତାରୁଙ୍ଗୁଁ ଝିସ୍ତି ଏବାଣାକୁବା ନେଗେଣ୍ଡୁ ଆଦେଙ୍ଗ୍ ଆଟ୍‌ଏଜି ମାରଆଡ୍, *

୪୪ ଖାଦ୍ ଝେନ୍‌କାରି ପାଡ୍‌କାଦାନ୍ ଖାଜି ଖାନି ଖାତି ଜାଲିଦୁ ମୁଟ୍‌ତାଡ୍, ମାରି, ଆୟାଦାପ୍ରେ ତାନି ସୁତୁକ୍ ଆନି ରଗ୍ ନେଗେନ୍ ଆଡାଡ୍ ।

୪୫ ଆବେନ୍ନୁ ଜିସୁ ଇର୍ହାନ୍, “ଏନ୍ ନାଜି ମୁଟ୍‌ତାନ୍ ?” ମାତର୍ ଝିଜେରେ ସିଲେ ଇଜି ଇର୍ହାନ୍, ପିତର ଇର୍ହାନ୍, “ଏ ଗୁରୁ, ଲୋକୁ ମାଣ୍ଡାସୁଣ୍ଡା ଆଜି ନି ମୁସ୍କୁ ମାର୍‌ସି ସାଜିନାର୍ ।”

୪୬ ମାତର୍ ଜିସୁ ଇର୍ହାନ୍, “ଏନ୍ ଅରେନ୍ ନାଜି ମୁଟ୍‌ତାନ୍, ମାତର୍ ନା ବାଣାନ୍ ସାକ୍ତି ସତାଡ୍ ଇଜି ନାନ୍ ନେସ୍ତା ।”

୪୭ ଏସ୍ତିଖାଲେ ଆଇମାଲୋକ୍ ସୁଡ୍‌ତୁଡ୍ ଜେ, ଖାଦ୍ ମାରାଗ୍‌ଜି ମାନ୍‌ଶ୍ଟେଙ୍ଗ୍ ଆଟେଏତାଡ୍, ନାସ୍ତିଖାଲେ ଖାଦ୍ ତିରଗ୍‌ଜି ତିରଗିଜି ଖାଜି ଖାନି ପାଦାମ୍ ଆଡ୍‌ଗି ଆରଜି, ଇନିଦାନିଙ୍ଗ୍ ଖାନିଙ୍ଗ୍ ମୁଟ୍‌ତାଡ୍, ମାରି ଏଣ୍ଡେସ୍ ଦାପ୍ରେ ନେଗେଣ୍ଡୁ ଆଡାଡ୍, ଆୟାଝିନ୍ନୁ ଲୋକା ଆଗଡି ଇର୍ହାଡ୍ ।

୪୮ ଆବେଟ୍ ଖାନ୍ ତାନିଙ୍ଗ୍ ଇର୍‌ଆନ୍, “ଗାଡି, ନି ବିସ୍‌ବାସ୍ ନିଙ୍ଗ୍ ନେଗେନ୍ କିତାମାନାଡ୍, ସାକ୍ତିଦାନ୍ ସାଙ୍ଗ୍‌ଆ ।”

୪୯ ଜିସୁ ଆୟା ମାଟା ଇନିଖାଲେ ପାର୍‌ତନା ଇନ୍‌ଡ୍ରଣି ପେରିଲୋକା ଇନ୍‌ଡ୍ରଣାନ୍ ଅରେନ୍ ଖାଜି ଇର୍‌ଆନ୍, “ମି ଗାଡି ସାତାଡ୍‌ନି, ଗୁରୁଙ୍ଗ୍ ମାରି କାସୁ ସିମା ।”

୫୦ ମାତର୍ ଜିସୁ ଆୟାକା ଝେନ୍‌ଜି ଜାଈରସ୍‌ତିଙ୍ଗ୍ ଡେସି ଇର୍‌ଆନ୍, “ତିଲାମାଟ୍, ବିସ୍‌ବାସ୍ କିଦୁ, ମାରି ଖାଦ୍ ନେଗେନ୍ ଆନାଡ୍ ।”

୫୧ ମାରି, ଇନ୍‌ଡ୍ର ଖାଜି ପିତର, ଜୋହନ ମାରି ଜାକୁବ, ମାରି ଗାଡିସ୍‌ଦି ଯାୟା ବୁବା ଡିସ୍‌ତିଙ୍ଗ୍ ମାରି ଏୟେଙ୍ଗ୍ ନିଜେଖାଲେ ଲୋଇ ସନ୍‌ଡେଙ୍ଗ୍ ସିଏତାଡ୍ ।

୫୨ ମାତର୍ ଝିଜେରେ ତାନି ଉଣ୍ଡିଙ୍ଗ୍ ଆଡ୍‌ବାଜି ଆଡ୍‌ବାଜି ବକାଦୁ କତାଜି ମାରଆର୍ । ଆବେନ୍ନୁ ଖାନ୍ ଇର୍‌ଆନ୍, “ଆଡ୍‌ବାମାଟ୍; ଖାଦ୍ ସାଏଡ୍, ମାତର୍ ସୁସ୍‌ତାମାନାଡ୍ ।”

* ୮:୪୩ ଏସ ରାସାତିମାନୁ ଇୟା ପଦ୍ ରାସାତିକା ସିଲେଡ୍

୫୩ ମାତର ଖାଦ୍ୟ ସାତାମାନାତ୍ ଇତି ନେସ୍ତିବାଣାନ୍ ଖାର ଜିସୁଙ୍କୁ ସେମାର କିଜିମାରୁଆର୍ ।

୫୪ ମାତର ଖାନ୍ ଆଇଲିଦି କିୟୁ ଆସ୍ସି କୁକ୍ସି ଇରୁଆନ୍, “ଏ ଆଇଲି, ନିଙ୍ଗିଆ ।”

୫୫ ଆବେଟ୍ ତାନି ଜିବନ୍ ଡେସି ଖାତାତ୍, ମାରି ଖାଦ୍ୟ ଆୟାଦାପ୍ରେ ନିଙ୍ଗିତାତ୍, ଜିସୁ ତାନିଙ୍ଗ୍ ଇନିକାବା ଉଣ୍ଡେଙ୍ଗ୍ ସିଦେଙ୍ଗ୍ ଇରୁଆନ୍ ।

୫୬ ଇବେଟ୍ ତାନି ଯାୟା ବୁବା କାବା ଆତାର୍; ମାତର ଆୟା ଗର୍ନାଦି ମାଟାଦିଙ୍ଗ୍ ଏଙ୍ଗ୍ବା ଇନ୍ମାଟ୍ ଇତି ଖାରିଙ୍ଗ୍ ଇରୁଆନ୍ ।



ଜିସୁ ବାର ଲୋକୁ ସିସୁରିଙ୍ଗ୍ ପୋକ୍ତାନ୍

(ମାତିତ ୧୦:୫-୧୫; ମାର୍କ ୬:୭-୧୩)

୧ ଆୟାଖାଲେ ଜିସୁ ବାର ଲୋକୁ ସିସୁରିଙ୍ଗ୍ କୁକ୍ସି ଉନ୍ଡେମାନୁ ଉଣ୍ଡା କିଜି ଖାରିଙ୍ଗ୍ ଖିଜୁ ଦୁବେଙ୍ଗ୍ ଡିସ୍ତେଙ୍ଗ୍, ମାରି ରୋଗ୍ତିଙ୍ଗ୍ ନେଗେଣ୍ଡୁ କିଦେଙ୍ଗ୍ ସାକ୍ତି ମାରି ଅଦିକାର୍ ସିତାନ୍ ।

୨ ମାରି, ଖାନ୍ ଖାରିଙ୍ଗ୍ ମାପୁରୁଦି ରାଜିଦି ନେଗିକାବୁର୍ ଖେରଡେଙ୍ଗ୍ ମାରି ରୋଗ୍ତିମାନି ଲୋକାଙ୍ଗ୍ ନେଗେଣ୍ଡୁ କିଦେଙ୍ଗ୍ ପୋକ୍ତାନ୍,

୩ ମାରି ଖାରିଙ୍ଗ୍ ଇରୁଆନ୍, ମିର୍ ସନିଖାଲେ ବାଡିଗା ନୋ ମଣି ନୋ ରୁଟି ନୋ ତାବୁଙ୍ଗ୍ ଇନିକା ବା ଅମାଟ୍, ବା ରୁଣ୍ଡି ଆଙ୍ଗ୍ ଅର୍ସେ ଅମାଟ୍ ।

୪ ମାରି, ମିଙ୍ଗିଆମା ଇନ୍ଡୁଣିକାର୍ କୁକ୍ନାର୍, ଆୟା ବାଡିଦାନ୍ ଡେସି ରେଇ ସାଦି ଆବେ ତେବାଦୁ ।

୫ ମାରି, ଏସୋ ଲୋକୁ ମିଙ୍ଗିଆମା ଖାନ୍ ଖାଲେ ଲୋକ୍ତି ବିରୁଦ୍ଧତାନ୍ ସାକ୍ତି ସିଦେଙ୍ଗ୍ ଇତି ମି ପାଦାମ୍ବାଣି ଦୁଡି ସାଡୁଦୁ ।

୬ ଆବେଟ୍ ସିସୁର୍ ସଲ୍ସି ଖିଜୁ ତରିନ୍ ନେଗିକାବୁର୍ ଖେରଡାର୍ ମାରି ରୋଗ୍ତିମାନି ନେଗେଣ୍ଡୁ କିଜି କିଜି ନାରକାଙ୍ଗ୍ ନାରକାଙ୍ଗ୍ ସରୁଆର୍ ।

ହେରୋଦ ବାୟା ଆତାନ୍

(ମାତିଉ ୧୪:୧-୧୨; ମାର୍କ ୬:୧୪-୨୯)

୭ ✠ଆୟାଞ୍ଜାଲେ ଗାଲିଲିଦି ସାସନ୍‌କିନି ସାମନ୍ତରାଜା ହେରୋଦ ଇୟାଞ୍ଜିନ୍ ମାଟା ଶ୍ଵେନ୍‌ଜି ବାୟାଆତା ସର୍‌ଆନ୍, ଇରିଙ୍ ଡୁବନ୍‌ସିନି ଯୋହନ ମାରିଡ଼େସିଜିବନ୍ ଆତାମାନାନ୍ ଇଜି ଏର୍ ଏର୍ ଇଜିମାର୍‌ଆର୍ ।

୮ ମାରି, ଏର୍ ଏର୍ ଏଲିୟୁ ତରାଈଆତାମାନାନ୍ ଇଜିମାର୍‌ଆର୍ ମାରି ଆଇକାର ପୁର୍ବେଦି ବାବବାଦିର୍ ଲୋଇ ଅରେନ୍ ସାତିମାଣାନ୍ ଡେସି ନିଙ୍ ତାମାନାନ୍ ଇଜି ଇଜିମାର୍‌ଆର୍ ।

୯ ମାତର୍ ହେରୋଦ ରାଜା ଇର୍‌ଆନ୍, “ଡୁବନ୍‌ସିନି ଜୋହନତି ତାଲା ତୋ ନାନ୍ କଇସ୍‌ତାମାନା, ମାତର୍ ଆମାଞ୍ଜାନି ବିସୟତାନ୍ ନାନ୍ ଇୟାଞ୍ଜା ମାଟା ଶ୍ଵେନ୍‌ଜିନା, ଇକାନ୍ ଏନ୍ ?” ମାରି, ହେରୋଦ ଜିସୁଙ୍କୁ ସୁଡ଼ୁଦଙ୍ ବଦା କିଜିମାର୍‌ଆନ୍ ।

ଜିସୁ ପାସ୍ ହାଜାର ଲୋକାଙ୍ ଉର୍‌ପିସ୍‌ତାନ୍

(ମାତିଉ ୧୪:୧୩-୨୧; ମାର୍କ ୬:୩୦-୪୪; ଜୋହନ ୬:୧-୧୪)

୧୦ ଶ୍ଵେନ୍‌କା ସିସୁର୍ ଡେସିଞ୍ଜାଜି, ଆମାକା ଆମାକା କିତାମାର୍‌ଆର୍, ଆୟାଞ୍ଜିନ୍ ଜିସୁଙ୍କୁ ଶ୍ଵେରତାର୍ । ମାରି, ଞାନ୍ ଆଇମାନ୍ ମାନ୍‌ଡେଙ୍ ଞାରିଙ୍ ଞାନ୍‌ଞାଲେ ଅସି ବେଡ଼ସାଇଦା ଦର୍‌ତି ଗାଡ଼ୁ ସରଆର୍ ।

୧୧ ମାତର୍ ଲୋକ୍ ଓଜେରେ ଆକା ନେସ୍‌ତାରୋ ଞାନ୍‌ଞାଲେ ସନ୍‌ଡେଙ୍ ଆସ୍‌ତାର୍; ମାରି, ଜିସୁ ଜିବନ୍ ନଜି ଞାରିଙ୍ ମାପୁରୁଦି ରାଜିଦି ବିସୟତାନ୍ ଞାରିଙ୍ ଇନ୍‌ଡେଙ୍ ଆସ୍‌ତାନ୍, ମାରି ଆମାଞ୍ଜାରିଙ୍ ରୋଗ୍‌ତାନ୍ ନେଗେଶୁ ଆନିକା ମାର୍‌ଆଡ଼, ଞାରିଙ୍ ନେଗେଶୁ କିତାନ୍ ।

୧୨ ନାସ୍ତିଞାଲେ ଶ୍ଵେଡ଼ା ଆଜି ଞାଜିମାର୍‌ଆର୍; ଆବେଟ୍ ବାର୍ ଲୋକୁ ସିସୁର୍ ଜିସୁ ଲାକ୍‌ଡୁ ଞାଜି ଇର୍‌ହାର୍, “ଲୋକୁ ଏଶ୍ଵେସ୍ ସାରିବେଡ଼ତି ନାର୍‌କାଙ୍ ମାରି ଇସ୍ତିନାର୍‌କାଙ୍ ତେବାନାର୍ ମାରି କାଦି ଉଶ୍ଵେଙ୍ ପୋଇଦେଙ୍ ଆଟ୍‌ନାର୍, ଆୟାଉଶ୍‌ଞ୍ ଞାରିଙ୍ ପୋକ୍‌ଆ, ଇରିଙ୍ ମାଡ଼ ଇବେ ସିମ୍ବା ବାଡ଼ିଦୁ ମାନିକା ।”

✠ ୯:୭ ମାତିଉ ୧୭:୧୪; ମାର୍କ ୮:୨୮; ଲୁକ ୯:୧୯.

୧୩ ମାତର୍ ଜିସୁ ଖାରିଙ୍ଗ୍ ଇର୍ହାନ୍, “ମିର୍ ଖାରିଙ୍ଗ୍ ଉର୍ପିସ୍ କିଦୁ ।”
 ଖାର୍ ଇର୍ହାର୍, “ମା ଲାକତୁ ପାସ୍ ଗୋଟା ରୁଟିଙ୍ଗ୍ ମାରି ରୁଣ୍ଡି ମିନ୍ କାଣ୍
 ନାଣ୍ ସିଲୁ; ଆରିଙ୍ଗ୍ ମାପ୍ ଇନିକା ସନାପ୍ ଇୟାଞ୍ଜିଲୁ ଲୋକା ଉଣ୍ଡିଙ୍ଗ୍
 କାଦି କଣାପ୍ ?”

୧୪ ଇରିଙ୍ଗ୍ ଖାର୍ ୫,୦୦୦ ହାଜାର୍ ମେମାରୁଙ୍ଗ୍ ମାରଆର୍ । ମାରି,
 ଜିସୁ ଖାନି ସିସୁରିଙ୍ଗ୍ ଇର୍ଆନ୍, “ପଟାସ୍ ପଟାସ୍ କିଜି ଖାରିଙ୍ଗ୍ ଦଲ୍
 ଦଲ୍ କିଜି ବାସିସ୍ କିଦୁ ।”

୧୫ ଆବେଟ୍ ଖାର୍ ଆୟାଞ୍ଜାଜା ଓଜେରିଙ୍ଗ୍ ବାସିସ୍ କିତାର ।

୧୬ ମାରି, ଜିସୁ ଆୟା ପାସ୍ ଗୋଟା ରୁଟିଙ୍ଗ୍ ମାରି ରୁଣ୍ଡି ମିନ୍ କୁ ଅସି
 ମୁସ୍ କୁ ତରିନ୍ ସୁଡ଼ୁ ଆୟାଞ୍ଜିଲୁ ଆସିର୍ବାଦ୍ କିତାନ୍, ମାରି ରୁକ୍ସି
 ଲୋକାଙ୍ଗ୍ ବାଟା କିଜି ସିଦେଙ୍ଗ୍ ଇଜି ସିସୁରିଙ୍ଗ୍ ସିତାନ୍ ।

୧୭ ଆବେଟ୍ ଓଜେରେ ତିର୍ଆରୋ ପଟାପାଜିତାର୍, ମାରି ଖାର୍ ଖାରି
 ଲାକତୁ ଏଜିତି ମାର୍ଇ ବାରଗୋଟା ଡାଡ଼ିଙ୍ଗ୍ ଉଣ୍ଡାକିତାର୍ ।

ଜିସୁଙ୍ଗ୍ ପିତର ମାନାତାନ୍

(ମାତିଉ ୧୬:୧୩-୧୯; ମାର୍କ ୮:୨୭-୨୯)

୧୮ ଅର୍ଲେନ୍ ଜିସୁ ଅରେନ୍ ପାରତନା କିନିଞ୍ଜାଲେ ସିସୁର୍
 ଖାନିଞ୍ଜାଲେ ମାରଆର୍, ମାରି ଖାନି ଖାରିଙ୍ଗ୍ ଖେନ୍ ବାତାନ୍, “ନାନ୍ ଏନ୍
 ଇଜି ଲୋକୁ ଓଜେରେ ଇନିକା ଇନାର୍ ?”

୧୯ ☆ଆବେଟ୍ ଖାର୍ ଇର୍ହାର୍, “ତୁବନ୍ସିନି ଜୋହନ, ମାତର୍ ଏର୍
 ଏର୍ ଇନାର୍, ଏଲିୟ, ମାରି ଏର୍ ଏର୍ ଇନାର୍, ପୁର୍ବେଦି ବାବବାଦିରି
 ଲୋଇ ଅରେନ୍ ଜିବନ୍ ଆଜି ନିଙ୍ଗ୍ ତାମାନାନ୍ ।”

୨୦ ଜିସୁ ଖାରିଙ୍ଗ୍ ଖେନ୍ ବାନ୍, “ମାତର୍ ନାନ୍ ଏନ୍ ଇଜି ମିର୍ ଇନିକା
 ଇଜିନିଦେର୍ ?” ପିତର ଇର୍ଆନ୍, “ନିନ୍ ମାପୁରୁଦି କ୍ରିସ୍ତ ।”

ଜିସୁ ନିଜେଦି ଦୁଃଖ୍ ନି ସାନି ବିସୟତାନ୍ ଖେର୍ତାନ୍

(ମାତିଉ ୧୬:୨୦-୨୮; ମାର୍କ ୮:୩୦; ୯:୧)

୨୧ ଆବେଟ୍ ଜିସୁ ଇକା ଏଙ୍ଗ୍ବା ଇନ୍ ମାଟ୍ ଇଜି ଖାରିଙ୍ଗ୍ ଆଟ୍ ଖାଦାନ୍
 ଖେର୍ତାନ୍,

☆ ୯:୧୯ ମାତିଉ ୧୪:୧,୨; ମାର୍କ ୬:୧୪,୧୫; ଲୁକ ୯:୬,୮. ☆ ୯:୨୦ ଜୋହନ ୬:୬୮,୬୯.

୨୨ “ମନୁଷ୍ୟପୁତ୍ରଦିଙ୍କ ନାଣ୍ଡ ଦୁକ୍ ପୋଇଦେଙ୍କ ଆନାଡ଼ ମାରି ନେତାର, ପେରିଜାଜକକୁ ମାରି ସାସ୍ତିର୍ ସେମାର କିଜି ଡାକ୍ନାର, ମାରି ମୁନେଟାନ୍ ମାରିଡ଼େସିଜିବନ୍ ଆଜି ନିଙ୍କୁ ନାନ୍ ।”

୨୩ ☆ନାସ୍ତିଖାଲେ ଜିସୁ ଝିଜେରିଙ୍କ ଇର୍ଆନ୍, ଏନ୍ ଜଦି ନା ଝାଲେ ଝାଦେଙ୍କ ବଦାକିନାନ୍, ଆରିଙ୍କ ଝାନ୍ ନିଜେଦି ଡିସିନ୍, ମାରି ଦିନାମି ନିଜେଦି ଦୁକ୍ କସ୍ତଦିଙ୍କ ପିନ୍‌ଶୁଜି ନା ଝେନ୍‌କା ରାପିନ୍ ।

୨୪ ☆ଇରିଙ୍କ ଏନ୍ ନିଜେଦି ଜିବନ୍‌ତିଙ୍କ ରକିୟା କିଦେଙ୍କ ବଦାକିନାନ୍, ଝାନ୍ ଆକା ଆରାକିନାନ୍, ମାତର୍ ଏନ୍ ନା ଉଣ୍ଡିଙ୍କ ଝାନି ଜିବନ୍ ଆରାକିନାନ୍, ଝାନ୍ ଆକା ରକିୟା କିନାନ୍ ।

୨୫ ମାରି, ଅରେନ୍ ଲୋକୁ ସାରାଦୁନିଆଦିଙ୍କ ଜିଣାଜି ନିଜେଦିଙ୍କ ସାପିସକିନାନ୍ ବା ଆରାନାନ୍, ଆରିଙ୍କ ଝାନି ଇନି ଲାବ୍ ?

୨୬ ଆଦେଙ୍କ ଏନ୍ ନାଙ୍କୁ ମାରି ନା ବାକ୍ୟ ବିସୟତାନ୍ ସେମାର ଆନାନ୍, ମନୁଷ୍ୟପୁତ୍ର ଏସ୍ତିଖାଲେ ବୁବାଝାଲେ, ମାରି ମୁସକୁପୁରତି ପବିତ୍ର ଦୁଡ଼କାଝାଲେ ମହିମାଦାନ୍ ଝାନାନ୍, ନାସ୍ତିଖାଲେ ଝାନ୍ ଝାରି ବିସୟତାନ୍ ସେମାର କିନାନ୍ ।

୨୭ ମାତର୍ ନାନ୍ ମିଙ୍କୁ ସଡ଼ ଇଜିନା, “ମାପୁରୁଦି ରାଜି ସୁଡ଼ିଇ ସାନ୍ଦି ଇବେ ନିର୍ଇ ମାନି ଲୋକା ଲୋଇ ଏସୋ ଲୋକୁ ଏଣ୍ଡେସବା ସାଏର୍ ।”

ଜିସୁଦି ମୁରତି ବାଦ୍‌ଲେ ଆନିକା

(ମାତିଉ ୧୭:୧-୮; ମାର୍କ ୯:୨-୮)

୨୮ ଇୟାଝିକୁ ଗଟାନି ପୁରା ଆର୍ଦିନ୍ ଝେନ୍‌କା ଜିସୁ ପିତର, ଜୋହନ ମାରି ଜାକୁବଙ୍କ ଝାନିଝାଲେ ଅସି ପାର୍ତନା କିଦେଙ୍କ ଇଜି ଗରନ୍‌ଡୁ କୁକ୍‌ତାଅତାନ୍ ।

୨୯ ମାରି, ଝାନ୍ ପାର୍ତନା କିନିଝାଲେ ଝାନି ମୋକମ୍‌ତି ମୁରତି ବାଦ୍‌ଲେ ଆତାଡ଼ ମାରି ଝାନି ଆଙ୍କୁ ଅଡ଼ିନିକା ମାରି ନାଣ୍ଡ ଜାୟ ଆତାଡ଼ ।

୩୦ ମାରି ସୁଡ଼ୁ, ଆୟାଦାପ୍ରେ ମୋସା ନି ଏଲିୟ, ଇୟା ରିଏର୍ ଲୋକୁ ଝାନିଝାଲେ ଝାର୍‌ରିଜିସାଦେଙ୍କ ଆସତାର୍ ।

☆ ୯:୨୩ ମାତିଉ ୧୦:୩୮; ଲୁକ ୧୪:୨୭.
ଜୋହନ ୧୨:୨୫.

☆ ୯:୨୪ ମାତିଉ ୧୦:୩୯; ଲୁକ ୧୭:୩୩;

୩୧ ଖାରି ମୁସକୁପୁରତି ଗୌରବତାନ୍ ତରାଜିମାରୁଆର୍, ଖାର ଜିସୁଖାଲେ ଜିରୁସାଲାମତୁ ଗଟାଦେଙ୍ଗ୍ ମାନି ଖାନି ସାନି ବିସୟତାନ୍ ଖାରଗିଜି ସାଜି ମାରୁଆର୍ ।

୩୨ ନାସ୍ତିଖାଲେ ପିତରୁ ମାରି ଖାନି ତଡ଼କୁ ସୁଜଜିମାରୁଆର୍; ମାତରୁ ଖାର ଏସ୍ତିଖାଲେ ନିଙ୍ଗୁଁ ତାରୁ ଖାନି ମହିମା ମାରି ଖାନିଖାଲେ ନିରୁଇ ମାରୁଇ ଆୟା ରିଏରୁ ଲୋକାଙ୍ଗ୍ ସୁତତୁଆର୍ ।

୩୩ ମାରି, ମୋସା ନି ଏଲିୟୁ ସନ୍ତେଙ୍ଗ୍ ସନିଖାଲେ ପିତର ଜିସୁଙ୍ଗୁଁ ଇର୍ହାନ୍, “ଏ ଗୁରୁ, ମାଡ଼ ଜେ ଇବେ ମାନିକା, ଇକା ନେଗେଶୁ ଆତାଡ଼; ମାପ୍ ମୁତ୍ତି ଗୁଡେଙ୍ଗ୍ ତିଆର୍ କିନାପ୍, ନି ଉଣ୍ଡିଙ୍ଗ୍ ଉନ୍ତ୍ରି, ମୋସାଦି ଉଣ୍ଡିଙ୍ଗ୍ ଉନ୍ତ୍ରି ମାରି ଏଲିୟୁଦି ଉଣ୍ଡିଙ୍ଗ୍ ଉନ୍ତ୍ରି । ମାତରୁ ଖାନ୍ ଇନିକା ଇଜିନାନ୍, ଆକା ନେସଏତାର ।”

୩୪ ପିତର ଇକା ଇନ୍‌ରୁ ଇନ୍‌ରୁ କାଣ୍ଡେକ୍ ବାଦଡ଼ ଇମ୍‌ଜି ଖାତା ଦୋ ଖାରିଙ୍ଗ୍ ବାଦଡ଼ତି ନିଡ଼ଗା ପିଡ଼ିକ୍‌ତାଡ଼, ମାରି ଖାରିଙ୍ଗ୍ ବାଦଡ଼ କେରପ୍‌ନିଖାଲେ ପିତର, ଜୋହନ ମାରି ଜାକୁବ ତିଲାତାର ।

୩୫ ☆ମାରି, ଆୟା ବାଦଡ଼ତାନ୍ ଉଣ୍ଡି ବଲ୍ ଖାତାଡ଼, “ଇକାନ୍ ନା ମାରିନ୍, ନାନ୍ ଝେନିଙ୍ଗ୍ ବାସେକିତାମାନା, ଝେନି ମାଟା ଝେନ୍‌ଆ ।”

୩୬ ମାରି, ଆୟା ବଲ୍ ଖାତି ଝେନିକା ଜିସୁ ଅରେନ୍‌ନେ ତରାଆତାନ୍ । ମାରି, ଖାର ଆଲେତା ମାର୍ହାରୁ, ମାରି ଆମାକା ଆମାକା ସୁତତୁମାରୁଆର୍, ଆୟା ମାଟାଦି ବିସୟ ଏଙ୍ଗ୍‌ବା ଇନ୍‌ଏତାର ।

ତାଗଇ ଦୁବା ଆସତି କଡ଼ଦିଙ୍ଗ୍ ଜିସୁ ନେଗେଶୁ କିତାନ୍

(ମାତିଉ ୧୭:୧୪-୧୮; ମାର୍କ ୯:୧୪-୨୭)

୩୭ ମାରନାଣ୍ଡିଙ୍ଗ୍ ଜିସୁ ନି ଖାନି ମୁଏରୁ ସିସୁରୁ ଗରନ୍‌ତାନ୍ ରେତାଖାତାରୁ, ମାରି ନାଣ୍ଡଲୋକ୍ ଖାଜି ଜିସୁଙ୍ଗୁଁ ମିସତାର ।

୩୮ ମାରି ସୁତଦୁ, ଲୋକା ଲୋଇ ଅରେନ୍ ନାଣ୍ଡ ଆଉଲି ଆଜି ଇରୁଆନ୍, “ଏ ଗୁରୁ, ନାନ୍ ନିଙ୍ଗୁଁ ମାଡ଼ିସ୍ କିଜିନା, ନା କଡ଼ଦିଙ୍ଗ୍ ଦୟା କିଆ, ଇରିଙ୍ଗ୍ ଖାନ୍ ନା ଅରେନେ ମାରିନ୍;

୩୯ ସୁତଆ, ଖାନିଙ୍ଗ୍ ଉଣ୍ଡି ଦୁବା ଆସନାଡ଼, ମାରି ଖାନ୍ ଦାପ୍ରେନେ ଆଉଲି ଆଜି ନିଙ୍ଗୁଁ ନାନ୍, ମାରି ଦୁବା ଖାନିଙ୍ଗ୍ ଇୟାଖାଜା

ତିରପ୍ପନାପୋକନାଡ଼ ଜେ, ଖାନି ଖେୟୁଦାନ ପେପଲ୍ ସନାଡ଼, ମାରି
 ଖାଦ୍ ଖାନିଙ୍ଗ୍ ସିତାରାକାବରା କିଜି କାୟୁଦାନ ସନାସନାଡ଼ ।”

୪୦ ଖାନିଙ୍ଗ୍ ଦୁବା ଡିସିସ୍ତେଙ୍ଗ୍ ଇଜି ନାନ ନି ସିସୁରିଙ୍ଗ୍ ମାଡ଼ିସ୍କିଡ଼ା,
 ମାଡ଼ର୍ ଖାର୍ ଆର୍ଏଡାର ।

୪୧ ଜିସୁ ଖାରିଙ୍ଗ୍ ଇର୍ହାନ, “ଆରେ ଅଡ଼ପ୍ ବିସ୍ବାସିର୍ ମାରି
 ତାରୁଇସାରିଦୁ ସନି କୁଟୁମ୍, ଏସୋଦିନ୍ ନାନ ମି ଖାଲେ ତେବାଜି ମି
 ବ୍ୟବହାର କିନା ? ନି ମାରିନ୍ତିଙ୍ଗ୍ ଇବେ ତାଗା ।”

୪୨ ଖାନ୍ ଖାରୁ ଖାରୁ ଦୁବା ଖାନିଙ୍ଗ୍ ଆଡ଼ଗି ଆର୍ପସି ପୋକ୍ସି
 ବୟୁଜ୍ଜାଡ଼ତାନ ତିରପ୍ତା ପୋକ୍ତାଡ଼, ମାଡ଼ର୍ ଜିସୁ ଆୟା ତାଗିଇ
 ଆମ୍ବାଦିଙ୍ଗ୍ ଆଦ୍ରିସ୍ତାନ ମାରି କଡ଼ଦିଙ୍ଗ୍ ନେଗେନ୍ କିଜି ଖାନିଙ୍ଗ୍
 ତାମେ ବୁବାସି କିଦୁ ସିତାନ ।

୪୩ ଆବେଟ୍ ଖିଜେରେ ମାପୁରୁଦି ପେରିସାକ୍ତି ଉଣ୍ଡିଙ୍ଗ୍ କାବାଆଡାର
 । ମାଡ଼ର୍ ଖାନି କିଡ଼ି ଖିଜୁ ପାଣିଦି ଉଣ୍ଡିଙ୍ଗ୍ ଖିଜେରେ କାବା ଆନିଖାଲେ
 ଜିସୁ ଖାନି ସିସୁରିଙ୍ଗ୍ ଇର୍ଆନ,

ନିଜେ ସାନି ବିସୟତାନ ଜିସୁ ମାରିଡ଼େସି ଇର୍ହାନ

(ମାଡ଼ିଡ଼ ୧୭:୨୨-୨୩; ମାର୍କ ୯:୩୦-୩୨)

୪୪ “ଇୟାଞ୍ଜି ମାଟା ମି ଗିତଣିଆଙ୍ଗ୍ ୱେନ୍ଡୁ; ଇରିଙ୍ଗ୍
 ମନୁସ୍ୟପୁତ୍ର ଲୋକା କିୟୁଦୁ ସର୍ପେ ଆଦେଙ୍ଗ୍ ସଲ୍‌ସିନାନ ।”

୪୫ ମାଡ଼ର୍ ସିସୁର୍ ଆୟାମାଟା ବୁଜାଦେଙ୍ଗ୍ ଆର୍ଏଡାର, ମାରି
 ଆୟାକା ଖାରି ମାଣାନ ମାର୍ଗିତା ମାର୍ଆଡ଼, ଏଣ୍ଡେସ୍ ଆକା ଖାର୍
 ବୁଜାଦେଙ୍ଗ୍ ଆର୍ଏଡିଙ୍ଗ୍ ବା, ମାରି ଖାର୍ ଆୟା ମାଟାଦି ବିସୟତାନ
 ଖାନିଙ୍ଗ୍ ଖେନ୍‌ବାଦେଙ୍ଗ୍ ତିଲାଜି ମାର୍ଆଡ଼ ।

ଏନ୍ ପେରିକାନ ?

(ମାଡ଼ିଡ଼ ୧୮:୧-୫; ମାର୍କ ୯:୩୩-୩୭)

୪୬ ☆ ଖାରି ମାଣାନ ଏନ୍ ପେରିକାନ, ଆୟା ବିସୟତାନ ଖାରି ଲୋଇ
 ଖାର୍ଗିଜି ସାଡାର ।

୪୭ ମାତର ଜିସୁ ଖାରି ମୋନୁଡୁ ଖାରଗିଜିସାନିକା ନେସ୍ତାନନୋ ଅରେନ୍ ଇସି କଡ଼ଦିଙ୍ଗ ତାତାନ୍ ନୋ ନିଜେଦି ଲାକ୍ତୁ ନିଲ୍ପିସ କିତାନ୍ନୋ ଖାରିଙ୍ଗ ଇରଥାନ୍,

୪୮ ☆“ଏନ୍ଆପିନ୍ ନା ଦରତାନ୍ ଇୟା ଇସି କଡ଼ଦିଙ୍ଗ ମାନାନାନ୍, ଖାନ୍ ନାଙ୍ଗ୍ ମାନାନାନ୍, ମାରି ଏନ୍ଆପିନ୍ ନାଙ୍ଗ୍ ମାନାନାନ୍, ଖାନ୍ ନା ପୋକଡ଼ିମାନି ମାଲିକଡ଼ିଙ୍ଗ ମାନାନାନ୍; ଇରିଙ୍ଗ ମି ଖିଜେରି ମାଣକୁ ଏନ୍ ଇସିକାନ୍, ଖାନ୍ ପେରିକାନ୍ ।”

ଏନ୍ ବିରୁଦ୍ଧ ଆଏନ୍ ଖାନ୍ ମି ତରିନ୍

(ମାର୍କ ୯:୩୮-୪୦)

୪୯ ଆବେଟ୍ ଜୋହନ ଇରଥାନ୍, “ଏ ଗୁରୁ, ମାପ୍ ଅରେନ୍ ଖାନିଙ୍ଗ୍ ନି ଦରତାନ୍ ଦୁବା ଡିସିସକିନିକା ସୁଡ଼ତୁପ୍, ମାରି ଖାନ୍ ମା ଦଲ୍ଡିକାନ୍ ଆଏନ୍ଆକା ଖାନିଙ୍ଗ୍ ତେବା କିତାପ୍ ।”

୫୦ ମାତର ଜିସୁ ଜୋହନଡିଙ୍ଗ ଇରଥାନ୍, “ଖାନିଙ୍ଗ୍ ମନା କିମାଟ୍, ଇରିଙ୍ଗ୍ ଏନ୍ ମି ତରିନ୍ ଆଏନ୍, ଖାନ୍ ମି ତରିନ୍ ।”

ଉଣ୍ଡି ସମିରୋଣିୟ ନାର ଜିସୁଙ୍ଗ୍ ମାନାଏତାଡ଼

୫୧ ଖେନ୍କା ଏସ୍ତ୍ରାଲେ ଜିସୁଦି ଆଡ଼ଗିପୁର୍ ଡିସିସି ମୁସକୁପୁର୍ ସନି ଖେଡ଼ା ଆଜି ଖାଜି ମାର୍ଥାଡ଼, ନାସ୍ତ୍ରାଲେ ଜିସୁ ଜିରୁସାଲାମ୍ତୁ ସନ୍ତେଙ୍ଗ୍ ବଦାକିତାନ୍,

୫୨ ଖାନ୍ ଖାନି ଆଗ୍ଡି କାରୁର୍ ଅନିଖାରିଙ୍ଗ୍ ପୋକ୍ତାନ୍ । ଖାର୍ ସଲ୍ସି ଖାନି ଉଣ୍ଡିଙ୍ଗ୍ ତିଆର୍ କିଦେଙ୍ଗ୍ ସମିରୋଣିୟରିଦି ଉଣ୍ଡି ନାର୍ତୁ ସର୍ଥା ଡ଼ୁଗିତାର୍;

୫୩ ମାତର ଖାନ୍ ଜିରୁସାଲାମ୍ତୁ ସନି ଉଣ୍ଡିଙ୍ଗ୍ ବଦା କିତାମାନାନ୍ ଇଜି ନେସିସି ଖାର୍ ଖାନିଙ୍ଗ୍ ମାନାଏତାର୍ ।

୫୪ ଇକା ସୁଡ଼ଡ଼ି ଜାକୁବ ନି ଜୋହନ, ଇୟା ରିଏର୍ ସିସୁର୍ ଇର୍ହାର୍, “ପ୍ରୁ, ଏଲିୟ ବା ଏଣ୍ଡେସ୍ କିତାମାର୍ଥାନ୍, ଆୟାଖାଜା ବାଦଡ଼ତାନ୍ ସିସୁ ଆର୍ଜି ଖାରିଙ୍ଗ୍ ସାପିସ୍ କିପିଡ଼, ଇକା ମାପ୍ ଇନାପ୍ ଇଜି ଇନିକା ନି ବଦା ନୋ ?”

☆ ୯:୪୮ ମାତିଉ ୧୦:୪୦; ଲୁକ ୧୦:୧୭; ଜୋହନ ୧୩:୨୦.

୫୫ ମାତର୍ ଖାନ ମାର୍ଜି ବେସ୍ ସି ଖାରିଙ୍ଗ୍ ଲାଗାତାନ୍ ମାରି
 ଇରଥାନ୍, ମିର୍ ଏଣ୍ଡେସ୍ ନାନି ଆମ୍ବି ଲୋକୁ, ଇକା ନେସ୍ ଏଜିନା
 । ମନୁସ୍ୟପୁତ୍ର ଲୋକାଦି ଜିବନ୍ ସାପିସ୍ କିଦେଙ୍ଗ୍ ରେଏଣ୍ଡୁ ମାତର୍
 ରକିୟା କିଦେଙ୍ଗ୍ ଖାତାମାନାନ୍ । *

୫୬ ତାନିଝେନ୍କା ଖାର ମାରି ଉଣ୍ଡି ନାଟ ସରଥାର ।

ଜିସୁଦି ସିସୁ ଆଦେଙ୍ଗ୍ ବଦାକିନି ଲୋକୁ
 (ମାତିଉ ୮:୧୯-୨୨)

୫୭ ଖାର ସାରିଦୁ ସନିଝାଲେ ଅରେନ୍ ଲୋକୁ ଜିସୁଙ୍ଗ୍ ଇରଥାନ୍,
 “ନିନ୍ ଏମେ ବାଡିଦୁ ସନି, ନାନ୍ ନି ଝେନ୍କା ଝେନ୍କା ଖାନା ।”

୫୮ ଜିସୁ ଖାନିଙ୍ଗ୍ ଇର୍ହାନ୍, “ଗଲୁଦିଙ୍ଗ୍ ତେବାଦେଙ୍ଗ୍ ସାରାଆ
 ମାନାଡ୍, ବାଦଡ୍ଡି ପଟିଦିଙ୍ଗ୍ ତେବାଦେଙ୍ଗ୍ ଜାଲୁ ମାନାଡ୍, ମାତର୍
 ମନୁସ୍ୟପୁତ୍ରଦିଙ୍ଗ୍ ତାଲା ଇଡ୍ଡେଙ୍ଗ୍ ବାଡି ସିଲେଡ୍ ।”

୫୯ ମାରି, ଖାନ ମାରି ଅରେନ୍ ଖାନିଙ୍ଗ୍ ଇରଥାନ୍, “ନା ଝେନ୍କା ରାଆ
 ।” ମାତର୍ ଖାନ ଇରଥାନ୍, “ଆଗ୍ଡି ସଲ୍‌ସୋ ନା ବୁବେଙ୍ଗ୍ ମୁସ୍‌ତେଙ୍ଗ୍
 ଇଜି ନାଙ୍ଗ୍ ସାରି ସିଦା ।”

୬୦ ମାତର୍ ଜିସୁ ଖାନିଙ୍ଗ୍ ଇରଥାନ୍, “ସାତି ଖାରିଙ୍ଗ୍ ନିଜେ ନିଜେଦି
 ସାତି ଲୋକାଙ୍ଗ୍ ମୁସ୍‌ତେଙ୍ଗ୍ ଇଜି ଡିସ୍‌ତୁ, ଇରିଙ୍ଗ୍ ମିର୍ ସଲ୍‌ସୋ
 ମାପୁରୁଦି ରାଜି ପ୍ରଚାର କିଦୁ ।”

୬୧ ମାରି ଅରେନ୍ ବା ଇରଥାନ୍, “ପ୍ରୁ, ନାନ୍ ନି ଝେନ୍କା ଖାନା,
 ମାତର୍ ଆଗ୍ଡି ନା ଇଲ୍‌ତୁ ମାନି ଲୋକାମାଣ୍‌କୁ ନି ଖାଲେ ଖାନି ବିସୟ୍
 ମାଡିସ୍‌କିଦେଙ୍ଗ୍ ନାଙ୍ଗ୍ ସାରି ସିଦା ।”

୬୨ ମାତର୍ ଜିସୁ ଖାନିଙ୍ଗ୍ ଇର୍ହାନ୍, “ଏନ୍ ନାଙ୍ଗେଲ୍ ମେଡିଦୁ କିୟୁ
 ଆସ୍‌ସି ଝେନ୍କା ବେସ୍‌ନାନ୍, ଖାନ ମାପୁରୁଦି ରାଜିଦୁ ଜୋଗ୍ ସିଲେନ୍
 ।”

୧୦

ଜିସୁ ସତୁରି ରୁଣ୍ଡି ଲୋକାଙ୍ଗ୍ ପକ୍‌ତାନ୍

* ୯:୫୫ ଏସ ରାସ୍‌ତିମାନ୍ ସିଲେତ

୧ ଇୟା ଖେନକା ପ୍ରଭୁ ମାରି ସତୁରୁ* ରୁଣ୍ଡି ଲୋକାଙ୍କ ବାସସିକିତାନ ମାରି ନିଜେ ଏମେ ଏମେ ଗାଡ଼କାଙ୍କ ମାରି ବାଡ଼ିଦୁ ସନ୍ତେଜ୍ ବଦାକିତାମାର୍ହାନ, ଆୟା ଆୟା ବାଡ଼ିଦୁ ରିଏର୍ ରିଏର୍ କିଜି ଖାରିଙ୍ ଖାନି ଆଗଡ଼ି ପୋକ୍ତାନ ।

୨ ☆ମାରି, ଜିସୁ ଖାରିଙ୍ ଇର୍ହାନ, ପାସି ନାଣ୍ଡ, ମାତର୍ ପାଣିକିନିକାର୍ ଉଣା; ନିଜେଦି ପାସିକିଡ଼ିଇଦୁ ପାଣିକିନିଖାରିଙ୍ ପୋକ୍ନି ଉଣ୍ଡିଙ୍ ପାସିକିଡ଼ିଇଦି ମାଲିକ୍ତି ଲାକ୍ତୁ ଖେର୍ତୁ ।

୩ ☆ମିର୍ ସାନ୍ତୁ; ସୁଡ଼ୁ, ନୋରେସକା ଲାକ୍ତୁ ମେଣ୍ଡାପିଲେକା ଖାଜା ନାନ୍ ମିଙ୍ ପୋକ୍ସିନା ।

୪ ତାବୁଙ୍ ଆସିନି ମଣି, ମଣି ମାରି ଜୁତେଙ୍ ଅମାଟ୍, ମାରି ସାରିଦୁ ଏଙ୍ଗବା ମାଡ଼ିସ କିମାଟ୍ ।

୫ ମାରି, ଏମେ ଇଲ୍ତୁ ମିର୍ ଡ଼ଗୁନିଦେର୍, ଆଗଡ଼ି ଇନ୍ତୁ, ଇୟା ଇଲ୍ତୁ ଉଣ୍ଡିଙ୍ ସାନ୍ତି ଆପିଟ୍ ।

୬ ମାରି, ଆୟାବାଡ଼ିଦୁ ଜଦି ଅରେନ୍ ସାନ୍ତିଦି ଲୋକୁ ତେବାନାନ୍, ଆଡ଼ିଙ୍ ମି ସାନ୍ତି ଖାନି ମୁସକୁ ବାସାନାଟ୍; ମାତର୍ ଜଦି ସିଲେଟ୍, ଆଦେଙ୍ ଆକା ମି ଲାକ୍ତୁ ଡେସିଖାନାଟ୍ ।

୭ ☆ଖାରିମାନୁ ଆମାକା ମାନାଟ୍, ଆକା ଉଣ୍ଡିଜିନିଜି ଆୟା ଇନ୍ତୁ ମାନ୍ତୁ, ଇରିଙ୍ ପାଣିକିନିକାର୍ ନିଜେଦି କୁଲିଦି ତାବୁଙ୍ ପୋଇଦେଙ୍ ଜୋଗ୍ ମାନାଟ୍ । ଇଲ୍କାଙ୍ ଇଲ୍କାଙ୍ ସଲ୍ମାଟ୍ ।

୮ ମାରି, ଏମେ ଗାଡ଼ତୁ ମିର୍ ଡ଼ଗୁନିଦେର୍ ମାରି ଲୋକୁ ମିଙ୍ ମାନାର୍, ଆବେ ମିଙ୍ ଆମାକା ଉଣ୍ଡେଙ୍ ସିନାର୍, ଆକା ଉଣ୍ଡୁ ।

୯ ଆୟାବାଡ଼ିଦୁ ମାନି ରୋଗ୍ ଲୋକାଙ୍କ ନେଗେଣ୍ଡ କିଦୁ, ମାରି ଖାରିଙ୍ ଇନ୍ତୁ, ମାପୁରୁଦି ରାଜି ମି ଲାକ୍ତୁ ଇଗା ଖାତାଡ଼ିନି ।

୧୦ ☆ମାତର୍ ଏମେ ଗାଡ଼ତୁ ମିର୍ ଡ଼ଗୁନିଦେର୍ ମାରି ଲୋକୁ ମିଙ୍ ମାନାଏର୍, ଆୟା ଦୁଆର୍ଆଙ୍ ସଲ୍ସି ଇନ୍ତୁ,

୧୧ ☆ମି ଗାଡ଼ି ଏମେ ଦୁଡ଼ି ମା ପାଦାମ୍ବାଙ୍କ କାସ୍ତାମାନାଟ୍,

* ୧୦:୧ ଏସ ବାଡ଼ିଦୁ ସତୁରି ମାରି ଏସ ସତୁରି ରୁଣ୍ଡି ଇଜି ରାସାତେ ☆ ୧୦:୨ ମାଡ଼ିଉ ୯:୩୭,୩୮. ☆ ୧୦:୩ ମାଡ଼ିଉ ୧୦:୧୭. ☆ ୧୦:୬ ୧ କରିନ୍ଥୟ ୯:୧୪; ୧ ତିମତି ୫:୧୮. ☆ ୧୦:୧୦ ପ୍ରେରିତ ୧୩:୫୧. ☆ ୧୦:୧୧ ମାଡ଼ିଉ ୧୦:୬-୧୪; ମାର୍କ ୬:୮-୧୧; ଲୁକ ୯:୩-୫.

ଆକାବା ମି ଉଣ୍ଡିଙ୍ଗ ସାଡ଼ସି ସିଜିନାପ; ମାତର ମାପୁରୁଦି ରାଜି ଯେ
ଇଗା ଖାତାଡ଼, ଇକା ନେସସୋ ମାନଡୁ ।

୧୨ ☆ନାନ ମିଙ୍ଗ ଇଜିନା, ଆୟାନାଣ୍ଡିଙ୍ଗରି ଆୟା ଗାଡ଼ଡି ଦଣ୍ଡ
ବାଦଲୁ ସଦମ୍ପତି ଦଣ୍ଡ ଆଟ୍‌ଡେଙ୍ଗ ଆନାଡ଼ ।

ବିସ୍‌ବାସ କିଇ ଗାଡ଼କାଙ୍ଗ ଜିସୁ ଜାଗାଡ଼ଡା

(ମାଡିଉ ୧୧:୨୦-୨୪)

୧୩ ଏ କୋରାଜିନ୍ ନି ଦସ୍ ଏସା ବୟଙ୍ଗର୍ ଆନାଡ଼ ଏ
ବେଡ଼ସାଜଦାଦୁ ବା ନି ଦସ୍ ଏସା ବୟଙ୍ଗର୍ ଆନାଡ଼, ଇରିଙ୍ଗ ମିବାନ୍
ଏମେ ଏମେଦି ସାକ୍ତିଦି ପାଣି କିତାମାନା, ଆୟାଞ୍ଜିକୁ ଜଦି ସୋର
ନି ସିଦନ୍‌ଡୁ କିଆଇଆତାଡ଼ମାନ୍, ଆରିଙ୍ଗ ଖାଟ୍ ଏସୋ ଆଗଡ଼ିରାନ୍
ବାସ୍‌ଡେଙ୍ଗ ଆରାଜି ନିରୁଡୁ ବାସ୍‌ସି ମନ୍‌ଡିଙ୍ଗ ଡେପଡ଼ାର ମାନ୍ ।

୧୪ ବିସାର କିନି ନାଣ୍ଡିଙ୍ଗ ମି ଦସ୍ ବାଦଲୁ ସୋର ନି ସିଦନ୍‌ଡି ଦସ୍
ଆଟ୍‌ଡେଙ୍ଗ ଆନାଡ଼ ।

୧୫ ମାରି, ଏ କପରନାହୁମ୍, ନିନ୍ ଇନିକା ମୁସକୁପୁର୍ ସାନ୍
ପିରଡେଙ୍ଗ ଆଟ୍‌ନି ? ନର୍କ ସାନ୍ ଇଗା ସନି ।

୧୬ ☆ଜିସୁ ଖାନି ସିସୁରିଙ୍ଗ ଇରଥାନ୍, “ଏନ୍ ମି ମାଟା ଖେନାନ୍,
ଖାନ୍ ନା ମାଟା ଖେନାନ୍, ମାରି ଏନ୍ ମିଙ୍ଗ ମାନାଏନ୍, ଖାନ୍ ନାଙ୍ଗ
ମାନାଏନ୍, ଖାନ୍ ନା ପୋକ୍ତିମାନି ମାଲିକ୍‌ଡିଙ୍ଗ ମାନାଏନ୍ ।”

ସତୁରି ରୁଣ୍ଡି ଲୋକୁ ଡେସିଖାନିକା

୧୭ ଆୟାଖେନକା ଆୟା ସତୁରି ରୁଣ୍ଡି ସିସୁର୍ ଖେଡ଼ିକାଦାନ୍
ଡେସିଖାଜି ଇର୍ହାର, “ପ୍ରୁ, ଦୁବେଆଙ୍ଗ ବା ନି ଦର୍ଡାନ୍ ମା ମାଟା
ମାନାଡେ ।”

୧୮ ମାତର ଜିସୁ ଖାରିଙ୍ଗ ଇରଥାନ୍, “ମିରସ୍‌ନିଖାଜା ମୁସକୁପୁରଡାନ୍
ସୟଡାନ୍ ଆରନିକା ନାନ୍ ସୁଡ଼ୁ ।

୧୯ ସୁଡ଼ୁ, ନାନ୍ ମିଙ୍ଗ ସାରାସ୍ ନି ସରକୁପି ମୁସକୁ ବୁଲାଦେଙ୍ଗ
ଅଦିକାର୍ ସିତାମାନା, ମାରି ସାଡୁଦି ଡିକୁ ସାକ୍ତି ମୁସକୁ ବା ଅଦିକାର୍
ସିତାମାନା, ମାରି ଇନିକା ଏଣ୍ଡେସ୍ କିଜି ମି ପାଣିଦିଙ୍ଗ ସେଏଣ୍ଡ କିଦେଙ୍ଗ
ଆଟ୍‌ଏଡ଼ ।

☆ ୧୦:୧୨ ମାଡିଉ ୧୧:୨୪; ମାଡିଉ ୧୦:୧୫. ☆ ୧୦:୧୭ ମାଡିଉ ୧୦:୪୦; ମାର୍କ ୯:୩୭;
ଲୁକ ୯:୪୮; ଜୋହନ ୧୩:୨୦.

୨୦ ତାରୁଆମ୍ଭମେଙ୍କ ଜେ ମି ମାଟା ମାନାନେ, ଆବେ ଖେଡ଼ିକା ଆମାଟ୍, ମାତର୍ ମି ଦର୍ ଯେ ମୁସକୁପୁର୍ ରାସାତାମାନାତ୍, ଆୟା ଉଣ୍ଟିଙ୍କ ଖେଡ଼ିକା ଆଦୁ ।”

ଜିସୁ ଖେଡ଼ିକା ଆତାନ୍

(ମାତିଉ ୧୧:୨୫-୨୭; ୧୩:୧୭-୧୭)

୨୧ ଆୟାଝେନ୍‌କା ଜିସୁ ପବିତ୍ର ଆମ୍ଭାଦିମାଣାନ୍ ଖେଡ଼ିକାଦାନ୍ ପୁରାଆଜି ଇର୍ଆନ୍, “ଏ ବୁବା, ମୁସକୁପୁର୍ ମାରି ଦୁନିଆଦି ପ୍ରବୁ, ନିନ୍ ବୁଦିମାନି ଲୋକାମାଣକୁ ଇୟାଝିନ୍ ବିସୟ ମାରକସି ଇଡ଼ଜି ଇସି କଡ଼ରିମାନ୍ ଖେକ୍ତି, ଇୟାଉଣ୍ଟିଙ୍କ ନି ଦନ୍ୟବାଦ୍ କିଜିନା; ହୁଁ ବୁବା, ଇରିଙ୍କ ଇକା ନି ନାଣ୍ଟ ବଦା ।

୨୨ ☆“ନା ବୁବାଦି ପାଣି ଝିନ୍ ନା କିୟୁଦୁ ସିତାମାନାନ୍; ମାରି, ମାରିନ୍ ଏନ୍, ଇକା ବୁବେଙ୍କ ଡିସତିଙ୍କ ଏନ୍ ନେସଏନ୍, ମାରି ବୁବା ଏନ୍, ଇକା ମାରିନ୍‌ଡିଙ୍କ ଡିସତିଙ୍କ ଏନ୍ ନେସଏପ୍, ମାରି ମାରିନ୍ ଆମାଝାନି ଲାକ୍‌ଡୁ ଝାନିଙ୍କ ତର୍ତେଙ୍କ ୍ବିଦାକିନାନ୍, ଝାନ୍ ନେସନାନ୍ ।”

୨୩ ମାରି, ଜିସୁ ସିସୁରି ତରିନ୍ ମାର୍ଜି ବେସସି ଝାରିଙ୍କ ଇର୍ଆନ୍, “ମିର୍ ଇୟାଝିନ୍ ବିସୟ ସୁଡ଼ୁମାନିଦେର୍ ଆକା ମିର୍ ଦନ୍ୟ ।

୨୪ ନାନ୍ ମିଙ୍ଗ୍ ସଡ଼ ଇଜିନା, ମିର୍ ଆମାକା ଆମାକା ସୁଡ଼ୁନିଦେର୍, ଆୟାଝିନ୍ ଏସୋ ବାବବାଦିର୍ ମାରି ରାଜାର୍ ସୁଡ଼ୁଦେଙ୍କ ବଦାକିତାର୍, ମାତର୍ ସୁଡ଼ୁଆତାର୍; ମାରି, ମିର୍ ଆମାକା ଆମାକା ଝେନ୍‌ଜିନିଦେର୍, ଆୟାଝିନ୍ ଝାର୍ ଝେନ୍‌ଡ୍ରେଙ୍କ ବଦାକିତାର୍, ମାତର୍ ଝେନ୍‌ଆତାର୍ ।”

ନେଟି ସମିରୋଣିୟ ଲୋକ୍ତି କାତା

୨୫ ☆ମାରି, ସୁଡ଼ୁ, ଅରେନ୍ ଦାମ୍‌ଗୁରୁ ନିଙ୍ଗ୍‌ଜି ଜିସୁଙ୍କୁ ପରିକା କିଜି ଝେନ୍‌ବାତାନ୍, “ଏ ଗୁରୁ, ଏସ୍‌କାଙ୍ଗ୍‌ଝିଜିଇ ଜିବନ୍‌ତି ଅଦିକାରି ଆଦେଙ୍କ ନାନ୍ ଇନିକା କିନା ?”

୨୬ ଆବେଟ୍ ଜିସୁ ଇର୍ଆନ୍, “ସାସ୍ତ୍ରୁ ଇନିକା ରାସାଏଡ଼ ? ନିନ୍ ଏଣ୍ଟେସ୍ ପଡ଼ାଜିନି ?”

୨୭ ଜିସୁ ଖାନିଙ୍ଗ୍ ଇର୍ହାନ, “ନିନ୍ ନି ଝିନ୍ତୁ ଜିବନ୍, ଝିନ୍ତୁ ଜିବନ୍, ଝିନ୍ତୁ ଝାଲି, ମାରି ଝିନ୍ତୁ ମନ୍ ସିଜି ପ୍ରବୁ ନି ମାପୁରୁଙ୍ଗ୍ ଜିବନ୍ ନଆ; ମାରି, ମି ଲାକ୍ତୁରି ଲୋକାଙ୍ଗ୍ ନିଜେଦିଙ୍ଗ୍ ଜିବନ୍ନୋତି ଖାଜା ଜିବନ୍ନୋଦୁ ।”

୨୮ ଆବେଟ୍ ଜିସୁ ଖାନିଙ୍ଗ୍ ଇରଥାନ, “ନିନ୍ ସଡ଼ ଇହ୍ ମାନି; ଇକା କିଆ, ଆତିଙ୍ଗ୍ ନିନ୍ ଜିବନ୍ ପୋଇନି ।”

୨୯ ମାତର୍ ଦାମ୍ ସାସ୍ତି ନିଜେଦିଙ୍ଗ୍ ଦାମ୍ ଲୋକୁ ଇଜି ତରତେଙ୍ଗ୍ ବଦାକିଜି ଜିସୁଙ୍ଗ୍ ଖେନବାତାନ୍, “ଆରିଙ୍ଗ୍ ନା ଲାକ୍ତୁମାନିକାନ୍ ଏନ୍ ?”

୩୦ ଜିସୁ ଆୟା ମାଟା ଅସି ଇର୍ହାନ, “ଅରେନ୍ ଲୋକୁ ଜିରୁସାଲମ୍ତାନ୍ ଜିରିହୋଦି ଗାଡ଼ତୁ ସଲ୍ପୁ ସଲ୍ପୁ ତଙ୍ଗାରି କିଦୁ ସେରତାନ୍ । ଖାର ଖାନି ଖାତଗନ୍ଦା ଡିବସ୍ତାଅତାରୋ ମାରି ଡାକ୍ତାରୋ ଖାନିଙ୍ଗ୍ ଅଡ଼ପ୍ଜିବନ୍ମାନବୁ ଡାକ୍ତାର ଡିବ୍ତା ସରଆର୍ ।

୩୧ ଆୟାଖାଲେ ଅରେନ୍ ଜାଜକ ଆୟା ସାରି ସିଜି ସଲ୍ସି ମାରଥାନ, ମାରି ଖାନ୍ ଖାନିଙ୍ଗ୍ ସୁଡ଼ୁ ସାରିଦି ଆଇ ପାଡ଼କା ସିଜି ସର୍ହାନ ।

୩୨ ଆୟାଖାଜା ଅରେନ୍ ଲେବି ବା ଆୟା ବାଡିଦୁ ଖାଜି ଖାନିଙ୍ଗ୍ ସୁଡ଼ୁ ସାରିଦି ଆଇ ପାଡ଼କା ସିଜି ସର୍ଥାନ ।

୩୩ ମାତର୍ ଅରେନ୍ ସମିରୋଣିୟ ଲୋକୁ ଖାନି ଲାକ୍ତୁ ଖାତାନ୍ନୋ ଖାନିଙ୍ଗ୍ ସୁଡ଼ୁ ନାଣ୍ଡ ଦୁଃକ୍ କିତାନ୍,

୩୪ ମାରି ଖାନି ଲାକ୍ତୁ ସଲ୍ସି ଖାନି ଗାଉକାଙ୍ଗ୍ ଝିନ୍ତୁ ନିନ୍ତୁ ଉସ୍ତାନ୍ ମାରି ଅଙ୍ଗୁରରସ୍ ଖାକ୍ସି ଆୟାଝିନ୍ତୁ ଗାଉତୁ ତରତାନ୍, ମାରି ଖାନିଙ୍ଗ୍ ଖାନି ଗଦ ମୁସକୁ ବାସିସକିଜି ଖାନିଙ୍ଗ୍ ଲୋକୁ ରମ୍ମି ଉଣ୍ଡି ଇଲ୍ତୁ ଅତାନ୍ନୋ ଖାନି ସେବା କିତାନ୍ ।

୩୫ ମାରିନାଣ୍ଡିଙ୍ଗ୍ ଖାନ୍ ରୁଣ୍ଡି ଡିନାରି ସପ୍ସି ଲୋକୁ ରମ୍ମି ଇଲ୍ତି ମାଲିକତିଙ୍ଗ୍ ସିଜି ଇରଥାନ, ଖେନି ସେବା କିଆ, ମାରି ଜଦି ନାଣ୍ଡ ଡାବୁଙ୍ଗ୍ କାରସୁ ଆନେ, ଆକା ନାନ୍ ଡେସିଖାନି ଖାଲେ ନିଙ୍ଗ୍ ସିନା ।”

୩୬ ଇୟା ମୁଏରି ଲୋଇ ଏନ୍ ତଙ୍ଗାରି କିଦୁସେରିତି ମାରଇ ଲୋକ୍ତି ପାଡ଼ିରି ଲୋକୁ ଇଜି ଅଡ଼ବିଜିନିଦେର୍ ?

୩୭ ଦାର୍ମ ସାସ୍ତି ଇରଥାନ, “ଏନ୍ ଖାନି ଉଣ୍ଡିଙ୍ଗ କାର୍ମ ତରତାନାନ ଖାନ,” ଜିସୁ ଖାନିଙ୍ଗ ଇରଥାନ, “ସାଙ୍ଗଥା, ନିନ୍ ବା ଆୟାଖାଜା କିଆ ।”

ଜିସୁ ମାର୍ତୀ ନି ମରିୟମ୍ତି ଇଲ୍ଲତୁ ସରଥାନ

୩୮ ଜିସୁ ନି ଖାନି ସିସୁର ସନିଖାଲେ ଉଣ୍ଡି ନାର୍ତୁ ଡରିତାର, ମାରି ମାର୍ତୀ ଦରତି ଅରେଡ୍ ଆଇମା ତାନି ଇନ୍ତୁ ଜିସୁଙ୍ଗ କୁକ୍ତାଡ୍ ।

୩୯ ମରିୟମ୍ ଦରତି ତାନି ଅରେଡ୍ ତାଙ୍ଗ ମାର୍ଥାଡ୍, ଖାଦ୍ ପ୍ରବୁଦି କାଲ୍ଲକା ଆଡ୍ଗି ବାସସି ଖାନି ବାକ୍ୟ ଖେନ୍ତି ମାର୍ଥାଡ୍ ।

୪୦ ମାତର୍ ମାର୍ତୀ ରାନ୍ଧାବାଡା କିଦେଙ୍ଗ ବେସି ତେରେପେତେ ଆଜି ମାର୍ଥାଡ୍; ଆଦେଙ୍ଗ ଖାଦ୍ ଜିସୁ ଲାକ୍ତୁ ଖାଜି ଇର୍ହାଡ୍, “ଏ ପ୍ରବୁ, ନା ତାଙ୍ଗ ଜେ ନା ଅରେଡ୍ତାନି ମୁସ୍କୁନେ ରାନ୍ଧାବାଡା କିନି ବନ୍ତୁ ଡିସ୍ତାମାନାଡ୍, ତାନେ ତରିନ୍ ଇନିକା ନି ମନ୍ ସିଲେଡ୍ ? ଖାଦ୍ ନାଙ୍ଗ ସେବା କିନି ଉଣ୍ଡିଙ୍ଗ ତାନିଙ୍ଗ ଇନ୍ଥା ।”

୪୧ ମାତର୍ ପ୍ରବୁ ତାନିଙ୍ଗ ଇରଥାନ, “ମାର୍ତୀ, ମାର୍ତୀ, ନିନ୍ ନାଣ୍ଡ ବିସୟତାନ ସିନ୍ତା ମାରି ତେରେପେତେ ଆଜିନି,”

୪୨ ମାତର୍ ଉଣ୍ଡି ଜିନିସ୍ ନାଣ୍ଡଦରକାର୍; ମରିୟମ୍ ତାନେ ଉଣ୍ଡିଙ୍ଗ ନେଗି ବିସୟ ଆସ୍ କିତାମାନାଡ୍, ମାରି ଆକା ତାନେମାଣାନ୍ ଡିବିସୋ ଅତେଙ୍ଗ ଆର୍ଏନ୍ ।

୧୧

ଜିସୁ ପାର୍ତନା ବିସୟତାନ ସିକ୍ସା ସିତାନ

(ମାତିଡ ୭:୯-୧୩; ୭:୭-୧୧)

୧ ଅର୍ଲେନ୍ ଜିସୁ ଉଣ୍ଡି ବାଡିତୁ ପାର୍ତନା କିଜିମାର୍ହାନ; ଖାନ ପାର୍ତନା କିତି ଝିସ୍ତିଖେନ୍କା, ଖାନି ସିସୁରି ଲୋଇ ଅରେନ୍ ଖାନିଙ୍ଗ ଇରଥାନ, ଏ ପ୍ରବୁ, ତୁବନ୍ସିନି ଜୋହନ ଏଣ୍ଡେସ୍ ଖାନି ସିସୁରିଙ୍ଗ ପାର୍ତନା କିଦେଙ୍ଗ ଅଜାକିତାନ, ନିନ୍ ବା ଆୟାଖାଜା ମାଙ୍ଗ ପାର୍ତନା କିଦେଙ୍ଗ ଅଜାକିଆ ।

୨ ଆବେଡ୍ ଜିସୁ ଖାରିଙ୍ଗ ଇରଥାନ, ଏସ୍ତିଖାଲେ ମିର୍ ପାର୍ତନା କିନିଦେର୍, ନାସ୍ତିଖାଲେ ଇନ୍ତୁ,

ତୁବା,
ନି ପବିତ୍ର ଦରୁ ପେରିକାଆପିଡ଼ ।
ନି ରାଜି ରାପିଡ଼ ।

୩ ମାଙ୍ଗ୍ ଓଁ ଜିହୁଦିନ୍ ଦରକାର୍ ମାନି କାଦି ସିଦା ।

୪ ମା ପାପ୍ ଓଁ କେମା କିଆ,
ଇରିଙ୍ଗ୍ ମାପ୍ ବା ମା ବିରଦତାନ୍ ପାପ୍ କିତିଝାରିଙ୍ଗ୍ କେମା
କିନାପ୍ ।

ମାଙ୍ଗ୍ ଆଟ୍‌ଝା ପରିକାଦୁ ଆର୍ଦେଙ୍ଗ୍ ସିମା ।

୫ ମାରି, ଜିସୁ ଖାନି ସିସୁରିଙ୍ଗ୍ ଇର୍ଥାନ୍, ମି ଆମାଝାନି ଇୟାଝାଜା
ତଡ଼୍ ମାନାନ୍ ନୋ, ଆମାଝାନି ଲାକ୍ତୁ ମାଜେରନାଡ଼ା ଖାନ୍ ସଲ୍‌ସି
ଇନାନ୍, ଏ ତଡ଼୍, ନାଙ୍ଗ୍ ମୁଣ୍ଡି ରୁଟିଙ୍ଗ୍ ଉଦାର୍ ସିଦା ।

୬ ନା ଅରେନ୍ ଆଇ ନାଟି ତଡ଼୍ ନାବାନ୍ ଖାତାମାନାନ୍, ଖାନିଙ୍ଗ୍
ଉଟ୍‌ପିସ୍‌ତେଙ୍ଗ୍ ନାବାନ୍ ଇନିକା ସିଲେଡ଼ ।

୭ ମାରି ଖାନ୍ ଲୋଇରାନ୍ ଇୟାଝାଜା ଇନାନ୍, ନାଙ୍ଗ୍ କାସୁ ସିମା,
ସେରଲା କେରତାନି, ମାରି ନା କଡ଼ର୍ ନାଝାଲେ ସୁଜ୍‌ଜିନାର୍; ନାନ୍
ନିଙ୍ଗ୍‌ଜି ନିଙ୍ଗ୍‌ ସିଦେଙ୍ଗ୍ ଆଟ୍‌ଏ ।

୮ ନାନ୍ ମିଙ୍ଗ୍ ଇଜିନା, ଖାନ୍ ଆତିଙ୍ଗ୍‌ବା ଖାନି ତଡ଼୍ ଆନାନ୍
ଆକା ନିଙ୍ଗ୍‌ଜି ସିଏନ୍, ମାତର୍ ଖାନ୍ ସେମାର୍‌ଆଏଣ୍ଡା ରିଜା ମୁଜା
ଲୋସ୍‌ତାନ୍‌ଆକା ଖାନ୍ ନିଙ୍ଗ୍‌ଜି, ଖାନିଙ୍ଗ୍ ଏସା ଦରକାର୍, ଖାନିଙ୍ଗ୍
ନାସୋ ସିନାନ୍ ।

୯ ନାନ୍ ବା ମିଙ୍ଗ୍ ଇଜିନା, ଲୋସ୍‌ତୁ, ଆରିଙ୍ଗ୍ ମିଙ୍ଗ୍
ସିଆଇଆନାଡ଼୍; ପୋୟ୍‌ଦୁ, ଆବେଟ୍‌କୁ ମିର୍ ପୋୟ୍‌ନିଦେର୍;
ସେରଲାଦୁ କଡ଼୍‌ତୁ, ଆବେଟ୍‌କୁ ମି ଉଣ୍ଡିଙ୍ଗ୍ ସେରଲା ରେନାସିନାନ୍ ।

୧୦ ଇରିଙ୍ଗ୍ ଏନ୍ ଲୋସ୍‌ନାନ୍, ଖାନିଙ୍ଗ୍ ପୁଟ୍‌ନାଡ଼୍, ଏନ୍ ପୋୟ୍‌ନାନ୍,
ଖାନ୍ ପୋୟ୍‌ଦେଙ୍ଗ୍ ଆଟ୍‌ନାନ୍; ମାରି, ଏନ୍ ସେରଲାଦୁ କଡ଼୍‌ନାନ୍, ଖାନି
ଉଣ୍ଡିଙ୍ଗ୍ ସେରଲା ରେନାସିନାନ୍ ।

୧୧ ମାରି, ମି ଲୋଇ ଇୟାଝାଜା ତୁବା ଏନ୍ ମାନାନ୍ ? ଆମାଝାନିଙ୍ଗ୍
ଖାନି ମାରିସି ମିନି ଲୋସ୍‌ତିଙ୍ଗ୍ ଖାନ୍ ଖାନିଙ୍ଗ୍ ମିନି ବାଦ୍‌ଲୁ ସାରାସ୍
ସିନାନ୍ ?

୧୨ ମାରି କରୁ ଗୁଡ଼ ଲୋସଡ଼ିଙ୍ଗ୍ ଖାନ୍ ଖାନିଙ୍ଗ୍ ସରକୁପି ସିନାନ୍ ନୋ ?

୧୩ ମିର୍ ତାଗଇ ଲୋକୁ ଆତିଙ୍ଗ୍ବା ଏସାଙ୍ଗ୍ ନିଜେ ନିଜେରି କଡ଼ରିଙ୍ଗ୍ ନେଗି ନେଗି ଜିନିସ୍ ସିଦେଙ୍ଗ୍ ନେସ୍ନିଦେର୍, ଆରିଙ୍ଗ୍ ଏମେ ବୁବା ମୁସ୍କୁପୁର୍ତାନ ସିନାନ୍, ଖାନ୍ ଖାନିମାନୁ ଲୋସ୍ନି ଲୋକାଙ୍ଗ୍ ଏସୋ ନାଶୁଖାଜା ପବିତ୍ରଆମ୍ବା ସିନାନ୍ !

ଜିସୁ ନି ବାଆଲ୍‌ଜିବୁଲ୍

(ମାତିଉ ୧୨:୨୨-୩୦; ମାର୍କ ୩:୨୦-୨୭)

୧୪ ଅରଲେନ୍ ଜିସୁ ଖାରଗିଦେଙ୍ଗ୍ ଆର୍‌ଇ ଅରେନ୍ ଲୋକ୍‌ମାଣାନ୍ ଦୁବା ପେର୍‌ଜିମାର୍‌ଆନ୍, ଦୁବା ସତି ସର୍‌ଇ ସ୍ତେନ୍‌କା ଗୁଲା ଲୋକୁ ଖାରଗିଦେଙ୍ଗ୍ ଆର୍‌ତାନ; ଆବେର୍ ଲୋକୁ ସ୍ତେରେ କାବା ଆତାର ।

୧୫ ☆ମାତର୍ ଖାରି ଲୋଇ ଏର୍ ଏର୍ ଇର୍‌ହାର୍, ଜିସୁ ଦୁବେଙ୍ଗ୍ ପେରିକାନ୍ ବାଲ୍‌ଜିବୁଲ୍ ସାଲ୍‌ଦାନ୍ ଦୁବେଙ୍ଗ୍ ଡିସିସ୍‌ନାନ୍ ।

୧୬ ☆ଆଇକାର୍ ଖାନିଙ୍ଗ୍ ଉରିଦୁ ଆର୍‌ପ୍‌ତେଙ୍ଗ୍ ବଦା କିଜିମାର୍‌ଆର୍ । ଆଦେଙ୍ଗ୍ ମାପୁରୁ ଜେ ଖାନିଖାଲେ ମାନାନ୍ ଇୟା ସିନାଦି ଖାଜା ଖାନିଙ୍ଗ୍ ବାଦଡ଼ତାନ୍ ଉଣ୍ଡି କାବାଆନି ପାଣି ତରତେଙ୍ଗ୍ ଇର୍‌ହାର୍ ।

୧୭ ମାତର୍ ଜିସୁ ଖାରି ମନ୍ତି ମାଟା ନେସ୍‌ସି ଖାରିଙ୍ଗ୍ ଇର୍‌ଆନ୍, ଏମେ ଦେସ୍ ବାଗ୍ ଆଜି ନିଜେ ବିରଦ୍‌ତାନ୍ ନିଙ୍ଗ୍‌ନାଡ଼, ଆକା ନାସ୍ ଆନା ସନାଡ଼, ମାରି ଉଣ୍ଡି ଇଲୁ ରୁଣ୍ଡି ବାଗ୍ ଆତିଙ୍ଗ୍ ନାସ୍ ଆନାଡ଼ ।

୧୮ ମାରି, ସୟତାନ୍ ବା ଜଦି ବାଗ୍ ଆଜି ନିଜେ ବିରଦ୍‌ତାନ୍ ନିଙ୍ଗ୍‌ତାନି, ଆତିଙ୍ଗ୍ ତାନି ରାଜି ଏଣ୍ଡେସ୍ ତିରୁଆଜି ତେବାନାଡ଼ ? ନାନ୍ ବାଲ୍‌ଜିବୁଲ୍‌ତି ସାକାଦାନ୍ ଦୁବେଆଙ୍ଗ୍ ଡିସିସ୍‌ନା ଇଜି ମିର୍ ତୋ ଇଜିନିଦେର୍ ।

୧୯ ମାତର୍ ନାନ୍ ଜଦି ବାଲ୍‌ଜିବୁଲ୍‌ତି ସାଲ୍‌ଦାନ୍ ତାଗଇ ଦୁବେଆଙ୍ଗ୍ ପେର୍‌ଜିନା, ଆରିଙ୍ଗ୍ ମି କଡ଼ର୍ ଏମେ ସାକାଦାନ୍ ଖାରିଙ୍ଗ୍ ଡିସିସ୍‌ନାର୍ ? ଆଦେଙ୍ଗ୍ ଖାର୍ ମି ମୁସ୍‌କୁ ବିସାର୍ କିନିକାର୍ ଆନାର୍ ।

୨୦ ସିଲେ, ମାତର ମାପୁରୁଦି ସାକ୍ଷିଦାନ ନାନ ଦୁବେଙ୍ଗ ଡିସିସ୍‌କିନା ମାରି ଇକା ପାରମାଣ୍ ଆଜିନାତ୍ ଜେ ମାପୁରୁଦି ରାଜି ମି ଲାକ୍‌ତୁ ଇଗା ଖାତାଦ୍‌ନି ।

୨୧ ଅରେନ୍ ବପୁମାନି ଲୋକୁ ଆମାସାନ୍ଦି ଜୁଦ୍ କିନି ସାସାପାତି ଆସ୍‌ସି ତିଆର୍ ଆଜି ନିଜେଦି ରାଜି ରକିୟା କିନାନ, ଆୟା ସାନ୍ଦି ଖାନି ଝିକୁ ସମ୍ପତି ନେଗେନ୍ ତେବାନାତ୍ ।

୨୨ ମାତର ଏସ୍ତ୍ରାଲେ ଖାନିମାଣାନ୍ ନାଣ୍ଟ ବପୁଦି ଲୋକୁ ଖାନିଙ୍ଗ୍ ଡାକ୍‌ସି ଜିଣାନାନ୍, ନାସ୍ତ୍ରାଲେ ଏମେ ଜୁଦ୍‌କିନି ସାସାପାତିଦୁ ଖାନି ଆସା ମାର୍‌ଆତ୍, ଆୟାଝିକୁ ଖାନ୍ ରେନା ଅନାନ୍, ମାରି ଖାନି ତଙ୍ଗାକିତି ଜିନିସ୍ ବାଟାକିନା ଅନାନ୍ ।

୨୩ ଏନ୍ ନା ତରିନ୍ ସିଲେନ୍, ଖାନ୍ ନା ସାତୁ; ମାରି, ଏନ୍ ନା ଖାଲେ ଉଣ୍ଟା କିଏନ୍, ଖାନ୍ ଇନ୍‌ଙ୍ଗା ଆନିଙ୍ଗା କିନା ପୋକ୍‌ନାନ୍ ।

ତାଗ୍‌ଇଦୁବା ଡେସିଖାନିକା

(ମାତିତ୍ ୧୨:୪୩-୪୫)

୨୪ “ଏସ୍ତ୍ରାଲେ ଉଣ୍ଟା ତାଗ୍‌ଇଦୁବା ଅରେନ୍ ଲୋକୁ ମାଣାନ୍ ସତିସର୍‌ଇ ଖେନ୍‌କା ଏରୁସିଲି ବାତିଙ୍ଗ୍ ଝିକୁ ବୁଲାଜି ରମ୍‌ଦେଙ୍ଗ୍ ପୟନାତ୍, ମାରି ଖାଦ୍ ରମ୍‌ଦେଙ୍ଗ୍ ବାତି ପୋୟଏତିଙ୍ଗ୍ ଇନାତ୍, ନାନ୍ ଏମେ ଇନ୍‌ତ୍ରାଣାନ୍ ସତା ଖାତାମାର୍‌ଆ, ନା ଆୟା ଇନ୍‌ତ୍ରା ମାରିଡେସି ସନା ।

୨୫ ମାରି, ଖାଦ୍ ଖାଜି ଆୟା ଇଲୁ ନେଗ୍ରେଣ୍ଟା ସିପାତିକା ମାରି ଝିକୁ ରସ୍‌ତିକା ସୁଣାତ୍ ।

୨୬ ନାସ୍ତ୍ରାଲେ ଖାଦ୍ ସଲ୍‌ସି ତାନେମାଣାନ୍ ନାଣ୍ଟ ତାଗ୍‌ଇ ମାରି ସାତ୍‌ଗୋଟା ଆଡ୍‌ମେଙ୍ଗ୍ ଅର୍‌ସେ ଆସ୍‌ନା ଖାନାତ୍, ମାରି ଖାକ୍ ଆବେ ଡଗ୍‌ନେ ନୋ ଆବେ ବାସାନେ, ମାରି ଆୟା ଲୋକ୍‌ତି ପାର୍‌ତୁମ୍‌ତି ଦସ୍ ବାଦ୍‌ଲୁ ଖେନ୍‌କାରି ଦସ୍ ନାଣ୍ଟ ତାଗ୍‌ଇକା ଆନାତ୍ ।”

ସତ୍ ଖେଡିକା

୨୭ ଜିସୁ ଇୟା ମାଟା ଇନିଞାଲେ ଲୋକା ଲୋଇରାନ୍ ଅରେଡ୍ ଆଇମା ନାଣ୍ଟ ଆଉଲି ଆଜି ଇର୍‌ହାତ୍, “ଦନ୍‌ୟ ମି ଯାୟା, ଏଦ୍ ନିଙ୍ଗ୍ ଜନମ୍ ସିତାମାନାତ୍ ମାରି ଆୟା ପାଲ୍, ଆମାଟ୍‌କୁ ନିନ୍‌ ଉତିମାନି ।”

୨୮ ଜିସୁ ଇର୍ଥାନ୍, “ସିଲେ, ଏମେକାର ମାପୁରୁଦି ବାକ୍ୟ ଖେନାର, ମାରି ମାନାନାର, ଖାର ଦନ୍ୟ ।”

କାବାଆନି ପାଣି ଉଣ୍ଡିଙ୍ଗ ଦାବି
(ମାତିଉ ୧୨:୩୮-୪୨)

୨୯ ☆ଲୋକ୍ ଖିଜେରେ ମାୟା ମାୟା ଆଜି ଜିସୁ ଲାକ୍ତୁ ଉଣ୍ଡାଜି ମାର୍ତ୍ତ ଖାଲେ ଖାନ୍ ଇନ୍ତେଙ୍ଗ ଆସ୍ତାନ୍, ଇୟା ଦିନ୍ତି ମେମାରିଏନ୍ ତାର୍ତ୍ତକାର୍; ଇକାର୍ ସିନା ପୋଇନାର୍, ମାତର୍ ଜୁନସ୍ତି ସିନା ଡିସ୍ତିଙ୍ଗ ଆଇ ଆମା ସିନା ଖାରିଙ୍ଗ୍ ସିଏର୍ ।

୩୦ ମାତର୍ ଜୁନସ୍ ଏଣ୍ଡେସ୍ ନିନିବିଦିଝାରି ଉଣ୍ଡିଙ୍ଗ୍ ସିନାଦିଝାଜା ଆତାନ୍, ମନୁସ୍ୟପୁତ୍ର ବା ଆୟାଝାଜା ଇୟା ଜୁଗ୍ତି ଲୋକା ଉଣ୍ଡିଙ୍ଗ୍ ଆନାନ୍ ।

୩୧ ସିବା ଦେସ୍ତି ରାଣି ବିଚାର୍ତୁ ଇୟା ଦିନ୍ତୁ ମେମାର୍ତ୍ତା ଖାଲେ ନିଙ୍ଗ୍ ଜି ଇୟାଝାରିଙ୍ଗ୍ ଦୋସ୍ ଆସିସ୍ କିନାର୍, ମାତର୍ ସଲମନ୍ତି ବୁଦିଦି ମାଟା ଖେନ୍ତେଙ୍ଗ୍ ଇଜି ଦୁନିଆଦି ଆକ ଦେସ୍ତାନ୍ ଖାଦ୍ ଖାତାମାର୍ତାତ୍, ମାରି ସୁଡ୍ତୁ, ସଲମନ୍ତି ଡିସ୍ତିଙ୍ଗ୍ ପେରି ବିସୟ୍ ଇୟା ବାଡିଦୁ ମାନାତ୍ ।

୩୨ ନିନିବିଦି ଲୋକ୍ ବିଚାର୍ତୁ ଇୟା ଦିନ୍ତି ମେମାର୍ତ୍ତା ଖାଲେ ନିଙ୍ଗ୍ ଜି ଇୟାଝାରିଙ୍ଗ୍ ଦସ୍ କିନାର୍, ମାତର୍ ଖାର୍ ଜୁନସ୍ତି ପ୍ରଚାର୍ତାନ୍ ମନ୍ ଡେପ୍ତା ମାର୍ତାତ୍, ମାରି ସୁଡ୍ତୁ, ଜୁନସ୍ତି ଡିସ୍ତିଙ୍ଗ୍ ପେରି ବିସୟ୍ ଇବେନ୍ନୁ ମାନାତ୍ ।

ମେନ୍ଦଲ୍ତି ଦିଝା
(ମାତିଉ ୫:୧୫; ୬:୨୨-୨୩)

୩୩ ☆“ଏନ୍ ଦିଝା କାସିସ୍ କିଜ ଆଡିକ୍ସି ବାକ୍ତାବୁ ଇଡ୍‌ଏନ୍ ମାରି ଅତି ଆଡ୍‌ଗି ଇଡ୍‌ଏର୍, ମାତର୍ ଦିଝା ଇଡ୍‌ନି ବାଡିଦୁ ଇଡ୍‌ନାର୍, ଏଣ୍ଡେସ୍ ଲୋଇ ଡୁଗୁନି ଲୋକ୍ ଜାୟ୍ ସୁଡ୍‌ଦେଙ୍ଗ୍ ଆଟ୍‌ନାର୍ ।

୩୪ ମି କାଶ୍‌ଗା ମେନ୍ଦଲ୍ତି ଦିଝା । ଏସ୍ତିଝାଲେ ମି କାଶ୍‌ଗା ନେଗିକା ତେବାନାତ୍, ନାସ୍ତିଝାଲେ ମି ଖିଜୁ ମେନ୍ଦଲ୍ ବା ଜାୟ୍‌ଝାଜା ଆନାତ୍;

ମାତର ଏସ୍ତ୍ରାଲେ କାଣ୍ଗା ତାଗ୍‌ଇକା ମାନାଡ଼, ନାସ୍ତ୍ରାଲେ ମି
ମେନ୍‌ଲ୍ ବା ସିକାଟିଝାଜା ଆନାଡ଼ ।

୩୫ ମାରି ଜାଗାଡ଼ତା, ଏଣ୍ଡେସ୍ ମି ଜିବନ୍‌ଡି ଜାୟ୍ ସିକାଟି ଆଏଡ଼ ।

୩୬ ଜଦି ମି ଝିଜୁ ମେନ୍‌ଲ୍ ଜାୟ୍ ଆନାଡ଼ ମାରି ଆବେଣି ଇନି ବାଡିଦୁ
ସିକାଟି ତେବାଏଡ଼, ଆଡିଙ୍ଗ୍ ଦିଝା ଏଣ୍ଡେସ୍ ଜାୟ୍‌ତୁ ମିଙ୍ଗ୍ ଜାୟ୍
ସିନାଡ଼, ଆୟାଝାଜା ମି ଝିଜୁ ମେନ୍‌ଲ୍ ଜାୟ୍ ଆନାଡ଼ ।”

ଜିସୁ ପାରୁସି ନି ସାସ୍ତ୍ରିଙ୍ଗ୍ ବିରୁଦ୍‌କିତାର୍

(ମାତିଡ ୨୩:୧-୩୬; ମାର୍କ ୧୨:୩୮-୪୦; ଲୁକ ୨୦:୪୫-୪୭)

୩୭ ଜିସୁ ମାଟା ଇନ୍‌ଜିମାର୍‌ଇ ଝାଲେ ଅରେନ୍ ପାରୁସି ଝାନିଙ୍ଗ୍ ଝାନି
ଇନ୍‌ଡ୍ର ଉଣ୍ଡେଙ୍ଗ୍ କୁକ୍‌ତାନ୍, ମାରି ଝାନ୍ ଇନ୍‌ଡ୍ର ଡ୍ରୁଡାନ୍ ନୋ ଉଣ୍ଡେଙ୍ଗ୍
ବାସ୍‌ତାନ୍ ।

୩୮ ମାତର ଉଣି ଆଗ୍‌ଡି ଝାନ୍ ଜେ ଆଗ୍‌ଡି ଏର୍ ନର୍‌ବାଏନ୍
ମାର୍‌ଆନ୍, ଇକା ସୁଡ଼ୁଟି ଆୟା ପାରୁସି କାବା ଆତାନ୍ ।

୩୯ ଆବେଟ୍ ପ୍ରୁ ଝାନିଙ୍ଗ୍ ଇର୍‌ଆନ୍, ମିର୍ ପାରୁସିର୍ ଗାଦେ ଡ୍ରୁବାଇ
ନି ସାଡ଼ଝାଦି ଆଡ଼ରେ ନର୍‌ନିଦେର୍, ମାତର ମି ଲୋଇ ଡଙ୍ଗ୍‌କିନିପାଣି
ନି ତାଗ୍‌ଇପାଣି ପୁରାମାନାଡ଼ ।

୪୦ ଏ ବୁଦିସିଲିକିଦେର୍, ଏନ୍ ଆଡ଼ରେ ତିଆର୍ କିତାନ୍, ଝାନ୍
ଇନିକା ଲୋଇ ବା ତିଆର୍ କିଏତାନ୍ ?

୪୧ ମି ଲବ୍ରାଦାନ୍ ଆମାକା ଉଣ୍ଡାକିତିମାନିଦେର୍ ଆକା କାକୁଟ୍
ଲୋକାଙ୍ଗ୍ ଦାନ୍ ସିଦୁ ଆରିଙ୍ଗ୍ ମିର୍ ପୁରା ନର୍‌ଆନିଦେର୍ ।

୪୨ ମାତର ଚି, ଦଣ୍ଡ ପୋଇନି ପାରୁସିର୍, ଇରିଙ୍ଗ୍ ମିର୍ ପୋଦିନା,
ଆରୁଦ ମାରି ଝିଜୁଜାତିଦି କୁସାପୁଲା ଦସ୍‌ବାଗ୍‌ତାନ୍ ଉଣ୍ଡି ବାଗ୍
ମାପୁରୁଙ୍ଗ୍ ଦାନ୍ ସିନିଦେର୍, ମାରି ଆଇ ଲୋକାଙ୍ଗ୍ ନ୍ୟାୟ୍ ବିସାରୁଡ଼ୁ
ଦୟା ତରତେଙ୍ଗ୍ ମାରି ମାପୁରୁଙ୍ଗ୍ ଜିବନ୍‌ନୋଦେଙ୍ଗ୍ ବାଣାନିଦେର୍;
ମାତର ଇୟାଝିଜୁ କିନିକା ମାରି ଆଇକା ଝିଜୁ ବାଣାଇକା ମାନାଡ଼ ।

୪୩ “ଚି, ପାରୁସିର୍ ମିର୍ ଦଣ୍ଡ ପୟ୍‌ନିଦେର୍, ଇରିଙ୍ଗ୍ ମିର୍
ପାର୍‌ତନାକିନି ଇଲ୍‌କାଙ୍ଗ୍ ପେରି ବାଡି ମାରି ସାତାସାଉକାଦୁ
ମାଡ଼ିସ୍‌କିନିକା ପୋୟ୍‌ଦେଙ୍ଗ୍ ଅଡ଼ିବିନିଦେର୍ ।

୪୪ ଚି, ମିର ଦଣ୍ଡ ପୟନିଦେର, ଇରିଙ୍ଗ ମିର ତରଇ ମୁସ୍ତି ବାଡ଼ିଦି
ଝାଜା; ତାନି ମୁସ୍ତିକୁ ନେସ୍‌ଏଣ୍ଡା ବୁଲାସାଲାନିକାର ଲୋକୁ ଆକା ମୁସ୍ତି
ବାଡ଼ି ଇଜି ନେସ୍‌ଏର ।”

୪୫ ଆବେନ୍ନୁ ସାସ୍ତିରି ମାଣାନ୍ ଅରେନ୍ ଝାନିଙ୍ଗ୍ ଇର୍ହାନ୍, “ଏ ଗୁରୁ,
ଇକା ଇନ୍‌ଜି ନିନ୍ନୁ ମାଙ୍ଗ୍ ବା ଅପମାନ୍ କିଜିନି ।”

୪୬ ଝାନ୍ ଇର୍ହାନ୍, “ଚି, ସାସ୍ତିର୍ ଯେ ମିର ମିର ବା ଦଣ୍ଡ
ପୋଇନିଦେର, ଇରିଙ୍ଗ ମିର ଲୋକାଙ୍ଗ୍ ନିୟମକୁ ମାନାଦେଙ୍ଗ୍
ଇଜିନିଦେର ମାତର ନିଜେ ମିର ଏସାଙ୍ଗ୍‌ବା ଇବେଣି ଉନ୍‌ଡ୍ରୁ ନିୟମ
ବା ମାନାଦେଙ୍ଗ୍ ସାହାଜ୍ୟକିଇଜିନିଦେର ।

୪୭ ଚି, ମିର ଦଣ୍ଡ ପୟନିଦେର, ଇରିଙ୍ଗ ମିର ବାବବାଦିରି
ମୁସ୍ତି ଗୁଟା ତିଆର କିଜିମାନିଦେର, ଆମାଝାରିଙ୍ଗ୍ ମି
ପୁର୍ବେଦିତକରାଦାଦାର ଝାରିଙ୍ଗ୍ ସାୟାମାର୍‌ଗା ଡାକ୍ତା ମାର୍‌ଆର

୪୮ ମାରି, ମି ପୁର୍ବେଦିତକରାଦାଦାରି ପାଣିଦି ବିସୟତାନ୍ ମିର ସାକି
ଆନିଦେର ମାରି ଆକା ରାଜି ଆଜିନିଦେର; ଇରିଙ୍ଗ୍ ଝାର ଗାଦେ
ବାବବାଦିରିଙ୍ଗ୍ ସାୟାମାର୍‌ଗା ଡାକ୍ତା ମାର୍‌ଆର, ମାତର ମିର ଝାରିଦି
ମୁସ୍ତିବାଡ଼ି ତିଆର କିଜିନିଦେର ।

୪୯ ଆଦେଙ୍ଗ୍ ମାପୁରୁ ବା ନିଜେଦି ବୁଦିଦାନ୍ ଇର୍‌ଆ ମାନାନ୍,
ମାପ୍ ଝାରି ଲାକ୍‌ତୁ ବାବବାଦି ନି ପ୍ରେରିତ ସିସ୍ତୁରିଙ୍ଗ୍ ପୋକ୍‌ନା; ଝାରି
ଲୋଇରାନ୍ ଏଙ୍ଗ୍ ଏଙ୍ଗ୍ ଝାର ସାୟାମାର୍‌ଗା ଡାକ୍‌ନାର ମାରି ଏଙ୍ଗ୍ ଏଙ୍ଗ୍
କାସ୍ତୁ ସିନାର,

୫୦ ଇୟା ଜଗ୍‌ତି ଲୋକୁ ଦୁନିଆଦି ତିଆର‌ଆତି ଆଗ୍‌ଡିରାନ୍
ଝିଜେରେ ବାବବାଦିରି ସାୟାମାର୍‌ଗା ଡାକ୍‌ତିମାନି ଉଣ୍ଡିଙ୍ଗ୍ ଦଣ୍ଡ
ପୟନାର ।

୫୧ ହେବଲ୍‌ତି ଡାକ୍‌ତିମାଣ୍ଡୁକୁ ଆରାମ୍ କିଜି ଜିକରିୟଦି
ସାଦି, ଆମାଝାନିଙ୍ଗ୍ ପୁଜାକିନି ବେଦି ମାରି ପବିତ୍ର ବାଡ଼ିଦୁ
ସାୟାମାର୍‌ଗାଡାକ୍‌ତା ମାର୍‌ଆର, ହୁଁ, ନାନ୍ ମିଙ୍ଗ୍ ଇଜିନା, ଇୟା
ଜଗ୍‌ତି ଲୋକୁ ଆୟା ଝିଜେରି ଉଣ୍ଡିଙ୍ଗ୍ ଦଣ୍ଡ ବଗାନାର ।

୫୨ “ଚି, ଦଣ୍ଡ ପୟନି ସାସ୍ତିର୍, ଇରିଙ୍ଗ ମିର ବୁଦିଦି କୁସିକାଣ୍ଡି ନିଜେ
ଇଟ୍‌ତିଦେର; ମିର ନିଜେନିଜେ ଡଗୁଇତିଦେର ମାରି ଡଗୁଦେଙ୍ଗ୍

ବଦାକିତି ଲୋକାଙ୍କୁ ସାରି ସିଦ୍ଧିଦେବ ।”

୫୩ ମାରି, ଜିସୁ ଆବେଟ୍‌କୁ ସତିସରଇ ଖେନକା ସାସ୍ତିର୍ ନି ପାରୁସିର୍ ନାଣ୍ଟ ରିସା ଆଜି,

୫୪ ଖାନି ଖେୟୁଦାନ୍ ଇନି ତାଗ୍‌ଇ ମାଟା ଆସ୍‌ସି ଉଣ୍ଡିଙ୍ଗ୍ ଉରିଦୁ ଆରପ୍‌ତେଙ୍ଗ୍ ଖାନିଙ୍ଗ୍ ନାଣ୍ଟ ବିସୟତାନ୍ ମାଟା ଖେନ୍‌ବାଦେଙ୍ଗ୍ ଆସିତାବ୍ ।

୧୨

ଟକ୍ ଲୋକ୍‌ଖାଜା ଆମାଟ୍

(ମାତିଉ ୧୦:୨୭-୨୭)

୧ ☆ଆବେନ୍‌ ଅଜାରଅଜାର ଲୋକୁ ଉଣ୍ଡାତାର୍ ନୋ ନିଜେ ନିଜେଦି ମୁସ୍‌କୁ ମାଟ୍‌ସିସାଜିମାର୍‌ହାର୍; ନାସ୍ତିଖାଲେ ଜିସୁ ଆଗିଡି ନିଜେଦି ସିସୁରିଙ୍ଗ୍ ଇନ୍‌ଡ୍ରେଙ୍ଗ୍ ଆସ୍‌ତାନ୍, ପାରୁସିର୍ କମିର୍ ଖାଜା ଟକ୍‌ତି ବିସୟତାନ୍ ଜାଗାର୍‌ତା ମାନ୍‌ଡୁ ।

୨ ☆ମାତର୍ ଆମାକା ମାର୍‌ଗିତା ମାନାଟ୍, ଆକା ତରାନାଟ୍ । ମାରି ଖିଜୁ ବିସୟ୍ ତରାନାଟ୍ ।

୩ ମିର୍ ଆମାକା ସିକାଟିଦୁ ଇର୍‌ଇମାନିଦେର୍, ଆୟାଖିଜୁ ଜାୟ୍‌ତୁ ଖେନିଦେର୍, ମାରି ଆମାକା ନେସ୍‌ଇ ଖାଜା ବାକ୍‌ରା ଲୋଇ ମାରାକ୍‌ସି ଇର୍‌ଇମାନିଦେର୍, ଆକା ଇଲୁଦି ସାଟ୍ ମୁସ୍‌କୁ ପ୍ରଚାର୍ କିଆୟ୍‌ଆନାଟ୍ ।

ଏଙ୍ଗ୍ ଡିଲାନିକା

(ମାତିଉ ୧୦:୨୮-୩୧)

୪ ମାତର୍ ନା ତଡ୍‌କୁ ଜେ ମିର୍, ମିଙ୍ଗ୍‌ ନାନ୍ ଇଜିନା, ଏମାକାର୍ ମେନ୍‌ଲ୍‌ଡିଙ୍ଗ୍ କାଡ୍‌ନାର୍, ମାତର୍ ତାନେଖେନକା ମାରି ଇନିକା କିଦେଙ୍ଗ୍ ଆଟ୍‌ଏର୍, ଖାରିଙ୍ଗ୍ ଡିଲାମାଟ୍ ।

୫ ମାତର୍ ଏଙ୍ଗ୍ ଡିଲାନିଦେର୍, ଆକା ନାନ୍ ମିଙ୍ଗ୍‌ ଖେର୍‌ନା; ସାୟାମାର୍‌ଗାତାକ୍‌ତି ଖେନକା ନରକଦୁ ପୋକ୍‌ନି ଉଣ୍ଡିଙ୍ଗ୍ ଆମା ମାପୁରୁଦି ଅଦିକାର୍ ମାନାଟ୍, ଖାନିଙ୍ଗ୍ ଡିଲାଦୁ; ହୁଁ, ନାନ୍ ମିଙ୍ଗ୍‌ ସଡ୍ ଇଜିନା, ଖାନିଙ୍ଗ୍ ଡିଲାଦୁ ।

୬ ପାସଗୋଟା ସାଡ଼ାପୋଟିଙ୍ଗ ଇନିକା ଉଣା ଡାବୁଆଙ୍ଗ୍ ଧୋର୍ଏର୍ ନୋ ? ମାରି, ଝାନିକା ମାଣ୍ଟୁ ଉଣ୍ଡିତାନିଙ୍ଗ୍ ବା ମାପୁରୁ ବାଣାଏନ୍ ।

୭ ମାତର୍ ମି ତାଲାଦି କୁକୁଟି ବା ଝିଜୁ ଲେକିସ୍ କିଆୟାଆତାମାନାଡ଼ । ତିଲାମାଟ୍; ମିର୍ ନାଣ୍ଟ ସାଡ଼ାପୋଟିଙ୍ଗ୍ ମାଣାନ୍ ନାଣ୍ଟ !

କ୍ରିସ୍ତଙ୍ଗ୍ ମାନାନିକା ମାରି ମାନାଇକା

(ମାତିଉ ୧୦:୩୨-୩୩; ୧୨:୩୨; ୧୦:୧୯-୨୦)

୮ ମାରି, ନାନ୍ ମିଙ୍ଗ୍ ଇଜିନା, ଏନ୍ ଲୋକା ଆଗିଡି ନାଙ୍ଗ୍ ମାନାନାର୍, ମନୁଷ୍ୟପୁତ୍ର ବା ମାପୁରୁଦି ମୁସକୁପୁରତି ଦୁଡ଼କା ଆଗ୍ତି ଝାନିଙ୍ଗ୍ ମାନାନାର୍;

୯ ମାତର୍ ଏନ୍ ଲୋକା ଆଗିଡି ନାଙ୍ଗ୍ ମାନାଏନ୍, ଝାନ୍ ମାପୁରୁଦି ଦୁଡ଼କା ଆଗିଡି ମାନାକିବିସ୍ କିଏର୍ ।

୧୦ ☆ମାରି, ଏନ୍ବା ମନୁଷ୍ୟପୁତ୍ରଦି ବିରଦ୍ତାନ ମାଟା ଇନ୍ନାନ, ଝାନିଙ୍ଗ୍ କେମା ପୁଟ୍ନାଡ଼; ମାତର୍ ଏନ୍ ପବିତ୍ରଆମ୍ବାଦି ବିରଦ୍ତାନ ନିନ୍ଦା ମାଟା ଇନ୍ନାନ, ଝାନିଙ୍ଗ୍ କେମା ପୁଟ୍ନାଏଡ଼ ।

୧୧ ☆“ମାରି, ଏସ୍ତ୍ରିଝାଲେ ଝାର୍ ମିଙ୍ଗ୍ ପାରତନା ଇଲୁଦୁ, ସାସନ୍କିନିଝାରିମାନୁ ମାରି ଅଦିକାର୍ ପୋଇତି ଲୋକା ଲାକ୍ତୁ ଅନାର୍, ନାସ୍ତ୍ରିଝାଲେ ମିର୍ ମି ତରିଟାନ୍ ଏଣ୍ଡେସ୍ମାରି ଇନି ମାଟା ଇଣ୍ଡେଙ୍ଗ୍ ଆନାଡ଼ ମାରି ଇନିକା ଇନା, ଆୟା ବିସୟତାନ୍ ଚିନ୍ତା କିମାଟ୍ ।

୧୨ ଇରିଙ୍ଗ୍ ଇନିକା ଇଣ୍ଡେଙ୍ଗ୍ ଆନାଡ଼, ଆକା ପବିତ୍ର ଆମ୍ବା ଆୟାଝାଲେ ମିଙ୍ଗ୍ ଅଜା କିନାଡ଼ ।”

ମୁର୍କୁ ମାଜନ୍ ଲୋକାଦି କାତା

୧୩ ଲୋକା ଲୋଇରାନ୍ ଅରେନ୍ ଜିସୁଙ୍ଗ୍ ଇରୁଆନ୍, “ଏ ଗୁରୁ, ନା ତଡ଼ାନତିଙ୍ଗ୍ ନା ଝାଲେ ବୁବାଦି ଦନ୍ ସମ୍ପତ୍ତି ବାଟା କିଜ ସିଦେଙ୍ଗ୍ ଇନ୍ଆ ।”

☆ ୧୨:୧୦ ମାତିଉ ୧୨:୩୨; ମାର୍କ ୩:୨୯. ☆ ୧୨:୧୧ ମାତିଉ ୧୦:୧୯, ୨୦; ମାର୍କ ୧୩:୧୧; ଲୁକ ୨୧:୧୪, ୧୫.

୧୪ ମାତର ଜିସୁ ଖାନିଙ୍ଗ୍ ଇରୁଆନ୍, ଏ ତଡ଼, ଏନ୍ ନାଙ୍ଗ୍ ମି ଦନ୍ ସମ୍ପତି ମୁସକୁ ବିସାର୍ କିନିକାନ୍ ମାରି ବାଟା କିଜି ସିଦେଙ୍ଗ୍ ନିଲପ୍ତାନ୍ ?

୧୫ ମାରି, ଖାନ୍ ଖାରିଙ୍ଗ୍ ଇରୁଆନ୍, ଜାଗରାତା, ଝିଜୁଜାତିଦି ଆସାଦାନ୍ ନିଜେ ନିଜେଦିଙ୍ଗ୍ ଆକ ଇଡ଼ୁ, ଇରିଙ୍ଗ୍ ଅରେନ୍ ଲୋକ୍ତି ଜିବନ୍ ଖାନି ଦନ୍ ସମ୍ପତି ମୁସକୁ ଆସାଏନ୍ ।

୧୬ ମାରି ଖାନ୍ ଖାରିଙ୍ଗ୍ ଇୟା କାତା ଇରୁଆନ୍, ଅରେନ୍ ମାଜନ୍ ଲୋକ୍ତି କିଡ଼ିଇଦୁ ନାଣ୍ଡ ପାସି ଆତାଡ଼ ।

୧୭ ଆବେଟ୍ ଖାନ୍ ମନ୍ତୁ ମନ୍ତୁ ଅଡ଼ବିଜି ଇରୁଆନ୍, ଇନିକା କିନା ? ଇରିଙ୍ଗ୍ ନା ପାସି ଉଣ୍ଡା କିଜି ଇଡ଼ୁଦେଙ୍ଗ୍ ବାଡ଼ି ସିଲେଡ଼ ।

୧୮ ମାରି, ଖାନ୍ ଇରୁଆନ୍, ଇକା କିନା; ନାନ୍ ଆଗିଡ଼ି ଇଡ଼ନି କଲ୍ଲକି ରୁକ୍ସି ପେରି ପେରି କଲ୍ଲକିଙ୍ଗ୍ କିଜି ତିଆର୍ କିନା ମାରି ଆୟାଝିଜୁ ମାନ୍ ନା ପାସି ଉଣ୍ଡା କିଜି ଇଡ଼ିନା,

୧୯ ମାରି ନାନ୍ ନା ଜିବନ୍ତିଙ୍ଗ୍ ଇନା, ରେ ଜିବନ୍, ଏସ ବାସ୍ତେକ୍ତି ଉଣ୍ଡିଙ୍ଗ୍ ନି ଉଣ୍ଡିତିନିକା ନାଣ୍ଡ ପାସି ଉଣ୍ଡାତାମାନାଡ଼, ରମ୍‌ଆ, ଉଣ୍ଡୁଆ, ଝେଡ଼ିକା କିଆ;

୨୦ ମାତର ମାପୁରୁ ଖାନିଙ୍ଗ୍ ଇରୁଆନ୍, ଏ ବୁଦି ସିଲିକିୟା, ନେର୍ ନାଡ଼ା ନି ଜିବନ୍ ନିବାଣାକୁ ଅନା; ଆବେଟ୍‌କୁ ନିନ୍ ଆମାକା ଆମାକା ନିଜେଦିଙ୍ଗ୍ ଉଣ୍ଡା କିତିମାନି, ଆୟାଝିଜୁ ଏନ୍ ଆନାଡ଼ ?

୨୧ ଏନ୍ ନିଜେଦି ଉଣ୍ଡିଙ୍ଗ୍ ଦନ୍ ଉଣ୍ଡା କିନାନ୍, “ମାତର ମାପୁରୁଦି ଆଗଡ଼ି ମାଜନ୍ ଆଏନ୍, ଖାନି ଉଣ୍ଡିଙ୍ଗ୍ ଇୟାଝାଜା ଗଟେଆନାଡ଼ ।”

ମାପୁରୁମାନ୍ ଆସା ଇଡ଼ିନାଟ୍

(ମାତିଉ ୨:୨୫-୩୪)

୨୨ ଜିସୁ ନିଜେଦି ସିସୁରିଙ୍ଗ୍ ଇରୁଆନ୍, ଇୟାଉଣ୍ଡିଙ୍ଗ୍ ନାନ୍ ଇଜିନା, ଇନିକା ଉଣା, ଇୟାଝାଜା ଇଜି ମି ଜିବନ୍ତି ଉଣ୍ଡିଙ୍ଗ୍, ମାରି ଇନିକା ଆରାନା, ଇୟାଝାଜା ଇଜି ମି ମେନ୍‌ଲ୍‌ଡ଼ି ଉଣ୍ଡିଙ୍ଗ୍ ବା ସିନ୍ତା କିମାଟ୍ ।

୨୩ ଇରିଙ୍ଗ୍ ଉଣି ବାଦୁଲୁ ଜିବନ୍ ମାରି ଆଙ୍ଗ୍ ଆରାନି ବାଦୁଲୁ ମେନ୍‌ଲ୍‌ ପେରିକା ।

୨୪ କାକିଆଙ୍ଗ୍ ବିସୟ୍ ଅଡ଼ବିଜ ସୁଡ଼ୁ, ଖାକ୍ ଝିଡ଼ୁ ଝିଡ଼ୁ କି କୟ୍‌ଉ, ମାରି ତାମେ ଇଲୁ କି ପାସି ଇଡ଼ନି କଲ୍ଲକି ସିଲେଡ଼, ମାରି

ମାପୁରୁ ଖାନିକାଙ୍କ କାଦି ସିନାନ; ମିର୍ ପଟିଙ୍ଗା ବାଦୁଲୁ ଏସ ନାଣ୍ଡ ପେରିକିଦେର୍ !

୨୫ ମାରି, ମି ଲୋଇ ଏନ୍ ସିନ୍ତା କିଜି କିଜି ନିଜେଦି ବାସେକ୍ ଉଣ୍ଡି, ମୁରା ପିରିସ୍‌କିଦେଙ୍ଗ ଆଟ୍‌ନାନ ?

୨୬ ମିର୍ ଜଦି ଝିକୁମାଣାନା ଇସ୍ତି ବିସୟତିଙ୍ଗ ବା କିଦେଙ୍ଗ ସାକ୍ତି ସିଲେଡ୍, ଆରିଙ୍ଗ ଆଇ ଝିକୁ ବିସୟତି ଉଣ୍ଡିଙ୍ଗ ଏନ୍ତା ସିନ୍ତା କିଜିନିଦେର୍ ?

୨୭ ପୁଙ୍ଗୁକାଙ୍ଗ ଅଡ୍‌ବିଜ ସୁଡ୍‌ଦୁ, ଝାକ୍ ଏଣ୍ଡେସ୍ ନୁଲ୍ କୟ୍‌ଉ କି ଝାତି ଗୁଡ୍‌ଉ; ନାନ୍ ମିଙ୍ଗ୍ ଇଜିନା, ରାଜା ସଲମନ୍ ବା ଆୟା ଦନ୍‌ତି ପୁଙ୍ଗୁକା ଲୋଇରାନ୍ ଏମେ ଉଣ୍ଡି ପୁଙ୍ଗୁତି ଝାଜା ବା ସୁନ୍‌ର୍ ଆଦେଙ୍ଗ ଆଟ୍‌ଏନ୍ ମାର୍‌ଆନ୍ ।

୨୮ ମାତର୍ ନେର୍ ଆମା ଲାଟା କିଡିଇଦୁ ମାନାଡ୍, ମାରି ଝିଗେରିଙ୍ଗ ସିସ୍‌ଗୁଟାଦୁ ପୋକ୍‌ନାର୍, ତାନେଙ୍ଗ ଜଦି ମାପୁରୁ ଇୟାଝାଜା ରୁପ୍ ସିନାନ, ଆରିଙ୍ଗ, ଏ ଉଣା ବିସ୍‌ବାସ୍‌ସିର୍, ଝାନ୍ ମିଙ୍ଗ୍ ଏସ ନାଣ୍ଡ ସିଏନ୍ !

୨୯ ମାରି ଇନିକା ତିନା ମାରି ଇନିକା ଉଣା, ଆକା ମିର୍ ପୋଇଜି ବୁଲ୍‌ମାଟ୍ ମାରି ସିନ୍ତା କିମାଟ୍,

୩୦ ଇରିଙ୍ଗ ଦୁନିଆଦି ଅଣଜିହୁଦି ଲୋକୁ ଇୟାଝିକୁ ବିସୟ ପୋଇଜି ବୁଲ୍‌ମାଟ୍; ମାତର୍ ଇୟାଝିକୁ ବିସୟ ଜେ ମିଙ୍ଗ୍ ଦର୍‌କାର୍ ମାନାଡ୍, ଆକା ମି ବୁବା ନେସ୍‌ନାନ ।

୩୧ ମିର୍ ମାପୁରୁଦି ରାଜି ବିସୟ ପୋୟ୍‌ଦୁ, ମାରି ଇୟାଝିକୁ ବିସୟ ବା ମିଙ୍ଗ୍ ପୁଟ୍‌ନାଡ୍ ।

ମୁସ୍‌କୁପୁର୍‌ତୁ ଦନ୍

(ମାତିଉ ୬:୧୯-୨୧)

୩୨ ଏ ଇସ୍ତି ମାୟା, ତିଲାମାଟ୍, ଇରିଙ୍ଗ ମିଙ୍ଗ୍ ଆୟା ରାଜି ସିଦେଙ୍ଗ ଇଜି ମି ମୁସ୍‌କୁପୁର୍‌ତି ବୁବା ବଦା କିଜିନାନ ।

୩୩ ମିଙ୍ଗ୍ ଆମାକା ମାନାଡ୍, ଆକା ପୋର୍‌ଜି କାକୁତ୍ ଲୋକାଙ୍ଗ ସିଦୁ; ଆମାକା ସେଏଣ୍ଡ୍ ଆଏଡ୍, ଇୟାଝାଜା ମଣି ନିଜେ ନିଜେଦି ଉଣ୍ଡିଙ୍ଗ ତିଆର୍ କିଦୁ; ଏମେମାନୁ ତଙ୍ଗିରଏନ୍ ଲାକ୍‌ତୁ ରେଏନ୍ ମାରି ପିଡ୍‌କୁ ତିନ୍‌ଉ, ଇୟାଝାଜା ମୁସ୍‌କୁପୁର୍‌ତୁ ନାଷ୍ଟୁ ଆଇ ଦନ୍ ଉଣ୍ଡା କିଦୁ,

୩୪ ଇରିଙ୍ଗ ଏମେମାନୁ ମି ଦନ୍, ଆବେବା ମି ମୋନ୍ ।

ଜାଗ୍ରତା ମାନି ସାକରକୁ

୩୫ ☆ପାଣିକିନି ଉଣ୍ଡିଙ୍ଗ ଓଜୁଦିନ୍ ତିଆର୍ ଆଜି ମାନ୍ତୁ ମାରି ମି ଦିଝେଙ୍ଗ କାସିସ୍ କିଜ ଇଡ଼ୁ;

୩୬ ☆ମାରି ମାଲିକ୍ ପେଡ଼ି ଇଣ୍ଡୁ ରାନ୍ ଡେସିଝାଜି ସେରଲାଦୁ କଡ଼ନି ଦାପେ ଏମେ ଲୋକୁ ଖାନି ଉଣ୍ଡିଙ୍ଗ ଆୟା ଦାପେ ସେରଲା ରେଡେଙ୍ଗ କାପକିଜି ତେବାନାନ୍, ମିର୍ ଖାରି ଖାଜା ଆଜି ମାନ୍ତୁ ।

୩୭ ମାଲିକ୍ ଖାଜି ଆମା ଗତିମୁରୁଲିରିଙ୍ଗ ଜାଗ୍ରତା ମାନିକା ସୁଣାନ୍, ଖାର ଦନ୍ୟ; ନାନ୍ ମିଙ୍ଗ୍ ସଡ଼ ଇଜିନା, ମାଲିକ୍ ବା ଖାରି ସେବାକିଦେଙ୍ଗ ନିଜେଦିଙ୍ଗ ତିଆର୍ କିନାନ୍, ଖାନ୍ ଖାରିଙ୍ଗ ବାସ୍ତେଙ୍ଗ ଇଜି ଇନାନ୍ ମାରି ନିଜେ କାଦି ବାଟାକିଜି ସିନାନ୍ ।

୩୮ ମାରି, ଖାନ୍ ଜଦି ମାଜେର୍ ନାଡ଼ା ନୋ କର୍ରୁ କେଡ଼ିପି ବା ଖାଜି ଖାରିଙ୍ଗ ଆୟାଖାଜା ସୁଣାନ୍, ଆଡିଙ୍ଗ ଆୟା ସାକରକୁ ଦନ୍ୟ ।

୩୯ ☆ମାତର୍ ଇକା ନେସସୋ ମାନ୍ତୁ, ଏସିଝାଲେ ତଙ୍ଗାଁରଏନ୍ ଖାନାନ୍, ଇକା ଇଲୁଦି ମାଲିକ୍ ଏସକାଙ୍ଗ ନେସନାନ୍, ଆଡିଙ୍ଗ ଖାନ୍ ନିଜେଦି ଇଲୁଡୁ ତଙ୍ଗାଁ କିଦେଙ୍ଗ ସିଏତାନ୍ମାନ୍ ।

୪୦ ମିର୍ ବା ଓଜୁଦିନ୍ ଜାଗ୍ରତା ଆଜମାନ୍ତୁ, ଇରିଙ୍ଗ ଏସିଝାଲେ ମିର୍ ଅଡ଼ବିଇମାନିଦେର୍, ଆୟାଖାଲେ ମନ୍ଦୁସ୍ୟପୁଡୁ ଖାନାନ୍ ।

ବିସ୍ବାସ ସାକର ନି ଅବିସ୍ବାସ ସାକର

(ମାତିଉ ୨୪:୪୫-୫୧)

୪୧ ଆବେଟ୍ ପିତର୍ ଇରଥାନ୍, “ଏ ପ୍ରବୁ, ନିନ୍ନେ ମାଙ୍ଗ୍ ନୋ ଓଜେରିଙ୍ଗ ଇୟା କାତା ଇଜିନି ?”

୪୨ ପ୍ରବୁ ଇରଥାନ୍, “ବିସ୍ବାସ୍ ମାରି ବୁଦିଦି ସାକର ଏନ୍ ? ଆମାଖିନିଙ୍ଗ ମାଲିକ୍ ଇଲୁ ସାଲାକିଦେଙ୍ଗ ଇଡ଼ନାନ୍, ଖାନ୍ ଆଇ ସାକରକାଙ୍ଗ ଖାରି କାଦି ସାମାନ୍ ବେଡ଼ାଦୁ ସିଦେଙ୍ଗ ଇଜି ଅରେନ୍ ସାକରତିଙ୍ଗ ଇରଥାମାରଥାନ୍, ଆମାଖିନିଙ୍ଗ ଇୟା ପାଣି କିଦେଙ୍ଗ ଇଜି ମାଲିକ୍ ବିସ୍ବାସ୍ କିନାନ୍, ଆୟା ପାଣିକିନିକାନ୍ ଏନ୍ ?

☆ ୧୨:୩୫ ମାତିଉ ୨୫:୧-୧୩.

☆ ୧୨:୩୬ ମାର୍କ ୧୩:୩୪-୩୬.

☆ ୧୨:୩୯ ମାତିଉ

୨୪:୪୩, ୪୪.

୪୩ ପ୍ରଭୁ ଡେସିଝାଜି ନିଜେଦି ଆମା ଗତିମୁରୁଲିଙ୍କ ଆୟାଝାଜା କିନିକା ସୁଣାନ, ଝାନ ଦନ୍ୟ ।

୪୪ ନାନ୍ ମିଙ୍ଗ୍ ସଡ଼ ଇଜିନା, ଝାନ ଝାନିଙ୍ଗ୍ ନିଜେଦି ଦନ୍ ମୁସକୁ ପାଣିଝିଜୁ କିଦେଙ୍ଗ୍ ସିନାନ୍ ।

୪୫ ମାତର ଜଦି ଆୟା ସାକର୍ ନା ମାଲିକ୍ ଝାନିକା ଝେଡ଼ାଆନାଡ଼ ଇଜି ଅଡ଼ବିଜି ମନ୍ତୁ ଇଜି ସାକରକାଙ୍ଗ୍ ଡାକ୍ତେଙ୍ଗ୍ ଇଜି ମାରି ଉଣ୍ଡିଜିନିଜି ସୋସଡେଙ୍ଗ୍ ଆରାମ୍ କିନାନ୍,

୪୬ ଆତିଙ୍ଗ୍ ଏମେ ନାଣ୍ଡିଙ୍ଗ୍ ଗତିମୁରୁଲି ଝାନିଙ୍ଗ୍ କାପ୍‌କିଜି ମାନ୍‌ଇଝାଲେ ମାରି ଏମେ ଝେଡ଼ା ଝାନ ନେସ୍‌ସନ୍‌ମାନାନ୍, ଆୟା ନାଣ୍ଡିଙ୍ଗ୍ ମାରି ନାସ୍ତିଝାଲେ ଝାନି ମାଲିକ୍ ଝାନାନ୍, ମାରି ମାଲିକ୍ ଝାନିଙ୍ଗ୍ ନାଣ୍ଡି ଦଣ୍ଡି ସିନାନ୍ । ଝାନ ଅବିସ୍‌ବାସ୍‌ତି ଦାସ୍‌କା ଦଣ୍ଡି ପୟ୍‌ନାନ୍ ।

୪୭ ମାରି ଆମା ଗତିମୁରୁଲି ନିଜେଦି ମାଲିକ୍‌ତି ବଦା ନେସେଇ ଜାଗରାତା ତେବାଏନ୍ ମାରି ଝାନି ବଦାଦାନ୍ ପାଣିକିଏନ୍ ମାନାନ୍, ଝାନ ମାଡ଼ ମୁସକୁ ମାଡ଼ ପୋଇନାନ୍;

୪୮ ମାତର ଏନ୍ ନେସ୍‌ସଣ୍ଡା ଦଣ୍ଡି ପାଣିକିନା ମାନାନ୍ ଝାନ ଉଣା ଦଣ୍ଡି ପୋଇନାନ୍ । ଆମାଝାନିଙ୍ଗ୍ ନାଣ୍ଡି ସିତାମାନାନ୍, ଝାନି ମାନ୍ ନାଣ୍ଡି ଲସ୍‌ନାନ୍; ମାରି, ଆମାଝାନି ଲାକ୍‌ତୁ ନାଣ୍ଡି ସିତାମାନାର ଝାନି ମାଣ୍ଡି ନାଣ୍ଡି ଲୋସ୍‌ନାର ।”

ଜିସୁଝାଲେ ଲୋକୁ ରାଜି ଆଏତାର୍

(ମାତିଉ ୧୦:୩୪-୩୬)

୪୯ “ନାନ୍ ଦୁନିଆଦୁ ସିସୁ କାସିସ୍‌କିଦେଙ୍ଗ୍ ଝାତାମାନା, ମାରି ଆକା ଜଦି କାସ୍‌ତାଡ଼ନି, ଆତିଙ୍ଗ୍ ନାଙ୍ଗ୍ ମାରି ଇନିକା ବଦା ?

୫୦ ✧ମାତର ନାଙ୍ଗ୍ ଉଣ୍ଡି, ତୁବନ୍‌ତୁ ତୁବନ୍ ଆଦେଙ୍ଗ୍ ଆନାଡ଼, ମାରି ଆକା ଝିଜି ସାନ୍ ନାନ୍ ଏଣ୍ଡେସ୍ କାସ୍‌ଆଜିନା ।

୫୧ ନାନ୍ ଦୁନିଆଦୁ ସାନ୍ତି ସିଦେଙ୍ଗ୍ ଝାତାମାନା ଇଜି ଇନିକା ମିର୍ ଅଡ଼ବିଜିନିଦେର୍ ? ସିଲେ, ନାନ୍ ମିଙ୍ଗ୍ ଇଜିନା, ମାତର ବାଗ୍ ବାଗ୍ କିଦେଙ୍ଗ୍ ଝାତାମାନା ।

୫୭ ଇରିଙ୍ଗ ଆଗଡ଼ିରାନ୍ ଉଣ୍ଡି, ଇନ୍ଦ୍ର ପାସ୍ ଲୋକୁ ମାରୁଆର୍ ମାରି ରିଏରି ବିରଦ୍ତାନ୍ ମୁଏର୍ ମାରି ମୁଏରି ବିରଦ୍ତାନ୍ ରିଏର୍ ଖେର୍ହେ ଆନାର୍ ।

୫୩ ମାରିସି ବିରଦ୍ତାନ୍ ବୁବାସି, ବୁବାସି ବିରଦ୍ତାନ୍ ମାରିସି, ଗାଡ଼ସି ବିରଦ୍ତାନ୍ ଆଇସି, ଆଇସି ବିରଦ୍ତାନ୍ ଗାଡ଼ସି, କଡେସି ବିରଦ୍ତାନ୍ ମିମ୍ସି ମାରି ମିମ୍ସି ବିରଦ୍ତାନ୍ କଡେସି ଖେର୍ଏ ଆନେ ।”

ଦିନ୍ତିଙ୍ଗ ନେସ୍ନିକା

(ମାତିଉ ୧୭:୨-୩)

୫୪ ମାରି, ଜିସୁ ଲୋକାଙ୍ଗ ବା ଇର୍ହାନ୍, “ଖେଡ଼ାଆରୁନି ତରିନ୍ ବାଦଡ୍, ନିଙ୍ଗିକା ସୁଡ଼ୁଙ୍ଗ ଆୟାଦାପ୍ରେ ମିର୍ ଇନିଦେର୍, ପିରୁ ଖାଜିନାଡ୍, ମାରି ଆୟାଖାଜା ଗଟାନାଡ୍;

୫୫ ମାରି, ଉଣେରି ତରିଟାନ୍ ଗାଲି ଖାତିଙ୍ଗ ମିର୍ ଇନିଦେର୍, ନାଣ୍ଡ ତେର୍ଝେଲ୍ ଆନାଡ୍, ମାରି ଆୟାଖାଜା ଗଟାନାଡ୍ ।

୫୬ ଏ ସୁରିଖାରିନିକିଦେର୍, ମିର୍ ଦୁନିଆ ମାରି ବାଦଡ଼ି ସିନା ନେସ୍ତେଙ୍ଗ ଆର୍ସିନିଦେର୍, ମାତର୍ ଇୟା ଦିନ୍ତି ସିନେଙ୍ଗ ଖିଜୁ ଏଣ୍ଡେସ୍ ନେସ୍ତେଙ୍ଗ ଆର୍ଈଜିନିଦେର୍ ?”

ସାତୁରିଖାଲେ ମିସାନିକା

(ମାତିଉ ୫:୨୫-୨୬)

୫୭ ମାରି, ନିଜେନିଜେ ଏୟା ଆମାକା ନେଗିକା ବିସାର୍ କିଦେଙ୍ଗ ଆର୍ଈଜିନିଦେର୍ ?

୫୮ ଜଦି ମିର୍ ମି ବିରଦ୍ ଲୋକ୍ତିଖାଲେ ନ୍ୟାୟ୍ କିନିବାଡିଦୁ ସଲ୍ସିନିଦେର୍, ଆରିଙ୍ଗ ସାରିଦୁ ଖାନିଖାଲେ ବୁଜାଜିସାଦେଙ୍ଗ ସେସ୍ଟା କିଦୁ । ଆକା ଆଏଡିଙ୍ଗ ଖାନ୍ ନିଙ୍ଗି ବିସାର୍ କିନି ଲୋକା ଆଗଡ଼ି ରେନା ଅନାନ୍, ନ୍ୟାୟ୍ କିନିକାନ୍ ମିଙ୍ଗି ପେରିଲୋକାକିଦୁ ସର୍ପେ କିନାସିନାନ୍, ମାରି ପେରିକାର୍ ମିଙ୍ଗି ଜଇଲ୍ଡୁ ତରନା ଇଡନାର୍ ।

୫୯ ନାନ୍ ମିଙ୍ଗି ସଡ଼ ଇଜିନା, ଆମାସାନ୍ ମିର୍ ଖିଜୁ ରୁଣ୍ଡୁ ତାବୁଙ୍ଗୁ ଡେସିସିଲ ମାନିଦେର୍, ଆୟା ସାନ୍ ମିର୍ ଆବେଟ୍କୁ ସହସ ଖାଦେଙ୍ଗ ଆର୍ଈଜିଦେର୍ ।

୧୩

ପାପତାନ୍ ମି ମନ୍ତିଙ୍କ ଡେପ୍‌ଡୁ

୧ ନାସ୍ତିଞ୍ଚାଲେ ଆବେ ମାର୍‌ଇ ଏସୋ ଲୋକୁ ଜିସୁଙ୍କୁ ଇର୍ହାର୍‌ଜେ, ଗାଲିଲିଦିକାର ମାପୁରୁମାନୁ ପୁଜାସିନି ଖାଲେ ପିଲାଡ଼ ଖାରିଙ୍ଗ୍ ଡାକ୍‌ତା ମାର୍‌ଆନ୍ ।

୨ ଆବେଟ୍ ଜିସୁ ଖାରିଙ୍ଗ୍ ଇର୍ହାନ୍, “ମିର୍ ଇନିକା ଅଡ଼୍‌ବିଜିନିଦେର୍ ଜେ ଇୟା ଲୋକୁ ଗାଲିଲିଦି ଖିଜେରିଙ୍ ନାଣ୍ଡ ପାପି ମାର୍‌ହାର୍ ଇଜି ଖାରିଙ୍ଗ୍ ମିର୍ ଅଡ଼୍‌ବିଜିନିଦେର୍ ନୋ ?

୩ ନାନ୍ ମିଙ୍ଗ୍ ଇଜିନା, ସିଲେ, ମାତର୍ ପାପତାନ୍ ମନ୍ତିଙ୍କ ଡେପ୍‌ଇତିଙ୍ ମିର୍ ଖିଜେରେ ଆୟାଞ୍ଜା ନାସ୍ତି ଆନିଦେର୍ ।

୪ ବା ସିଲୋହଦୁ ଆୟା ଆମା ଅଟ୍ ଲୋକା ମୁସକୁ କାପକିନି ଇଲୁ ଆରଜି ଖାରି ଜିବନ୍ ସରଆଡ଼, ଖାରି ବିସୟତାନ୍ ମିର୍ ଇନିକା ଅଡ଼୍‌ବିଜିନିଦେର୍ ? ଖାର ଖିଜେରେ ଜିରୁସାଲାମ୍‌ତିଲୋକା ବାଦ୍‌ଲୁ ନାଣ୍ଡ ଦୋସ୍‌କିତିକାର ଇଜି ନୋ ମିର୍ ଅଡ଼୍‌ବିଜିନିଦେର୍ ?

୫ ନାନ୍ ମିଙ୍ଗ୍ ଇଜିନା, ସିଲେ, ମାତର୍ ପାପତାନ୍ ମନ୍ତିଙ୍କ ଡେପ୍‌ଏତିଙ୍ ମିର୍ ଖିଜେରେ ଆୟାଞ୍ଜା ନାସ୍ତି ଆନିଦେର୍ ।”

ପଲ୍ ଆସ୍‌ଇ ତଗାମାରାତି କାତା

୬ ମାରି, ଜିସୁ ଇୟା କାତା ଖେର୍‌ତାନ୍, “ଅରେନ୍‌ଞ୍ଜାନି ଅଙ୍ଗୁର୍ କିଡ଼ିଇ ଉଣ୍ଡି ତଗା ମାରାନ୍ ଉର୍‌ତା ମାର୍‌ହାର୍ । ମାଲିକ୍ ଖାଜି ପଲ୍ ପଇତାନ୍, ମାତର୍ ପୟ୍‌ଏତାନ୍ ।

୭ ଆବେଟ୍ ଞାନ୍ ଅଙ୍ଗୁର୍ କିଡ଼ିଇ କାପକିନିଞ୍ଜାନ୍ ଇର୍‌ଆନ୍, ସୁଡ଼ଆ, ଇୟା ମୁଣ୍ଡି ବାର୍‌ସେକ୍ ଆତାଡ଼ ନାନ୍ ଖାଜି ଇୟା ତଗା ମାରାନ୍‌ଡ଼ ପଲ୍ ପୟ୍‌ଜିନା, ମାତର୍ ପୟ୍‌ଏଜିନା; ତେନିଙ୍ କାଡ଼‌ସୋ ପୋକ୍‌ଆ, ଇକା ଇନ୍‌ଦାନିଙ୍ ବୁମିଦିଙ୍ ବା ତାଗ୍‌ଇକା କିଜିନାଡ଼ ?

୮ ମାତର୍ କାପକିନିକାନ୍ ମାଲିକ୍‌ତିଙ୍ ଇର୍‌ଆନ୍, ପ୍ରୁ, ତେନିଙ୍ ଇୟା ଉଣ୍ଡି ବାର୍‌ସେକ୍ ବା ଡ଼ିସ୍‌ସୋସିଆ, ନାନ୍ ଇଲେ ତେନି ସାରିବେଡ଼ି କାର୍‌ଜି ଗାତାମ୍ ସିନା,

୯ ଞାନି ବାର୍‌ସେକ୍ ପଲ୍ ଆସ୍‌ତିଙ୍ ତୋ ନେଗି ମାଟା, ଆଏତିଙ୍ ତାନିଙ୍ କାଡ଼‌ସପୋକ୍‌ଆ ।”

ଜିସୁ ରମ୍ମିନାଣ୍ଡିଙ୍ଗ୍ ଅରେଡ୍ କୁବ୍ଡି ଆଇମାଦିଙ୍ଗ୍ ନେଗେଣ୍ଡୁ କିତାନ୍

୧୦ ଅରଲେନ୍ ଜିସୁ ରମ୍ମିନାଣ୍ଡିଙ୍ଗ୍ ଉଣ୍ଡି ପାର୍ତନା ଇଲୁଦୁ ସିକିୟା ସିଜିମାର୍ହାନ୍ ।

୧୧ ମାରି ସୁଡ଼ୁ, ଅଗ୍ର ବାସେକ୍ ଆତାଡ୍ ଉନ୍‌ଣ୍ଡି ତାଗ୍‌ଆମ୍ ଆସସି ଅରେଡ୍ ଆଇମାଦିଙ୍ଗ୍ ସାକିସିଲିଝାଜା କିତାମାର୍‌ଆଡ୍, ଝାଦ୍ କୁବ୍ଡି ଆଜି ଏଣ୍ଡେସ୍‌ବା ନିଜେଦିଙ୍ଗ୍ ସିଦା କିଜି ବୁଲାଦେଙ୍ଗ୍ ଆର୍‌ଏଜିମାର୍‌ହାଡ୍ ।

୧୨ ଜିସୁ ତାନିଙ୍ଗ୍ ସୁଡ଼ୁ ଲାକ୍‌ଡୁ କୁକ୍‌ସି ଇର୍‌ଆନ୍, ଏ ଆଇମା, ନି ରୋଗ୍‌ଜିବନ୍‌ତାନ୍ ନେଗେଣ୍ଡୁ ଆତି ।

୧୩ ମାରି, ଝାନ୍ ତାନି ମୁସ୍‌କୁ କିୟ୍ ଇର୍‌ତାନ୍, ଆବେଟ୍ ଝାଦ୍ ଆୟାଦାପ୍ରେ ସାଡ଼କୁ ଆଜି ମାପୁରୁଦି ଦନ୍‌ଏବାଦ୍ କିଦେଙ୍ଗ୍ ଆସ୍‌ତାଡ୍ ।

୧୪ ମାତର୍ ଜିସୁ ରମ୍ମିନାଣ୍ଡିଙ୍ଗ୍ ନେଗେଣ୍ଡୁ କିତାନ୍‌ଆକା ପାର୍ତନା ଇଲୁଦି ପେରିକାନ୍ ରିସା ଆଜି ଲୋକାଙ୍ଗ୍ ଇର୍‌ହାନ୍, “ପାଣି କିନି ଉଣ୍ଡିଙ୍ଗ୍ ସଅଦିନ୍ ମାନାଡ୍, ଆଦେଙ୍ଗ୍ ଆୟାଞ୍ଜିନ୍ ଦିନ୍ ଝାଜି ନେଗେଣ୍ଡୁ ଆଦୁ, ରମ୍ମିନାଣ୍ଡିଙ୍ଗ୍ ରାମାର୍ ।”

୧୫ ମାତର୍ ପ୍ରବୁ ଝାନିଙ୍ଗ୍ ଇର୍‌ଆନ୍, “ରେ କପଟିର୍, ମିର୍ ଝିଜେରେ ଇନିକା ରମ୍ମିନାଣ୍ଡିଙ୍ଗ୍ ନିଜେ ନିଜେଦି ଡାନ୍ ମାରି ଗଦ୍ ସାଡ଼ାଦାନ୍ କୁଡ଼ିଅସି ଏରୁ ଉଡ଼ିସି କିକ୍‌ଦେର୍ ?

୧୬ ମାରି ସୁଡ଼ୁ ଅଗ୍ର ବାସେକ୍ ଆତାଡ୍ ସୟତାନ୍ ମାଣକୁ ତରାଜି ଅବ୍ରାହାମତି ଗାଡ଼ି ଇୟା ଆଇମାଲୋକ୍ ଇନିକା ରମ୍ମିନାଣ୍ଡିଙ୍ଗ୍ ନିଜେଦି ରୋଗ୍‌ତି ଗାଟିଦାନ୍ କୁଦାଦେଙ୍ଗ୍ ଦର୍କାର୍ ସିଲେତାଡ୍ ନୋ ?”

୧୭ ମାରି, ଝାନ୍ ଇୟା ମାଟା ଝିନ୍ ଇର୍‌ହାନ୍‌ଆକା, ଝାନି ବିରୁଦ୍‌ତିକାର୍ ଝିଜେରେ ସେମାର୍‌ଆତାର୍, ମାତର୍ ଲୋକ୍ ଝିଜେରେ ଝାନି କିତି ଝିନ୍ ପେରି ପାଣି ଉଣ୍ଡିଙ୍ଗ୍ ଝେଡ଼ିକା କିଦେଙ୍ଗ୍ ଆସ୍‌ତାର୍ ।

ସାର୍‌ସୁ ପାଡ଼ୁ କାତା

(ମାତିଉ ୧୩:୩୧-୩୨; ମାର୍କ ୪:୩୦-୩୨)

୧୮ ଆବେଟ୍ ଜିସୁ ଇର୍ହାନ, “ମାପୁରୁଦି ରାଜି ଆମାତାନି ୱାଜା ? ମାରି, ଆମାତାନି-ୱାଲେ ନାନ ତାନିଙ୍ଗ୍ ତୁସନା ?

୧୯ ଆକା ଇୟା-ୱାଜା ଉଣ୍ଡି, ସାର୍ସୁ ପାତୁ-ୱାଜା, ଆମାକା ଅସି ଅରେନ୍ ଲୋକୁ ନିଜେଦି ତଡିଦୁ ଝିତ୍ତାନ, ମାରି ଆକା ପିରଜି ମାରାନ୍ ଆତାଡ୍, ବାଦଡ୍ଡି ପଟିଙ୍ଗ୍ ୱାଜି ତାନି କମେଆଙ୍ଗ୍ ୱାଲୁ ତରସି ବାସାନେ ।”

କମିରତି କାତା

(ମାତିଉ ୧୩:୩୩)

୨୦ ଜିସୁ ମାରି ୱେଟ୍ତାନ, “ନାନ୍ ଆମାତାନି ୱାଲେ ମାପୁରୁଦି ରାଜିଦିଙ୍ଗ୍ ତୁସନା ?

୨୧ ଆକା କମିରତି ୱାଜା, ଅରେଡ୍ ଆଇମା କମିର୍ ଅସି ଆତା ଅଟାଗୁଣ୍ଡାଦି ଲୋଇ ମିସାକିଜି ପଡିକ୍ସି ଇଟ୍ତାଡ୍, ମାରି ସାରାସାରି କମିର୍ ଝିଜୁ ଗୁଣ୍ଡାଦିଙ୍ଗ୍ ଉଦିସକିତାଡ୍ ।”

ସିପଡି ସେର୍ଲା

(ମାତିଉ ୭:୧୩-୧୪; ୨୧:୨୩)

୨୨ ଇୟା ୱେନ୍‌କା ଜିସୁ ଗାଡ୍‌କାଙ୍ଗ୍ ଗାଡ୍‌କାଙ୍ଗ୍ ମାରି ନାରକାଙ୍ଗ୍ ୱାଲୁ ନାରକାଙ୍ଗ୍ ୱାଲୁଲି ସିକିୟା ସିବୁ ସିବୁ ଜିରୁସାଲାମ୍ ତରିନ୍ ସଲ୍‌ସି ମାର୍ହାନ ।

୨୩ ମାରି, ଅରେନ୍ ୱାନିଙ୍ଗ୍ ଇର୍ଆନ୍, “ପ୍ରବୁ, ରକିୟା ପଇନି ଲୋକାଦି ସଂକିୟା ଇନିକା ଉଣା ?” ଆବେଟ୍ ୱାନ୍ ୱାରିଙ୍ଗ୍ ଇର୍ହାନ,

୨୪ ସିପଡି ସେର୍ଲା ସିଜି ତୁଗୁଦେଙ୍ଗ୍ ତେରେପେତେ ଆଦୁ, ଇରିଙ୍ଗ୍ ନାନ୍ ମିଙ୍ଗ୍ ଇଜିନା, ଝିଜେରେ ତୁଗୁଦେଙ୍ଗ୍ ଇଜି ବଦା କିନାର୍, ମାତର୍ ଆଟ୍‌ଏର୍ ।

୨୫ ଇଲୁଦି ମାଲିକ୍ ନିଙ୍ଗ୍‌ଜି ସେର୍ଲା କେରତି ୱେନ୍‌କା ଏସ୍ତି-ୱାଲେ ମିର୍ ଆଡ୍‌ରେ ନିନି ତେବାନିଦେର୍ ମାରି ଏ ପ୍ରବୁ, ମା ଉଣ୍ଡିଙ୍ଗ୍ ସେର୍ଲା ରେଆ, ଇକା ଇଜି ସେର୍ଲା ଡାକ୍‌ତେଙ୍ଗ୍ ଆସ୍‌ନିଦେର୍, ନାସ୍ତି-ୱାଲେ ୱାନ୍ ମିଙ୍ଗ୍ ଇନାନ୍, ମିର୍ ଏମେ ବାଡିଦି ଲୋକୁ, ଆକା ନାନ୍ ନେସେଏ ।

୨୬ ଆୟା-ୱାଲେ ମିର୍ ଇନ୍‌ଡେଙ୍ଗ୍ ଆସ୍‌ନିଦେର୍, ମାପ୍ ମି ଆଗ୍ତି ଉଟାପ୍ ତିର୍ଆପ୍, ମାରି ନିନ୍ ମା ଦୁଆରକାଙ୍ଗ୍ ସିକିୟା ସିଡି;

୨୭ ମାରି, ଖାନ ମିଙ୍ଗ ଇନାନ, ମିର୍ ଏମେ ବାଡ଼ିଦି ଲୋକୁ, ଆକା ନାନ ନେସେଏ; ଏ ତାଗ୍‌ଇ ପାଣିକିନି ଝିଜେରେ ନା ଲାକ୍‌ତୁରାନ ଆକ ଆଦୁ ।

୨୮ ☆☆ଏସ୍ତ୍ରାଝାଲେ ମିର୍ ଅବ୍ରାହାମ, ଇସହାକ୍, ଜାକୁବ, ମାରି ଝିଜେରେ ବାବବାଦିରିଙ୍ଗ୍ ମାପୁରୁଦି ରାଜିଦୁ ମାନିକା ମାରି ନିଜେ ନିଜେଦିଙ୍ଗ୍ ଆଡ଼ରେ ପୋକ୍‌ନିକା ସୁଡ଼ନିଦେର୍, ନାସ୍ତ୍ରାଝାଲେ ଆବେ ଆଡ଼ବାନିଦେର୍ ମାରି ପାଲ୍‌କୁ କାତ୍ରେ କିନିଦେର୍ ।

୨୯ ମାରି, ଝେଡ଼ାସନି ତରିଟାନ ମାରି ଝେଡ଼ାଆରନି ତରିଟାନ, ତେବିରି ତରିଟାନ ମାରି ଉଣେରି ତରିଟାନ ଲୋକୁ ଖାଜି ମାପୁରୁଦି ରାଜିଦୁ ଉଣ୍ଡେଙ୍ଗ୍ ବାସ୍‌ନାର ।

୩୦ ☆ମାରି ସୁଡ଼ଦୁ, ଏର୍ ଇଲେଇ ଝେନ୍‌କା ମାନାର୍ ଖାର୍ ଆଗ୍‌ଡ଼ି ଆନାର୍ ମାରି ଆଗ୍‌ଡ଼ି ମାନି ଏସୋ ଲୋକୁ ଝେନ୍‌କା ଆନାର୍ ।

ଜିସୁ ଜିରୁସାଲମ୍‌ଡିଙ୍ଗ୍ ଜିବନ୍‌ନୋତାନ

(ମାଡିଉ ୨୩:୩୭-୩୯)

୩୧ ନାସ୍ତ୍ରାଝାଲେ ଏସୋ ପାରୁସିର୍ ଜିସୁ ଲାକ୍‌ତୁ ଖାଜି ଇହ୍‌ର, “ଇୟା ବାଡ଼ି ଡିସ୍‌ସି ସହସୋ ସାଙ୍ଗ୍‌ଆ, ଇରିଙ୍ଗ୍ ହେରୋଦ ନିଙ୍ଗ୍ କାଡ଼ତେଙ୍ଗ୍ ବଦା କିଜିନାନ୍ ।”

୩୨ ଆବେର୍ ଜିସୁ ଖାରିଙ୍ଗ୍ ଇର୍‌ଆନ୍, “ମିର୍ ସଲ୍‌ସୋ ଆୟା ଗଲୁଦିଙ୍ଗ୍ ଇନ୍‌ଡୁ, ସୁଡ଼ଦୁ, ନାନ୍ ନେର୍ ମାରି ଝିଗେରିଙ୍ଗ୍ ଲୋକାମାଣକୁ ଦୁବେଙ୍ଗ୍ ପେର୍‌ଜିନା ମାରି ଲୋକାଙ୍ଗ୍ ନେଗେନ୍ କିଜିନା, ମିଏରିଙ୍ଗ୍ ନା ପାଣି ଝିଜିନାଡ଼ ।

୩୩ ମାଡର୍ ନାନ୍ ଇୟାଝିକୁ ପାଣି ନେର୍, ଝିଗେରିଙ୍ଗ୍ ମାରି ମିଏରିଙ୍ଗ୍ ନାଙ୍ଗ୍ ସନ୍‌ଡ୍ରେଙ୍ଗ୍ ଆନାଡ଼, ଇରିଙ୍ଗ୍ ଜିରୁସାଲମ୍‌ଡି ଆଡ଼ରେ ବାବବାଦିର୍ ସାନିକା ଟିକ୍ ସିଲେ ।

୩୪ “ଏ ଜିରୁସାଲମ୍, ଏ ଜିରୁସାଲମ୍, ନିନ୍ ବାବବାଦିରିଙ୍ଗ୍ କାଡ଼ତିମାନି । ଏମେ ଲୋକାଙ୍ଗ୍ ମାପୁରୁ ନି ଲାକ୍‌ତୁ ପୋକ୍‌ତାମାର୍‌ଆନ୍, ନିନ୍ ଖାନିଙ୍ଗ୍ କାଲ୍‌କାଣ୍ ଡାକ୍‌ତିମାନି । ନାନ୍ ଏସୋ ଦେବେଙ୍ଗ୍ ମି ଲୋକାଙ୍ଗ୍ ସାକା କିଦେଙ୍ଗ୍ ବଦା କିଜିନା ।

☆ ୧୩:୨୮ ମାଡିଉ ୨୨:୧୩; ୨୫:୩୦.

☆ ୧୩:୨୮ ମାଡିଉ ୮:୧୧,୧୨.

☆ ୧୩:୩୦

ମାଡିଉ ୧୯:୩୦; ୨୦:୧୭; ମାର୍କ ୧୦:୩୧.

ଉଣ୍ଡି ତାଡ଼ି କରୁଛନ୍ତି ତାରି ରେକା ଆଡ଼ି କରୁ ପିଲେକାଙ୍କ ଅରସେ
ଉଣ୍ଡିକିନିଝାଜା ନାନ ମି ଲୋକାଙ୍କ ଉଣ୍ଡି କିଦେଙ୍କ ବଦାକିତାମାର୍ଥା
। ମାତର ଆକା କିଦେଙ୍କ ବଦା କିଇତି ।

୩୫ ସୁତୁ, ମି ମନ୍ଦିରତିଙ୍କ ଲୋକୁ ଡିସ୍ତାମାନାର୍; ମାରି, ନାନ
ମିଙ୍କ ଇଜିନା, ପ୍ରବୁଦି ଦରତାନ୍ ଆମାକାନ୍ ଝାଜିନାନ୍, ଝାନ୍ ଦନ୍ୟ,
ମିର ଆମା ନାଣ୍ଡିଙ୍କ ଇୟା ମାଟା ଇନିଦେର, ଆୟା ଦିନ୍ ଝାନି ସାନ୍
ନାଙ୍କ ମାରି ସୁତୁଦେଙ୍କ ଆଟ୍‌ଇଦେର ।”

୧୪

ଜିସୁ ରୋଗିଲୋକତିଙ୍କ ନେଗେଣ୍ଡ କିତାନ୍

୧ ଅର୍ଲେନ୍ ଜିସୁ ରମ୍‌ନିନାଣ୍ଡିଙ୍କ ଉଣ୍ଡେଙ୍କ ପାରୁସିର ଅରେନ୍
ପେରିଝାନ୍‌ଦି ଇଲ୍‌ତୁ ସର୍‌ଆନ୍, ମାରି ଲୋକୁ ଝାନିଙ୍କ ସୁତୁ
ମାର୍‌ଆର୍ ।

୨ ମାରି ସୁତୁ, ଝାନି ଆଗ୍‌ତି ଅରେନ୍ କିକୁ ନି କାଲ୍‌କୁ ଝାସ୍‌ସି ରୋଗ୍
ଆସ୍‌ତିମାର୍‌ଇ ଲୋକୁ ମାର୍‌ଆନ୍ ।

୩ ଆବେଟ୍ ଜିସୁ ବାଇବଲ୍‌ତି ସାସ୍‌ତିରିଙ୍କ ମାରି ପାରୁସିରିଙ୍କ
ଇରୁଆନ୍, “ରମ୍‌ନିନାଣ୍ଡିଙ୍କ ରୋଗ୍‌ତାନ୍ ନେଗେଣ୍ଡ କିନି ନିୟମ୍ ନୋ
ସିଲେ ? ମାତର ଝାର୍ ଆଲେତା ମାର୍‌ଆର୍ ।”

୪ ମାରି, ଝାନ୍ ଝାନିଙ୍କ ଆସ୍‌ସି ନେଗେଣ୍ଡ କିତାନ୍ ମାରି ଝାନିଙ୍କ ଝାନି
ଇନ୍‌ଡ୍ର ପୋକ୍‌ତାନ୍ ।

୫ ମାରି, ଝାନ୍ ଝାରିଙ୍କ ଇରୁଆନ୍, “ମି ଲୋଇ ଏନ୍ ନିଜେଦି
ମାରିନ୍ ବା ତାନ୍ କୁଇଁଦୁ ଆରତିଙ୍କ ଇନିକା ଝାନିଙ୍କ ରମ୍‌ନିନାଣ୍ଡିଙ୍କ
ଆୟାଦାପ୍ରେ ନିକ୍‌ଏନ୍ ନୋ ?”

୬ ମାରି, ଝାର୍ ଇୟାଞ୍ଜିକୁ ମାଟାଦି ଇନି ଉତ୍‌ର ସିଦେଙ୍କ ଆଟ୍‌ଏତାର୍
।

ସାନ୍ତି ଆନିକା ନି ସେବାକିନିକା

୭ ମାରି, ଜିସୁ ସୁତୁତାନ୍ ଜେ ଏସୋ କୁଡାଙ୍କ ବାସ୍‌ତେଙ୍କ ଇଜି ପେରି
ପେରି ବାଡିଙ୍କ ପୋୟଜି ମାର୍‌ଆର୍ । ଆଦେଙ୍କ ଜିସୁ ଇୟା କାତା
ଝେର୍‌ତାନ୍,

୮ ଏସ୍ତ୍ରାଈଲେ ମିଙ୍ଗୁ ଅରେନ୍ ପେଡ଼ି ବଜିଦୁ ଉଣ୍ଡେଙ୍ଗ କୁକ୍‌ନାନ୍, ନାସ୍ତ୍ରାଈଲେ ପେରିବାଡ଼ିଦୁ ବାସ୍‌ମାଟ୍, ଆନାଡ଼୍ ଖାନ୍ ମିବାଣ୍‌କାଣ୍ ପେରି ପେରି ଲୋକାଙ୍ଗ କୁକ୍‌ନା ମାନାନ୍,

୯ ମାରି ଏନ୍ ମିଙ୍ଗୁ ନି ଆଇଞ୍ଜାନିଙ୍ଗ କୁକ୍‌ନା ମାନାନ୍, ଖାନ୍ ଖାନା ମିଙ୍ଗୁ ଖେରନାର୍, ଖେନିଙ୍ଗ ବାଡ଼ି ସିଆ; ମାରି, ନାସ୍ତ୍ରାଈଲେ ମିର୍ ସେମାର୍‌ଆଜି ଆଡ଼ଗିରି ବାଡ଼ିଦୁ ବାସ୍‌ନିଦେର୍ ।

୧୦ ମାତର୍ ଏସ୍ତ୍ରାଈଲେ ଅରେନ୍ ମିଙ୍ଗୁ କୁକ୍‌ନାନ୍, ନାସ୍ତ୍ରାଈଲେ ମିର୍ ସଲ୍‌ସି ଆଡ଼ଗିରି ବାଡ଼ିଦୁ ବାସ୍‌ତୁ, ଏଣ୍ଡେସ୍ ମିଙ୍ଗୁ କୁକ୍‌ତିକାନ୍ ଖାଜି ମିଙ୍ଗୁ ଇନାନ୍, ଏ ତଡ଼ାନ୍, ମୁସ୍‌କୁରି ବାଡ଼ିଦୁ ରାଆ; ନାସ୍ତ୍ରାଈଲେ ମିଞ୍ଜାଲେ ବାସ୍‌ସିମାନି ଖିଜେରି ଲୋକାଞ୍ଜାଲେ ଆଗ୍‌ଡ଼ି ମିର୍ ସମ୍ମାନ ପୟନିଦେର୍ ।

୧୧ ✧ ଇରିଙ୍ଗ ଏନ୍ ନିଜେଦିଙ୍ଗ ପେରିକାନ୍ ତରନାନ୍, ଖାନିଙ୍ଗ ଆଡ଼ଗି କିନାନ୍, ମାରି ଏନ୍ ନିଜେଦିଙ୍ଗ ଇସିକାନ୍ କିନାନ୍, ଖାନିଙ୍ଗ ପେରିକାନ୍ କିନାନ୍ ।

୧୨ ମାରି, ଖାନ୍ କୁକ୍‌ତି ମାରଇ ଲୋକାଙ୍ଗ ବା ଇର୍‌ଆନ୍, “ଖେଡେ ବା ନାଡ଼ା ବୋଜି ସିତିଙ୍ଗ ମି ତଡ଼୍ କି ଦାଦା କି ନିଜେଦି ଲୋକାଙ୍ଗ କି ମାଜନ୍‌ଡି ମି ଲାକ୍‌ତୁରି ଲୋକାଙ୍ଗ କୁକ୍‌ମାଟ୍, ଏସ୍ତ୍ରାଈଲେ ଖାନ୍ ବା ମିଙ୍ଗୁ ଡେସି କୁକ୍‌ନାର୍ ମାରି ଡେପ୍‌ନାସିନାର୍ ।

୧୩ ମାତର୍ ବୋଜି କିତିଙ୍ଗ କାକୁତ ଲୋକାଙ୍ଗ, ଇରାଜିବୁଲାନିଞ୍ଜାରିଙ୍ଗ, ସଟାରିଙ୍ଗ ମାରି କାଣା ଲୋକାଙ୍ଗ କୁକ୍‌ତୁ;

୧୪ ଆତିଙ୍ଗ ମିର୍ ଦନ୍‌ଏ ଆନିଦେର୍, ଇରିଙ୍ଗ ମିଙ୍ଗୁ ଡେସି ସିଦେଙ୍ଗ ଇଜି ତାମେମାନ୍ ଇନିକା ସିଲେଡ଼; ମାରି, ଦାମ୍‌ ଲୋକୁ ମାରିଡେସି ନିଙ୍ଗିନିଞ୍ଜାଲେ ମିଙ୍ଗୁ ପୁରସ୍‌କାର ପୁର୍‌ନାଡ଼ ।”

ପେରି ବଜିଦି କାତା
(ମାଡ଼ିଉ ୨୨:୧-୧୦)

୧୫ ଆକା ଖେନ୍‌ଜି ଜିସୁଞ୍ଜାଲେ ଉଣ୍ଡେଙ୍ଗ ବାସ୍‌ତି ମାରୁରି ଲୋକା ଲୋଇ ଅରେନ୍ ଖାନିଙ୍ଗ ଇର୍‌ଆନ୍, “ଆମା ଲୋକୁ ମାପୁରୁଦି ରାଜିଦୁ ଉଣ୍ଡେଙ୍ଗ ବାସ୍‌ନାନ୍, ଖାନ୍ ଦନ୍‌ଏ ।”

୧୭ ମାତର ଜିସୁ ଖାନିଙ୍ଗ୍ ଇରୁଆନ୍, ଅରେନ୍ ଲୋକୁ ଉଣ୍ଡି ପେରି ବୋଜି ସିଦେଙ୍ଗ୍ ବଦାକିଜି ନାଣ୍ଡ ଲୋକାଙ୍ଗ୍ କୁକିସତାନ୍;

୧୭ ମାରି, ବୋଜି ଉଣି ସମୟ ଇଗା ଖାତାତୁଆକା, କୁକ୍ତି ମାରଇ ଲୋକାମାନୁ ଖାନି ପାଣିକିନି ଖାନି ପୋକ୍ସି କୁକ୍ସୋ ତାତେଙ୍ଗ୍ ଇରୁଆନ୍, ଇରିଙ୍ଗ୍ ବୋଜିଞ୍ଜୁ ଖାର୍ତ୍ତା ଝିସତାମାରୁଆର୍ ।

୧୮ ମାତର ଝିଜେରେ ଅରସେ ଇନ୍ତେଙ୍ଗ୍ ଆସ୍ତାର । ପାରୁତୁମ୍ ଅରେନ୍ ଇରୁଆନ୍, ନାନ୍ କାଣ୍ଡେକ୍ ବୁମି କଟାମାନା, ଆକା ନାଙ୍ଗ୍ ସୁଡ଼ୁକିକା ମାନାଡ଼; ନାନ୍ ମାଡ଼ିସ୍ କିଜିନା, ନିନ୍ ନାଙ୍ଗ୍ ଡିସ୍ସିତିମାନି ଇଜି ଅଡ଼ବିଜିନା ।

୧୯ ମାରି ଅରେନ୍ ଇରୁଆନ୍, ନାନ୍ ପାସ୍ଗୋଟା ସେରକୁ ଡାକ୍ କୋଟାମାନା, ମାରି ନାନ୍ ଖାନିକାଙ୍ଗ୍ ମିତେଙ୍ଗ୍ ସଲ୍ସିନା; ମାଡ଼ିସ୍ କିଜିନା, ନିନ୍ ନାଙ୍ଗ୍ ଡିସ୍ସିତିମାନି ଇଜି ଅଡ଼ବିଜିନା ।

୨୦ ମାରି ଆଇକାନ୍ ଇରୁଆନ୍, ନାନ୍ ପୁନା ପେଡ଼ି ଆତାମାନା, ଆଦେଙ୍ଗ୍ ଖାଦେଙ୍ଗ୍ ଆଟ୍ଏ ।

୨୧ ମାରି, ଆୟା ଗତିମୁରୁଲି ଖାଜି ଖାନି ମାଲିକ୍ତିଙ୍ଗ୍ ଆୟାଞ୍ଜି ଇରୁଆନ୍, ଆବେଟ୍ ଆୟା ଇଲୁଦି ମାଲିକ୍ ରିସା ଆତାନୋ ଖାନି ଗତିମୁରୁଲିଙ୍ଗ୍ ଇରୁଆନ୍, ବେଗି ଗାଡ଼ାକା ଦୁଆରକାଙ୍ଗ୍ ମାରି ସାକ୍ତି ସାକ୍ତି ସଲ୍ସି କାକୁଡ଼ ଲୋକାଙ୍ଗ୍, ଇରାଜିବୁଲାନିଞ୍ଜାରିଙ୍ଗ୍, କାଣାରିଙ୍ଗ୍ ମାରି ସଟାରିଙ୍ଗ୍ ଇବେ କୁକ୍ସୋ ତାଗା ।

୨୨ ଝେନ୍କା ଆୟା ଗତିମୁରୁଲି ଇରୁଆନ୍, ଏ ମାଲିକ୍, ନି ବଦାଦାନ୍ କିତାମାନା, ମାତର ମାରି ବାଡ଼ି ମାନାଡ଼ ।

୨୩ ଆବେଟ୍ ମାଲିକ୍ ଆୟା ସାକ୍ତିଙ୍ଗ୍ ଇରୁଆନ୍, ପେରି ଦୁଆରକାଙ୍ଗ୍ ମାରି କନା ମୁଲ୍ଲାଦୁ ସଲ୍ସି, ନା ଇଲ୍ଲତୁ ଲୋକୁ ଏଣ୍ଡେସ୍ ବଡ଼ ଆନାର, ଆୟା ଉଣ୍ଡିଙ୍ଗ୍ ଲୋକୁ ଖାଦେଙ୍ଗ୍ ଇନ୍ତୁ ।

୨୪ ଏଣ୍ଡେସ୍ ମିଙ୍ଗ୍ ନାନ୍ ଇଜିନା, ଆୟା କୁକ୍ତିମାରଇ ଲୋକା ଲୋଇ ଏରବା ନାନ୍ ବୋଜି କିତିମାନୁ ଉଣ୍ଡେଙ୍ଗ୍ ଆଟ୍ଏର ।

ସିସୁ ଆନି ଦାରା
(ମାଡ଼ିଉ ୧୦:୩୭-୩୮)

୨୫ ଅରଲେନ୍ ନାଣ୍ଟ ଲୋକୁ ଜିସୁଖାଲେ ସଲ୍‌ସିମାର୍‌ଆର୍, ମାରି
 ଖାନ୍ ଖେନ୍‌କା ମାର୍‌ଜିବେସ୍‌ସି ଖାରିଙ୍ଗ୍‌ ଇର୍‌ଆନ୍,

୨୬ ☆ଜଦି ଅରେନ୍ ଲୋକୁ ନା ଲାକ୍‌ତୁ ଖାଜି, ମାତର୍‌ ଖାନ୍ ଜଦି
 ନାଙ୍ଗ୍‌ ଡିସ୍‌ସି ନିଜେଦି ବୁବା ଯାୟାଏଙ୍ଗ୍‌, ଆଡିସିଙ୍ଗ୍‌, କଡରିଙ୍ଗ୍‌,
 ତାଙ୍ଗ୍‌ ତଡାନକାଙ୍ଗ୍‌ ମାରି ଏଣ୍ଡେସ୍‌ ନିଜେଦି ଜିବନ୍‌ଡିଙ୍ଗ୍‌ ବା ନାଣ୍ଟ
 ଜିବନ୍‌ନୋନାନ୍, ଖାନ୍ ନା ସିସୁ ଆଦେଙ୍ଗ୍‌ ଆର୍‌ଏନ୍ ।

୨୭ ☆ଏନ୍ ଜଦି ନିଜେଦି କୁସ ପିଣ୍ଡୁଜି ନା ଖେନ୍‌କା ରେଏନ୍, ଖାନ୍ ନା
 ସିସୁ ଆଦେଙ୍ଗ୍‌ ଆର୍‌ଏନ୍ ।

୨୮ ଇରିଙ୍ଗ୍‌ ମି ଲୋଇ ଏନ୍ କାପ୍‌କିନି ଇଲୁ ତିଆର୍‌ କିଦେଙ୍ଗ୍‌
 ବଦାକିଜି ଆକା ଝିସ୍‌ତେଙ୍ଗ୍‌ ଇଜି ଖାନିମାନ୍‌ ତାରୁଙ୍ଗ୍‌ ମାନେ ନୋ ସିଲୁ,
 ଇକା ପାର୍‌ତୁମ୍‌ ବାସ୍‌ସ ଏସୋ ତାରୁଙ୍ଗ୍‌ ତାକ୍‌ନେ ଲେକିସ୍‌ କିଏନ୍‌ ନୋ
 ?

୨୯ ଆନାଡ୍‌ ଖାନ୍ କୁନାଦି ପୋକ୍‌ସି ଝିସ୍‌ତେଙ୍ଗ୍‌ ଜଦି ଆର୍‌ଏନ୍,
 ଲୋକୁ ଆକା ସୁଣାର୍‌, ଝିଜେରେ ଖାନିଙ୍ଗ୍‌ ସେମାର୍‌ କିଜି ଇନ୍‌ଡ୍ରେଙ୍ଗ୍‌
 ଆସ୍‌ନାର୍‌,

୩୦ ଇୟାକାନ୍‌ ତିଆର୍‌ କିଦେଙ୍ଗ୍‌ ଆରାମ୍‌ କିଜି ମାତର୍‌ ଝିସ୍‌ତେଙ୍ଗ୍‌
 ଆର୍‌ଏତାନ୍ ।

୩୧ ମାରି ଏମେ ରାଜା ଆଇ ଅରେନ୍ ରାଜାଖାଲେ ଜୁଦ୍‌ କିଦେଙ୍ଗ୍‌
 ସନିଖାଲେ, ଦାସ୍‌ ହାଜାର୍‌ ସନ୍‌ସରିଙ୍ଗ୍‌ ଆସ୍‌ସି, ଖାନି ବିରଦ୍‌ତାନ୍‌
 ଖାଜିମାନି କଡେ ହାଜାର୍‌ ସନ୍‌ସରିଙ୍ଗ୍‌ ଅସି ଜୁଦ୍‌ କିଦେଙ୍ଗ୍‌ ଖାଜିମାନି
 ରାଜାଖାଲେ ଜୁଦ୍‌ କିଦେଙ୍ଗ୍‌ ଆର୍‌ନାନ୍‌ ନୋ ଆର୍‌ଏନ୍‌, ଆକା ଆର୍‌ଡିନେ
 ଅଡ୍‌ବିଏନ୍‌ ନୋ ?

୩୨ ଜଦି ଆର୍‌ଏନ୍‌, ଆଇ ରାଜା ଆକ ମାନ୍‌ବୁନେ ଖାନ୍‌ ଖାନି
 ଲୋକାଙ୍ଗ୍‌ ପୋକ୍‌ସି ଆୟା ରାଜାଖାଲେ ସାନ୍ତି କିନାନ୍ ।

୩୩ ଆୟାଖାଜା ମି ଲୋଇ ଏନ୍ ଜଦି ନିଜେଦି ଝିଜୁ ଡିସ୍‌ଏନ୍‌, ଖାନ୍‌
 ନା ସିସୁ ଆଦେଙ୍ଗ୍‌ ଆର୍‌ଏନ୍ ।

କାରିୟାଆଇ ସର୍‌

(ମାତିଡ ୫:୧୩; ମାର୍କ ୯:୫୦)

୩୪ ସର୍ବ ତୋ ନେଗିକା; ମାତର ସର୍ବ ଜଦି ତାନି କାରିୟା ଆନିକା ସିଲେଡ଼ିଆନାଡ଼, ଆରିଙ୍ଗ ଆକା ଆମାନ ବା କାରିୟା କିଦେଙ୍ଗ ଆର୍ଏଡ଼ ।

୩୫ ତେନିଙ୍ଗ ମିର୍ ଇୟାଞ୍ଜା ବୁମିଦି ଉଣ୍ଡିଙ୍ଗ ବା ଗାତାମ୍ କିଦେଙ୍ଗ ଆର୍ଇଦେର୍ । ଲୋକୁ ଆକା ଆଡ଼ରେ ପୋକ୍ନାର୍ । ଆମାଞ୍ଜାନିଙ୍ଗ ଝେନ୍‌ଡ୍ରେଙ୍ଗ ଗିତଣିଙ୍ଗମାନେ, ଝାନ୍ ଝେନିନ୍ ।

୧୫

ମୁରିତିମାନି ମେଣ୍ଡାଦି କାତା

(ମାତିଉ ୧୮:୧୨-୧୪)

୧ *ଅର୍ଲେନ୍, ସିସ୍ତୁ ଲୋସ୍‌ନିକାର୍ ନି ପାପି ଲୋକୁ ଝିଜେରେ ଜିସୁଦି ବାକ୍ୟ ଝେନ୍‌ଡ୍ରେଙ୍ଗ ଝାନି ଲାକ୍‌ତୁ ଝାଜି ମାର୍‌ଆର୍ ।

୨ ଆବେଟ୍ ପାରୁସିର୍ ନି ସାସ୍ତ୍ରିର୍ ଝିଜେରେ ବାସେ କିଜି କିଜି ଇର୍ହାର୍, ଇକାନ ପାପି ଲୋକାଙ୍ଗ ଝାନିଲାକ୍‌ତୁ କୁକ୍‌ନାନ୍ ମାରି ଝାରିଞ୍ଜାଲେ ଉଣାନ୍ ।

୩ ଆବେଟ୍ ଜିସୁ ଝାରିଙ୍ଗ ଇୟା କାତା ଇର୍‌ଆନ୍,

୪ “ମି ମାଣ୍‌କୁ ଇୟାଞ୍ଜା ଏମେ ଲୋକୁ ମାନାନ୍ ଜେ, ଝାନିଦି ଜଦି ୧୦୦ ଗୋଟା ମେଣ୍ଡେଙ୍ଗମାନେ, ମାରି ତାମେ ଲୋଇ ଉଣ୍ଡି ମୁରନାଡ଼, ମାରି ଝାନ୍ ନବେ ନୋଗୋଟା ମେଣ୍ଡେଙ୍ଗ ଗରନ୍‌ତୁ ଡିସ୍‌ସି ଆୟା ମୁରୁତିମାନି ମେଣ୍ଡା ପୋୟଇ ସାନ୍ଦି ତାନିଙ୍ଗ ପୟ୍‌ଏନ୍ ନୋ ?

୫ ମାରି, ଝାନ୍ ମେଣ୍ଡାଦିଙ୍ଗ ପଇତିଙ୍ଗ ଝାନ୍ ତାନିଙ୍ଗ ଝେଡ଼ିକାଦାନ୍ ଗୁଜାମ୍‌ତୁ ପିଣ୍ଡି ଇନ୍‌ଡ୍ର ତାନାନ୍,

୬ ମାରି, ନିଜେଦି ଲୋକାଙ୍ଗ ମାରି ପାଡ଼କାଦି ଲୋକାଙ୍ଗ କୁକ୍‌ସି ଉଣ୍ଡେ ମାନୁ କିଜି ଝାରିଙ୍ଗ ଝେର୍‌ନାନ୍, ନା ଝାଲେ ଝେଡ଼ିକା କିଦୁ, ଇରିଙ୍ଗ ନା ମୁରୁତିମାର୍‌ଇ ମେଣ୍ଡା ପୁଟ୍‌ତାଡ଼ ।

୭ ନାନ୍ ମିଙ୍ଗ୍ ଝେର୍‌ସିନା, ଆୟାଞ୍ଜାମାନେ ଏମେଲୋକାଦି ମନତିଙ୍ଗ ଡେପ୍‌ଡେଙ୍ଗ ଦରକାର୍ ସିଲେ, ଇୟାଞ୍ଜା ନବେ ନୋଗୋଟା ଦାମ୍‌ ଲୋକା ବାଦ୍‌ଲୁ, ଜେ ମନତିଙ୍ଗ ଡେପ୍‌ନାନ୍, ଇୟାଞ୍ଜା ଅରେନ୍ ପାପି ଲୋକ୍ ଉଣ୍ଡିଙ୍ଗ ମୁସ୍‌କୁପୁରୁତୁ ନାଣ୍ଡ ଝେଡ଼ିକା ଆନାଡ଼ ।

ମୁରିତିମାନି ଖେଣ୍ଡି ଅଦଲିଦି କାତା

୮ “ଇୟାଝାଜା ଏମେ ଆଇମା ଲୋକୁ ମାନାତ୍ ଜେ, ତାନିଦି ଜଦି ଦଶଗୋଟା ଖେଣ୍ଡି* ଅଦଲିଙ୍ଗମାନେ, ମାରି ଆବେଟ୍ ଉଣ୍ଡି ମୁରୁନାତ୍, ମାରି ଝାଦ୍ ଦିଝା କାସସିସ୍ କିଜି ଇଲୁଦୁ ସିପାଜି ଆକା ପୟ୍‌ଇ ସାନ୍ଧି ନେଗେନ୍‌ତାନ୍ ପୟ୍‌ଏତ୍ ?

୯ ମାରି, ଆକା ପଇତିଙ୍ଗ୍ ଝାନ୍ ନିଜେଦି ଲୋକାଙ୍ଗ୍ ମାରି ପାଡ଼କାଦି ଲୋକାଙ୍ଗ୍ କୁକ୍‌ସି ଉଣ୍ଡି ମାନୁ କିଜି ଝାରିଙ୍ଗ୍ ଝେରନାନ୍, ନା ଝାଲେ ଝେଡ଼ିକା କିଦୁ, ଏମେ ଖେଣ୍ଡି ଅଦଲି ମୁରୁତିମାର୍‌ଇକା, ଆକା ପୁଟ୍‌ତାତ୍ ।

୧୦ ନାନ୍ ମିଙ୍ଗ୍ ଝେରସିନା, ଇୟାଝାଜାନେ ଏନ୍ ମନତିଙ୍ଗ୍ ଡେପ୍‌ତିଙ୍ଗ୍, ଇୟାଝାଜା ଅରେନ୍ ପାପି ଉଣ୍ଡିଙ୍ଗ୍ ମାପୁରୁଦି ଦୁଡ଼କୁ ଝେଡ଼ିକାକିନେ ।”

ମୁରୁତି ମାରିନ୍ କାତା

୧୧ ଜିସୁ ମାରି ଇର୍ହାନ୍, ଅରେନ୍ ଲୋକୁଦିଙ୍ଗ୍ ରିଏର୍ କଡ଼ର୍ ମାର୍‌ଆର୍ ।

୧୨ ଝାରି ମାଣ୍‌କୁ ଇସିରି ମାରିନ୍ ବୁବେଙ୍ଗ୍ ଇର୍ହାନ୍, ବୁବା, ସମ୍ପତିଦି ଏମେ ବାଗ୍ ନା ବାଗତୁ ପୋଡ଼ାଜିନାତ୍, ଆକା ନାଙ୍ଗ୍ ସିଦାଟ୍ । ଆବେଟ୍ ଝାନ୍ ନିଜେଦି ଝିଜୁ ଝାରିଙ୍ଗ୍ ବାଟା କିଜି ସିତାନ୍ ।

୧୩ ଅଡ଼ପ୍ ଦିନ୍ ଝେନ୍‌କା ଇସିରି କଡ଼ ଝିଜୁ ଉଣ୍ଡି ମାନୁ କିଜି ଆକ ଦେଶ୍‌ତୁ ସର୍ହାନ୍, ମାରି ଆବେଶ୍‌କୁ ମୁର୍କୁ ଆଜି ନିଜେଦି ସମ୍ପତି ଇପ୍‌ତାନ୍ ।

୧୪ ମାତର୍ ଝିଜୁ ଝିସ୍‌ତି ଝେନ୍‌କା ଆୟା ଦେସ୍‌ତୁ ପେରି ଦୁବ୍ କିୟ ଆତାଡ଼ଆକା ଝାନିଙ୍ଗ୍ ସିଲିଝାଜା ଆଦେଙ୍ଗ୍ ଆସ୍‌ତାତ୍ ।

୧୫ ଆବେଟ୍ ଝାନ୍ ସଲ୍‌ସି ଆୟା ଦେଶ୍‌ଦି ଅରେନ୍ ଲୋକ୍‌ମାନୁ ଗତି ତେବାତାନ୍, ମାରି ଝାନ୍ ଝାନିଙ୍ଗ୍ ପାଣ୍ଡିଙ୍ଗ୍ ସାରାକିଦେଙ୍ଗ୍ ଇଜି ନିଜେଦି କିଡ଼ିଇଦୁ ପୋକ୍‌ତାର୍;

୧୬ ମାରି, ପାଣ୍ଡିଙ୍ଗ୍ ଏମେ କାଦି ତିନ୍‌ଜିମାର୍‌ଏ, ଆବେଟ୍ ଝାନ୍ ନିଜେଦି ପଟାପାଜିସ୍ କିଦେଙ୍ଗ୍ ବଦା କିଜିମାର୍‌ହାନ୍, ମାତର୍ ଏନ୍‌ବା ଝାନିଙ୍ଗ୍ ଇନିକାବା ସିଏଜି ମାର୍‌ହାର୍ ।

* ୧୫:୮ ଉନ୍‌ଡ଼ି ଖେଡ଼ି ଅଦଲିଦି ଅର୍ତ୍ତ ଉନ୍‌ଡ଼ି ନାଣ୍ଡିରି କୁଲି ତାବୁଙ୍ଗା ବୁଜା କିନାଟ୍

୧୭ ମାତର୍ ଖାନ୍ ଚେତନା ଆଜି ଇର୍ହାନ୍, ନା ବୁବାଦି ଏସ କୁଲିକିନିଝାରଇଦି ଉଣିକା ତେବାଜିନାଡ଼, ମାତର୍ ନାନ୍ ଇବେନ୍ ବାଙ୍ଗାଦାନ୍ ସାଜିନା ।

୧୮ ନାନ୍ ନିଙ୍ଗି ନା ବୁବାଦି ଲାକ୍ତୁ ସନା ମାରି ଖାନିଙ୍ଗ୍ ଖେରନା, ବୁବା, ମାପୁରୁଦି ବିରଦ୍ତାନ୍ ମାରି ନି ବିରଦ୍ତାନ୍ ନାନ୍ ପାପ୍ କିତାମାନା;

୧୯ ମି କଡ଼ ଇଜି କୁକ୍ନିକା ନାନ୍ ମାରି ଦୋର୍ ସିଲେ; ନାଙ୍ଗ୍ ମିବାନ୍ ଅରେନ୍ କୁଲିକିନି ଲୋକା ଖାଜା ଇଡିଆ ।

୨୦ ଆବେନ୍ ଖାନ୍ ନିଙ୍ଗି ନିଜେଦି ବୁବାଦି ଲାକ୍ତୁ ସର୍ହାନ୍ । ମାତର୍ ଖାନ୍ ଆକ ମାନଜି ମାନଜି ଖାନି ବୁବା ଖାନିଙ୍ଗ୍ ସୁଡ଼ୁ ଲାଡ଼ଦାନ୍ ତେରପେଡ଼ ଆତାନ୍ ମାରି ଉରୁକ୍ସି ସଲ୍ସି ଖାନିଙ୍ଗ୍ ପମିତାଆସ୍ତାନ୍ ନୋ ଲାଡ଼ଦାନ୍ ନଣ୍ଡିତାନ୍ ।

୨୧ ମାରିସି ଖାନିଙ୍ଗ୍ ଇରଆନ୍, ବୁବା ମାପୁରୁଦି ବିରଦ୍ତାନ୍ ମାରି ନି ବିରଦ୍ତାନ୍ ନାନ୍ ପାପ୍ କିତାମାନା, ମି ମାରିନ୍ ଇଜି କୁକ୍ତେଙ୍ଗ୍ ନାନ୍ ମାରି ଜର୍ ସିଲେ ।

୨୨ ମାତର୍ ବୁବା ନିଜେଦି ସାକରକାଙ୍ଗ୍ ଖେରତାନ୍, ଝିନ୍ଦୁମାଣକୁ ନେଗି ଖାତି ବେଗି ଆସୋଅରାଦୁ ଖେନିଙ୍ଗ୍ ଆରସିକିଦୁ, ଖେନି କିୟୁଦୁ ଖେତରି ମାରି ପାଦାମ୍ବକାଙ୍ଗ୍ ଜୁତେଙ୍ଗ୍ ସିଦୁ,

୨୩ ମାରି ବାଲ୍ସି ଜାଡ଼ ତାସ ଡାକ୍ତୁ; ରାଦୁ, ମାଡୁ ବୋଜି କିଜି ଖେଡ଼ିକା କିନାଟ୍,

୨୪ ମାତର୍ ନା ଇୟା ମାରିନ୍ ସାତା ମାର୍ହାନ୍, ମାରିଡେସି ଜିତାନ୍; ମୁରିତାମାର୍ହାନ୍, ମାରି ପଇତାନ୍ । ଆବେଟ୍ ଖାରିଙ୍ଗ୍ ଖେଡ଼ିକା କିଦେଙ୍ଗ୍ ଆତାର ।

୨୫ ନାସ୍ତିଖାଲେ ଖାରି ପେରି ମାରିନ୍ ଜମିଦୁ ମାର୍ହାନ୍ । ଖାନ୍ ଏସ୍ତିଖାଲେ ଖାଜି ଇଲୁଦି ଲାକ୍ତୁ ଖାତାନ୍, ନାସ୍ତିଖାଲେ ବାଜା ମାରି ଗାଡ଼ନିକା ଆଉଲି ଖେରାନ୍,

୨୬ ସାକରକାଙ୍ଗ୍ ମାଣକୁ ଅରେନ୍ ଲାକ୍ତୁ କୁକ୍ତାନ୍ ଆୟାଝିଜୁ ଇନିକା ଇଜି ଖେନ୍ବାଦେଙ୍ଗ୍ ଆସ୍ତାନ୍ ।

୨୭ ଖାନ୍ ଖାନିଙ୍ଗ୍ ଖେରତାନ୍, ମି ତଡ଼ାନ୍ ଖାତାମାନାନ୍, ମାରି ମି ବୁବା ଖାନିଙ୍ଗ୍ ନେଗି ମୋନ୍ଦାନ୍ ପଇତାନ୍ଆକା ବାଲ୍ସି ଜାଡ଼

ତାଙ୍କତାମାନାନ୍ ।

୨୮ ଆବେଟ୍ ଖାନ୍ ରିସାଆଜି ଲୋଇ ସଣ୍ଡେଙ୍ଗ୍ ଇଜି ବଦାକିଏତାନ୍; ମାତର୍ ଖାରି ବୁବା ଆଡ଼ରେ ଖାଜି ଖାନିଙ୍ଗ୍ ନାଣ୍ ବୁଜାକିଦେଙ୍ଗ୍ ଆସତାନ୍ ।

୨୯ ମାତର୍ ଖାନ୍ ବୁବାସିଙ୍ଗ୍ ଇର୍ଆନ୍, ସୁଡୁଆ, ନିସବାସେକ୍ ଆତାଡ଼ ନାନ୍ ମି ସାକରତି ଖାଜା ପାଣିକିଜି ଖାଜିନା, ମାରି ଏସକାଙ୍ଗ୍ବା ମି ମାଟା ଅମାନ୍ୟ କିଏ, ମାରି ନା ସାଙ୍ଗ୍ରି ଖାଲେ ଖେଡ଼ିକା କିଦେଙ୍ଗ୍ ନିନ୍ ନାଙ୍ଗ୍ ଏସକାଙ୍ଗ୍ବା ଗରିୟାପିଲା ବା ସିଇ;

୩୦ ମାତର୍ ମି ଇୟା ଏମେ ମାରିସି ତାଗ୍‌ଇଖାରି ଖାଲେ ମି ଦନ୍ ଝିଜୁ ଉଣ୍ଡି ଝିସତା ମାନାନ୍, ଏସିଖାଲେ ଖାନ୍ ଖାତାନ୍, ନାସିଖାଲେ ନିନ୍ ଖାନି ଉଣ୍ଡିଙ୍ଗ୍ ବାଲ୍‌ସି ଜାତୁ ତାଙ୍କତାମାନାନ୍ ।

୩୧ ଆବେଟ୍ ଖାନ୍ ଖାନିଙ୍ଗ୍ ଖେରତାନ୍, ମାରିନ୍, ନିନ୍‌ତୋ ଝିଜୁଦିନ୍ ନା ଖାଲେ ମାନି, ମାରି ଆମାକା ଝିଜୁ ନାଦି, ଆୟାଝିଜୁ ନିଦି;

୩୨ ମାତର୍ ଇୟା ଜେ ନି ତଡ଼ାନ୍ ସାତାମାର୍‌ଆନ୍, ମାରିଡେସି ଜିତାନ୍, ମୁରିତାମାର୍‌ଆନ୍, ମାରି ପୁଟାନ୍, ଆୟା ଉଣ୍ଡିଙ୍ଗ୍ ଖେଡ଼ିକା କିଦେଙ୍ଗ୍ ଦରକାର୍‌ମାର୍‌ହାଡ଼ ।

୧୭

ସାଲାକିଦି ଗୋତିମୁରୁଲିଦି କାତା

୧ ଜିସୁ ସିସୁରିଙ୍ଗ୍ ବା ଇର୍ହାନ୍, ଅରେନ୍ ମାଜନ୍ ଲୋକୁ ମାର୍‌ହାନ୍, ଖାରି ମାନୁ ଅରେନ୍ ଗୋତିମୁରୁଲି ମାର୍‌ହାନ୍, ମାରି ଖାନ୍ ଖାରି ସମ୍ପତି ବୁଡ଼ା କିଜିନାନ୍ ଇଜି ଆୟା ବିସୟତାନ୍ ଖେନ୍‌ଜି ଖାନ୍ ଖାନିଙ୍ଗ୍ କୁକ୍‌ତାନ୍‌ନୋ ଇର୍ହାନ୍,

୨ ନାନ୍ ନି ବିସୟତାନ୍ ଇକା ଇନି ମାଟା ଖେନ୍‌ଜିନା ? ନି ପାଣିଦି ଇସାବ୍ ସିଦା, ମାତର୍ ନିନ୍ ମାରି ଗୋତିମୁରୁଲି ଆଜି ମାଣ୍ଡେ_ଙ୍ଗ୍ ଆଡ଼ଇ ।

୩ ଆବେନ୍ ଆୟା ଗୋତିମୁରୁଲି ମୋନ୍‌ତୁ ମୋନ୍‌ତୁ ଇର୍ହାନ୍, ଇନିକା କିନା ? ନା ମାଲିକ୍ ତୋ ନାମାଣ୍‌କୁ ଗୋତିମୁରୁଲିଦି ନା ସାକିରି ଅସି ସୋଲ୍‌ସିନାନ୍ । ସିକ୍‌ଲା କାର୍‌ଦେଙ୍ଗ୍ ନା ସାକ୍ତି ସିଲେଡ଼, ଭିକିୟା ଲସ୍‌ତେଙ୍ଗ୍ ନାଙ୍ଗ୍ ସେମାର୍ ଖାଜିନାଡ଼ ।

୪ ନାନ ଗୋତିମୁରୁଲିଦାନ ଡିସ୍ତି ଝେନକା ଲୋକୁ ଏଣ୍ଡେସ୍ ନାଙ୍ଗ୍ ନିଜେ ନିଜେଦି ଇଲ୍ଲକାଙ୍ଗ୍ କୁକ୍ନାର୍, ଇୟାଉଣ୍ଡିଙ୍ଗ୍ ଇନିକା କିନା, ଆକା ନେସ୍ତାନି ।

୫ ମାରି, ଝାନ୍ ନିଜେଦି ମାଲିକ୍ ଦି ଝିଜେରିଙ୍ଗ୍ ରୁଣ୍ଡୁ ଅତିମାନି ଲୋକାଙ୍ଗ୍ ଲାକ୍ତୁ କୁକ୍ସି ଆଗ୍ଡିରି ଅରେନ୍‌ଝାନିଙ୍ଗ୍ ଇର୍ହାନ୍, ନି ମୁସ୍‌କୁ ନା ପ୍ରବୁଦି ମାନୁ ଏସ୍ ଟାକା ସିଦେଙ୍ଗ୍ ମାନାଡ୍ ? ଝାନ୍ ଇର୍ହାନ୍, ସଏ ଡାବା ନିୟୁ ।

୬ ଝାନ୍ ଝାନିଙ୍ଗ୍ ଇର୍ହାନ୍, ନି ଇସାବ୍ କିନି ଆକୁ ବେଗିତାସ୍ ବାସ୍‌ସ ପସାସ୍ ଡାବା ନିୟୁ ଇଜି ରାସ୍‌ଆଁ ।

୭ ତାନେ ଝେନକା ଝାନ୍ ମାରି ଅରେନ୍‌ଝାନିଙ୍ଗ୍ ଇର୍ହାନ୍, ନି ମୁସ୍‌କୁ ଏସ୍ ଡାବୁଙ୍ଗ୍ ସିଦେଙ୍ଗ୍ ମାନାଡ୍ ? ଝାନ୍ ଇର୍ହାନ୍, ସଏ ବାସ୍ତା ଗଦ୍‌ମୁ । ଝାନ୍ ଝାନିଙ୍ଗ୍ ଇର୍ହାନ୍, ନି ଇସାବ୍ କିନି ଆକୁ ବେଗିତାସ୍ ଅସେ ବାସ୍ତା ଇଜି ରାସ୍‌ଆଁ ।

୮ ଆୟା ଅବିସ୍‌ବାସ୍‌କିତି ଗୋତିମୁରୁଲି ବୁଦିଦି ଝାଲେ ପାଣି କିତିମାନିଙ୍ଗ୍ ଝାନି ମାଲିକ୍ ଝାନିଙ୍ଗ୍ ପ୍ରସଂସା କିତାନ୍; ଇୟା ଦୁନିଆ କଡ଼ର୍ ଝାରି ପାଣି କିଦେଙ୍ଗ୍ ଜାୟ୍‌ତି କଡ଼ରି ବାଦୁଲୁ ନାଣ୍ଡୁ ବୁଦି ।

୯ ନାନ୍ ବା ମିଙ୍ଗ୍ ଇଜିନା, “ଦୁନିଆଦି ଦନ୍‌ତୁ ନିଜେ ନିଜେଦି ଉଣ୍ଡିଙ୍ଗ୍ ସଙ୍ଗ୍ ପଇଦୁ, ଏଣ୍ଡେସ୍ ଆକା ଝିଜ୍‌ତିଙ୍ଗ୍ ମିଙ୍ଗ୍ ଝିଜୁଦିନ୍‌ତି ଡରନିବାଡିଦୁ କୁକ୍ନାନ ।

୧୦ ଏନ୍ ଉଣା ବିସ୍‌ୟତାନ୍ ବିସ୍‌ବାସ୍ କିନାନ୍, ଝାନ୍ ନାଣ୍ଡୁ ବିସ୍‌ୟତୁ ବା ବିସ୍‌ବାସ୍ ମାନାନ୍, ମାରି ଏନ୍ ଉଣା ବିସ୍‌ୟତାନ୍ ଅବିସ୍‌ବାସ୍ ଝାନ୍ ନାଣ୍ଡୁ ବିସ୍‌ୟତୁ ବା ଅବିସ୍‌ବାସ୍ କିନାନ୍ ।

୧୧ ମାରି, ମିର୍ ଜଦି ଦୁନିଆଦି ଦନ୍‌ତୁ ବିସ୍‌ବାସ୍ କିଜ୍‌ଦେର୍, ଆଦେଙ୍ଗ୍ ଏନ୍ ମିଙ୍ଗ୍ ବିସ୍‌ବାସ୍ କିଜି ସଡ୍ ଦନ୍ ମି କିୟୁଦୁ ସପ୍ରେ କିନାନ୍ ?

୧୨ ମାରି, ଜଦି ମିର୍ ଆଇଝାନି ଦନ୍ ବିସ୍‌ୟତାନ୍ ବିସ୍‌ବାସ୍ କିଜ୍‌ଦେର୍, ମାରି ଏନ୍ ମିଙ୍ଗ୍ ମି ନିଜେଦି ବିସ୍‌ୟ ସିନାନ୍ ?

୧୩ ☆“ଅରେନ୍ ସାକର୍ ରିଏରି ମାଲିକ୍‌କା ସାକର୍ ଆଦେଙ୍ଗ୍

ଆର୍ଏନ୍; ମାତର ଖାନ୍ ଅରେନ୍‌ଖାନିଙ୍କ କାଡ଼୍‌ନାନ୍ ମାରି ଆଇଖାନିଙ୍କ ଜିବନ୍‌ନୋନା, ମାରି ଅରେନ୍‌ଖାନି ଉଣ୍ଡିଙ୍କ ଲାକ୍‌ତୁ କିନାନ୍ ମାରି ଆଇଖାନିଙ୍କ ଡିସ୍‌ନାନ୍ । ମିର୍ ମାପୁରୁ ମାରି ଦନ ରିଏରି ସାକର୍ ଆଦେଙ୍କ ଆର୍‌ଇଦେର୍ ।”

ଏସ ଜିସୁ ଇନି ମାଟା

(ମାତିଉ ୧୧:୧୨-୧୩; ୫:୩୧-୩୨; ମାର୍କ ୧୦:୧୧-୧୨)

୧୪ ଇୟାଞ୍ଜିଲୁ ମାଟା ଖେନ୍‌ଜି ଦନ୍‌ଆସାନି ପାରୁସିର୍ ଜିସୁଙ୍କୁ ନିଦା କିଦେଙ୍କ ଆସ୍‌ତାର ।

୧୫ ଆବେନ୍ ଖାନ୍ ଖାରିଙ୍କ ଇର୍ହାନ୍, ଏର୍ ନିଜେ ନିଜେଦିଙ୍କ ଲୋକାରି ଆଗ୍‌ଡି ଦାର୍ମୁ ଇଜି ତରନାର୍, ମିର୍ ଆୟାଖାଜାଦି ଲୋକୁ, ମାତର ମାପୁରୁ ମି ଜିବନ୍‌ତିଙ୍କ ନେସ୍‌ନା; ମାତର ଏମେକା ଲୋକାରି ମାନୁ ପେରିକା, ଆୟାକା ମାପୁରୁଦି ଆଗ୍‌ଡି କାଡ଼୍‌ନିକା ।

୧୬ ☆ମୋସାଦି ନିୟମତାନ୍ ମାରି ବାବବାଦିର୍ ଦାର୍ମୁସାସ୍ତ୍ର ତୁବନ୍‌ସିନି ଜୋହନତି ସାନ୍ଧି ଖେଙ୍‌ତା ମାର୍ହାଡ୍; ଆୟା ଖାଲେରାନ୍ ମାପୁରୁଦି ରାଜିବୁ ସୁସମାଚାର ପ୍ରଚାର କିଜିନାର୍, ମାରି ଖିଜେରେ ଲୋକୁ ଡାଟ୍‌ତାନ୍ ଆବେନ୍‌ ସଲ୍‌ସିନାର ।

୧୭ ☆ମାତର ନିୟମତି ଉଣ୍ଡି ଇସ୍ତି ଠିକା ମାର୍‌ଗିନି ବାଦ୍‌ଲୁ ବାଦଡ୍ ନି ଦୁନିଆ ମାର୍‌ଗିନିକା ଉସାସ୍ ।

୧୮ ☆ଏନ୍‌ଆପିନ୍ ନିଜେଦି ଆଡ଼୍‌ସିଙ୍କ ଡିସ୍‌ନାନ୍ ନୋ ଆଇତାନିଙ୍କ ପେଡି ଆନାନ୍, ଖାନ୍ ଦାରିପାଣି କିନାନ୍; ମାରି, ଏନ୍ କୋନ୍‌ଲି ମାଣ୍‌କୁ ଡିସ୍‌ତି ଆଇମାଦିଙ୍କ ପେଡିଆନାନ୍, ଖାନ୍ ବା ଦାରିପାଣି କିନାନ୍ ।

ଅରେନ୍ ମାଜନ୍ ଲୋକୁ ନି ଲାଜାର୍

୧୯ ଅରେନ୍ ଦନି ଲୋକୁ ମାର୍ହାନ୍, ଖାନ୍ ନାଣ୍ତ ଦାରାଦି ଆଙ୍‌ ଆରାଜି ଖିଜୁଦିନ୍ ନାଣ୍ତ ଖେଡିକାଦାନ୍ ଉଣ୍ଡିଜିତିନ୍‌ଜି ମାର୍ହାନ୍;

୨୦ ମାତର ଖାନି ଦୁଆର୍ ଲାକ୍‌ତୁ ଲାଜାର୍ ଇଜି ଅରେନ୍ ବିକାରି ବାସ୍‌ତା ମାର୍ହାନ୍, ଖାନି ମୋନ୍‌ଲ୍‌ଖିଜୁ ଗାଉକୁ ବର୍‌ ଆତେମାରେଏ;

☆ ୧୭:୧୭ ମାତିଉ ୧୧:୧୨, ୧୩. ☆ ୧୭:୧୭ ମାତିଉ ୫:୧୮. ☆ ୧୭:୧୮ ମାତିଉ ୫:୩୨; ୧ କରନ୍ତିୟ ୭:୧୦, ୧୧.

୨୧ ଖାନ୍ ଆୟା ଦନି ଲୋକୁଦି ଟେବୁଲ୍‌ତାନ୍ ଆରନ୍ତି ସକ୍ତିଦାନ୍ ଏସ ଉଣ୍ଡି ପଟାପାଜିସ୍ କିଦେଙ୍ଗ୍ ଆସା କଜିମାର୍ହାନ୍; ମାରି, ନୁକୁଡ଼ିଙ୍ଗ୍ ଖାଜି ଖାନି ଗାଉକୁ ଝିନ୍ତୁ ନାକସି ମାର୍‌ଏ ।

୨୨ ତାନେ ଝେନ୍‌କା ଆୟା ବିକାରି ସାତାନ୍ ମାରି ଦୁଡ଼କା ମାଣ୍‌କୁ ଅବ୍ରାହାମତି ଗାତୁ ଅତେ; ଝେନ୍‌କା ଆୟା ଦନି ଲୋକୁ ବା ସାତାନ୍ ମାରି ମୁସ୍‌ତାର ।

୨୩ ମାରି, ଖାନ୍ ନର୍‌କଦି କାସ୍‌ତୁ କଲ୍‌ବଲ୍ ଆଜି ମୁସ୍‌କୁ ସୁଡ଼ୁ ଆକରାନ୍ ଅବ୍ରାହାମ ମାରି ଖାନି ଗାତୁଦୁ ଲାଜାରତିଙ୍ଗ୍ ସୁଡ଼ୁଦୁ ।

୨୪ ଆବେଟ୍ ଖାନ୍ କୁକସି ଇର୍ହାନ୍, ଏ ବୁବା ଅବ୍ରାହାମ, ନାଙ୍ଗ୍ ଦୟା କିଜି ଲାଜାରତିଙ୍ଗ୍ ପୋକ୍‌ତାଆ, ଏଣ୍ଡେସ୍ ଖାନ୍ ଏରତୁ ନିଜେଦି ଡାସକା ମୁଡ଼ୁସ୍ ନା ଝେଡ଼ଲତିଙ୍ଗ୍ ସିଡ଼ି କିଦେଙ୍ଗ୍, ମାତର୍ ନାନ୍ ଇୟା ସିସୁଦୁ କଲ୍‌ବଲ୍ ଆଜିନା ।

୨୫ ମାତର୍ ଅବ୍ରାହାମ ଇର୍ହାନ୍, ମାରିନ୍, ନିନ୍ ଜେ ଜିବନ୍‌ମାର୍‌ଇ ଖାଲେ ନିଜେଦି ନେଗି ବିସୟ୍‌ଝିନ୍ତୁ ପଇତି, ମାରି ଲାଜାର ଆୟାଖାଜା ତାର୍‌ଇ ବିସୟ୍‌ଝିନ୍ତୁ ପଇତାନ୍, ଇକା ଅଡ଼ିଆ; ମାତର୍ ଇଲେ ଖାନ୍ ଇୟା ବାଡ଼ିଦୁ ଝେଡ଼କା ପଇଜିନାନ୍, ମାରି ନିନ୍ କଲ୍‌ବଲ୍ ଆଜିନି ।

୨୬ ଆକା ଡିସ୍‌ତିଙ୍ଗ୍ ନିଦି ମାନ୍ତି ମାଣ୍‌କୁ ନାଣ୍ଟ ଗାଡ଼ି ମାନାଡ଼, ଏଣ୍ଡେସ୍ ଏମେ ଲୋକୁ ଇୟା ବାଡ଼ିଦାନ୍ ମି ଲାକ୍‌ତୁ ସଣ୍ଡେଙ୍ଗ୍ ଇଜି ବଦା କିନାର୍, ଖାର୍ ସଣ୍ଡେଙ୍ଗ୍ ଆର୍‌ଏର୍, ମାରି ଆୟାବାଡ଼ିଦାନ୍ ଏନ୍‌ବା ମା ଲାକ୍‌ତୁ ନାସ୍ ଖାଦେଙ୍ଗ୍ ଆର୍‌ଏର୍ ।

୨୭ ଆବେନ୍ ମାଜନ୍‌ଲୋକ୍ ଇର୍ହାନ୍, ଏ ବୁବା, ଆତିଙ୍ଗ୍ ନାନ୍ ନିଙ୍ଗ୍ ମାଡ଼ିସ୍ କିଜିନା, ଖାନିଙ୍ଗ୍ ନା ବୁବାଦି ଇଲ୍‌ଦୁ ପୋକ୍‌ଆ,

୨୮ ମାତର୍ ନା ପାସ୍‌ଲୋକ୍ ତଡ଼ାନ୍‌କୁ ମାନାର୍; ଖାର୍‌ବା ଏଣ୍ଡେସ୍ ଇୟା କାସ୍‌ଦି ବାଡ଼ିଦୁ ରାମାକିର୍, ଆୟାଉଣ୍ଡିଙ୍ଗ୍ ଖାନ୍ ଖାରି ଲାକ୍‌ତୁ ସାକି ସିନି ।

୨୯ ମାତର୍ ଅବ୍ରାହାମ ଇର୍ହାନ୍, ଖାରି ଲାକ୍‌ତୁ ମୋସା ମାରି ବାବବାଦିରି ଦାର୍‌ମୁସାସ୍ ମାନାଡ଼, ଖାର୍ ଖାରି ମାଟା ଝେନ୍‌ରି ।

୩୦ ଆବେନ୍ ଖାନ୍ ଇର୍ହାନ୍, ଏ ବୁବା ଅବ୍ରାହାମ, ଆକା ନାଣ୍ଟ ଆଏଡ଼; ମାତର୍ ଜଦି ସାତିମାନିଲୋକା ଲାକ୍‌ତୁରାନ୍ ଅରେନ୍ ଖାରି ଲାକ୍‌ତୁ ସନାର୍, ଆତିଙ୍ଗ୍ ଖାର୍ ମନ୍‌ତିଙ୍ଗ୍ ଡେପ୍‌ନାର ।

୩୧ ମାତର ଖାନ୍ ଖାନିଙ୍କ ଇର୍ହାନ୍, ଜଦି ଖାର ମୋସା ନି ବାବବାଦିରି ମାଟା ଝେନ୍‌ଏର୍, ଆତିଙ୍କ ସାତିମାନି ଲୋକାମାଣକୁ ଅରେନ୍ ମାରିଡ଼େସି ଜିବନ୍‌ଆଜିନିଙ୍କ ଜି ସରିଙ୍କ ବା ଖାର ନେଗିମାଟା ଝେରଡ଼ିଙ୍କ ଝେନ୍‌ଏର୍ ।

୧୭

ପାପ୍

(ମାତିଉ ୧୮:୨-୭, ୨୧-୨୨; ମାର୍କ ୯:୪୨)

୧ ଜିସୁ ଖାନି ସିସୁରିଙ୍କ ଇର୍ହାନ୍, ଏମେ ଝିକୁ ପରିକାଦାନ୍ ଲୋକୁ ପାପ୍‌ତୁ ଆରନାନ୍, ଆୟାଝିକୁ ଏଣ୍ଡେସବା ଖାନାଡ଼, ମାତର ଜେ ଇୟା ଝିକୁଦି ବଜ୍ ଆନାନ୍, ଖାନି ଦସ୍ ଏସା ବୟକାର୍ ଆନାଡ଼ ।

୨ ଇୟା ଇସି ଲୋକାମାଣକୁ ଅରେନ୍‌ଖାନି ଲୋକତି ପାପ୍ ଆନାନ୍ ଖାନି କକଲାଦୁ ଉଣ୍ଡି ଜାତାକାଲୁ ଡ଼ସି ଖାନିଙ୍କ ସାମ୍‌ଦୁରତୁ ପକତିଙ୍କ ମାରରିଙ୍କ ଖାନି ଉଣ୍ଡିଙ୍କ ନେଗେଣ୍ଡ ଆତାଡ଼ମାନ୍ତି ।

୩ ✠ଆରିଙ୍କ, ମିର୍ ନିଜେ ନିଜେଦି ବିସୟତାନ୍ ଜାଗାର୍‌ତା ଆଜି ମାନ୍‌ତୁ । ଜଦି ମି ତଡ଼ାନ୍ ପାପ୍ କିନାନ୍, ଆରିଙ୍କ ଖାନିଙ୍କ ଝେରଡ଼ୁ; ମାରି, ଖାନ୍ ଜଦି ମନ୍ ଡେପ୍‌ନାନ୍, ଆରିଙ୍କ ଖାନିଙ୍କ କେମା ସିଦୁ ।

୪ ମାରି, ଜଦି ଖାନ୍ ଅରନେଟିଙ୍କ ସାଡ଼ ଦେବେଙ୍କ ମି ବିରଦ୍‌ତାନ୍ ପାପ୍ କିନାନ୍ ମାରି ସାଡ଼ ଦେବେଙ୍କ ମି ଲାକ୍‌ତୁ ଡେସିଝାଜି ନାନ୍ ମନ୍ ଡେପ୍‌ସିନା ଇଜି ଇନାନ୍, ଆରିଙ୍କ ଖାନିଙ୍କ ଏଣ୍ଡେସବା କେମା ସିଦୁ ।

ବିସ୍‌ବାସ୍

୫ ଆବେଟ୍‌କୁ ପ୍ରେରିତ ସିସୁର୍ ପ୍ରବୁଙ୍କ ଇର୍‌ଆନ୍, “ମା ବିସ୍‌ବାସ୍ ନାଣ୍ଡ ପିରିସ୍ କିଆ ।”

୬ ପ୍ରବୁ ଇର୍‌ଆନ୍, ଜଦି ଉଣ୍ଡି ସାରସୁ ପାଡ଼ୁ ଝାଜା ମି ବିସ୍‌ବାସ୍ ତେବାନାଡ଼, ଆତିଙ୍କ ଇୟା ତୁଡ଼କଡ଼ି ମାରତିଙ୍କ ନିନ୍ ମଦଲ୍‌ତାନ୍ ରେଲାଜି ସାମ୍‌ଦୁରତୁ ଉରାଆ ଇଜି ଇରିଙ୍କ ଆକା ମି ମାଟା ମାନାନାଡ଼ ।

ଅରେନ୍ ଗତିମୁରୁଲିଦି ପାଣି

୭ ମାତର ମି ମାଣକୁ ଇୟାଜାଜା ଲୋକୁ ଏନ୍ ମାନାନ୍, ଆମାଜାନି ଗତିମୁରୁଲି ତୁଟ୍ଟି ଖାନାନ୍ ମାରି ଡାକକଡିଙ୍ଗ୍ ସାରାକିଜି କିଡ଼ିଇଦାନ୍ ଖାତିଙ୍ଗ୍ ଖାନ୍ ଖାନିଙ୍ଗ୍ ଇନାନ୍, ଇୟାଦାପ୍ରେ ଖାଜି ଉଣ୍ଡେଙ୍ଗ୍ ବାସ୍‌ଆ ?

୮ ଖାନ୍ ଇନିକା ଖାନିଙ୍ଗ୍ ଇନ୍‌ଏନ୍, ନାନ୍ ଉଣ୍ଡେଙ୍ଗ୍ ରସ୍‌ଆ, ମାରି ନାନ୍ ତିନିଉଣିକା ଡିସ୍‌ଇ ସାନ୍ତି ଜୁକ୍‌ଦୁ ତରାଜି ନା ସେବା କିଆ, ତାନି ଖେନ୍‌କା ନିନ୍ ତିନିଉଣି ?

୯ ଗତିମୁରୁଲି ଖାନି ମାଟାଦାନ୍ ପାଣି କିତିଙ୍ଗ୍ ଖାନ୍ ଇନିକା ଖାନିଙ୍ଗ୍ ଦନ୍‌ଏବାଦ୍ ସିନାନ୍ ?

୧୦ ଆୟାଜାଜାନେ ମିର୍ ବା ମାଟାଦାନ୍ ଡିଜୁ ପାଣିକିତି ଖେନ୍‌କା ଇନ୍‌ଶୁ ମାପ୍ ଇନି ପାଣି କିଇ ଗତିମୁରୁଲିଙ୍ଗ୍, ଏମେକା କିଦେଙ୍ଗ୍ ଆନାଡ୍, ଆକାନେ କିତାମାନାପ୍ ।

ଜିସୁ ଦାସ୍‌କୁସ୍ତି ଲୋକାଙ୍ଗ୍ ନେଗେଶୁ କିତାନ୍

୧୧ ଜିସୁ ଜିରୁସାଲମ୍‌ତୁ ସନିଖାଲେ ସମିରୋଶ୍ ମାରି ଗାଲିଲି ବା ସିଜି ସଲ୍‌ସିମାର୍‌ଆର୍ ।

୧୨ ମାରି, ଖାନ୍ ଉଣ୍ଡି ନାର୍‌ତୁ ତୁଟ୍ଟିତାନ୍, ଦାସ୍‌ଲୋକ୍ କୁସ୍ତୁରୋଗତି ଲୋକୁ ଖାନିଙ୍ଗ୍ ମିସାତାର୍;

୧୩ ଖାର୍ ଆକ ନିଲ୍‌ଜି ନାଶୁ ଆଉଲି ଆଜି ଇର୍ହାନ୍, “ଏ ଜିସୁ, ଗୁରୁ, ମାଙ୍ଗ୍ ଦୟା କିଆ ।”

୧୪ ମାରି, ଖାନ୍ ଖାରିଙ୍ଗ୍ ସୁଡ଼ୁଟ୍ଟି ଇର୍ହାନ୍, “ମିର୍ ସଲ୍‌ସି ନିଜେ ନିଜେଦିଙ୍ଗ୍ ଜାଜକରିଙ୍ଗ୍ ତରୁତୁ ।” ମାରି, ଖାର୍ ସଲ୍‌ପୁ ସଲ୍‌ପୁ ନେଗେଶୁ ଆତାର୍ ।

୧୫ ମାତର ଖାରି ମାଣକୁ ଅରେନ୍ ନିଜେଦି ନେଗେଶୁ ଆତିକା ସୁଡ଼ୁଟ୍ଟି ନାଶୁ ଆଉଲି ଆଜି ମାପୁରୁଦି ଦନ୍‌ଏବାଦ୍ କିଜି କିଜି ତେସି ଖାତାନ୍,

୧୬ ମାରି ଜିସୁଦି ପାଦାମ୍‌କା ଆଡ଼ଗି ଆଉଜି ଖାନିଙ୍ଗ୍ ଦନ୍‌ଏବାଦ୍ ସିଦେଙ୍ଗ୍ ଆସ୍‌ତାନ୍; ଖାନ୍ ଅରେନ୍ ସମିରୋଶିୟ ଲୋକୁ ।

୧୭ ଆବେର୍ ଜିସୁ ଇର୍ହାନ୍, “ଦାସ୍‌ଲୋକ୍ ଇନିକା ନେଗେଶୁ ଆସ୍‌ତାର୍ ? ଆରିଙ୍ଗ୍ ମାରି ଲୋକୁ ଏମେ ?

୧୮ ଗୌରବ୍ ମାପୁରୁଦି ଦନ୍‌ଏବାଦ୍ ସିଦେଙ୍ଗ୍ ଇଜି ଇୟା ଆଇଜାତିଦି ଲୋକ୍‌ତିଙ୍ଗ୍ ଡିସ୍‌ତିଙ୍ଗ୍ ଇନିକା ମାରି ଏର୍‌ବା ତେସି ରେଏର୍ ?”

୧୯ ମାରି, ଜିସୁ ଖାନିଙ୍ଗ୍ ଇରଥାନ, “ନିଙ୍ଗ୍ ଜ ସାଙ୍ଗଥା, ନି ବିସ୍ବାସ୍ ନିଙ୍ଗ୍ ନେଗେନ୍ କିତାମାନାଡ଼ ।”

ମାପୁରୁଦି ରାଜି ଖାଜିନାଡ଼

(ମାତିଉ ୨୪:୨୩-୨୮, ୩୭-୪୧)

୨୦ ମାପୁରୁଦି ରାଜି ଏସକାଙ୍ଗ୍ ଖାଜିନାଡ଼, ଇୟା ବିସ୍ବାସ୍ତାନ ପାରୁସିର୍ ଜିସୁଙ୍ଗ୍ ଖେନ୍ବାତିଙ୍ଗ୍ ଖାନ ଖାରିଙ୍ଗ୍ ଇର୍ହାନ, “ମାପୁରୁଦି ରାଜି ତରାଜି ରେଏଡ଼;

୨୧ ମାରି ସୁଡ଼ୁ, ମାପୁରୁଦି ରାଜି ଇବେନ୍ ବା ଆବେନ୍ ଇଜି ଲୋକୁ ଇନ୍ଏର୍; ମାତର୍ ସୁଡ଼ୁ, ମାପୁରୁଦି ରାଜି ମି ଲୋଇ ମାନାଡ଼ ।”

୨୨ ମାତର୍ ଜିସୁ ସିସୁରିଙ୍ଗ୍ ଇର୍ହାନ, “ଇୟାଖାଜା ଦିନ୍ ଖାନାଡ଼, ଏସ୍ତିଖାଲେ ମିର୍ ମନ୍ସ୍ୟପୁତ୍ରଦି ଦିନାମତି ମାଣ୍ଟୁ ଉଣ୍ଡି ନାଣ୍ଡିଙ୍ଗ୍ ସୁଡ଼ୁଦେଙ୍ଗ୍ ବଦା କିନିଦେର୍, ମାତର୍ ସୁଡ଼ୁଦେଙ୍ଗ୍ ଆଟ୍ଟଦେର୍ ।

୨୩ ସୁଡ଼ୁ, ଆବେନ୍, ସୁଡ଼ୁ, ଇବେନ୍, ଇଜି ଲୋକୁ ମିଙ୍ଗ୍ ଇନ୍ନାର୍; ମାତର୍ ମିର୍ ଆବେ ସଲ୍ମାଟ୍ ।

୨୪ ମାତର୍ ମିର୍ସିନିକା ଏଣ୍ଡେସ୍ ବାଦଡ଼ତି ଉଣ୍ଡି ଲାକ୍ତୁରାନ୍ ମାରି ଉଣ୍ଡି ସାନ୍ଦି ଜାଈସିନାଡ଼, ମନ୍ସ୍ୟପୁତ୍ର ନିଜେଦି ଦିନ୍ତୁ ଆୟାଖାଜା ତରାୟ୍ ଆନାନ୍ ।

୨୫ ମାତର୍ ଆଗ୍ତି ଖାନିଙ୍ଗ୍ ପୁରା ନାଣ୍ଡ ଦୁଃକ୍‌କାସ୍ କିଦେଙ୍ଗ୍ ଆନାଡ଼ ମାରି ଇୟା ଇଲେତି ମେମାରିର୍ ମାଣ୍ଟୁ ଡିସାଈ ଆଦେଙ୍ଗ୍ ପଡ଼ାନାଡ଼ ।

୨୬ ମାରି, ନୋହଦି ବେଡ଼ାଦୁ ଏଣ୍ଡେସ୍ ଗଟାତା ମାହାଡ଼, ମନ୍ସ୍ୟପୁତ୍ରଦି ଖାନି ବେଡ଼ାଦୁ ବା ଆୟାଖାଜା ଗଟାନାଡ଼;

୨୭ ଏରଜାହାଜ୍ତୁ ନୋହଦି ଡ଼ଗୁନି ଦିନ୍ ସାନ୍ଦି ଲୋକୁ ଉଣ୍ଡିତିନିକା ମାରି ମେମାରି ନି ଆଇମା ପେଡ଼ିଆନି ଝିକୁପାଣିଦୁ ଦାନ୍ଦା ଆତାମାହାଡ଼, ମାରି ନାଣ୍ଡ ଗାଲିପିରୁ ଖାଜି ଝିଜେରିଙ୍ଗ୍ ଏର୍ତୁ ମୁଡ଼ୁଜାଡ଼ ।

୨୮ ଲୋଟଦି ସମୟତୁ ବା ଆୟାଖାଜା ଗଟାତା ମାହାଡ଼, ଲୋକୁ ଉଣ୍ଡିକାତିନିକା, କଣିକାପର୍ନିକା, ମାରାକୁତରୁନିକା ମାରି ଇଲୁ ତିଆର୍ କିଦେଙ୍ଗ୍ ଦାନ୍ଦା ଆତା ମାହାଡ଼,

୨୯ ମାତର ଲୋଟ ସଦମଦାନ ସତିସରଇ ନାଣିଙ୍କ ବାଦଡ଼ତାନ ସିସୁ ମାରି ଗନ୍ଧକ ପିରୁ ଖାଜା ଖାଜି ଖିଜେରିଙ୍କ ସାପିସ କିତାଡ଼ ।

୩୦ ମନୁସ୍ୟପୁତ୍ର ତରାୟାନି ନାଣିଙ୍କ ଆୟାଖାଜା ଗଟାନାଡ଼ ।

୩୧ ☆“ଆୟାନାଣିଙ୍କ ଏନ୍ ସାଡ଼ ମୁସକୁ ତେବାନାନ୍, ଖାନ୍ ଇଲୁ ଲୋଇ ମାନି ନିଜେଦି ସାଶାପାତି ଅତେଙ୍କ ଇଜି ରେସି ରାମାକିନ୍; ଆୟାଖାଜା ଏନ୍ କିଡ଼ିଇଦୁ ତେବାନାନ୍, ଖାନ୍ ତେସି ସଲ୍‌ମାକିନ୍ ।

୩୨ ଲୋଟଦି ଆଡ଼ସି ମାଟା ଅଡ଼ବିଆ ।

୩୩ ☆ଏନ୍‌କି ନିଜେଦି ଜିବନ୍‌ଡିଙ୍କ ଜିଣା କିଦେଙ୍କ ବଦା କିନାନ୍, ଖାନ୍ ଆକା ଆରାକିନାନ୍, ମାରି ଏନ୍‌କି ନିଜେଦି ଜିବନ୍‌ଡିଙ୍କ ଆରାକିନାନ୍, ଖାନ୍ ଆକା ଜିପସନାନ୍ ।

୩୪ ନାନ୍ ମିଙ୍ଗ୍ ଝେରସିନା, ଆୟା ନାଡ଼ା ରିଏର ଉଣ୍ଡେ କାଟେଲ୍‌ଡୁ ତରନା ମାନାର, ଅରେନ୍ ଖାନିଙ୍କ ଅନାନ୍ ମାରି ଆଇ ଅରେନ୍‌ଖାନିଙ୍କ ଡିସନାନ୍ ।

୩୫ ରୁଣ୍ଡିଲୋକ୍ ଆଇମେକ୍ ଅରସେ ଜାତାଦୁ ନୁରଜିମାନେ, ଅରେଡ଼ତାନିଙ୍କ ଅନାନ୍ ମାରି ଆଇ ଅରେଡ଼ତାନିଙ୍କ ଡିସନାନ୍ ।

୩୬ ରୁଣ୍ଡିଲୋକ୍ କିଡ଼ିଇଦୁ ତେବାନେ, ଅରେନ୍‌ଖାନିଙ୍କ ଅନାନ୍ ମାରି ଆଇ ଅରେନ୍‌ଖାନିଙ୍କ ଡିସନାନ୍ ।”

୩୭ ଆବେଟ୍ ଖାର ଖାନିଙ୍କ ଇର୍ହାର, “ଏ ପ୍ରୁ, ଏମେ ଇୟାଞ୍ଜିରୁ ଗଟାନାଡ଼ ?” ଜିସୁ ଖାରିଙ୍କ ଇରୁଆନ୍, “ଏମେମାନୁ ସାତି ମାଡ଼ା ମାନାଡ଼, ଆୟାବାନୁ ତେଗେଙ୍କ ଉନ୍‌ଡ୍ରେମାନୁ ଉଣ୍ଡାନେ ।”

୧୮

ରାଣ୍ଡି ଆଇମା ମାରି ବିଚାରକିନିଖାନି କାତା

୧ ଖାଦ୍‌ଏଶାଗା ଖିଜୁଦିନ୍ ପାରତନା କିନିକା ଜେ ପାଣି, ଇୟା ବିସୟତାନ ଜିସୁ ଖାରିଙ୍କ କାତାଦାନ୍ ଝେରତାନ୍,

୨ ଉଣ୍ଡି ଗାଡ଼ଡୁ ଅରେନ୍ ବିସାର କିନିକାନ୍ ମାରୁଆନ୍, ଖାନ୍ ମାପୁରୁଙ୍କୁ ତିଲାଏଜି ମାରୁଆନ୍ କି ଲୋକାଙ୍କ ମାନାଏଜି ମାରୁଆନ୍ ।

☆ ୧୭:୩୧ ମାତିଉ ୨୪:୧୭,୧୮; ମାର୍କ ୧୩:୧୫,୧୬. ☆ ୧୭:୩୩ ମାତିଉ ୧୦:୩୯; ୧୭:୨୫; ମାର୍କ ୮:୩୫; ଲୁକ ୯:୨୪; ଜୋହନ ୧୨:୨୫.

୩ ଆୟା ଗାଡ଼ତୁ ଅରେଡ଼ ରାଣ୍ଡି ମାରଆଡ଼, ଝାଦ୍ ରିଜାମୁଜା ଝାନି ଲାକ୍ତୁ ସଲ୍‌ସି ଝେରୁସି ମାରଆଡ଼, ଲୋକୁ ନା ଉଣ୍ଡିଙ୍ଗ୍ ଅନ୍‌ୟାୟ୍ କିଜିନାର୍ ନିନ୍ ନାଙ୍ଗ୍ ବିସାର୍ କିଆ ।

୪ ମାରି, ଝାନ୍ ଏସ ସମୟ ଆତାଡ଼ ରାଜିଆଏଜି ମାରଆନ୍; ମାତର୍ ଝେନ୍‌କା ଝାନ୍ ମୋନ୍‌ତୁ ମୋନ୍‌ତୁ ଅଡ଼ବିତାନ୍, ଜଦିବା ନାନ୍ ମାପୁରୁଦିଙ୍ଗ୍ ତିଲାଏ ମାରି ଲୋକାଙ୍ଗ୍ ମାନାଏ,

୫ ମାତର୍ ଇୟା ରାଣ୍ଡି ନାଙ୍ଗ୍ ଜେଲ୍ ସିଜିମାରଆଡ଼ଆକା ନାନ୍ ତାନେ ଉଣ୍ଡିଙ୍ଗ୍ କିତିମାନି ଅନ୍‌ୟାୟ୍ ପାଣିଦି ଉଣ୍ଡିଙ୍ଗ୍ ନାନ୍ ତାନେଙ୍ଗ୍ ସାକାକିନା, ଆଏତିଙ୍ଗ୍ ଝାଦ୍ ଦିନ୍‌କେ ଝାଜି ନାଙ୍ଗ୍ ବିଜାର୍ କିଜିମାନାଡ଼ ।

୬ ଆବେଟ୍ ପ୍ରବୁ ଝେରୁତାନ୍, “ଇୟା ଅଦାମ୍‌ଦି ବିସାର୍‌କିନିକାନ୍ ଇନିକା ଝେରୁସିନାନ୍, ଆକା ଝେଣ୍ଡୁ ।

୭ ମାରି ମାପୁରୁଦି ଏମେ ସେବାକିନି ଲୋକୁ ଝେଡେନାଡ଼ା ଝାନିଙ୍ଗ୍ କୁକ୍‌ସିମାନାର୍, ଝାନ୍ ନୋ ଝାରି ଉଣ୍ଡିଙ୍ଗ୍ କିତିମାନି ତାଗ୍‌ଲ୍ ପାଣିଦି ଉଣ୍ଡିଙ୍ଗ୍ ଝାରିଙ୍ଗ୍ ସାକା କିଏନ୍ ନୋ, ଝାନ୍ ଝାରିଙ୍ଗ୍ ସାହାଜ୍ୟ କିଦେଙ୍ଗ୍ ଝେଡ଼ା କିନାନ୍‌ନୋ ?

୮ ନାନ୍ ମିଙ୍ଗ୍ ଝେରୁସିନା, ଝାନ୍ ବେଗି ଝାରିଙ୍ଗ୍ କିତିମାନିମାନି ତାଗ୍‌ଲ୍ ପାଣିଦି ଉଣ୍ଡିଙ୍ଗ୍ ଝାରିଙ୍ଗ୍ ବିସାର୍‌କିନାନ୍ । ମାତର୍ ମନୁସ୍ୟପୁତ୍ର ଝାଜି ଦୁନିଆଦୁ ଇନିକା ବିସ୍‌ବାସ୍ ସୁଣାନ୍ ?”

ପାରୁସି ମାରି ସିସ୍‌ଟୁଲସ୍‌ନି ମାଟା

୯ ନିଜେ ନିଜେଦି ଦାମ୍‌ବୁଦି ମାନାଡ଼ ଇଜି ଆଇ ଝିଜେରିଙ୍ଗ୍ ସେମାର୍ କିଜିମାନି ଏସ ନିଜେଦି ମୁସ୍‌କୁ ଆସା ଇଡ଼ନି ଲୋକାଙ୍ଗ୍ ଜିସୁ ଇୟା କାତାଦାନ୍ ଇର୍ହାନ୍,

୧୦ ରିଏର୍ ଲୋକୁ ପାର୍‌ତନା କିନି ଉଣ୍ଡିଙ୍ଗ୍ ମନ୍ଦିରୁତୁ ସରଆର୍, ଅରେନ୍ ପାରୁସି ମାରି ଆଇକାନ୍ ସିସ୍‌ଟୁ ଲସ୍‌ନିକାନ୍ ।

୧୧ ପାରୁସି ଅରେନ୍ ନିରାଆନ୍‌ନୋ ନିଜେଦିମାନ୍ ଇୟାଝାଜା ପାର୍‌ତନା କିଦେଙ୍ଗ୍ ଆସ୍‌ତାନ୍, ଏ ମାପୁରୁ, ନାନ୍ ନିଙ୍ଗ୍ ଦନ୍‌ସବାଦ୍ ସିଜିନା ଜେ, ନାନ୍ ଆଇ ଝିଜେରି ଲୋକା ଝାଜା କାଡ଼ନିକାନ୍, ଅଦାମ୍‌, ଦାରିପାଣି ବା ଇୟା ସିସ୍‌ଟୁଲସ୍‌ନିଝାନି ଝାଜାବା ଆଏ;

୧୨ ନାନ୍ ଖାରାମ୍ଭୁ ରିନେଶ୍ଟ ଉପାସ୍ କିଜିନା ମାରି ନାନ୍ ଉଣ୍ଡାକିନିକା ଦାସ୍‌ବାର୍ତ୍ତାନ୍ ଉନ୍‌ତ୍ରି ବାଗ୍ ସିଜିନା ।

୧୩ ମାତର୍ ସିସ୍ତୁ ଲସ୍‌ନିକାନ୍ ଆକ ନିଲ୍‌ସି ମୁସ୍‌କୁ ତରିନ୍ ସୁତଦେଙ୍ଗ୍ ବା ସାସ୍‌କିଦେଙ୍ଗ୍ ଆର୍‌ଏତାନ୍, ମାତର୍ ନିଜେଦି ବକାତୁ ଡାକାଜି ଇର୍ହାନ୍, ଏ ମାପୁରୁ, ନାନ୍ ପାପି, ନାଙ୍ଗ୍ ଦୟା କିଆ ।

୧୪ ☆ନାନ୍ ମିଙ୍ଗ୍ ଇଜିନାନ୍, “ଆୟା ପାରୁସି ଆଏନ୍, ମାତର୍ ଇୟା ସିସ୍ତୁଲସ୍‌ନିକାନ୍ ଦାମ୍‌ଲୋକୁ ଆଜି ନିଜେଦି ଇଲ୍‌ତୁ ସର୍‌ଆନ୍; ମାତର୍ ଏମେକାନ୍ ନିଜେଦିଙ୍ଗ୍ ପେରିକାନ୍ ଇଜି ତର୍‌ଆନ୍, ଖାନିଙ୍ଗ୍ ଇସ୍‌କାନ୍ କିନାର୍, ମାତର୍ ଏନ୍ ନିଜେଦିଙ୍ଗ୍ ଇସ୍‌କାନ୍ କିନାନ୍, ଖାନିଙ୍ଗ୍ ପେରିକାନ୍ କିନାନ୍ ।”

ଜିସୁ କଡ଼ରିଙ୍ଗ୍ ଆସିର୍ବାଦ୍ କିତାନ୍

(ମାତିଉ ୧୯:୧୩-୧୫; ମାର୍କ ୧୦:୧୩-୧୬)

୧୫ ଜିସୁ ଏଣ୍ଡେସ୍ ଇସ୍‌କିଡ଼ରି ମୁସ୍‌କୁ କିୟ୍ ଇଡ଼ଜି ମୁର୍‌ନାନ୍, ଇୟାଉଣ୍ଡିଙ୍ଗ୍ ଲୋକୁ ଖାରିଙ୍ଗ୍ ବା ଜିସୁଦି ଲାକ୍‌ତୁ ତାତେଙ୍ଗ୍ ଆସ୍‌ତାର୍; ମାତର୍ ସିସ୍ତୁ ଆକା ସୁଡ଼କ୍ତି ଖାରିଙ୍ଗ୍ ଆଦରିସ୍‌ତେଙ୍ଗ୍ ଆସ୍‌ତାର୍ ।

୧୬ ମାତର୍ ଜିସୁ ଖାରିଙ୍ଗ୍ ନିଜେଦି ଲାକ୍‌ତୁ କୁକ୍‌ତା ଇର୍ହାନ୍, ଇସ୍‌ କଡ଼ରିଙ୍ଗ୍ ନା ଲାକ୍‌ତୁ ଖାଦେଙ୍ଗ୍ ସିଦୁ, ମାରି ଖାରିଙ୍ଗ୍ ମାନା କିମାର୍; ଇରିଙ୍ଗ୍ ମାପୁରୁଦି ରାଜି ଇୟାଖାଜା କଡ଼ରିଦି ।

୧୭ ନାନ୍ ମିଙ୍ଗ୍ ସଡ଼ ଇଜିନା, “ଏନ୍ ଇସ୍‌କିଡ଼ଖାଜା ମାପୁରୁଦି ରାଜି ଆସ୍‌ଏନ୍, ଖାନ୍ ଏଣ୍ଡେସ୍‌କିଜିବା ମୁସ୍‌କୁପୁର୍ ସଣ୍ଡେଙ୍ଗ୍ ଆର୍‌ଏନ୍ ।”

ଅରେନ୍ ମାଜନ୍‌ଲୋକ୍

(ମାତିଉ ୧୯:୧୬-୩୦; ମାର୍କ ୧୦:୧୭-୩୧)

୧୮ ଅରେନ୍ ଜିହୁଦିର୍ ପେରିକାନ୍ ଜିସୁଙ୍ଗ୍ ଝେନ୍‌ବାତାନ୍, “ଏ ସଡ଼ ଗୁରୁ, ଏସ୍‌କାଙ୍ଗ୍‌ଝିଜି ଲିବନ୍ ପୟ୍‌ନି ଉଣ୍ଡିଙ୍ଗ୍ ନାନ୍ ଇନିକା କିନା ?”

୧୯ ଆବେଟ୍ ଜିସୁ ଖାନିଙ୍ଗ୍ ଇର୍ହାନ୍, “ନାଙ୍ଗ୍ ନେଗିକାନ୍ ଇଜି ଇନିଦାନିଙ୍ଗ୍ ଇଜିନି ? ମାରି ମାପୁରୁଙ୍ଗ୍ ଡିସ୍‌ଡିଙ୍ଗ୍, ମାରି ଆଇକାନ୍ ଏନ୍‌ବା ସଡ଼ ସିଲେନ୍ ।

☆ ୧୮:୧୪ ମାତିଉ ୨୩:୧୨; ଲୁକ ୧୪:୧୧.

୨୦ ପ୍ରଭୃତି ନିୟମକୁ ଓଡ଼ିଆ ତୋ ନିନ୍ ନେସ୍ତିମାନି, ଦାରିପାଣି କିମାଟ୍, ଲୋକାଙ୍ଗ ସାୟାମାରଗା ଡାକ୍‌ମାଟ୍, ଡଙ୍ଗା ପାଣି କିମା, ମିସ୍‌ସାକି ଖେର୍‌ମା, ନିଜେଦି ବୁବା ଯାୟାଏଙ୍ଗ ମାନାଆ ।”

୨୧ ଖାନ୍ ଖେର୍‌ତାନ୍, ଇୟାଓଡ଼ି ନାନ୍ ମୁରୁଲିଖାଲେରାନ୍ ମାନାଜି ଖାଜିନା ।

୨୨ ଜିସୁ ଇୟାକା ଖେନ୍‌ଜି ଖାନିଙ୍ଗ ଇର୍‌ଆନ୍, ନି ଉଣ୍ଡି-ବିସୟ ଉଣାମାନାଟ୍; ନିନ୍ ନିଜେଦି ଓଡ଼ିଆ ସମ୍ପତ୍ତି ପର୍‌ଜି କାକୁଟ୍ ଲୋକାଙ୍ଗ ବାଟାକିଜି ସିଆ, ମାରି ନିନ୍ ମୁସ୍‌କୁପୁର୍‌ତୁ ଦନ୍ ପୟନି; ମାରି, ଖାଜି ନା ଖେନ୍‌କା ରାଆ ।

୨୩ ମାତର୍ ଖାନ୍ ଇୟାଓଡ଼ି ମାଟା ଖେନ୍‌ଜି ନାଣୁ ଦୁଃକ୍ ଆତାନ୍, ଇରିଙ୍ଗ ଖାନ୍ ପେରିମାଜନ୍ ମାର୍‌ଆନ୍ ।

୨୪ ଆବେଟ୍ ଖାନି ଦୁଃକ୍ ଆନିକା ସୁଡ଼ିଜି ଜିସୁ ନିଜେଦି ସିସୁରିଙ୍ଗ ଇର୍‌ହାନ୍, ଏମେ ଲୋକ୍‌ତିଙ୍ଗ ଦନ୍ ମାନାଟ୍, ଖାର୍ ଏସ କାସ୍‌ଦାନ୍ ମାପୁରୁଦି ରାଜିଦୁ ସନାର୍ !

୨୫ ଇରିଙ୍ଗ ମାପୁରୁଦି ରାଜିଦୁ ମାଜନ୍ ଲୋକୁ ସନି ବାଦୁଲୁ ସୁଜିଦି ବର୍‌ ସିଜି ଉର୍‌ ଡ଼ଗୁନିକା ଉସାସ୍ ।

୨୬ ଏମେ ଲୋକୁ ଇୟା ମାଟା ଖେର୍‌ଆର୍, ଖାର୍ ଇର୍‌ହାର୍, ଆର୍‌ତିଙ୍ଗ ଏନ୍ ରକିୟା ପଇଦେଙ୍ଗ ଆଟ୍‌ନାନ୍ ?

୨୭ ମାତର୍ ଜିସୁ ଇର୍‌ହାନ୍, “ଆମା ପାଣି ଲୋକାମାଣାନ୍ ଆଏଡ୍, ଆୟା ପାଣି ମାପୁରୁ କିନାନ୍ ।”

୨୮ ଆବେଟ୍ ପିତର୍ ଇର୍‌ହାନ୍, “ସୁଡୁଆ, ମାପୁ ନିଜେ ନିଜେଦି ଓଡ଼ିଆ ଡିସ୍‌ସି ନି ଖେନ୍‌କା ଖାତା ମାନାପ୍ ।”

୨୯ ଜିସୁ ଖାରିଙ୍ଗ ଇର୍‌ଆନ୍, ନାନ୍ ମିଙ୍ଗ୍ ସଡ୍ ଖେର୍‌ସିନା, ଏମେ ଲୋକୁ ମାପୁରୁଦି ରାଜିଦି ଉଣ୍ଡିଙ୍ଗ ଇଲୁ କି ନିଜେଦି ଆଡ଼ି କି ତଡ଼ାନ୍ କି ବୁବାୟାୟା କି କଡ଼କ୍‌ରା ଡିସ୍‌ତି ମାନିଦେର୍ ।

୩୦ ଇୟା ଦୁନିଆଦୁ ନାଣୁଗୁଣ୍ ମାରି ଖେନ୍‌କାରି କାଡ଼ାଦୁ ଏସ୍‌କାଙ୍ଗ୍‌ଓଡ଼ିଜି ଜିବନ୍ ପୟନାନ୍, ଇୟାଖାଜା ଲୋକୁ ଏର୍‌ ସିଲେର୍ ।

ମୁଜା ଜିସୁ ଖାନି ସାନି ବିସୟ ଇର୍‌ଆନ୍
(ମାତିଉ ୨୦:୧୭-୧୯; ମାର୍କ ୧୦:୩୨-୩୪)

୩୧ ଖେନକା ଜିସୁ ବାରଲୋକ୍ ଖେରଏ କିଜି ଖାରିଙ୍ଗ୍ ଖେରତାନ,
“ଖେନଡୁ, ମାପ୍ ଜିରୁଆଲମ୍‌ତୁ ସଲ୍‌ସିନାପ୍, ମାରି ମନୁସ୍ୟପୁତ୍ରଦି
ବିସୟତାନ ବାବବାଦିରି ଆମାଞ୍ଜିକୁ ରାସ୍‌ତାମାନାର୍, ଆୟାଞ୍ଜିକୁ ପୁରା
ଆନାଡ୍;

୩୨ ଇରିଙ୍ଗ୍ ଖାନ୍ ଅଣଜିହୁଦି କିୟୁଦୁ ସର୍‌ପେ ଆନାନ୍, ମାରି ଖାର୍
ଖାନିଙ୍ଗ୍ ସେମାର୍ କିନାର୍, ଖାନିଙ୍ଗ୍ ଅପ୍‌ମାନ୍ କିନାର୍ ଖାନି ମୁସକୁ
ପୁସ୍କାଡ଼ାଙ୍ଗ୍ ପୁସ୍‌ନାର୍,

୩୩ ଖାନିଙ୍ଗ୍ କର୍ତ୍ତା ତେଇଜି ସାୟାମାରଗାଡ଼ାକ୍‌ନାର୍, ମାରି ମୁନେଟି
ଖେନକା ଖାନ୍ ମାରିତେସି ଜିବନ୍‌ଆଜି ନିଙ୍ଗ୍‌ନାନ୍ ।”

୩୪ ମାତର୍ ଖାର୍ ଇୟାଞ୍ଜିକୁ ବିସୟ ଇନିକାବା ନେସ୍‌ସତାର୍; ଇୟା
ବାକ୍ୟ ଖାରିମାନ୍‌କୁ ମାର୍‌ଗିତା ତେବାତାଡ୍, ମାରି ଇନିକା ଇନିକା
ଇଜିମାର୍‌ଆର୍, ଆୟାଞ୍ଜିକୁ ଖାର୍ ନେସ୍‌ସଜି ମାର୍‌ଆର୍ ।

ଜିସୁ କାଣା ବିକାରିଙ୍ଗ୍ ନେଗେଣ୍ଡୁ କିତାନ୍

(ମାତିଡ ୨୦:୨୯-୩୪; ମାର୍କ ୧୦:୪୬-୫୨)

୩୫ ଜିସୁ ଜିରିହୋଦି ଲାକ୍‌ତୁ ଆଜିମାରି ଖାଲେ ଅରେନ୍ କାଣା ସାରି
ପାଡ଼ି ବାସ୍‌ତାନ୍ ବିକୟା ଲସ୍‌ସି ମାର୍‌ଆନ୍ ।

୩୬ ଖାନ୍ ଲୋକୁ ବୁଲାନି ସେଉଡ଼ୁ ଖେନଜି ମାଟା ଇନିକା ଇଜି
ଖେନବାଦେଙ୍ଗ୍ ଆସ୍‌ତାନ୍ ।

୩୭ ଖାର୍ ଖାନିଙ୍ଗ୍ ଇର୍ହାର୍, ନାଜରିୟତିୟ ଜିସୁ ଇୟା ସାରି ସିଜି
ସଲ୍‌ସିନାନ୍ ।

୩୮ ଆବେଟ୍ ଖାନ୍ ନାଣ୍ଡୁ ଆଉଲି ଆଜି ଇର୍‌ଆନ୍, “ଏ ଜିସୁ ଦାଉଦତି
ମାରିନ୍, ନାଙ୍ଗ୍‌ଦୟା କିଆ ।”

୩୯ ମାତର୍ ଆଗିଡ଼ି ସଲ୍‌ସିମାରି ଲୋକୁ ଖାନିଙ୍ଗ୍ ଆଲେଜ
ମାନ୍‌ଡେଙ୍ଗ୍ ଇଜି ଆଦିରିସ୍‌ତେଙ୍ଗ୍ ଆସ୍‌ତାର୍, ମାତର୍ ଖାନ୍ ମାରି
ନାଣ୍ଡୁ ଆଉଲି ଆଜି ଇନ୍‌ଡେଙ୍ଗ୍ ଆସ୍‌ତାନ୍, “ଏ ଦାଉଦତି ମାରିନ୍,
ନାଙ୍ଗ୍‌ଦୟା କିଆ ।”

୪୦ ଆବେଟ୍ ଜିସୁ ନିଲ୍‌ଜି ଖାନିଙ୍ଗ୍ ନିଜେଦି ଲାକ୍‌ତୁ ତାତେଙ୍ଗ୍ ଇଜି
ଆଦେସ୍‌ ସିତାନ୍; ମାରି, ଖାନ୍ ଲାକ୍‌ତୁ ଖାତାନ୍‌ଆକା, ଜିସୁ ଖାନିଙ୍ଗ୍
ଖେନବାତାନ୍,

୪୧ “ନାନ୍ ନି ଉଣ୍ଡିଙ୍ଗ୍ ଇନିକା କିନା ଇଜି ନିନ୍ ବଦା କିଜିନି ?” ଖାନ୍ ଇର୍ଥାନ୍, “ଏ ପ୍ରବୁ, ନାନ୍ ଏଣ୍ଡେସ୍‌ମାରି ସୁଡ଼ୁଦେଙ୍ଗ୍ ଆଟ୍‌ନା ।”

୪୨ ଜିସୁ ଖାନିଙ୍ଗ୍ ଇର୍ଥାନ୍, “ଆରିଙ୍ଗ୍ ସୁଡ଼ୁଆ; ନି ବିସ୍‌ବାସ୍ ନିଙ୍ଗ୍ ନେଗେନ୍ କିତାମାନାଡ଼ ।”

୪୩ ଆୟାଦାପ୍ରେ ଖାନ୍ ସୁଡ଼ୁଦେଙ୍ଗ୍ ଆଟ୍‌ତାନ୍‌ନୋ ମାପୁରୁଙ୍ଗ୍ ଦନ୍‌ସ୍‌ବାଦ୍ କିଜି କିଜି ଖାନି ଖାଲେଖାଲେ ବୁଲାଦେଙ୍ଗ୍ ଆସ୍‌ତାନ୍ ମାରି ଲୋକୁ ଝିଜେରେ ଆକା ସୁଡ଼ୁଜି ମାପୁରୁଦି ପ୍ରସଂସା କିତାର୍ ।

୧୯

ଜିସୁ ନି ଜକିୟ

୧ ଝେନ୍‌କା ଜିସୁ ଜିରିହୋ ଗାଡ଼ୁଡୁ ଡ଼ଗୁଜି ନାଡ଼ମିସିଜି ସଲ୍‌ସିମାର୍‌ଥାନ୍ ।

୨ ମାରି ସୁଡ଼ୁଦୁ, ଜକିୟ ଦର୍ତ୍ତି ଅରେନ୍ ଲୋକୁ ମାର୍‌ଥାନ୍, ମାରି ଖାନ୍ ଅରେନ୍ ପେରି ସିସ୍‌ଟୁଲ୍‌ସ୍‌ନିକାନ୍ ମାରି ମାଜନ୍ ମାର୍‌ଥାନ୍ ।

୩ ଜିସୁ ଏନ୍, ଆକା ସୁଡ଼ୁଦେଙ୍ଗ୍ ଖାନ୍ ବଦା କିଜିମାର୍‌ଥାନ୍, ମାତର୍ ଲୋକା ଗଲିଦି ଉଣ୍ଡିଙ୍ଗ୍ ସୁଡ଼ୁଦେଙ୍ଗ୍ ଆଟ୍‌ଏଜି ମାର୍‌ଥାନ୍, ଇରିଙ୍ଗ୍ ଖାନ୍ ବୁଟ୍‌କା ମାର୍‌ଥାନ୍ ।

୪ ଆଦେଙ୍ଗ୍ ଖାନ୍ ଲୋକା ଆଗ୍‌ଡ଼ି ଉରୁକ୍‌ସି ସଲ୍‌ସି ଜିସୁଙ୍ଗ୍ ସୁଡ଼ୁଦେଙ୍ଗ୍ ଇଜି ଉଣ୍ଡି ତଗାମାରାନ୍‌ଡୁ ଏକ୍‌ତାନ୍, ଇରିଙ୍ଗ୍ ଆୟା ସାରି ସିଜି ଜିସୁ ସନିକା ମାର୍‌ଥାଡ଼ ।

୫ ଜିସୁ ଆୟା ବାଡ଼ିଦୁ ଖାଜି ମୁସ୍‌କୁ ବେସ୍‌ସି ଜକିୟଙ୍ଗ୍ ଇର୍ଥାନ୍, “ଜକିୟ, ବେଗି ରେସିରାଆ, ଇରିଙ୍ଗ୍ ନେର୍ ନାଙ୍ଗ୍ ମି ଇନ୍‌ଡୁ ଏଣ୍ଡେସ୍‌ବା ତେବାଦେଙ୍ଗ୍ ଆନାଡ଼ ।”

୬ ଆବେଟ୍ ଜକିୟ ଦାପ୍ରେ ରେସିଖାଜି ଝେଡ଼ିକାଦାନ୍ ଜିସୁଙ୍ଗ୍ ଖାନି ଇଣ୍ଡି କୁକ୍‌ତାଅତାନ୍ ।

୭ ଆକା ସୁଡ଼ୁଜି ଝିଜେରେ କାଡ଼୍‌ଜି ଇନ୍‌ଣ୍ଡେଙ୍ଗ୍ ଆସ୍‌ତାର୍, “ଖାନ୍ ଅରେନ୍ ପାପି ଲୋକ୍‌ତି ଇଣ୍ଡି ତେବାଦେଙ୍ଗ୍ ସର୍‌ଥାନ୍‌ନି ।”

୮ ମାତର୍ ଜକିୟ ନିର୍‌ଥାନ୍‌ନୋ ପ୍ରବୁଙ୍ଗ୍ ଇର୍ଥାନ୍, “ଏ ପ୍ରବୁ, ସୁଡ଼ୁଆ, ନା ଦନ୍ ଆଦାବାଗ୍ କାକୁତ ଲୋକାଙ୍ଗ୍ ସିଜିନା, ମାରି ଜଦି ଅନ୍‌ସାୟତାନ୍ ଏମାଣୁକୁ ଇନିକା ଅନାମାନା, ଆଡିଙ୍ଗ୍ ସାରି ଗୁଣ୍ଡାନ୍ ଡେସିସିଜିନା ।”

୯ ଆବେଟ୍ ଜିସୁ ଖାନି ବିସୟତାନ୍ ଇର୍ଥାନ୍, “ନେର୍ ଇୟା ଇଣ୍ଟୁ ରକିୟା ପଇନିକା ଇଗା ଖାତାମାନାଡ୍, ଇରିଙ୍ଗ୍ ଇକାନ୍ ବା ଅବ୍ରାହାମତି ଅରେନ୍ ମାରିସି ।

୧୦ ☆ଇରିଙ୍ଗ୍ ଆମାକା ମୁରିତାମାନାଡ୍, ଆକା ପୟଜ ରକିୟା କିଦେଙ୍ଗ୍ ମନ୍ତୁସ୍ୟପୁତ୍ର ଖାତାମାନାନ୍ ।”

ବାଙ୍ଗାଁରାମ୍ ଅଦଲିଦି କାତା (ମାତିଉ ୨୫:୧୪-୩୦)

୧୧ ଲୋକୁ ଇୟା ମାଟା ଝିକୁ ଝେନିଝାଲେ ଜିସୁ ମାରି ଉଣ୍ଟି କାତା ଝେରତାନ୍, ଇରିଙ୍ଗ୍ ଖାନ୍ ଜିରୁସାଲ୍ଲାମ୍ ଲାକ୍ତୁ ଇତା ମାର୍ଥାନ୍ ମାରି ମାପୁରୁଦି ରାଜି ଦାପ୍ରେନେ ଖାନାଡ୍ ଇଜି ଖାର୍ ଅଡ୍ବିଜି ମାର୍ଥାନ୍ ।

୧୨ ଆବେଟ୍ ଖାନ୍ ଇର୍ଥାନ୍, ଅରେନ୍ ପେରି ଲୋକୁ ରାଜା ଆଦେଙ୍ଗ୍ ଉଣ୍ଟି ଆକ ରାଜିଦୁ ସନ୍ତେଙ୍ଗ୍ ତିଆର୍ ଆଜି ମାର୍ଥାନ୍, ଝେନ୍କା ଖାନ୍ ଡେସିଝାଜି ନିଜେଦି ଲୋକା ମୁସକୁ ସାସନ୍ କିଦେଙ୍ଗ୍ ଅଡ୍ବିଜି ମାର୍ଥାନ୍ ।

୧୩ ଖାନ୍ ନିଜେଦି ଦସ୍ଲୋକ୍ ସାକରକାଙ୍ଗ୍ କୁକ୍ସି ଖାରିଙ୍ଗ୍ ଝିଜେରିଙ୍ଗ୍ ଉଣ୍ଟି ଉଣ୍ଟି ବାଙ୍ଗାଁରାମ୍ ଅଦଲି ସିଜି ଇର୍ଥାନ୍, ନାନ୍ ଖାନି ସାଦି ବେପାର୍ କିଦୁ ।

୧୪ ମାତର୍ ଖାନି ଦେସ୍ତି ଲୋକୁ ଖାନିଙ୍ଗ୍ କାଡ୍ଜି ମାର୍ଥାନ୍, ମାରି ଖାର୍ ଖାନି ଝେନ୍କା ଅରେନ୍ ଖାନିଙ୍ଗ୍ କାବୁର୍ ପୋକ୍ସି ଇର୍ହାର୍, ଇକାନ୍ ଜେ ମା ମୁସକୁ ସାସନ୍ କିନାନ୍, ଇକା ମା ବଦା ସିଲେଡ୍ ।

୧୫ ଝେନ୍କା ଖାନ୍ ରାଜା ଆଜି ଡେସିଝାତାନ୍, ମାରି ଆମା ସାକରକାଙ୍ଗ୍ ତାବୁଙ୍ଗ୍ ସିତାମାର୍ଥାନ୍, ଖାରି ଲୋଇ ବେପାର୍ କିଜି ଏନ୍ ଏସୋ ଲାବ୍ ପୟତା ମାନାନ୍, ଆକା ନେସ୍ତେଙ୍ଗ୍ ଇଜି ଖାରିଙ୍ଗ୍ ଖାନି ଲାକ୍ତୁ କୁକ୍ସୋ ତାତେଙ୍ଗ୍ ଆଦେସ୍ ସିତାନ୍ ।

୧୬ ଆବେଟ୍ ପାର୍ତୁମ୍ତିକାନ୍ ଖାଜି ଇର୍ଥାନ୍, ପ୍ରୁ, ନି ଉଣ୍ଟି ବାଙ୍ଗାଁରାମ୍ ତାବୁଦୁ ନାନ୍ ମାରି ଦଶଗୋଟା ବାଙ୍ଗାଁରାମ୍ ତାବୁଙ୍ଗ୍ ଲାବ୍ କିତାମାନା ।

୧୭ ଖାନ୍ ଖାନିଙ୍ଗ୍ ଇର୍ଆନ୍, ନିନ୍ ବେସି ନେଗି ସାକର୍, ନିନ୍ ଉଣା ବିସୟତୁ ବିସବାସତାନ୍ ପାଣି କିତିମାନି ଆକା ନିନ୍ ଦସ୍‌ଗୋଟା ଗାଡ଼ାକା ମୁସ୍କା ଅଦିକାର୍ ପୟଦେଙ୍ଗ୍ ସିଜିନା ।

୧୮ ମାରି, ଅରେନ୍ ଖାଜି ଇର୍ଆନ୍, ପ୍ରବୁ, ନି ଉଣ୍ଡି ବାଙ୍ଗାଁରାମ୍ ଡାବୁଦାନ୍ ନାନ୍ ପାସ୍‌ଗୋଟା ବାଙ୍ଗାଁରାମ୍ ଡାବୁଙ୍ଗ୍ ଲାବ୍ କିତାମାନା ।

୧୯ ଖାନ୍ ଖାନିଙ୍ଗ୍ ବା ଇର୍ଆନ୍, ନିନ୍ ବା ପାସ୍‌ଗୋଟା ଗାଡ଼ାକା ମୁସ୍କା ଅଦିକାର୍ ପୟଦେଙ୍ଗ୍ ସିଜିନା ।

୨୦ ମାରି ଅରେନ୍ ଖାଜି ଇର୍ଆନ୍, ପ୍ରବୁ, ସୁଡ଼ଆ, ଇୟା ନି ବାଙ୍ଗାଁରାମ୍ ଡାବୁଙ୍ଗ୍, ନାନ୍ ଇୟା ପାଗାବୁ ତରତା ଇର୍ଟା ମାର୍ଆ;

୨୧ ଇରିଙ୍ଗ୍ ନାନ୍ ନିଙ୍ଗ୍ ତିଲାତା, ଇରିଙ୍ଗ୍ ନିନ୍ ଅରେନ୍ ଆର୍‌ଝାଦି ଲୋକୁ, ଆମାକା ଇଡ଼ଇମାନି, ଆକା ପେର୍ନିଅନି, ମାରି ଆମାକା ଝିଡ଼ଇ, ଆକା କୟନି ।

୨୨ ଖାନ୍ ଖାନିଙ୍ଗ୍ ଇର୍ଆନ୍, ରେ ତାଗ୍‌ଇ ସାକର୍, ନି ମୋକମ୍‌ତି ମାଟାଦି ନି ବିସାର୍ କିନା । ନାନ୍ ଅରେନ୍ ଆର୍‌ଝାଦି ଲୋକୁ, ଆମାକା ଇଡ଼ଏମାନା, ଆକା ପେର୍ନିଅନା, ମାରି ଆମାକା ଝିଡ଼ଏମାନା, ଆକା କୟନା, ଇକା ଇନିକା ନେସ୍‌ତିମାର୍‌ଇ ?

୨୩ ଜଦି, ଇୟା ମାଟା ସଡ଼, ବ୍ୟାଙ୍କ୍‌ତୁ ଏୟା ନା ବାଙ୍ଗାଁରାମ୍ ଡାବୁଙ୍ଗ୍ ଇଡ଼ଇତି ? ଆତିଙ୍ଗ୍ ନାନ୍ ଖାଜି ବ୍ୟାଙ୍କ୍‌ତାନ୍ ଉପ୍‌ରି ପଇତାମାନ୍ତି ।

୨୪ ମାରି, ଆୟା ଲାକ୍‌ତୁ ନିର୍‌ଇ ମାର୍‌ଇ ଲୋକାଙ୍ଗ୍ ଇର୍ଆନ୍, ଝେନି ମାଣାନ୍ ଇୟା ବାଙ୍ଗାଁରାମ୍ ଡାବୁଙ୍ଗ୍ ଅସି, ଆମାଖାନିମାନ୍ ଦଶଗୋଟା ବାଙ୍ଗାଁରାମ୍ ଡାବୁଙ୍ଗ୍ ମାନେ, ଖାନିଙ୍ଗ୍ ସିଦୁ ।

୨୫ ଆବେଟ୍ ଖାର୍ ଖାନିଙ୍ଗ୍ ଇର୍ହାର୍, ପ୍ରବୁ, ଖାନିଙ୍ଗ୍ ତୋ ଦାସ୍‌ଗୋଟା ବାଙ୍ଗାଁରାମ୍ ଡାବୁଙ୍ଗ୍‌ମାନେ ।

୨୬ ☆ନାନ୍ ମିଙ୍ଗ୍ ଝେର୍‌ସିନା, ଏମେଲୋକାଦି ମାନାଡ଼, ଖାନିଙ୍ଗ୍ ସିନାର୍, ମାତର୍ ଆମାଖାନିଙ୍ଗ୍ ସିଲେଡ଼, ଖାନି ଲାକ୍‌ତୁରାନ୍ ଆମାକା ଉଣାମାନାଡ଼, ଆକାବା ଖାନି ମାଣ୍‌କୁ ଅନାର୍ ।

୨୭ ☆ମାତର୍ ନା ଇୟା ଆମା ସାଡ଼ୁର୍ ନାନ୍ ଖାରି ମୁସ୍କା ସାସନ୍ କିନା ଇଜି ବଦା କିଏଜିମାର୍‌ଆର୍, ଖାରିଙ୍ଗ୍ ଇବେ ତାସିନା ଆଗ୍‌ଡ଼ି କାଡ଼ୁ ।

ଜିସୁ ଜିରୁସାଲୀମକୁ ଜିଣାଜି ସନିକା

(ମାତିତ ୨୧:୧-୧୧; ମାର୍କ ୧୧:୧-୧୧; ଜୋହନ ୧୨:୧୨-୧୯)

୨୮ ଜିସୁ ଇୟା ମାଟା ଖେରତି ଝିସତି ଖେନକା ସିସୁରି ଆଗଡ଼ି ଆଗଡ଼ି ଜିରୁସାଲୀମ ତରିନ୍ ସନ୍ତେଜ୍ ଆସ୍ତାନ ।

୨୯ ମାରି, ଏସ୍ତିଖାଲେ ଜିସୁ ଜୀତ ଗରନ୍ ଲାକ୍ତୁରି ବେଡ଼ପାଗି ନି ବେତନିୟା ଲାକ୍ତୁ ଇତାନ, ନାସ୍ତିଖାଲେ ଖାନ୍ ଖାନି ସିସୁରି ଲୋଇ ରିଏରିଜ୍ ଇୟା ମାଟା ଖେରସି ପୋକ୍ତାନ,

୩୦ ମି ଆଗଡ଼ିରି ଆୟା ଆୟା ନାଟ ସାନ୍ତୁ; ଆବେ ଇତି ଦାପ୍ରେ, ଆମାତାନି ମୁସ୍କୁ ଏସାଜ୍ ଏନ୍ ବାସ୍ଏନ୍, ଇୟାଖାଜା ଉଣ୍ଡି ଗଦପିଲାଦିଜ୍ ତରନ୍ ମାନିକା ସୁଡ଼ନୁଦେର୍; ତାନେଜ୍ କୁଡ଼ସ ତାଗାଟ୍ ।

୩୧ ମାରି, ଏନ୍ ଜଦି ମିଜ୍ ଏନ୍ କୁଡ଼ସି ଅସିନିଦେର୍ ଇଜି ଖେନବାନାନ୍, ମିର୍ ଇୟାଖାଜା ଇନିଦେର୍, ଇରିଜ୍ ତେନେମାନୁ ପ୍ରବୁଜ୍ ଦରକାର ମାନାଟ୍ ।

୩୨ ଆବେଟ୍ ଆୟା ରିଏର୍ ସିସୁର ନାର୍ତୁ ସରଆର୍, ମାରି ପ୍ରବୁ ଖାରିଜ୍ ଏଣ୍ଡେସ୍ ଇର୍ଆ ମାର୍ଆନ୍, ଆୟାଖାଜାନେ ସୁଡ଼ତୁର ।

୩୩ ମାରି, ଖାର ଗଦପିଲାଦିଜ୍ କୁଡ଼ନିଖାଲେ ଗଦପିଲାଦି ମାଲିକକୁ ଖାରିଜ୍ ଖେନବାତାନ, ଏନ୍ ଗଦପିଲାଦିଜ୍ କୁଡ଼ସିନିଦେର୍ ?

୩୪ ଖାର ଇର୍ହାର୍, ତେନେମାନୁ ପ୍ରବୁଜ୍ ଦରକାର ମାନାଟ୍ ।

୩୫ ମାରି, ଖାର ଗଦପିଲାଦିଜ୍ ଜିସୁ ଲାକ୍ତୁ ଆୟା ଗଦ ମୁସ୍କୁ ନିଜେ ନିଜେଦି ଖାତିଜ୍ ପାର୍ସି ଜିସୁଜ୍ ବାସ୍ସିତାର୍ ।

୩୬ ମାରି, ଖାନ୍ ସନିଖାଲେ ଲୋକୁ ରାସ୍ତାଦୁ ନିଜେ ନିଜେଦି ଖାତିଜ୍ ପାର୍ସି ସିଦେଜ୍ ଆସ୍ତେ ।

୩୭ ମାରି, ଖାନ୍ ଏସ୍ତିଖାଲେ ଜୀତ ଗରନ୍ତି ଗାଡ଼ଗାଡ଼ା ବାତି ଲାକ୍ତୁ ଇତାନ, ନାସ୍ତିଖାଲେ ଝିଜେରେ ସିସୁର ସୁଡ଼ତି ମାର୍ଇ ଝିଜୁ ସାକ୍ତିଦି ପାଣି ଉଣ୍ଡିଜ୍ ଖେଡ଼ିକାଦାନ୍ ନାଣ୍ଡ ଆଉଲି ଆଜି ମାପୁରୁଦି ଦନ୍ୟବାଦ୍ କିଜି କିଜି ଇର୍ହାର୍,

୩୮ ପ୍ରବୁ ଦରତାନ୍ ଆମା ରାଜା ଖାଜିନାନ୍, ଖାନ୍ ଦନ୍ୟ । ମୁସ୍କୁପୁରତୁ ସାନ୍ତି ମାରି ଗୌରବ୍ ମାପୁରୁଦି ଦନ୍ୟବାଦ୍ ଆପିଟ୍ ।

୩୯ ଆବେଟ୍‌କୁ ଲୋକା ଲୋକ ଏସୋ ପାରୁସିର୍ ଜିସୁଙ୍କୁଁ ଇର୍ହାର୍, “ଏ ଗୁରୁ, ନି ସିସୁରିଙ୍କ ଆଲ୍‌ଜ ମାନ୍‌ଡ୍ରେଙ୍କ୍ ଜନ୍‌ଆଁ ।”

୪୦ ଜିସୁ ଇର୍‌ଆନ୍, “ନାନ୍ ମିଙ୍କ୍ ସଡ଼ ଇଜିନା, ଇକାର୍ ଆଲେତି ମାର୍‌ରିଙ୍କ୍, କାଲ୍‌କୁ ଆଉଲି ଆନେ ।”

ଜିସୁ ଜିରୁସାଲମ୍‌ତି ଉଣ୍ଡିଙ୍କ୍ ଆଡ଼୍‌ବାତାନ୍

୪୧ ମାରି, ଏସ୍ତ୍ରାଝାଲେ ଜିସୁ ଜିରୁସାଲମ୍‌ ଲାକ୍‌ତୁ ଝାତାନ୍, ନାସ୍ତ୍ରାଝାଲେ ଗାଡ଼ତିଙ୍କ୍ ସୁଡ଼ୁଛି ତାନେ ଉଣ୍ଡିଙ୍କ୍ ଆଡ଼୍‌ବାଜି ଇର୍‌ଆନ୍,

୪୨ “ନିନ୍, ହୁଁ, ନିନ୍ ଜଦି ନେର୍ ସାନ୍ତି ପୟ୍‌ନି ବିସୟତିଙ୍କ୍ ନେସ୍‌ତି ମାନ୍‌ ! ମାତର୍ ଇଲେଇ ଆୟାଝିଜୁ ନିବାଣ୍‌କୁ ମାର୍‌ଗିତା ମାନାଡ଼ ।

୪୩ ଆଦେଙ୍କ୍ ନି ମୁସ୍‌କୁ ମାନି କାର୍‌ମୁଦି ସମୟ ନିନ୍ ନେସ୍‌ଇତି ଆକା, ସମୟ ଝାଜିନାଡ଼ ଏସ୍ତ୍ରାଝାଲେ ମି ସାତୁର୍ ନି ସାରିବେଡ଼ତି ଗାଟୁ ଡର୍‌ସି ନିଙ୍କ୍ କେର୍‌ପସି ବାଦା କିନାର୍, ମାରି ମି ଝିଜୁ ସେର୍‌ଲେଙ୍କ୍ କେର୍‌ନାର୍ ।

୪୪ ମାରି ନିଙ୍କ୍ ନିବାନ୍ ମାନି ଝିଜୁ ଲୋକାଙ୍କ୍ ଗୁଣ୍ଡା କିନାର୍, ମାରି ନିବାନ୍ ଉଣ୍ଡି କାଲ୍‌ଦିଙ୍କ୍ ଆଇ ଉଣ୍ଡି କାଲ୍‌ ମୁସ୍‌କୁ, ଡେବାଏଡ଼, ଇରିଙ୍କ୍ ନିଙ୍କ୍ ଏସ୍ତ୍ରାଝାଲେ ମାପୁରୁ ରକିୟା କିଦେଙ୍କ୍ ଝାତାନ୍, ନିନ୍ ଝାନିଙ୍କ୍ ସିନିସ୍ କିଇତିଦେର୍ ।”

ଜିସୁ ଜିରୁସାଲମ୍‌ ମନ୍‌ଦିର୍‌ତୁ ସର୍‌ଆନ୍

(ମାତିଡ଼ ୨୧:୧୨-୧୭; ମାର୍କ ୧୧:୧୫-୧୯; ଜୋହନ୍ ୨:୧୩-୨୨)

୪୫ ମାରି, ଜିସୁ ମନ୍‌ଦିର୍‌ତୁ ଡରିତାନ୍ ନୋ ପର୍‌ନି ଲୋକାଙ୍କ୍ ଇକା ଇଜି ସପଡେଙ୍କ୍ ଆସ୍‌ତାନ୍,

୪୬ “ଦର୍‌ମୁସାସ୍ତୁ ରାସାତାମାନାଡ଼, ମାପୁରୁ ଇର୍‌ଆନ୍, ମା ଇଲୁ ପାର୍‌ତନାଦି ଇଲୁ ଆନାଡ଼, ମାତର୍ ମିର୍ ତାନେଙ୍କ୍ ଡକ୍‌ମ୍‌ରକ୍‌ମ୍ ଇଲୁ କିତିମାନିଦେର୍ ।”

୪୭ ☆ମାରି, ଜିସୁ ଝିଜୁଦିନ୍ ମନ୍‌ଦିର୍‌ତୁ ସିକ୍‌ଆ ସିଜିମାର୍‌ଆନ୍, ମାତର୍ ପେରି ଜାଜକର୍, ସାସ୍ତ୍ରିର୍ ମାରି ଲୋକାଣି ପେରିକାର୍ ଝାନିଙ୍କ୍ ସାପିସ୍‌କିଦେଙ୍କ୍ ବଦାକିଜିମାର୍‌ଆର୍ ।

୪୮ ମାତର ଲୋକ ଝିଜେରେ ଝେଡ଼ିକାଦାନ ଝାନି ସିକିୟା
ଝେନ୍‌ଜିମାରୁଆର୍, ଆୟାଉଣ୍ଡିଙ୍ଗ୍ ଝାର୍ ଇନିକା କିଦେଙ୍ଗ୍ ଆନାଡ଼
ଆକା ଅଡ଼ବିଦେଙ୍ଗ୍ ଆବ୍‌ଏଜି ମାରୁଆର୍ ।

୨୦

ଜିସୁସ୍ ଅଦିକାର ବିସୟତିଙ୍ଗ୍ ପ୍ରସ୍ତ

(ମାତିଉ ୨୧:୨୩-୨୭; ମାର୍କ ୧୧:୨୭-୩୩)

୧ ଜିସୁ ଅର୍ଲେନ୍‌ ମନ୍ଦିର୍ ଲୋଇ ମାନ୍‌ଜି ଲୋକାଙ୍ଗ୍ ସିକିୟା
ସିଜିମାରୁଆନ୍ ମାରି ନେଗିକାରୁର୍ ଝେର୍‌ସି ମାରୁଆନ୍, ନାସ୍ତିଝାଲେ
ପେରି ଜାଜକର୍ ନି ସାସ୍ତିର୍ ଜିହୁଦିର୍ ପେରି ଲୋକାଝାଲେ ଝାଜି
ଝାନିଙ୍ଗ୍ ଇର୍ହାର୍,

୨ ନିନ୍ ଏମେ ଅଦିକାରତାନ୍ ଇୟାଝିଜୁ କିଜିନି, ବା ଏନ୍‌ ନିଙ୍ଗ୍
ଇୟା ଅଦିକାର ସିତାନ୍, ଝାନ୍ ଏନ୍‌, ମାଙ୍ଗ୍ ଇନ୍‌ଆଁ ।

୩ ମାତର ଜିସୁ ଝାରିଙ୍ଗ୍ ଝେର୍‌ତାନ୍, “ନାନ୍ ବା ମିଙ୍ଗ୍ ଉଣ୍ଡି ମାଟା
ଝେନ୍‌ବାନା, ନାଙ୍ଗ୍ ଇନ୍‌ଣ୍ଡି

୪ ତୁବନ୍‌ସିନି ଯୋହନତି ବାପ୍ତିସ୍ମ ସିନି ଅଦିକାର ମାପୁରୁ ମାଣ୍‌କୁ ନୋ
ଲୋକା ମାଣ୍‌କୁ ଆତାମାରୁଆଡ଼ ।”

୫ ଆବେଟ୍ ଝାର୍ ଝାରି ଝାରି ଲୋଇ ଝାର୍‌ଗିଜି ସାତାର୍, ଜଦି ମାପୁରୁ
ମାଣ୍‌କୁ ଇଜି ଇନିକା, ଆବେଟ୍ ଝାନ୍ ଇନାନ୍, ମିର୍ ଏନ୍‌ ଝାନିଙ୍ଗ୍
ବିସ୍‌ବାସ୍ କିଇତିଦେର୍ ?

୬ ଜଦି ଲୋକା ମାଣ୍‌କୁ ଇଜି ଇନିକା, ଆବେଟ୍ ଲୋକଝିଜେରେ
ମାଙ୍ଗ୍ କାଲ୍‌କାଣ୍ଡ ତାକ୍‌ନା ପୋକ୍‌ନାର୍, ଇରିଙ୍ଗ୍ ଯୋହନ ଜେ
ଅରେନ୍‌ ବାବବାଦି, ଇକା ଝାର୍ ଆବ୍‌ଝାଦାନ୍ ମାନାତାମାନାର୍ ।

୭ ଆଦେଙ୍ଗ୍ ଇକା ଆମାଣ୍‌କୁ ଆତାଡ଼, “ଇକା ନେସ୍‌ଏପ୍ ଇଜି ଝାର୍
ଜିସୁଙ୍ଗ୍ ଝେର୍‌ତାର୍ ।”

୮ ଜିସୁ ଝାରିଙ୍ଗ୍ ଇର୍‌ଆନ୍, “ନାନ୍ ଏମେ ଅଦିକାରତାନ୍ ଇୟାଝିଜୁ
କିଜିନା, ଆକାବା ନାନ୍ ମିଙ୍ଗ୍ ଝେର୍‌ତେଙ୍ଗ୍ କେଏ ।”

ଅଙ୍ଗୁରକିଡ଼ିଇତୁ ବାଗ୍‌ତାନ୍ ପାଣିକିନିଝାରି କାତା

(ମାତିଉ ୨୧:୩୩-୪୬; ମାର୍କ ୧୨:୧-୧୨)

୯ ଇୟା ଝେନ୍‌କା ଜିସୁ ଲୋକାଙ୍କ ଇୟା କାତା ଝେରତେଙ୍ଗ ଆସ୍‌ତାନ୍ । “ଅରେନ୍ ଲୋକୁ ଉଣ୍ଡି ଅଙ୍ଗୁର୍ କିଡ଼ିଇ କିଜି ଆକା ପାଣିକିନିଝାରିଙ୍ଗ ବାଗ୍‌ତୁ ପାଣି କିଦେଙ୍ଗ ସିଜି ନାଣ୍ଡ ଦିନ୍‌ତି ଉଣ୍ଡିଙ୍ଗ ଆଇ ଦେସ୍‌ତୁ ସର୍‌ଆନ୍ ।

୧୦ ମାରି, ପାଣିକିନିକାର୍ ଏଣ୍ଡେସ୍ ଝାନିଙ୍ଗ ଅଙ୍ଗୁର୍ କିଡ଼ିଇଦି ପଲ୍‌ତି ବାଗ୍‌ ସିନାର୍, ଇୟାଉଣ୍ଡିଙ୍ଗ ଝାନ୍ ଅରେନ୍ ପାଣି କିନି ମୁରୁଲିଙ୍ଗ ଟିକ୍ ସମୟତୁ ଝାରି ଲାକ୍‌ତୁ ପୋକ୍‌ତାନ୍, ମାତର୍ ଆୟା ପାଣିକିନିକାର୍ ଝାନିଙ୍ଗ ମାଡ୍‌ ତାକ୍‌ତାରୋ ଝାର୍‌ଇ କିୟୁଦାନ୍ ଡେସିପେରିତାର୍ ।

୧୧ ଝାନ୍ ମାରି ଅରେନ୍ ପାଣିକିନି ଗତିମୁରୁଲିଙ୍ଗ ପୋକ୍‌ତାନ୍; ଝାର୍ ଝାନିଙ୍ଗ ବା ତାକ୍‌ତାର୍ ମାରି ଅପ୍‌ମାନ୍ କିଜି ଝାର୍‌ଇ କିୟୁଦାନ୍ ଡେସିପେରିତାର୍ ।

୧୨ ଝେନ୍‌କା ଝାନ୍ ମାରି ଅରେନ୍‌ଝାନିଙ୍ଗ ବା ପୋକ୍‌ତାନ୍; ମାତର୍ ଝାର୍ ଝାନିଙ୍ଗ ବା କାଣ୍ଡିଆ କାବରା କିଜି ଆଡ୍‌ରେ ପେର୍‌ତାପୋକ୍‌ତାର୍ ।

୧୩ ଆବେର୍ ଅଙ୍ଗୁର୍ କିଡ଼ିଇଦି ମାଲିକ୍ ଇର୍‌ଆନ୍, ନାନ୍ ଇନିକା କିନା ? ନା ଲାଡ୍‌ତି ମାରିନ୍‌ତିଙ୍ଗ ପୋକ୍‌ନା, ଆନାଡ୍‌ସୁରି ଝାର୍ ଝାନିଙ୍ଗ ମାନାନାର୍ ।

୧୪ ମାତର୍ ପାଣିକିନିକାର୍ ମାଲିକ୍‌ତି ମାରିସିଙ୍ଗ ସୁଡ୍‌କୁ ଝାରି ଲୋଇ ଝାର୍‌ଗିସାଜି ଇନ୍‌ଡ୍ରେଙ୍ଗ ଆସ୍‌ତାର୍, ଇକାନ୍ ତୋ ଝାନି ମାରିସି, ଝେନିଙ୍ଗ ସାୟାମାର୍‌ଗା ତାକ୍‌ନାର୍, ଏଣ୍ଡେସ୍‌କି ଇୟାଝିନ୍‌ ଦନ୍ ମାଦି ଆନାଡ୍ ।

୧୫ ମାରି, ଝାର୍ ଝାନିଙ୍ଗ ଅଙ୍ଗୁର୍ କିଡ଼ିଇ ଆଡ୍‌ରେ ଅସି ସାୟାମାର୍‌ଗା ତାକ୍‌ତାର୍ । ଇଲେଇ, ଅଙ୍ଗୁର୍ କିଡ଼ିଇଦି ମାଲିକ୍ ଝାରିଙ୍ଗ ଇନିକା କିନାନ୍ ?

୧୬ ମାଲିକ୍ ଝାଜି ଇୟା ପାଣିକିନିଝାରିଙ୍ଗ ସାବିସ୍ କିନାନ୍ ମାରି ଆଇ ଲୋକାଙ୍କ ଅଙ୍ଗୁର୍ କିଡ଼ିଇ ବାଗ୍‌ତୁ ପାଣି କିଦେଙ୍ଗ ସିନାନ୍ । ଇକା ଝେନ୍‌ଜି ଝାର୍ ଇର୍‌ହାର୍, ଆୟାଝାଜା ଆମାକିଡ୍ ।”

୧୭ ମାତର୍ ଜିସୁ ଝାରିଙ୍ଗ ସୁଡ୍‌କୁ ଇର୍‌ଆନ୍, ଆରିଙ୍ଗ ଇୟା ଆମା ବାକ୍ୟ ରାସାତାମାନାଡ୍, ତାନେ ଅର୍ଡ଼ ଇନିକା, ଇଲୁ ତିଆର୍ କିନିକାର୍ ଆମା କାଲୁଦିଙ୍ଗ ସିଲେ ଇର୍‌ହାର୍, ଆକା କନାଦି ମୁଲ୍‌କାଲୁ ଆତାଡ୍ ।

୧୮ ଆମାକାନ ଆୟା କାଲୁ ମୁସକୁ ଆରନାନ, ଖାନ ମକା ମକା ଆନାନ, ମାରି ଆୟା କାଲୁ ଆମାଖାନି ମୁସକୁ ଆରନାତ୍, ଖାନିଙ୍ଗ୍ ଆକା ଗୁଣ୍ଡୁଗୁଣ୍ଡା କିନାତ୍ ।

ସିସୁଟ୍‌ସିନି ବିସୟତି କାତା

(ମାତିତ ୨୨:୧୫-୨୨; ମାର୍କ ୧୨:୧୩-୧୭)

୧୯ ଆବେଟ୍ ସାସ୍ତିର୍ ମାରି ପେରି ଜାଜକର୍ ଆୟା ଦାପ୍ରେ ଜିସୁଙ୍କୁ ଆସ୍‌ତେଙ୍ଗ୍ ସେସ୍ତା କିତାର୍, ମାତର୍ ଖାର ଲୋକାଙ୍ଗ୍ ଡିଲ୍‌ତାର୍, ଇରିଙ୍ଗ୍ ଖାନ ଇୟା କାତା ଖାରିଙ୍ଗ୍ ସୁଡ଼ୁଡ଼ି ଇର୍ହାନ ଇଜି ଖାର ବୁଜାତାର୍ ।

୨୦ ଆବେଟ୍ ଦାର୍ମୁସାସ୍ତିର୍ ମାରି ପେରି ଜାଜକର୍ ଜିସୁଙ୍କୁ ଜାଡ଼ିଦୁ ଆର୍‌ପ୍‌ତେଙ୍ଗ୍ ଇଜି ନେଗି ସମୟତିଙ୍ଗ୍ କାପକିଜି ମାର୍ହାର୍ । ଖାର ଜିସୁ ଲାକ୍‌ତୁ ଏସୋ ସାଲାକିଦି ଖାରିଙ୍ଗ୍ ଲାଞ୍ଜସିଜି ପୋକ୍‌ତାର୍ । ଖାର ଇୟା ଲୋକାଙ୍ଗ୍ ନେଗି ଲୋକୁ ଖାଜା ସାଲାକି କିନି ଉଣ୍ଡିଙ୍ଗ୍ ଇର୍‌ଆ ମାର୍ହାର୍ । ଖାର ଜିସୁ ଖେର୍‌ସିମାନି ମାଟାଦୁ ଇନି ତାର୍‌ଇ ବିସୟ ପୟଜ ସପ୍‌ତେଙ୍ଗ୍ ବଦା କିଜିମାର୍ହାର୍ । ଇରିଙ୍ଗ୍ ଜଦି ଖାର ଜିସୁମାନୁ ଇନି ତାର୍‌ଇ ବିସୟ ସୁଡ଼ୁଦେଙ୍ଗ୍ ଆଟ୍‌ନାର୍, ଆବେଟ୍ ଖାର ଜିସୁଦି ମୁସକୁ ଅଦିକାର୍ ମାନି ସାସନ୍ କିନି ଲୋକା କିୟୁଦୁ ଜିସୁଙ୍କୁ ଆସ୍‌ପିସ୍‌ନା ସିନାର୍ ।

୨୧ ଖାର ଖାନିଙ୍ଗ୍ ଖେନ୍‌ବାତାର୍, “ଏ ଗୁରୁ, ମାପ୍ ନେସ୍‌ନାପ୍, ନିନ୍ ଟିକ୍ ମାଟା ଖେର୍‌ନି, ମାରି ସିକିୟା ସିନି, ମାରି ଏଙ୍ଗ୍‌ବା ମକମ୍ ସୁଡ଼ୁଡ଼ି ପାଣି କିଇ, ମାତର୍ ସଡ଼ତାନ୍ ଲୋକା ଜିବନ୍ ଉଣ୍ଡିଙ୍ଗ୍ ମାପୁରୁଦି ବଦା ବିସୟତାନ୍ ସିକିୟା ସିନି ।

୨୨ ମାଙ୍ଗ୍ ଇନ୍‌ଆଁ, ରାଜା କାଇସର୍‌ତିଙ୍ଗ୍ ସିସୁଟ୍ ସିନିକା ମା ନିୟମ୍ ନୋ ସିଲେ ?”

୨୩ ମାତର୍ ଜିସୁ ଖାରି ସାଲାକି ନେସ୍‌ସି ଖାରିଙ୍ଗ୍ ଇର୍ହାନ, ନାଙ୍ଗ୍ ଉଣ୍ଡି ଅଦ୍‌ଲି ତର୍‌ତୁ ।

୨୪ ଉଣ୍ଡି ଖେଣ୍ଡି ଟାକା ତାବୁଙ୍କୁ ତର୍‌ତୁ । ତେନି ମୁସକୁ ଏ ବମା ନି ଦର୍ ମାନାତ୍ ? ଖାର ଇର୍ହାର୍, ରାଜା କାଇସର୍‌ତିନ୍‌ନ୍ଦି ।

୨୫ ଆବେଟ୍ ଜିସୁ ଖାରିଙ୍ଗ ଇର୍ହାନ୍, “ଆରିଙ୍ଗ ରାଜା କାଇସର୍ତି ଆମାକା, ଆକା ରାଜା କାଇସର୍ତିଙ୍ଗ ସିଦୁ; ମାରି, ମାପୁରୁଦି ଆମାକା, ଆକା ମାପୁରୁଙ୍ଗ ସିଦୁ ।”

୨୬ ଆବେଟ୍ ଖାର ଲୋକା ଆଗ୍ତି ଜିସୁ ମାଟାଦି ତାଗ୍ଲ ବିସୟ ଆସତେଙ୍ଗ ଆଟ୍‌ଏତାର୍, ମାରି ଖାର ଖାନ୍ ଖେରତି ମାଟାଦି ଉଣ୍ଡିଙ୍ଗ କାବାଆଜି ଆଲେତା ମାର୍ହାର୍ ।

ଡେସିନିଙ୍ଗ୍ ନି ବିସୟତାନ୍ ପ୍ରସ୍ତ

(ମାତିଡ ୨୨:୨୩-୩୩; ମାର୍କ ୧୨:୧୮-୨୭)

୨୭ ☆ଇୟା ଖେନ୍‌କା ସାତିଲୋକ୍ ମାରିଡେସିଜିବନ୍‌ଆଜି ନିଙ୍ଗ୍‌ନିକା ବିସବାସ୍ କିଇକାର୍ ଏସୋ ସାଦୁକିର୍ ଜିସୁ ଲାକ୍‌ତୁ ଖାତା ଖେନ୍‌ବାତାର୍,

୨୮ “ଏ ଗୁରୁ, ମୋସା ମା ଉଣ୍ଡିଙ୍ଗ ରାସ୍‌ତାମାନାନ୍ ଜେ, ଜଦି ଏମେ ଲୋକ୍‌ତି ଦାଦ୍‌ସି ଆଡ୍‌ସି ମାନାପ୍ ମାନାପ୍ କଡକକ୍‌ରା ଆଏଣ୍ଡା ସାନାନ୍, ଆଡିଙ୍ଗ୍ ଖାନି ତଡାନ୍ ଖାନି ଆଡ୍‌ସିଙ୍ଗ୍ ପେଡିଆଜି ନିଜେଦି ଦାଦ୍‌ସି ଉଣ୍ଡିଙ୍ଗ୍ କୁଟୁମ୍ କିଦେଙ୍ଗ୍ ଆଟ୍‌ନାନ୍ ।

୨୯ ଅର୍ଲେନ୍‌ ସାଡ୍‌ଲୋକ୍ ତଡାନ୍‌କୁ ମାର୍ହାର୍; ପେରିଦାଦ୍‌ସି ଅରେଡ୍ ଆଇମାଦିଙ୍ଗ୍ ପେଡି ଆତାନ୍ ମାରି କଡକକ୍‌ରା ଆଏଣ୍ଡା ସାତା ସର୍ହାନ୍;

୩୦ ଖେନ୍‌କା ଖାନି କର୍‌ରି ତଡାନ୍ ପେଡିଆଜି କଡକକ୍‌ରା ଆଏଣ୍ଡା ସାତା ସର୍ହାନ୍ ମାରି ଅରେନ୍‌ ତଡାନ୍ ତାନେଙ୍ଗ୍ ପେଡି ଆତାନ୍;

୩୧ ଆୟାଖାଜା ସାଡ୍ ତଡାନ୍‌କୁ ଖିଜେରେ କଡକକ୍‌ରା ଆଏଣ୍ଡା ସାତାସର୍ହାର୍ ।

୩୨ ସାରାସାରିଖେନ୍‌କା ଆୟା ଆଇମା ବା ସାତା ସର୍ହାଡ୍ ।

୩୩ ଆରିଙ୍ଗ୍, ମାରିଡେସିଜିବନ୍‌ଆଜି ଖାର ନିଙ୍ଗ୍‌ନିଖାଲେ ଆୟାଖାରି ଲୋଇ ଖାଦ୍ ଏ ଆଡ୍‌ସି ଆନାଡ୍ ? ସାଡ୍‌ଲୋକ୍ ତୋ ତାନିଙ୍ଗ୍ ପେଡି ଆତାମାର୍ହାର୍ ।”

୩୪ ଜିସୁ ଖାରିଙ୍ଗ ଇର୍ହାନ୍, “ଇୟା ଦୁନିଆଦି କଡକକ୍‌ରା ପେଡି ଆନାର୍ ମାରି ପେଡି ସିନାର୍,

୩୫ ମାତର ଏମେ ମେମାରି ନି ଆଇମେକ୍ ସାତି ଲୋକାମାଣକୁ ମାରିତେସି ନିଜ୍ଞିନି ଉଣ୍ଡିଙ୍ଗ୍ ମାରି ଖାନି ଦୁନିଆଦୁ ଜିଦେଙ୍ଗ୍ ଜଗ୍ ଆନାର୍ ଖାର୍ ପେଡି ଆଏର୍;

୩୬ ମାରି, ଖାର୍ ସାଦେଙ୍ଗ୍ ଆର୍ଏର୍, ଇରିଙ୍ଗ୍ ଝିଜେରେ ମୁସକୁପୁରତି ଦୁଡକା ଖାଜା ତେବାନାର୍ ମାରି ମାରିତେସି ଜିବନ୍‌ଆଜିନିଙ୍ଗ୍ ତିଙ୍ଗ୍ କଡର୍ ଆକାର୍‌ଆକା ମାପୁରୁଦି କଡର୍ ଆନାର୍ ।

୩୭ ମୋସା ନେଗ୍ରେଣ୍ଡା ତର୍ତାମାନ୍ ଜେ ଲୋକୁ ସାତିମାଣକୁ ମାରିତେସିଜିବନ୍ ଆଜି ଜିନାର୍ । ମୋସା ଏସ୍ତିଝାଲେ କାସିନି ଦୁପାଦି ବିସୟତାନ୍ ରାସ୍ତାନ୍, ଖାନ୍ ଇର୍‌ଆନ୍ ଜେ, ପ୍ରବୁ ଆଜିନାନ୍ ଅବ୍ରାହାମତି ମାପୁରୁ, ଇସହାକ୍ତି ମାପୁରୁ ମାରି ଜାକୁବଦି ମାପୁରୁ ।

୩୮ ଖାନ୍ ତୋ ସାତିଲୋକ୍ତି ମାପୁରୁ ଆଏନ୍, ମାତର ଜିବନ୍‌ମାନି ଲୋକା ମାପୁରୁ; ଇରିଙ୍ଗ୍ ଝିଜେରେ ଖାନି ଆଗ୍ତି ଜିନିକାର୍ ଆନାର୍ ।”

୩୯ ଆବେର୍ ସାସ୍ତିରି ଲୋଇ ଏସୋ ଲୋକୁ ଇର୍ହାର୍, “ଏ ଗୁରୁ, ନିନ୍ ସଡ୍ ଝେରତି ।”

୪୦ ଇରିଙ୍ଗ୍ ଖାର୍ ଖାନିଙ୍ଗ୍ ଇନି ପ୍ରସ୍ତ ଝେନ୍‌ବାଦେଙ୍ଗ୍ ମାରି ସାସ୍ କିଏତାର୍ ।

କ୍ରିସ୍ତ ଏ ମାରିନ୍ ?

(ମାତିଉ ୨୨:୧-୪୬; ମାର୍କ ୧୨:୩୫-୩୭)

୪୧ ମାତର ଜିସୁ ଖାରିଙ୍ଗ୍ ଝେନ୍‌ବାତାନ୍, କ୍ରିସ୍ତ ଜେ ଦାଉଦତି ମାରିନ୍, ଇକା ଲୋକୁ ଏଣ୍ଡେସ୍ ଇନାର୍ ?

୪୨ ଇରିଙ୍ଗ୍ ନିଜେ ଦାଉଦ ଗିତସଂହିତାଦୁ ଇନାନ୍, ପ୍ରବୁ ନା ପ୍ରବୁଙ୍ଗ୍ ଇର୍ହାନ୍,

୪୩ ମାପ୍ ଆମାସାନ୍ ନି ସାତୁରିଙ୍ଗ୍ ନି କାଲ୍‌କା ଆଡ୍‌ଗି କିଏପ୍, ଆୟା ସାନ୍ ମା ଉଣେରି ତରିନ୍ ବାସ୍‌ସ ମାନ୍‌ଆ ।

୪୪ ମାରି, ଦାଉଦ ଖାନିଙ୍ଗ୍ ପ୍ରବୁ ଇଜି ଇନାନ୍; ଆରିଙ୍ଗ୍, ଖାନ୍ ଏଣ୍ଡେସ୍ ଖାନି ମାରିନ୍ ?

ଜିସୁ ସାସ୍ତିରିଙ୍ଗ୍ ଜାଗାର୍‌ତା କିତାନ୍

(ମାତିଉ ୨୩:୧-୩୬; ମାର୍କ ୧୨:୩୮-୪୦)

୪୫ ଝେନ୍‌କା ଜିସୁ ଝିଜୁ ଲୋକା ଆଗ୍ତି ସିସୁରିଙ୍ଗ୍ ଇର୍‌ଆନ୍,

୪୭ “ସାହିରିମାଣକୁ ଜାଗାରତା ! ଖାର ନିରଈ ଆଙ୍ଗୁ ଆରାନାର । ମାରି ସାତାସାଉକାଦୁ ଲୋକୁ ମାଡ଼ିସ୍ କିପିର ଇଜି ଅଡ଼ବିନାର, ପାର୍ତନାକିନି ଇଲ୍ଲକାଙ୍ଗ ପେରି ବାଡ଼ି ମାରି ବୋଜି ଉଣିମାନୁ ପେରି ବାଡ଼ି ପୟଦେଙ୍ଗ ବଦାକିନାର ।

୪୭ ଖାର ରାଣ୍ଡି ଆଇମେକା ଇଲ୍ଲଦି ଝିଜୁ ବିସୟ ରେନାଅନାର ମାରି ନିଜେଦିଙ୍ଗ ନେଗିକାନ ତରତେଙ୍ଗ ନିରଈ ପାର୍ତନା କିନାର; ଖାର ନାଣ୍ଡି ଦଣ୍ଡି ପୟନାର ।”

୨୧

ରାଣ୍ଡି ଆଇମା ଦାନ ସିନିକା

(ମାର୍କ ୧୨:୪୧-୪୪)

୧ ଇୟା ଝେନକା ଜିସୁ ସାରିବେଡ଼ି ସୁଡ଼ଜି ଏସୋ ମାଜନ୍ ଲୋକୁ ମନ୍ଦିରତି ଡାବୁଙ୍ଗୁ ସିନି ପେଡ଼ାଦୁ ମାପୁରୁଦି ଉଣ୍ଡିଙ୍ଗ ଦାନ ସିନିକା ସୁଡ଼ଡ଼ାନ ।

୨ ମାରି, ଖାନ୍ ଅରେଡ଼ କାକୁତ ରାଣ୍ଡି ଆଇମା ଆୟା ପେଡ଼ାଦୁ ରୁନ୍ ଟାକେଙ୍ଗ ସିନିକା ସୁଡ଼ଜି ଝେରଡ଼ାର,

୩ ନାନ ମିଙ୍ଗ ସଡ଼ ଇଜିନା, ଇୟା କାକୁତ ରାଣ୍ଡି ଆଇମା ଝିଜେରିଙ୍ଗ ନାଣ୍ଡି ସିତାମାନାଡ଼ ।

୪ ଇରିଙ୍ଗ ଇକାର ଝିଜେରେ ପେଡ଼ାଦୁ ନିଜେ ନିଜେଦି ଆମାକା ଖାରିଙ୍ଗ ଦରକାର ସିଲେଡ଼ ଆୟା ଡାବୁଙ୍ଗୁ ଦାନ ସିତାମାନାର, ମାତର୍ ଇକାଡ଼ ନିଜେ ଜିଦେଙ୍ଗ ଆମାକା ଝିଜୁ ତାନେମାନୁ ମାର୍ଆଡ଼, ଆକା ଝିଜୁ ସିତାଡ଼ ।

ମନ୍ଦିରତି ଦଂସ ବିସୟତାନ୍ ଇହାନ

(ମାତିଡ଼ ୨୪:୧-୨; ମାର୍କ ୧୩:୧-୨)

୫ ମାରି, ଏସୋ ସିପୁର ମନ୍ଦିର ବିସୟତାନ୍ ଖାରଗି ସାଜିମାରଆର୍ । ଖାର ଇଜିମାରଆର୍, ଇକା ଉଣ୍ଡି ନେଗି ମନ୍ଦିର । ଇକା ନେଗି କାଲ୍ଲକାଣ୍ଡି ତିଆର୍ ଆତାମାନାଡ଼ । ସୁଡ଼ଦୁ ମାପୁରୁଙ୍ଗୁ ସିତାମାନି ନେଗି ନେଗି ବିସୟ ସିତାମାନାର ।

୬ ଜିସୁ ଇରଥାନ, “ମିର ଆମାଞ୍ଜିକୁ ଇବେ ସୁଡ଼ୁନିଦେର, ଦିନଞାନାଡ଼, ଏସିଞାଲେ ଉଣ୍ଡି କାଲୁ ମାରି ଉନ୍ତ୍ର କାଲୁ ମୁସକୁ ତେବାଏଡ଼ ଖିଜୁ କାଲୁକୁ ଗୁଣ୍ଡ ଗୁଣ୍ଡା ଆନେ ।”

ଦୁକ୍ ନି ନିଦା

(ମାତିଉ ୨୪:୩-୧୪; ମାର୍କ ୧୩:୩-୧୩)

୭ ଆବେଟ୍ ସିସୁର ଜିସୁଙ୍କୁ ଖେନବାତାର, “ଏ ଗୁରୁ, ଆରିଙ୍ଗ ଇୟାଞ୍ଜି ଏସାଙ୍ଗ ଗଟାନାଡ଼ ? ମାରି, ଏମେ ଦିନତୁ ଇୟାଞ୍ଜି ଗଟନା ଇଗାଞ୍ଜାନାଡ଼, ଆୟାଦିନତି ସିନା ଇନିକା ?”

୮ ଆବେଟ୍ ଜିସୁ ଖାରିଙ୍ଗ ଇରଥାନ, “ଜାଗାରତା, ମିର ଏଣ୍ଡେସ୍ ବାୟା ଆମାଟ୍; ଇରିଙ୍ଗ ଏସୋ ଲୋକୁ ନା ଦରତାନ ଖାଜି, ନାନ୍ ଜିସୁ ମାରି ଦିନ ଇଗା ଖାତାଡ଼ ଇଜି ଇନାର୍; ଖାରି ଖେନକା ସଲମାଟ୍ ।

୯ ମାତର୍ ମିର ଏସିଞାଲେ ଜୁଦ୍ ମାରି ଲୋକୁ ଡାକ୍ସିସାନି ଆଉଲି ଖେନିଦେର, ନାସିଞାଲେ ଡିଲାମାଟ୍; ଇରିଙ୍ଗ ଇୟାଞ୍ଜି ସତେନେ ଆଗଡ଼ି ଗଟାନାଡ଼, ମାତର୍ ଆୟାଦାପ୍ରେ ଜୁଗ୍ ସେସ୍ ଆଏଦେ ।”

୧୦ ଆବେଟ୍ ଖାନ୍ ଖାରିଙ୍ଗ ଇରଥାନ, “ଜାତି ବିରଦତାନ ଜାତି ଲୋକା ଲୋଇ ଜୁଦ୍ କିନାର୍ ମାରି ଦେସ୍ ବିରଦତାନ ଦେସ୍ ଲୋଇ ଜୁଦ୍ କିନାର୍,

୧୧ ମାରି ନାଣ୍ଡ ବୁନିକମ୍ ଆନାଡ଼ ମାରି ବାତି ବାତିଆଙ୍ଗା ମରତି ଆନାଡ଼ ମାରି ଲୋକାଙ୍ଗ ଉଣିକା ପୁଟ୍‌ଏଡ଼, ମାରି ବାଦଡ଼ୁ ବୟଙ୍ଗାର୍ ତରନାଡ଼ ମାରି ପେରି ପେରି ସିନେଙ୍ଗ ତରାନେ ।

୧୨ ମାତର୍ ଇୟାଞ୍ଜି ଗଟାନି ଆଗଡ଼ି ଲୋକୁ ମିଙ୍ଗ୍ ଆସନାର୍ ମାରି ପାରତନା ଇଲୁଦୁ ମାରି ଜିଲୁଡୁ ମିଙ୍ଗ୍ ପୋକ୍ସି କାସୁ ସିନାର୍, ମାରି ନା ଦରତି ଉଣ୍ଡିଙ୍ଗ ମିଙ୍ଗ୍ ରାଜା ନି ସାସନ୍‌କିନି ଲୋକା ଆଗଡ଼ି ଅନାର୍;

୧୩ ମାତର୍ ଇକା ମିଙ୍ଗ୍ ନା ବିସୟତାନ ଲୋକାଙ୍ଗ ନେଗିକାରୁର୍ ସାକି ସିଦେଙ୍ଗ ଇଜି ସାରି ପୟନିଦେର ।

୧୪ ☆ମାରି ନିଜେଦି ତରିଟାନ ଇନିକା ଇନ୍‌ଡେଙ୍ଗ ଆନାଡ଼, ଆୟା ବିସୟତାନ ଆଗଡ଼ିରାନ ସିନ୍ତା କିଇ ନିଜେ ନିଜେଦି ମୋନ୍‌ଡୁ ତିର୍ କିଦୁ ।

୧୫ ଇରିଙ୍ଗ ନାନ ମିଙ୍ଗ ଇୟାଞ୍ଜା ମାଟା ନି ବୁଦି ସିନା ଜେ, ମି
ଝିକୁ ସାତୁ ଲୋକୁ ଆବେ ଆଙ୍ଗଦେଙ୍ଗ ଆଟ୍‌ଏର୍ ।

୧୬ ମାତର୍ ମିଙ୍ଗ ମି ବୁବାୟାୟା, ତତାନ, ନିଜେଦି ଲୋକୁ ମାରି
ସାମ୍‌ବିବନ୍‌ର ସାତୁରି କିୟୁଦୁ ସର୍‌ପେ କିନାସିନାର୍, ମାରି ମି ଲୋଇ
ଲୋକୁ ଏଙ୍ଗ ଏଙ୍ଗ କାଡ଼ନାର୍,

୧୭ ମାରି ନାବାନ୍ ମିର୍ ବିସବାସ୍ କିତିମାନି ଉଣ୍ଡିଙ୍ଗ ଲୋକୁ କାଡ଼ନାର୍
।

୧୮ ମାତର୍ ମି ତାଲାଦି କୁକୁଟି ବା ନାସୁ ଆଏଡ୍ ।

୧୯ ମିର୍ ସାସ୍‌ତାନ୍ ତେବାତିଙ୍ଗ ନିଜେ ନିଜେଦିଙ୍ଗ ରକିୟା କିଦେଙ୍ଗ
ଆଟ୍‌ନିଦେର୍ ।”

ଜିରୁସାଲାମ୍ ଦଂସ ଆନି ମାଟା ଇର୍‌ଆନ୍

(ମାତିଉ ୨୪:୧୫-୨୧; ମାର୍କ ୧୩:୧୪-୧୯)

୨୦ ମାତର୍ ମିର୍ ଏସ୍ତିଞ୍ଜାଲେ ଜିରୁସାଲାମ୍‌ତିଙ୍ଗ ସନ୍‌ୟର୍ ସାରିବେଡ୍‌ଡି
କାପକିନିମାନିକା ସୁଣିଦେର୍, ଆୟାଞ୍ଜାଲେ ଆକା ଝିର୍‌ଜି ସନି ଦିନ୍ ଜେ
ଇଗା ଝାତାଡ୍, ଇକା ମିର୍ ନେସ୍‌ଡୁ ।

୨୧ ନାସ୍ତିଞ୍ଜାଲେ ଆମାଲୋକ୍ ଝିଜେରେ ଜିହୁଦା ଗାଡ୍‌ଡୁ ମାନାର୍,
ଝାର୍ ଗରନ୍ ମୁସ୍‌କୁ ଉରୁକ୍‌ସି ସଲିର୍; ମାରି, ଏର୍ ଗାଡ୍‌କାଙ୍ଗ
ତେବାନାର୍, ଏଣ୍ଡେସବା ଝାର୍ ଗାଡ୍‌ ଡିସ୍‌ସି ସଲିର୍; ମାରି, ଏର୍
ଇସ୍ତିନାର୍‌କାଙ୍ଗ ତେବାନାର୍, ଏଣ୍ଡେସବା ଝାର୍ ଗାଡ୍‌ଡୁ ଡ୍ରୁମାକିର୍;

୨୨ ଇରିଙ୍ଗ ରାସାତିମାନି ବିସୟ୍‌ଝିକୁ ପୁରା ଆନି ଉଣ୍ଡିଙ୍ଗ ଆକା ଝିକୁ
ଦଣ୍ଡି ଦିନ୍ ଆନାଡ୍ ।

୨୩ ଆୟା ସମୟ୍‌ଡୁ ପଟାଦୁମାନି ଆଇମାଲୋକ୍ ମାରି ଇସ୍ତି
କଡ୍‌ରିଙ୍ଗ୍ ଆସ୍‌ସି ପାଲ୍ ଉର୍‌ପିସ୍‌କିଜିମାନି ଆଇସିକା ଅବସ୍ତା ଏସ
ତାଗଇକା ଆନାଡ୍, ଝାକ୍ ନାଣ୍ଡ ଦୁଃକ୍ ପୟ୍‌ନେ ! ଇରିଙ୍ଗ ଦେସ୍‌ଡୁ ନାଣ୍ଡ
ଦୁଃକ୍‌କାସ୍‌ ଝାନାଡ୍ ମାରି ମାପୁରୁଦି ଦଣ୍ଡ ଇୟା ଜାତି ମୁସ୍‌କୁ ଝାନାଡ୍ ।

୨୪ ମାରି ଝାର୍ କୁଡାମ୍‌କାଣ୍ ସାନାର୍ ମାରି ତର୍‌ଆୟ୍ ଆଜି
ଆଇଜାତିଦି ଲୋଇ ପୋକ୍‌ନାର୍, ମାରି ଅଣଜିହୁଦି ଲୋକା ଦିନ୍
ଝିଜେ ସାଦି ଜିରୁସାଲାମ୍ ଝାରି କାଲ୍‌କୁ ଆଡ୍‌ଗି ତେବାନାଡ୍ ।

ମନୁସ୍ୟପୁତ୍ର ମାରିଡେସି ଝାନିକା

(ମାତିଉ ୨୪:୨୯-୩୧; ମାର୍କ ୧୩:୨୪-୨୭)

୨୫ “ମାରି ଝେଡ଼ା, ଲେଖୁ ନି ସୁକେଙ୍ଗାଁଙ୍କ ସିନେଙ୍ଗ ତରାନେ, ମାରି ଦୁନିଆଦୁ ଜାତିଦି ଲୋକା ଲୋଇ ବାଦା ଖାନାଡ଼; ସାମ୍ବୁରୁ ମାରି ଏରୁଗାତିସ୍‌ଖାନି ଆଉଲିଦିଙ୍ଗ ଖାର ବାୟାବେମ୍‌ରି ଆନାର ।

୨୬ ମାରି ଦୁନିଆଦି ମୁସ୍କୁ ଖାଜିମାନି ଗଟନା ଝିଜୁଦିଙ୍ଗ କାପକିଜି ଲୋକୁ ଝିଜେରେ ମୁର୍ସା ଆନାର, ଇରିଙ୍ଗ ବାଦଡ଼ତି ସାକ୍ତିଝିଜୁ ଦୁଙ୍ଗନେ ସନେ ।

୨୭ ନାସ୍ତିଝାଲେ ଲୋକୁ ମନୁସ୍ୟପୁତ୍ରଦିଙ୍ଗ ନାଣ୍ଟ ସାକ୍ତିଦାନ ମାରି ନାଣ୍ଟ ମହିମାଦି ଖାଲେ ବାଦଡ଼ତାନ ଖାନିକା ସୁଣାର ।

୨୮ ମାତର ଇୟାଝିଜୁ ଗଟେନେଙ୍ଗ ଆରାମ୍‌ଆତିଙ୍ଗ ମିର ମୁସ୍କୁ ସୁଡ଼ଦୁ ମାରି ତାଲା ପେରଦୁ, ଏଣ୍ଡେସକି ମି ରକିୟା ପଇନିକା ଲାକଡ଼ୁ ଇଗା ଖାତାଡ଼ନି ।”

ତଗା ମାରାନତାନ ଅଜାନିକା

(ମାତିଡ ୨୪:୩୨-୩୫; ମାର୍କ ୧୩:୨୮-୩୧)

୨୯ ମାରି, ଜିସୁ ଖାରିଙ୍ଗ ଉଣ୍ଡି କାତା ଇର୍‌ଆନ୍, “ତଗା ମାରାନ, ମାରି ଆଇ ଝିଜୁ ମାରାକା ବିସୟତାନ ଅଡ଼ବିଦୁ ।

୩୦ ଏସ୍ତିଝାଲେ ଆୟା ମାରାକା ଆକ୍ ପୁନାକାୟନେ, ନାସ୍ତିଝାଲେ ମିର ଆକା ସୁଡ଼ୁ ଜେଟାପ୍ ଲେଖୁ ଇଗା ଖାତାଡ଼ନି ଇଜି ନିଜେନିଜେ ନେସ୍‌ନିଦେର୍ ।

୩୧ ଆୟାଝାଜା ମିର ବା ଇୟାଝିଜୁ ଗଟନା ସୁଡ଼ୁଙ୍ଗ ମାପୁରୁଦି ରାଜି ଜେ ଇଗା ଖାତାଡ଼, ଇକା ନେସ୍‌ଡୁ ।

୩୨ “ନାନ୍ ମିଙ୍ଗ ସଡ଼ ଇଜିନା, ଇୟାଝିଜୁ ଗଟେଆଇ ସାନ୍ଦି ଇୟା ଦିନ୍‌ଡି ଲୋକୁ ଏଣ୍ଡେସ୍ ଝିଜ୍‌ଏର୍ ।

୩୩ ବାଦଡ଼ନି ଦୁନିଆ ଝିଜ୍‌ନାଡ଼, ମାତର ନା ବାକ୍ୟଝିଜୁ ଏସାଙ୍ଗ ବା ଝିଜ୍‌ଏଡ଼ ।

ଜାଗାରତା ମାନ୍‌ଡୁ

୩୪ “ମାତର ମିର ନିଜେ ନିଜେଦି ବିସୟତାନ ଜାଗାରତା ମାଡୁ, ଏସ୍ତିଝାଲେ ମି ଜିବନ୍ ନାଣ୍ଟ ଝେଡ଼ିକାଦୁ ପୁରା ତେବାନାଡ଼ ମାରି

କାତୁରୁଣ୍ଡିସ୍‌ସଦେଇଁ, ମାରି ଜିନି ବିସୟତାନ୍ ସିନ୍ତାଦାନ୍ ଦୁଃକ୍
 ଖାନାତ୍, ମାରି ଆୟାନାଶ୍ଟିଙ୍ଗ୍ ଦାପ୍ରେ ମି ମୁସ୍‌କୁ ଖାନା ଆର୍‌ନାତ୍;

୩୫ ଇରିଙ୍ଗ୍ ଆକା ଜାଡ଼ିଦି ଖାଜା ଓଜୁ ଦେସ୍‌ଦୁନିଆଦି ଓଜୁ ଲୋକା
 ମୁସ୍‌କୁ ଖାନାତ୍ ।

୩୬ ମାତର୍ ମିର୍ ଏଣ୍ଡେସ୍‌କି ଇୟାଓଜୁ ଖାଜିନିଆର୍‌ଡ଼ି ଗର୍‌ନାଦାନ୍
 ରକିୟା ପୟ୍‌ଦେଙ୍ଗ୍ ମାରି ମନ୍‌ସ୍ୟପୁତ୍ରଦି ଲାକ୍‌ତୁ ନିନ୍‌ଡ୍ରେଙ୍ଗ୍ ତାଟ୍
 ଆଦୁ, ଇୟାଉଣ୍ଡିଙ୍ଗ୍ ଦିନାମି ପାର୍‌ତନା କିଜି ଜାଗାର୍‌ତା ମାଡୁ ।”

୩୭ ☆ଜିସୁ ଓଜୁଦିନ୍ ମନ୍‌ରୁତୁ ସିକିୟା ସିଜିମାର୍‌ହାନ୍, ମାରି ଓଜୁ ନାଡ଼ା
 ସହସି ସଲ୍‌ସି ଜିତ ଗରନ୍‌ତୁ ତେବାଜି ମାର୍‌ହାନ୍ ।

୩୮ ମାରି, ଓଜେରେ ଲୋକ୍‌କୁ ମନ୍‌ରୁତୁ ଖାନି ସିକିୟା ଖେନ୍‌ଡ୍ରେଙ୍ଗ୍
 ଇଜି ସାଲ୍‌ଦି ଖାନି ଲାକ୍‌ତୁ ଖାଜି ମାର୍‌ହାର୍ ।

୨୨

ଜିସୁଙ୍ଗ୍ ବିରଦ୍‌ତାନ୍ ତାକ୍‌ଡେଙ୍ଗ୍ ଽ ଅଡ଼ବିତାର୍

(ମାତିତ ୨୬:୧-୫; ୧୪:୧୬; ମାର୍କ ୧୪:୧-୨, ୧୦-୧୧; ଜୋହନ
 ୧୧:୪୫-୫୩)

୧ ନିସ୍ତାର୍ ପଣ୍ଡୟ ଇନି କମିର୍‌ସିଲି ରୁଟିଦି ପଣ୍ଡୟ ଲାକ୍‌ତୁ ଆଜି
 ଖାଜିମାର୍‌ହାତ୍ ।

୨ ମାରି, ପେରି ଜାଜକର୍ ନି ସାସ୍ତିର୍, ଏଣ୍ଡେସ୍ ଜିସୁଙ୍ଗ୍ ଏନ୍
 ନେସ୍‌ଏଶ୍‌ଗା ସାୟାମାର୍‌ଗା ତାକ୍‌ଡେଙ୍ଗ୍ ଽ ଆର୍‌ନାର୍, ଆବେଶି
 ଉପାୟ୍‌ ପଇଜି ମାର୍‌ହାର୍, ମାତର୍ ଖାର୍ ଲୋକାଙ୍ଗ୍ ତିଲାଜି ମାର୍‌ହାର୍ ।

ଜିସୁଙ୍ଗ୍ ଆସିସ୍ କିଦେଙ୍ଗ୍ ଇଜି ଜିହୁଦା ରାଜିଆତାନ୍

(ମାତିତ ୨୬:୧୪-୧୬; ମାର୍କ ୧୪:୧୦-୧୧)

୩ ନାସ୍ତିଖାଲେ ବାରଲୋକ୍ ସିସୁରି ଲୋଇରାନ୍ ଇସ୍‌ସାରିୟେତିୟ
 ଦର୍‌ଡି ଅରେନ୍ ଜିହୁଦାମାନୁ ସୟତାନ୍ ଡ଼ରିତାତ୍;

୪ ମାରି, ଜିହୁଦା ସୋର୍‌ଆନ୍‌ନୋ, ଇନି ଉପାୟ୍‌ତାନ୍ ଖାନିଙ୍ଗ୍ ପେରି
 ଜାଜକ ନି ସେନାପତିରି କିୟୁଦୁ ସପ୍ରେ କିଦେଙ୍ଗ୍ ଆର୍‌ନାନ୍, ଆକା ଖାରି
 ଖାଲେ ଖାର୍‌ଗିତାନ୍ ।

୫ ଆବେଟ୍ ଖାର ଝେଡ଼ିକା ଆଜିମାରି ଖାନିଙ୍ଗ ତାରୁକୁଁ ସିଦେଙ୍ଗ ଇଜି ପାରମାଣ୍ କିତାର ।

୬ ମାରି, ଜିହୁଦା ରାଜି ଆତାନନୋ ଲୋକ୍ ଝିଜେରେ ଅରେନ୍ଦବା ସିଲିଖାଲେ ଖାନିଙ୍ଗ ଖାରି କିୟୁଦୁ ସପ୍ରେ କିଜି ସିନି ଉଣ୍ଡିଙ୍ଗ ସାରି ପଇଦେଙ୍ଗ ଆସ୍ତାନ ।

ନିସ୍ତାର ପଣ୍ଡୟ ଉଣ୍ଡେଙ୍ଗ ଜିସୁ ତିଆର୍ ଆତାନ

(ମାତିଉ ୨୬:୧୭-୨୫; ମାର୍କ ୧୪:୧୨-୨୧; ଜୋହନ ୧୩:୨୧-୩୦)

୭ ଝେନ୍ଦକା ଏମେ ନାଣ୍ଡିଙ୍ଗ ନିସ୍ତାର ପଣ୍ଡୟତି ମେଣ୍ଡାପିଲେକାଙ୍ଗ କାଡ଼ତେଙ୍ଗ ଆନାଡ଼, ଆୟା କମିରସିଲି ରୁଟି ପଣ୍ଡୟ ନାଣ୍ଡିଙ୍ଗ ଖାତାଡ଼;

୮ ମାରି, ଜିସୁ ପିତର୍ ନି ଜୋହନତିଙ୍ଗ ଇକା ଇନ୍ଝି ପୋକ୍ତାନ, “ମାଡ଼ ଏଣ୍ଡେସ୍ ଉଣ୍ଡେଙ୍ଗ ଆଟ୍‌ନିକା, ଆୟାଉଣ୍ଡିଙ୍ଗ ମିର୍ ସୋଲ୍‌ସ ମା ଉଣ୍ଡିଙ୍ଗ ନିସ୍ତାର ପଣ୍ଡୟତି ବୋଜି ତିଆର୍ କିଦୁ ।”

୯ ଆବେଟ୍ ଖାର ଜିସୁକୁଁ ଝେନ୍ଦବାତାର, “ମାପ୍ ଇକା ଏମେ ବାଡ଼ିଦୁ ତିଆର୍ କିନାପ୍ ଇଜି ନିନ୍ ବଦା କିଜିନି ?”

୧୦ ଜିସୁ ଖାରିଙ୍ଗ ଇର୍ଆନ୍, “ସୁଡ଼ୁ, ମିର୍ ଗାଡ଼ୁଡ଼ୁ ଡ଼ରିତିଙ୍ଗା, ଏରୁସାରିଦୁ ଅସିମାନିକାଡ଼ ଅରେଡ଼ ଲୋକ୍ ମିଙ୍ଗ ବେଟ୍‌ଆନାଡ଼; ଖାଦ୍ ଏମେ ଇଣ୍ଡୁ ସନ୍ନାଡ଼, ତାନି ଝେନ୍ଦକା ଝେନ୍ଦକା ଆୟା ଇଣ୍ଡୁ ସୋଲ୍‌ସ ଇଲୁଦି ପେରିଖାନିଙ୍ଗ ଇନିଦେର୍,

୧୧ ଗୁରୁ ନିଙ୍ଗ ଝେନ୍ଦବାଜିନାନ୍, ନାନ୍ ନା ସିସୁରି ଖାଲେ ଏମେମାନୁ ନିସ୍ତାର ପଣ୍ଡୟତି ବୋଜି କିନାପ୍, ଆୟା କୁଡ଼ାଆଙ୍ଗ ଟେବାନି ବାକାର୍ ଆମାକା ?

୧୨ ଆବେଟ୍ ଖାନ୍ ମିଙ୍ଗ ନେଗେନ୍ ସଜେ କିତିମାନି ଉଣ୍ଡି ମୁସକ୍‌ରି ମୋହଲାଦି ପେରି ବାକରା ଡ଼ରନାସିନାନ୍; ଆୟାବାଡ଼ିଦୁ ବୋଜି ତିଆର୍ କିଦୁ ।”

୧୩ ମାରି, ପିତର୍ ନି ଜୋହନ ସର୍ଆରନୋ, ଜିସୁ ଖାରିଙ୍ଗ ଏଣ୍ଡେସ୍ ଇର୍ଆ ମାର୍ଆନ୍, ଆୟାଖାଜା ସୁଡ଼ୁ ନିସ୍ତାର ପଣ୍ଡୟତି ବୋଜି ତିଆର୍ କିତାର ।

ପ୍ରବୁ ବଜି

(ମାତିଉ ୨୬:୨୬-୩୦; ମାର୍କ ୧୪:୨୨-୨୬; ୧ କରିନ୍ଥିୟ ୧୧:୨୩-୨୫)

୧୪ ମାରି, ଖାର ନିସ୍ତାର ପଶ୍ଚାତ୍ତପ୍ତ ବୋଲି ଉଣି ସମୟ ଆତାଡ଼, ଜିସୁ ନି ଖାନି ଖାଲେ ପ୍ରେରିତ ସିସୁର ଉଣ୍ଡେଙ୍ଗ ବାସ୍ତାତ୍ ।

୧୫ ଜିସୁ ଖାରିଙ୍ଗ ଇରଆନ୍, ନାନ୍ ନା ଦୁକ୍‌ବଗାନି ଆଗିଡିନେ ନାନ୍ ମି ଖାଲେ ଅର୍ସେ ଇୟା ନିସ୍ତାର ପଶ୍ଚାତ୍ତପ୍ତ ବଜି ଉଣ୍ଡେଙ୍ଗ ଅରେନେ ବଦା କିତାମାରଆ;

୧୬ ମାତର୍ ନାନ୍ ମିଙ୍ଗ ଇଜିନା, ମାପୁରୁଦି ରାଜିଦୁ ଇୟା ଅର୍ଡ ପୁରା ଆଇ ସାନ୍ଧି ନାନ୍ ମାରି ଏସକାଙ୍ଗବା ନିସ୍ତାର ପଶ୍ଚାତ୍ତପ୍ତ ବଜି ମାରି ଉଣ୍ଡେଙ୍ଗ ।

୧୭ ମାରି, ଜିସୁ ଉଣ୍ଡି କୁଡ଼କୁାଦୁ ଅଙ୍ଗୁରରସ୍ ଅତାନ୍‌ନୋ ମାପୁରୁଙ୍ଗୁ ଦନ୍ୟବାଦ୍ ସିଜି ଇରଆନ୍, “ଇୟା କୁଡ଼କୁା ଅସି, ଇବେନ୍ ମାନି ଅଙ୍ଗୁରରସ୍‌ତିଙ୍ଗ ନିଜେ ନିଜେଦି ମାନୁ ବାଟା କିଦୁ,

୧୮ ମାତର୍ ନାନ୍ ମିଙ୍ଗ ଇଜିନା, ମାପୁରୁଦି ରାଜି ରେଇ ସାନ୍ଧି ଇକା ନାନୁ ମାରି ଇୟା ଅଙ୍ଗୁରରସ୍ ଉଣ୍ଡେଙ୍ଗ ।”

୧୯ ମାରି, ଖାନ୍ ରୁଟି ଅତାନ୍‌ନୋ ମାପୁରୁଙ୍ଗୁ ଦନ୍ୟବାଦ୍ ସିତାନ୍ ମାରି ରୁଟି ରୁକ୍‌ସି ସିଜି ଖାରିଙ୍ଗ ଇର୍ହାନ୍, “ମି ଉଣ୍ଡିଙ୍ଗ ସିଆଡିମାନି ଇକା ନା ମେନ୍‌ଲ୍; ନାଙ୍ଗ ଏଡକିନି ଉଣ୍ଡିଙ୍ଗ ଇକା କିଦୁ ।”

୨୦ ଉଟି ଝିସ୍‌ତି ଝେନ୍‌କା ଆୟାଝାଜା ଖାନ୍ ଅଙ୍ଗୁର ରସ୍‌ତି ଉଣି ତୁବାଇ ଆସ୍‌ତାନ୍‌ନୋ ଇର୍ହାନ୍, ଇୟା ଅଙ୍ଗୁରରସ୍ ମି ଉଣ୍ଡିଙ୍ଗ ସିଆଡିମାନି ନା ନେତେର୍‌ତି ପୁନି ନିୟମ୍ ।

୨୧ ମାତର୍ ସୁଡ଼ଦୁ, “ଏନ୍ ନାଙ୍ଗ ସାତୁରିକିୟୁଦୁ ସର୍‌ପେ କିଜିନାନ୍, ଖାନି କିୟୁ ନା ଖାଲେ ଟେବୁଲ୍ ମୁସ୍‌କୁ ମାନାଡ଼ ।

୨୨ ମାତର୍ ମାପୁରୁ ଏଣ୍ଡେସ୍ ଆତାମାନାଡ଼ କିତାମାନାନ୍, ମନ୍‌ସ୍ୟପୁତ୍ ଜେ ନାନ୍ ଆୟାଝାଜା ସାନି ଦଣ୍ଡ ପଇନା ସଡ଼, ମାରି ଏମେ ଲୋକୁ ମାଣ୍‌କୁ ଖାନ୍ ସାତୁରିକିୟୁଦୁ ସର୍‌ପେ ଆଜିନାନ୍, ଟି, ଖାନି ଉଣ୍ଡିଙ୍ଗ ଇକା ନାଣ୍ଡ କାରାବ୍ ଆନାଡ଼ !”

୨୩ ତାନେ ଝେନ୍‌କା ମା ଲୋଇରାନ୍ ଏନ୍ ଇକା କିଦେଙ୍ଗ୍ ସଲ୍‌ସିନାନ୍, ଆୟା ବିସ୍‌ୟତାନ୍ ସିସୁର ନିଜେ ନିଜେଦିମାନୁ ଝେନ୍‌ବାଜି ସାଦେଙ୍ଗ୍ ଆସ୍‌ତାତ୍ ।

ଏନ୍ ପେରିକାନ୍ ଆୟା ବିସ୍‌ୟତାନ୍ ଜଗ୍‌ଡ଼ା

୨୪ ☆ମାରି, ସିସୁରି ଲୋଇ ଏନ୍ ପେରିକାନ୍ ଇଜି ଖେଙ୍ଗ୍ ନାନ୍, ଆୟା ବିସୟତାନ୍ ଖାରିଖାରି ଲୋଇ ଖାରିଗିଜି ସାତାର ।

୨୫ ଆବେଟ୍ ଜିସୁ ଖାରିଙ୍ଗ୍ ଇରଥାନ୍, ଅଣଜିହୁଦି ରାଜାର ଖାରି ମୁସ୍କୁ ସାସନ୍ କିନାର୍, ମାରି ଏର୍ ଖାରି ମୁସ୍କୁ ସାସନ୍ କିନିକା ମାନାଡ୍, ଖାର ଦେସ୍ତି ସାଙ୍ଗ୍ ଇଜି ଖେଙ୍ଗ୍ ନାନ୍ ।

୨୬ ☆ମାତର୍ ମିର୍ ଆୟାଖାଜା ଆମାଟ୍, ଇରିଙ୍ଗ୍ ମି ମାଣ୍ଟୁ ଏନ୍ ପେରିକାନ୍, ଖାନ୍ ଖିଜେରି ମାଣ୍ଟୁ ଇସ୍ତ୍ରିକାନ୍ ଖାଜା ଆପିନ୍, ମାରି ଏନ୍ ନେତା ମାନାନ୍, ଖାନ୍ ସେବାକିନି ଖାନି ଖାଜା ଆପିନ୍ ।

୨୭ ☆ମାତର୍ ଖିଜେରି ମାଣାନ୍ ପେରି ଲୋକୁ ଏନ୍ ? ଏନ୍ ଉଣ୍ଡେଙ୍ଗ୍ ବାସ୍ତିମାନିକାର୍ ନୋ ଖାନିଙ୍ଗ୍ ଖେର୍ସିମାନି ଲୋକୁ ? ମିର୍ ଅଡ୍‌ବିନିଦେର୍ ଜେ ଉଣ୍ଡେଙ୍ଗ୍ ବାସ୍ତିମାନି ଲୋକୁ, ଖାନ୍ ଇନିକା ପେରିକାନ୍ ଆଏନ୍ ? ଇରିଙ୍ଗ୍ ନାନ୍ ମି ଲୋଇରାନ୍ ଅରେନେ ସେବାକିନିଖାନି ଖାଜା ମାନା ।

୨୮ ମାତର୍ ମିର୍ ନା ଖିଜୁ ପରିକାଦୁ ନା ଖାଲେ ମାନ୍‌ଖିଞ୍ଜିନିଦେର୍;

୨୯ ନା ବୁବା ଏଣ୍ଡେସ୍ ନା ଉଣ୍ଡିଙ୍ଗ୍ ରାଜି ତିଆର୍ କିତାନ୍, ନାନ୍ ବା ଆୟାଖାଜା ମି ଉଣ୍ଡିଙ୍ଗ୍ ତିଆର୍ କିଜିନା,

୩୦ ଏଣ୍ଡେସ୍ ମିର୍ ନା ରାଜିଦୁ ନା ଟେବୁଲ୍ ମୁସ୍କୁ ଉଣ୍ଡିନିଦେର୍, ମାରି ମିର୍ ରାଜାବାସ୍ତିଗୋଦିଦି ମୁସ୍କୁ ବାସ୍ତିନିଦେର୍ନୋ ଇସ୍ରାଏଲ୍‌ତି ବାରଗୋଟା କୁଟୁମ୍‌ତି ମୁସ୍କୁ ସାସନ୍ କିନିଦେର୍ ।

ପିତରତି ମାନାଇକା ଆଗିଡିରି ମାଟା ଜିସୁ ଖେର୍ତାନ୍

(ମାତିଉ ୨୬:୩୧-୩୫; ମାର୍କ ୧୪:୨୭-୩୧; ଜୋହନ ୧୩:୩୬-୩୮)

୩୧ “ସିମୋନ, ସିମୋନ, ସୁଡ଼ୁଆ, ପାଣିକିନିକାନ୍ ଗଦମୁଦାନ୍ ସପାଦିଙ୍ଗ୍ ଖେର୍ସ କିଦେଙ୍ଗ୍ ଇଜି ସୋଲିଦୁ ଜଲ୍‌ପ୍‌ନି ଖାଜା ନେଗି ଲୋକାମାଣ୍ଟୁ ତାଗ୍‌ଇ ଲୋକାଙ୍ଗ୍ ଖେର୍ସ କିନି ଉଣ୍ଡିଙ୍ଗ୍ ସୟତାନ୍ ମିଙ୍ଗ୍ ପରିକା କିଦେଙ୍ଗ୍ ସାରିପୋଇତା ମାନାଡ୍;

☆ ୨୨:୨୪ ମାତିଉ ୧୮:୧; ମାର୍କ ୯:୩୪; ଲୁକ ୯:୪୭. ☆ ୨୨:୨୬ ମାତିଉ ୨୩:୧୧; ମାର୍କ ୯:୩୫. ☆ ୨୨:୨୭ ମାତିଉ ୨୦:୨୫-୨୭; ମାର୍କ ୧୦:୪୨-୪୪. ☆ ୨୨:୨୭ ଜୋହନ ୧୩:୧୨-୧୫.

୩୨ ମାତର ମି ବିସବାସ ଏଣେସ୍ ମାରଗେଏଡ଼, ଇୟାଉଣ୍ଟିଙ୍ଗ୍ ନାନ୍ ମି ଉଣ୍ଟିଙ୍ଗ୍ ପାରତନା କିତାମାନା; ମାରି, ନିନ୍ ଡେସି ଖାତି ଖେନ୍କା ନିଜେଦି ତଡ଼ାନ୍‌କାଙ୍ଗ୍ ସାକ୍ତି କିଦୁ ।”

୩୩ ମାତର ପିତର ଜିସୁଙ୍କୁ ଖେରତାନ୍, “ଏ ପ୍ରବୁ, ନାନ୍ ନି ଖାଲେ ଜଇଲୁଟୁ ସଣ୍ଟେଙ୍ଗ୍ ମାରି ସାନିଦଣ୍ଟ ପଇଦେଙ୍ଗ୍ ବା ତିଆର୍ ଆତାମାନା ।”

୩୪ ମାତର ଜିସୁ ଖେରତାନ୍, “ଏ ପିତର, ନାନ୍ ନିଙ୍ଗ୍ ଇଜିନା, ନେର୍ ନାଡ଼ା କରୁ କେଡ଼ିଇ ଆଗ୍ଡିନେ ନିନ୍ ନାଙ୍ଗ୍ ମୁଜା ନେସେଏ ଇଜି ଇନି ।”

ଜିସୁମାନୁ ବାକ୍ୟଦି ସତ୍‌ଆନିକା

୩୫ ☆ତାନେ ଖେନ୍କା ଜିସୁ ସିସୁରିଙ୍ଗ୍ ଇର୍ଆନ୍, ଏସ୍ତିଖାଲେ ନାନ୍ ମିଙ୍ଗ୍ ଡାରୁଙ୍ଗ୍ ମଣି, ମଣି ମାରି ଜୁତେଙ୍ଗ୍ ଡିସତିଙ୍ଗ୍ ପୋକ୍ତା ମାରଆ, ନାସ୍ତିଖାଲେ ମିଙ୍ଗ୍ ଇନିକା ଉଣା ମାରଆଡ଼ ? ଖାର ଇର୍ହାର, ଇନିକା ସିଲେ ।

୩୬ ଆବେଟ୍ ଜିସୁ ଖାରିଙ୍ଗ୍ ଇର୍ଆନ୍, “ମାତର ଇଲେ, ଆମାଖାନିଦି ଡାରୁଙ୍ଗ୍ ଇଡ଼ନି ମଣି ମାନାଡ଼, ଖାନ୍ ଆକା ଅପିନ୍, ଆୟାଖାଜା ମଣି ବା ଅପିନ୍, ମାରି ଆମାଖାନିଙ୍ଗ୍ କୁଡ଼ାମ୍ ସିଲେଡ଼, ଖାନ୍ ନିଜେଦି ସାଦର୍ ଉଣ୍ଟି ପୋରଜ କାଣ୍ଟା କଡ଼ିନ୍ ।

୩୭ ମାତର ନାନ୍ ମିଙ୍ଗ୍ ଖେରସିନା, ଖାନ୍ ପାପିଲୋକା ଖାଲେ ମିସାତାନ୍, ଇୟା ଏମେ ବାକ୍ୟ ରାସ୍ତା ମାନାଡ଼, ଆକା ନା ମାନୁ ପୁରା ଆନିକା ମାନାଡ଼; ଆଦେଙ୍ଗ୍ ନା ବିସୟତି ମାଟା ପୁରା ଆଜିନାଡ଼ ।”

୩୮ ଆବେଟ୍ ଖାର ଇର୍ହାର, “ପ୍ରବୁ, ସୁଡ଼ଆ, ଇବେନ୍‌ରୁ ଉଣ୍ଟି କାଣ୍ଟେଙ୍ଗ୍ ମାନେ ।” ମାରି, ଜିସୁ ଖାରିଙ୍ଗ୍ ଇର୍ଆନ୍, ରୁଣ୍ଟି କାଣ୍ଟେଙ୍ଗ୍ ନାଣ୍ଟ ।

ଜିତ ଗରନ୍‌ଡୁ ଜିସୁଦି ପାରତନା

(ମାତିଉ ୨୬:୩୬-୪୬; ମାର୍କ ୧୪:୩୨-୪୨)

୩୯ ଜିସୁ ଗାଡ଼ତାନ୍ ଯୋତା ସୋର୍ଆନ୍‌ନୋ ନିଜେଦି ଦିନ୍‌କେରିଖାଜା ଜିତ ଗରନ୍ ମୁସକୁ ସୋର୍ଆନ୍, ମାରି ସିସୁର୍ ବା ଖାନି ଖାଲେ ଖାଲେ ସୋର୍ହାର ।

☆ ୨୨:୩୫ ମାତିଉ ୧୦:୯,୧୦; ମାର୍କ ୬:୮,୯; ଲୁକ ୯:୩; ୧୦:୪.

୪୦ ଆୟା ବାତିଦୁ ଇତାରରୋ ଜିସୁ ସିସୁରିଙ୍ଗ ଇରଥାନ, “ପରିକାଦୁ ଏଣ୍ଡେସ୍ ଆରଇଦେର୍, ଆୟାଉଣ୍ଡିଙ୍ଗ୍ ପାରତନା କିଦୁ ।”

୪୧ ମାରି, ଖାନ ଖାରିମାଣ୍ଡକୁ କାଣ୍ଡେକ୍ ଆକ ସୋର୍ଥାନନୋ ମେଣ୍ଡେଙ୍ଗ୍ ଗୋର୍ କିଜି ପାରତନା କିଦେଙ୍ଗ୍ ଆସତାନ ।

୪୨ ଏ ବୁବା, ଜଦି ନି ବଦା ମାନାଡ୍, ଆୟା ଦୁଃକ୍ ନି କାସୁଦି ସାଟି ଆକ କିଆ; ଆରିଙ୍ଗ୍ ନା ବଦା ସିଲେ, ମାତର୍ ନି ବଦା ସଡ୍ ଆପିଡ୍ ।

୪୩ ମାରି, ମୁସକୁପୁରତାନ ଅରେନ୍ ଦୁଡ୍ ଦର୍ସନ୍ ସିଜି ଖାନିଙ୍ଗ୍ ସାକ୍ତି ସିତାଡ୍ ।

୪୪ ମାରି, ଜିସୁ ନାଣ୍ଟ ଦୁଃକ୍ ଆଜି ଉଣ୍ଡି ମନ୍ତାନ ପାରତନା କିଦେଙ୍ଗ୍ ଅତାନ ମାରି ଖାନି ରୁନ୍ ନେତେର୍ ଟିପା ଖାଜା ବୁମିଦୁ ଖାଙ୍ଗ୍ ତାଡ୍ ।

୪୫ ମାରି, ଖାନ ପାରତନା କିନିମାଣାନ୍ ନିଙ୍ଗ୍ ଜି ସିସୁରି ଲାକ୍ତୁ ଖାଜି ଖାରିଙ୍ଗ୍ ଦୁଃକ୍ ଉଣ୍ଡିଙ୍ଗ୍ ସୁଜ୍‌ନିକା ସୁଡ୍‌ତୁନ୍;

୪୬ ମାରି, ଜିସୁ ଖାରିଙ୍ଗ୍ ଇରଥାନ, “ଏୟା ସୁଜ୍‌ଜିନିଦେର୍ ? ପରିକାଦୁ ଏଣ୍ଡେସ୍ ଆରଇଦେର୍, ଆୟା ଉଣ୍ଡିଙ୍ଗ୍ ନିଙ୍ଗ୍‌ଜ ପାରତନା କିଦୁ ।”

ଜିସୁ ସାତୁରି କିୟୁଦୁ ସର୍ପେ ଆତାନ

(ମାତିଉ ୨୬:୪୭-୫୨; ମାର୍କ ୧୪:୪୩-୫୦; ଲୋହନ ୧୮:୩-୧୧)

୪୭ ଜିସୁ ଖାରଗିନିଖାଲେ, ସୁଡ୍‌ଦୁ, ଲୋକୁ ଝିଜେରେ ଖାଜି ଉଣ୍ଡାତାର, ମାରି ବାରଲୋକ୍ ସିସୁରି ଲୋଇରାନ୍ ଜିହୁଦା ଦର୍ଡି ଅରେନ୍ ଖାରି ଆଗଡି ଆଗଡି ଖାଜି ଜିସୁଙ୍ଗ୍ ନଣ୍ଡଦେଙ୍ଗ୍ ଇଜି ଖାନି ଲାକ୍ତୁ ସର୍ଥାନ ।

୪୮ ମାତର୍ ଜିସୁ ଜିହୁଦେଙ୍ଗ୍ ଇରଥାନ, “ଏ ଜିହୁଦା, ମନୁସ୍ୟପୁତ୍ରଦିଙ୍ଗ୍ ନଣ୍ଡିଜି ନୋ ସାତୁରି କିୟୁଦୁ ସର୍ପେ କିଜି ସିଜିନି ?”

୪୯ ଇବେର୍ ଇନିକା ଆନାଡ୍, ଆକା ସୁଡ୍‌ଜି ଖାନି ତଡ୍‌କୁ ଇର୍ହାର, “ପ୍ରବୁ, ମାପ୍ ଇନିକା କାଣ୍ଡାଦାନ୍ କାଡ୍‌ନାପ୍ ?”

୫୦ ମାରି, ଖାରି ଲୋଇ ଅରେନ୍ ଝିଜେରିଙ୍ଗ୍‌ପେରି ଜାଜକ୍‌ତିମାନୁ ପାଣିକିନି ଗତିମୁରୁଲିଦି ଉଣ୍ଡେରି ଗିତଣି କୟାତା ପୋକ୍‌ତାନ ।

୫୧ ମାତର ଜିସୁ ଇରାଆନ୍, “ନିସନେ ଆନାତ୍‌ଲେ; ମାରି, ଖାନ୍ ଖାନି ଗିତଣି ମୁଟ୍‌ସି ଖାନିଙ୍ଗ୍ ନେଗେଣ୍ଡୁ କିତାନ୍ ।”

୫୨ ମାରି, ଜିସୁ ଖାନି ବିରଦ୍‌ତାନ୍ ଖାତି ମାର୍‌ଇ ପେରି ଜାଜକ, ମନ୍ଦିରୁତି ପେରି ପେରିକାର୍ ମାରି ପେରି ତକ୍ରାରିଙ୍ଗ୍ ଇରାଆନ୍, “ତଙ୍ଗାର୍‌ଏନ୍ ବିରଦ୍‌ତାନ୍ ସନି-ଖାନି-ଖାଜା କାଣ୍ଡା ନି ହୁତୁ ଆସ୍‌ସି ମିର୍ ଇନିକା ସତି-ଖାତିଦେର୍ ?

୫୩ ☆ନାନ୍ ଦିନାମି ମି-ଖାଲେ ମନ୍ଦିରୁତୁ ମାନି-ଖାଲେ ମିର୍ ନା ବିରଦ୍‌ତାନ୍ କିୟୁ ପେର୍‌ଇତିଦେର୍, ମାତର୍ ଇକା ମି ସମୟ ମାରି ସିକାଟିଦି ସାସନ୍ ।”

ପିତର୍ ଜିସୁଙ୍କୁ ନେସେଏ ଇରାଆନ୍

(ମାତିଉ ୨୬:୫୭-୫୮, ୬୯-୭୫; ମାର୍କ ୧୪:୫୩-୫୪, ୬୬-୭୨; ଜୋହନ ୧୮:୧୭-୧୮, ୨୫-୨୭)

୫୪ ଖେନ୍‌କା ଖାର୍ ଜିସୁଙ୍କୁ ଆସ୍‌ସି ଅସି ଡିଜେରିଙ୍ଗ୍‌ପେରି ଜାଜକରି ଇଲ୍‌ତୁ ତାତାର୍; ମାତର୍ ପିତର୍ ଆକ ତେବାଜି ଖେନ୍‌କା ଖେନ୍‌କା ସରାଆନ୍ ।

୫୫ ମାରି, ଖାର୍ ଦୁଆରତି ନାଡ଼ମି ସିସୁ କାସିସକିଜି ଉଣ୍ଡେ-ମାନୁ ବାସ୍‌ତାର୍, ପିତର୍ ଖାରିମାନୁ ବାସ୍‌ତା ମାରାଆନ୍ ।

୫୬ ଅରେଡ୍ ପାଣି କିନି ଆଇମା ପିତରୁତିଙ୍ଗ୍ ସିସୁ ଲାକ୍‌ତୁ ବାସ୍‌ତିମାର୍‌ଇକା ସୁଡ଼ୁ ଇର୍‌ହାଡ୍, “ଇକାନ୍ ବା ଜିସୁ-ଖାଲେ ମାରାଆନ୍ ।”

୫୭ ମାତର୍ ପିତର୍ ଇୟା ମାଟାଦିଙ୍ଗ୍ ସିଲେଇଜି ଇରାଆନ୍, “ଏ ଆଇମା, ନାନ୍ ଖାନିଙ୍ଗ୍ ନେସେଏ ।”

୫୮ ଏସୋ ସମୟ ଖେନ୍‌କା ମାରି ଅରେନ୍ ଖାନିଙ୍ଗ୍ ସୁଡ଼ୁ ଇରାଆନ୍, “ନିନ୍ ବା ଜିସୁ-ଖାଲେ ମାର୍‌ଇ ଲୋକା ଲୋଇ ଅରେନ୍ ।” ମାତର୍ ପିତର୍ ଇରାଆନ୍, “ସିଲେ, ତଡ଼ାନ୍, ନାନ୍ ନେସେଏ ।”

୫୯ ମାରି ଗଣ୍ଡା ଖେନ୍‌କା ମାରି ଅରେନ୍ ପୁରା ନେସ୍‌ସି ଇନ୍‌ଡ୍ରେଙ୍ଗ୍ ଆସ୍‌ତାନ୍, “ଇକାନ୍ ବା ସତେନେ ଖାନି-ଖାଲେ ମାରାଆନ୍, ଇରିଙ୍ଗ୍ ଖାନ୍ ତୋ ଗାଲିଲିଦି ଲୋକୁ ।”

୨୦ ମାତର ପିତର ଇରାଆନ୍, “ତତ୍ତାନ୍, ନିନ୍ ଆମାକା ଇଜିନି, ନାନ୍ ଆକା ନେସେଏ ।” ଆୟାଦାପ୍ରେ ଖାନ୍ ମାଟା ଇନ୍‌ବୁ ଇନ୍‌ବୁ କରୁ କେଡ଼ିତାଡ଼ ।

୨୧ ମାରି ପ୍ରବୁ ଡେସି ମାରଜି ପିତରତିଙ୍ଗ୍ ସୁଡ଼ତୁନ୍; “ଆବେଟ୍ ନେର୍ କରୁ କେଡ଼ିନି ଆଗଡ଼ିନେ ନିନ୍ ନାଙ୍ଗ୍ ମୁଜା ନେସେଏ ଇଜି ଇନି, ଇୟା ଆମା ମାଟା ପ୍ରବୁ ପିତରତିଙ୍ଗ୍ ଇରାଆମାରାଆନ୍,”

୨୨ ଆକା ପିତର ଖାନ୍ ମୋନଡୁ ଏଡ଼କିତାନ୍, ମାରି ଖାନ୍ ଆଡ଼ରେ ସଲ୍‌ସି ନାଣ୍ଟ ଦୁଃକ୍‌ତାନ୍ ଆଡ଼ବାତାନ୍ ।

ଜିସୁଙ୍ଗ୍ ସେମାର କିତାର ମାରି ଡାକ୍‌ତାର

(ମାତିଡ ୨୭:୨୭-୨୮; ମାର୍କ ୧୪:୨୫)

୨୩ ମାରି, ଏମେ ଲୋକ୍ ଜିସୁଙ୍ଗ୍ ଆସ୍‌ତା ଇଟ୍‌ତାମାରାଆର୍, ଖାର୍ ଖାନିଙ୍ଗ୍ ଡାକ୍‌ସି ଡାକ୍‌ସି ସେମାର କିତାର,

୨୪ ମାରି ଖାନି ମୋକମି ପାଗା କେର୍‌ପସି ଖାନିଙ୍ଗ୍ ଝେନ୍‌ବାତାର, ନିନ୍ ପରା ବାବବାଦି ! ଇନ୍‌ଆଁ ତୋ, ଏନ୍ ନିଙ୍ଗ୍ ଡାକ୍‌ତାର ?

୨୫ ମାରି, ଖାର୍ ନାଣ୍ଟ ମାଟେଙ୍ଗ୍ ଖାନି ବିରଦ୍‌ତାନ୍ ଇଜି ଖାନିଙ୍ଗ୍ ନିନ୍‌ଆ କିଦେଙ୍ଗ୍ ଆସ୍‌ତାର ।

ଜିସୁଙ୍ଗ୍ ପେରି ମିଟିଙ୍ଗ୍‌ତୁ ଡାତାର

(ମାତିଡ ୨୭:୫୯-୬୨; ମାର୍କ ୧୪:୫୫-୬୪; ଜୋହନ ୧୮:୧୯-୨୪)

୨୬ ସାଲ୍‌ଦି ଆତିଦାପ୍ରେ ଲୋକା ପେରିଡ଼କ୍‌ରାର୍, ମାରି ପେରି ଜାଜକର୍ ମାରି ସାସ୍ତ୍ରର୍ ଉଣ୍ଡାଜି ତାମେ ପେରି ଲୋକାମିଟିଙ୍ଗ୍‌ତୁ ଜିସୁଙ୍ଗ୍ ଅସି ଇର୍ହାର୍, “ନିନ୍ ଜଦି କ୍ରିସ୍ତୁ, ଆରିଙ୍ଗ୍ ମାଙ୍ଗ୍ ଇନ୍‌ଆଁ ।”

୨୭ ଖାର୍ ଇର୍ହାର୍, “ମାଙ୍ଗ୍ ଇନ୍‌ଆଁ, ନିନ୍ ଇନିକା ମସିହ ?” ଖାନ୍ ଖାରିଙ୍ଗ୍ ଇରାଆନ୍, “ନାନ୍ ଜଦି ମିଙ୍ଗ୍ ଇନା, ମିର୍ ତୋ ବିସ୍‌ବାସ୍ କିଇଦେର୍;

୨୮ ମାରି, ନାନ୍ ଜଦି ପ୍ରସ୍ତ ଝେନ୍‌ବାନା, ମିର୍ ଝେର୍‌ଇଦେର୍ ।

୨୯ ମାତର ଇଲେଇରାନ୍ ମନୁସ୍ୟପୁତ୍ର ପେରି ସାଲ୍‌ଦି ମାପୁରୁଦି ରାଜାଗାଦିଦି ଉଣେରି ତରିନ୍ ବାସ୍‌ନାନ୍ ।”

୭୦ ଆବେଟ୍ ଷ୍ଟିଜେରେ ଷ୍ଟେନ୍‌ବାତାର୍, “ଆରିଙ୍ଗ୍ ନିନ୍ ଇନିକା ମାପୁରୁଦି ମାରିନ୍ ?” ଜିସୁ ଖାରିଙ୍ଗ୍ ଇରଥାନ୍, “ନାନ୍ ଆକାନେ ଇଜି ମିର ଇଜିନିଦେର୍ ।”

୭୧ ଆବେଟ୍ ଖାର୍ ଇର୍ହାର୍, “ଆରିଙ୍ଗ୍ ମାଙ୍ଗ୍ ସାକି ମାରି ଏନ୍ଦା ଦରକାର ? ମାଡ୍ ତୋ ନିଜେନିଜେ ଖାନି ନିଜେଦି ଷ୍ଟେମୁଦାନ୍ ଷ୍ଟେରିକା ।”

୨୩

ଜିସୁଙ୍ଗ୍ ପିଲାଡ୍ ରାଜାଦି ଆଗ୍ଡି ତାତାର୍
(ମାତିଡ ୨୭:୧-୨, ୧୧-୧୪; ମାର୍କ ୧୫:୧-୫)

୧ ଷ୍ଟେନ୍‌କା କୁଟୁମ୍‌ତି ଷ୍ଟିଜେରେ ଲୋକୁ ନିଙ୍ଗ୍ ତାରୋ ପିଲାଡ୍ ରାଜାମାନୁ ଜିସୁଙ୍ଗ୍ ଅତାର୍ ।

୨ ମାରି, ଖାର୍ ଖାନି ବିରଦତାନ୍ ଦୋସ୍ କିଜି ଇନ୍‌ଡ୍ରେଙ୍ଗ୍ ଆସ୍ତାର୍, “ମାପ୍ ସୁଡ଼ତୁପ୍, ଇକାନ୍ ମା ଲୋକାଙ୍ଗ୍ ରାଜାଦି ବିରଦ୍ କିବିସ୍‌କିଜିନାନ୍ ମାରି କାଇସର୍ ରାଜେଙ୍ଗ୍ ସିସ୍ତୁ ସିଦେଙ୍ଗ୍ ତେବା କିଜିନାନ୍ ମାରି ନିଜେଦିଙ୍ଗ୍ କ୍ରିସ୍ତ ରାଜା ଇଜିନାନ୍ ।”

୩ ଆବେଟ୍ ପିଲାଡ୍‌ରାଜା ଖାନିଙ୍ଗ୍ ଷ୍ଟେନ୍‌ବାତାନ୍, “ନିନ୍ ନୋ ଜିହୁଦି ଲୋକ୍‌ତି ରାଜା ?” ଖାନ୍ ଖାନିଙ୍ଗ୍ ଇରଥାନ୍, ନିନ୍ ଇଜିନି ।

୪ ଆବେଟ୍ ପିଲାଡ୍ ରାଜା ପେରି ଜାଜକରିଙ୍ଗ୍ ମାରି ଲୋକାଙ୍ଗ୍ ଇରଥାନ୍, “ନାନ୍ ଇୟାଖାନିମାନୁ ଇନି ଦୋସ୍ ପୟ୍‌ଏଜିନା ।”

୫ ମାତର୍ ଖାର୍ ମାରି ନାଣ୍ଡଦାନ୍ ନାଣ୍ଡ ଇନ୍‌ଡ୍ରେଙ୍ଗ୍ ଆସ୍ତାର୍, “ଇକାନ୍ ଷ୍ଟିଜୁ ଜିହୁଦା ଦେସ୍‌ତୁ ସିକିୟା ସିଜି ଗାଲିଲିଦାନ୍ ଆରାମ୍ କିଜି ଇବେବା ଲୋକାଙ୍ଗ୍ ବାୟା କିଜିନାନ୍ ।”

ଜିସୁଙ୍ଗ୍ ହେରୋଦମାନୁ ଅତାର୍

୬ ମାତର୍ ପିଲାଡ୍ ରାଜା ଇକା ଷ୍ଟେନ୍‌ଜି ଷ୍ଟେନ୍‌ବାତାନ୍, “ଇୟା ଲୋକୁ ଇନିକା ଅରେନ୍ ଗାଲିଲିଦିକାନ୍ ?”

୭ ମାରି, ଖାନ୍ ଜେ ହେରୋଦ୍ ରାଜାଦି ଅଦିକାର୍‌ତାନ୍ ମାନାନ୍, ଇକା ନେସ୍‌ସି ଖାନ୍ ଜିସୁଙ୍ଗ୍ ହେରୋଦ୍ ଲାକ୍‌ତୁ ପୋକ୍‌ତାନ୍, ଖାନ୍ ବା ଆୟାଖାଲେ ଜିରୁସାଲାମ୍‌ତୁ ମାର୍ଥାନ୍ ।

୮ ହେରୋଦ ରାଜା ଜିସୁଙ୍କୁ ସୁତୁଳି ନାଶ୍ଟି ଖେଡ଼ିକା ଆଡ଼ାନ୍, ଇରିଙ୍ଗ୍
ଝାନ୍ ଜିସୁଦି ବିସୟତାନ୍ ଖେରୁଆମାରୁଆନ୍ ଆକା ଝାନିଙ୍ଗ୍ ଏସୋ
କାଡ଼ାଦାନ୍ ସୁତୁଦେଙ୍ଗ୍ ବଦାକିଜିମାରୁଆନ୍, ମାରି ଜିସୁ ମାଣାନ୍ ଉଣ୍ଡି
କାବାଆନି ପାଣି ସୁତୁଦେଙ୍ଗ୍ ଆସାକିଜିମାରୁଆନ୍ ।

୯ ଆଦେଙ୍ଗ୍ ହେରୋଦ ରାଜା ଜିସୁଙ୍କୁ ଏସୋ ମାଟେଙ୍ଗ୍
ଝେନ୍‌ବାଦେଙ୍ଗ୍ ଆସ୍‌ତାନ୍, ମାତର୍ ଝାନ୍ ଝାନିଙ୍ଗ୍ ଉଣ୍ଡି ମାଟା ବା
ଇନ୍‌ଏତାନ୍ ।

୧୦ ମାରି, ପେରି ଜାଜକର୍ ମାରି ସାସ୍ତ୍ରିର୍ ନିର୍‌ଆରୋ ଝାନି
ବିରଦ୍‌ତାନ୍ ଦୋସ୍ କିଦେଙ୍ଗ୍ ଆସ୍‌ତାର ।

୧୧ ମାରି, ହେରୋଦ ନିଜେଦି ସୈନ୍‌ୟରି ଝାଲେ ଝାନିଙ୍ଗ୍ ସେମାର୍
କିଜି ସେମାର୍ କିନି ରାଜାରି ଆଙ୍ଗ୍ ଆରିସ୍ କିତାରୁରୋ ପିଲାଡ଼ି
ଲାକ୍‌ତୁ ମାରିଡ଼େସି ପୋକ୍‌ତାର ।

୧୨ ଆୟା ନାଶ୍ଟିଙ୍ଗ୍ ହେରୋଦ ମାରି ପିଲାଡ଼ି ମିସାବିଡ଼ାଜି ସଙ୍ଗ୍
ଆଡ଼ାର୍; ଆରିଡ଼ି ଝାର୍ ନିଜେ ନିଜେଦି ମାନୁ ସାତୁରୁ ମାରୁଆର୍ ।

ଜିସୁଙ୍କୁ ସାନିଦଣ୍ଡ ସିତାର୍

(ମାତିଡ ୨୭:୧୫-୨୬; ମାର୍କ ୧୫:୬-୧୫; ଜୋହନ ୧୮:୩୯;
୧୯:୧୬)

୧୩ ତାନେଝେନ୍‌କା ପିଲାଡ଼ି ପେରି ଜାଜକରିଙ୍ଗ୍, ପେରି ଝାରିଙ୍ଗ୍
ମାରି ଝିଜୁ ଲୋକାଙ୍ଗ୍ ଉଣ୍ଡି ମାନୁ କୁକ୍‌ସି ଝାନ୍ ଝାରିଙ୍ଗ୍ ଇରୁଆନ୍,

୧୪ “ଇୟା ଲୋକାଙ୍ଗ୍ ସେଇପାଣି କିବିସକିଜିନାନ୍ ଇଜି ମିର୍
ଝେନିଙ୍ଗ୍ ମା ଲାକ୍‌ତୁ ତାତିମାନିଦେର୍; ମାରି ସୁତୁଦୁ, ମାପ୍ ମି
ଆରିଡ଼ିନେ ଝେନିଙ୍ଗ୍ ଝେନ୍‌ବାତାମାନା, ଝାନି ବିରଦ୍‌ତାନ୍ ମିର୍
ଆମାକାଝିଜୁ ଇଜିନିଦେର୍, ଆୟାଝାଜା ଇନି ସେଇପାଣି ଝେନିମାନୁ
ପୟ୍‌ଏ ।

୧୫ ହେରୋଦ ବା ଝାନି ସେଇପାଣି ପୟ୍‌ଏ, ମାତର୍ ହେରୋଦ
ଜିସୁଙ୍କୁ ମା ଲାକ୍‌ତୁ ମାରି ପୋକ୍‌ତାତାନ୍; ମାରି ସୁତୁଦୁ, ଇୟା ଲୋକ୍
ସାନିଦଣ୍ଡ ଜଗ୍ ଇନି ପାଣିବା କିଏନ୍;

୧୬ ମାରି ମାପ୍ ଝେନିଙ୍ଗ୍ ସାସ୍ତ୍ରି ସିତିଝେନ୍‌କାନେ ଡିସ୍‌ନାପ୍ ।

୧୭ ପଣ୍ଡୟତି ସମୟତୁ ଝାରି ଉଣ୍ଡିଙ୍ଗ୍ ଝାନିଙ୍ଗ୍ ଅରେନ୍ ଜଇଲ୍‌ତୁ
ମାନି ଝାନିଙ୍ଗ୍ ଡିସିସ୍ କିଦେଙ୍ଗ୍ ଆଜିମାର୍‌ହାଡ଼ ।”

୧୮ ମାତର୍ ଝାର ଝିଜେରେ ଅର୍ସେ ଆଉଲି ଆଜି ଇର୍ହାର,
“ଝେନିଙ୍ଗ୍ ସାୟାମାରାଗ୍ ତାକ୍ତୁ, ମା ଉଣ୍ଡିଙ୍ଗ୍ ବାରକାଦିଙ୍ଗ୍ ଡିସ୍ତୁ ।”

୧୯ ଇୟା ବାରକା ଗାଡ଼ତୁ ଗଟାତିମାନି ଜୁଦ୍ ଆରାମ୍ କିତିମାନି
ଉଣ୍ଡିଙ୍ଗ୍ ମାରି ଏସ ଲୋକାଙ୍ଗ୍ ସାୟାମାରଗା ତାକ୍ତିମାନି ଉଣ୍ଡିଙ୍ଗ୍
ଜଇଲ୍ତୁ ତେବାତା ମାର୍ଆନ୍ ।

୨୦ ମାତର୍ ପିଲାଡ଼ ଜିସୁଙ୍ଗ୍ ଡିସ୍ସି କିଦେଙ୍ଗ୍ ବଦାକିତାନନୋ
ଝାରିଙ୍ଗ୍ ମାରିଡେସି ବୁଜାକିତାନ୍ ।

୨୧ ଇରିଙ୍ଗ୍ ଝାର ନାଣ୍ ଆଉଲି ଆଜି ଇଣ୍ଡେଙ୍ଗ୍ ଆସ୍ତାର୍, “ଝାନିଙ୍ଗ୍
କୁସକାଟ୍ତୁ ଏକିସ୍କିଦୁ, କୁସକାଟ୍ତୁ ଏକିସ୍କିଦୁ ।”

୨୨ ମାରି, ପିଲାଡ଼ ଝାରିଙ୍ଗ୍ ମୁଣ୍ଡି ଦେବେଙ୍ଗ୍ ଇର୍ଆନ୍, “ଏନ୍ଦା, ଝାନ୍
ଇନିକା ଦସ୍ କିତାମାନାନ୍ ? ମାପ୍ ଝାନିମାନ୍ ସାନିଦଣ୍ଡି ଇନି ଦସ୍ବା
ପୟ୍ଏପ୍; ମାରି, ମାଡ଼ ଝାନିଙ୍ଗ୍ ସାସ୍ତି ସିନାଡ଼ ଡିସ୍ନାଟ୍ ।”

୨୩ ମାତର୍ ଝାନ୍ କୁସକାଟ୍ତୁ ଏକିସ୍କିଦୁ ଇଜି ଦାବି କିଜି ଝାର୍ ପେରି
ଝେୟ୍ଦାନ୍ ଜିଦ୍ କିଦେଙ୍ଗ୍ ଆସ୍ତାର୍, ମାରି ଝାରି ଆଉଲିଦାନ୍ ପୁରା
ଆଡାଡ଼ ।

୨୪ ମାରି, ଝାରି ଦାବି କିତି ଇସାବ୍ତାନ୍ ଆପିଡ଼ ଇଜି ପିଲାଡ଼
ଆଦେସ୍ ସିତାନ୍ ।

୨୫ ମାତର୍ ଜୁଦ୍ ମାରି ଲୋକାଙ୍ଗ୍ ସାୟାମାରଗା ତାକ୍ତି
ଉଣ୍ଡିଙ୍ଗ୍ ଜଇଲ୍ତୁ ଇଟ୍ତିମାନି ଏମେ ଲୋକ୍ତି ଉଣ୍ଡିଙ୍ଗ୍ ଝାର୍ ଦାବି
କିତାମାଆର୍, ଆୟା ବାରକାବେଙ୍ଗ୍ ପିଲାଡ଼ ଡିସ୍ତାନ୍, ମାରି ପିଲାଡ଼
ଜିସୁଙ୍ଗ୍ ସାୟାମାରଗା ତାକ୍ତେଙ୍ଗ୍ ଇଜି ଲୋକା ବଦାଦାନ୍ କିୟୁଦୁ
ସର୍ପେ କିତା ସିତାନ୍ ।

ଜିସୁଙ୍ଗ୍ କୁସକାଟ୍ତୁ ଏକିସ୍ତାର୍

(ମାତିଡ଼ ୨୭:୩୨-୪୪; ମାର୍କ ୧୫:୨୧-୩୨; ଜୋହନ୍ ୧୯:୧୭-୨୭)

୨୬ ସନ୍୩୨ ଜିସୁଙ୍ଗ୍ ଆସ୍ତାରୋ ସନିଝାଲେ ଇସ୍ତି ନାର୍ତାନ୍ ଗାଡ଼ତୁ
ଝାଜିମାନି ସିମୋନ ଦର୍ତି ଅରେନ୍ କୁରିଣି ଗାଡ଼ତି ଲୋକ୍ତିଙ୍ଗ୍
ଆସ୍ତାରୋ ଜିସୁଦି ଝେନ୍କା ଝେନ୍କା କୁସକାଟ୍ ପିତିଦେଙ୍ଗ୍ ଇଜି
ସିମୋନତି ମେପିଦୁ ଆକା ଇଟ୍ତାର୍ ।

୨୭ ମାରି, ଲୋକାଙ୍କ ମାରି ଖାନି ଉଣ୍ଡିଙ୍ଗ ଦୁଃଖ କିଜି ବକାଦୁ କତାଜି ଆଡ଼ବାଜି ମାନି ଆଇମେକ୍ ନାଣ୍ଡ ଲୋକୁ ଜିସୁ ଝେନ୍‌କା ଝେନ୍‌କା ସୋଲ୍‌ସିମାର୍‌ଏ ।

୨୮ ମାତର୍ ଜିସୁ ଆଇମେକା ତରିଣ୍ଡ ମାର୍‌ଜିବେସତାନ୍‌ନୋ ଇରଆନ୍, “ଏ ଜିରୁସାଲମତି ଆଇମେକ୍, ନା ଉଣ୍ଡିଙ୍ଗ ଆଡ଼ବାମାର୍, ମାରି ମିର୍ ନିଜେ ନିଜେଦି ଉଣ୍ଡିଙ୍ଗ ମାରି ନିଜେ ନିଜେଦି କଡ଼ରିଙ୍ଗ ଉଣ୍ଡିଙ୍ଗ ଆଡ଼ବାଦୁ;

୨୯ ମାତର୍ ସୁଡ଼ଦୁ, ଏମେ ଆଇମେକ୍ ବାଞ୍ଜି, ମାରି ଏମେ ଆଇମେକ୍ ଏସ୍‌କାଙ୍ଗ୍‌ବା ପୋଟାଦୁ ଆଉ ମାରି ପାଲ୍ ଉଟ୍‌ଉ, ଖାନିକାଙ୍ଗ୍ ଲୋକୁ ଏସ୍‌ତ୍ରାଲେ ଦନ୍‌ଏ ଦନ୍‌ଏ ଇଜି ଇନାର୍, ଇୟାଖାଜା ସମୟ ଖାଜିନାଡ଼ ।

୩୦ ☆ ନାସ୍‌ତ୍ରାଲେ ଲୋକୁ ଗରକାଙ୍ଗ୍ ଇଣ୍ଡେ_ଙ୍ଗ୍ ଆସ୍‌ନାର୍, ମା ମୁସ୍‌କୁ ଆର୍‌ଆ, ମାରି ଇସ୍‌ଗରକାଙ୍ଗ୍ ଇଣ୍ଡେ_ଙ୍ଗ୍ ଆସ୍‌ନାର୍, ମାଙ୍ଗ୍ ପିଡ଼ିକ୍‌ଆ ।

୩୧ ମାତର୍ ଲୋକୁ ଜଦି ଜିବନ୍‌ମାନି ମାରାନ୍ ଉଣ୍ଡିଙ୍ଗ ଇକା କିନାର୍, ଆଦେଙ୍ଗ୍ ଖାରତି ମାରାନ୍ ଉଣ୍ଡିଙ୍ଗ ଇନିକା ଗଟେଆଏଡ଼ ?”

୩୨ ମାରି, ଜିସୁଦି ଖାଲେ ସାନିଦଣ୍ଡ ସିଦେଙ୍ଗ୍ ଇଜି ମାରି ରିଏର୍ ତଙ୍ଗ୍‌ରିଙ୍ଗ୍ ବା ଖାନି ଖାଲେ ଅସିମାର୍‌ହାର୍ ।

୩୩ ମାରି, ଖାର କାପାଲ୍ ନାନି ଦର୍‌ତି ବାଡ଼ିଦୁ ଇତାର୍‌ରେ ଆବେନ୍‌ ସେନ୍‌ଏର୍ ଜିସୁଙ୍ଗ୍ କୁସକାଟ୍‌ତୁ ଏକିସ୍‌କିତାର୍, ମାରି ତଙ୍ଗ୍‌ରିଙ୍ଗ୍ ରିଏର୍ ମାଣ୍‌କୁ ଅରେନ୍ ଖାନିଙ୍ଗ୍ ଉଣ୍ଡିକିନ୍‌ ତରିନ୍ ମାରି ଆଇଖାନିଙ୍ଗ୍ ଡେବିରି କିନ୍‌ ତରିନ୍ କୁସକାଟ୍‌ତୁ ଏକିସ୍‌କିତାର୍ ।

୩୪ ନାସ୍‌ତ୍ରାଲେ ଜିସୁ ଇର୍‌ହାନ୍, “ଏ ବୁବା, ଝେରିଙ୍ଗ୍ କେମା କିଆ, ଇରିଙ୍ଗ୍ ଇକାର୍ ଇନିକା କିଜିନାର୍, ଆକା ଖାର ନେସ୍‌ଏର୍ ।” ମାରି, ଖାର ଖାନି ଆଙ୍ଗ୍ ଝିଜୁ ବାଗ୍ କିନି ଉଣ୍ଡିଙ୍ଗ କୁଡ଼କୁଡ଼ି କିତାର୍ ।

୩୫ ମାରି, ଲୋକୁ ନିର୍‌ଆର୍‌ରେ ଜିସୁଙ୍ଗ୍ ସୁଡ଼ଜି ମାର୍‌ହାର୍ । ମାରି, ଜିହୁଦି ନେତାର୍ ବା ଖାନିଙ୍ଗ୍ ସେମାର୍ କିଜି ଇଣ୍ଡେ_ଙ୍ଗ୍ ଆସ୍‌ତାର୍, ଖାନ୍ ଆଇଖାରିଙ୍ଗ୍ ରକିୟା କିତାନ୍, ଖାନ୍ ଜଦି ମାପୁରୁଙ୍ଗ୍ ବାସେକିତି କ୍ରିସ୍, ସିଲିଡିଙ୍ଗ୍ ନିଜେଦିଙ୍ଗ୍ ରକିୟା କିପିନ୍ ।

୩୭ ମାରି, ସୈନ୍ୟର ବା ଜିସୁ ଲାକଡୁ ଖାଜି ସୋଇନିରସ ଜାସେ କିଜି
ଖାନିଙ୍ଗ୍ ସେମାର କିଜି ଇର୍ହାନ,

୩୮ ନିନ୍ ଜଦି ଜିହୁଦିର ରାଜା, “ଆଦେଙ୍ଗ୍ ନିଜେଦିଙ୍ଗ୍ ରକିୟା କିଆ
।”

୩୯ ମାରି, ଖାନି ମୁସକୁ ଇୟାଖାଜା ରାସ୍ତିକା ବା ମାର୍ହାଡ଼, “ଇକାନ୍
ଜିହୁଦିର ରାଜା ।”

୪୦ ମାରି, କୁସକାଟୁ ଏକିସକିତିମାନି ତଙ୍ଗାରି ମାଣକୁ ଅରେନ୍
ଜିସୁଙ୍ଗ୍ ନିଦା କିଜି ଇଣ୍ଡେଙ୍ଗ୍ ଆସ୍ତାନ୍, “ନିନ୍ ଇନିକା କ୍ରସ୍ତ ଆଇନୋ
? ନିଜେଦିଙ୍ଗ୍ ନି ନାଙ୍ଗ୍ ରକିୟା କିଆ ।”

୪୧ ମାତର ମାରି ଅରେନ୍ ଖାନିଙ୍ଗ୍ ଆଦ୍ରିସ୍ କିଜି ଇର୍ହାନ, “ନିନ୍
ସାମାନ୍ ଦଣ୍ଡ ତୋ ପଇଜିନି, ନିନ୍ ମାପୁରୁଙ୍ଗ୍ ଇନିକା ତିଲାଇଜିନି ନୋ
?

୪୨ ମାରି, ମାଡ଼ ଗିଦେ ନିୟାଈସାବତାନ୍ ଦଣ୍ଡ ବୋଗାଜିନିକା,
ଇରିଙ୍ଗ୍ ମାଡ଼ ନିଜେ ନିଜେଦି କାର୍ମୁଦି ଦସ୍ ପଲ୍ ପୋଇଜିନିକା, ମାତର
ଇୟା ଲୋକୁ ଇନି ଦୋସ୍ ବା କିଏନ୍ ।”

୪୩ ତାନେଝେନକା ଆୟା ତଙ୍ଗାରେଏନ୍ ଜିସୁଙ୍ଗ୍ ଇର୍ହାନ, “ଏ ଜିସୁ
ନିନ୍ ନିଜେଦି ରାଜିଦୁ ସୋରରିଙ୍ଗ୍ ନାଙ୍ଗ୍ ଏଡ଼ କିଆ ।”

୪୪ ଆବେଟ୍ ଜିସୁ ଖାନିଙ୍ଗ୍ ଇର୍ହାନ, “ନାନ୍ ନିଙ୍ଗ୍ ସଡ଼ ଝେର୍ସିନା,
ନେରୁ ନିନ୍ ନା ଖାଲେ ମୁସକୁପୁର ସନି ।”

ଜିସୁ ସାତାନ୍

(ମାତିଡ ୨୭:୪୫-୫୭; ମାର୍କ ୧୫:୩୩-୪୧; ଜୋହନ୍ ୧୯:୨୮-୩୦)

୪୫ ନାସ୍ତିଖାଲେ ପୁରା ବାର ଗଣ୍ଟା ସମୟ ଆତାମାର୍ହାଡ଼, ମାରି,
ଝେଡାଦି ଜାୟ ସିଲେଣ୍ଡ ଆତାଡ଼ଆକା ମୁନ୍ତ୍ର ଗଣ୍ଟା ସାନ୍ ପୃତିବି ଝିଜୁ
ସିକାଟି ଆତାସୋର୍ହାଡ଼ ।

୪୬ ମାରି ମନ୍ଦିରତି ପବିତ୍ର ବାଡିଦିଙ୍ଗ୍ ଏର୍ପସିମାନି ଦୁଙ୍ଗୁନି ପାରଦା
ମୁସକୁରାନ୍ ଆଡ଼ଗି ସାନ୍ କିଜି ରୁଣ୍ଡି ମୋକେଙ୍ଗ୍ ଆତାଡ଼ ।

୪୭ ମାରି, ଜିସୁ ନାଣ୍ଡ ଆଉଲି ଆଜି ଡେସି ଇର୍ହାନ, “ଏ ବୁବା, ନି
କିୟୁଦୁ ନାନ୍ ନିଜେଦି ଆମ୍ବା ସପ୍ରେ କିଜିନା ।” ଇକା ଇନ୍ଝି ଖାନ୍ ସାତା
ସୋର୍ହାନ୍ ।

୪୭ ସତସେନାପତି ଇୟା ଗର୍ନା ସୁତୁଛି ମାପୁରୁଙ୍କୁଁ ଦନ୍ୟବାଦ କିଜି ଇର୍ହାନ୍, “ପୁରା ଇୟା ଲୋକୁ ଦାମ୍ଭୁ ମାର୍ହାନ୍ ।”

୪୮ ମାରି, ଏମେ ଲୋକୁଝିଜେର ଇୟା ଗର୍ନା ସୁତୁବୁଦଙ୍କୁ ଡଣ୍ଡେ ମାନୁ ଆତାମାର୍ହାନ୍, ଖାର ଝିଜେରେ ଆୟାଝିକୁ ଗର୍ନା ସୁତୁଛି ନାଣ୍ଡ ଦୁଃକ୍ କିଜି ନିଜେଦି ବକାଦୁ କତାଜି ଆଡ଼ବାଜି ଡେସି ସୋର୍ହାନ୍ ।

୪୯ ମାତର ଝାନିଙ୍କୁ ନେସତିକାର ଝିଜେରେ ମାରି ଗାଲିଲିଦାନ୍ ଅରସେ ଝାନି ଝେନ୍‌କା ଝେନ୍‌କା ଝାତିମାରୁଇ ଆଇମେକ୍ ଆକରାନ୍ ନିରେଏନୋ ଇୟାଝିକୁ ସୁତୁଛିମାରେଏ ।

ଜିସୁଙ୍କୁ ମୁସ୍‌ତାର

(ମାତିଡ ୨୭:୫୭-୬୧; ମାର୍କ ୧୫:୪୨-୪୭; ଜୋହନ ୧୯:୩୮-୪୨)

୫୦ ମାରି ସୁତୁବୁ, ଜିହୁଦିରି ହାରାମାତିୟା ଗାଡ଼ତି ଜୋସେପ୍ ଦରତିକାନ୍ ଅରେନ୍ ଲୋକୁ ପେରିଦଲ୍‌ତି ନେତା ମାର୍ହାନ୍, ଝାନ୍ ଅରେନ୍ ନେଗିକାନ୍ ମାରି ଦାମ୍ଭୁଦି ଲୋକୁ,

୫୧ ମାରି ଜିହୁଦିରି ମାଟାଦିଙ୍କୁ ନି ପାଣିଦିଙ୍କୁ ମାନାଏତା ମାର୍ହାନ୍, ମାରି ହାରାମାତିୟା ନିଜେ ବା ମାପୁରୁଦି ରାଜିଦିଙ୍କୁ କାପକିଜି ମାର୍ହାନ୍ ।

୫୨ ଖାଣ୍ଡୁ ପିଲାଡ଼ଦି ଲାକ୍‌ତୁ ସୋର୍ହାନ୍ ନୋ ଜିସୁଦି ସାତି ମାଡ଼ା ଲସ୍‌ତାନ୍,

୫୩ ମାରି ସାତିମାଡ଼ାଦିଙ୍କୁ ରେପ୍‌ସିତାସି କାଣ୍ଡେକ୍ ଝାତିଦାନ୍ ଡେରେପ୍‌ତାନ୍ ନୋ, ଆବେନ୍‌ତୁ ଏନ୍ ଏସ୍‌କାଙ୍କୁ ଇଡ଼ଏର୍ ମାର୍ହାନ୍, ଗରନ୍‌ତୁ କାରିତିମାରୁଇ ଇୟାଝାଜା ଡଣ୍ଡି ଗୁଟାଦୁ ଝାନିଙ୍କୁ ଇଟ୍‌ତାର ।

୫୪ ଆୟା ନାଣ୍ଡିଙ୍କୁ ତିଆରୁଆନି ଦିନ୍ ମାର୍ହାଡ଼, ମାରି ରମ୍‌ନିଦିନ୍ ଲାକ୍‌ତୁ ଆଜି ଝାଜି ମାର୍ହାଡ଼ ।

୫୫ ମାରି, ଗାଲିଲିଦାନ୍ ଝାନି ଝାଲେ ଝାତିମାରୁଇ ଆଇମେକ୍ ଝେନ୍‌କା ଝେନ୍‌କା ସୋର୍‌ଏ ନୋ ମୁସ୍‌ତିକା ମାରି ଝାନି ମାଡ଼ାଦିଙ୍କୁ ଏଣ୍ଡେସ୍ ଇଟ୍‌ତାର, ଆକା ସୁତୁବୁଡ଼େ,

୫୭ ମାରି ଝାକ୍ ଡେସିସୋର୍ଏନୋ ବାସ୍ନାଜିନିସ୍କୁ ମାରି ନିୟୁ ତିଆର୍ କିତେ । ଝାକ୍ ରମ୍‌ନିନାଣ୍ଡି ରମିତେ, ଇରିଙ୍ଗ୍ ଇକା ନିୟମତୁ ମାର୍‌ଆଡ୍ ।

୨୪

ଜିସୁ ସାତିମାଣାନ୍ ମାରିଡେସି ନିଙ୍ଗ୍‌ତାନ୍

(ମାତିଉ ୨୮:୧-୧୦; ମାର୍କ ୧୬:୧-୮; ଜୋହନ୍ ୨୦:୧-୧୦)

୧ ମାତର୍ ଝାରାଦି ଆଗିଡିରି ନାଣ୍ଡିଙ୍ଗ୍ ଉର୍‌ଲା ନାଡାକାଦେ ଝାକ୍ ଝାନିକା ତିଆର୍‌କିତି ବାସ୍ନାଦିଜିନିସ୍କୁ ନି ନିୟୁ ଆସ୍‌ଡେନୋ ମୁସ୍‌ତି ଲାକ୍‌ତୁ ସୋର୍‌ଏ ।

୨ ମାରି, ଝାକ୍ ମୁସ୍‌ତିମାଣ୍‌କୁ କାଲୁ ପେଲେକିତି ମାର୍‌ଇକା ସୁଡ଼ୁତେ,

୩ ମାତର୍ ଲୋଇ ସୋରେଏନୋ ପ୍ରୁ ଜିସୁଦି ମାଡା ପୟ୍‌ଉତେ ।

୪ ମାରି, ଝାକ୍ ଆୟା ବିସୟତାନ୍ ବାୟାବେମ୍‌ ଝାଜା ଆଡେ, ଇୟାଝାଜା ସମୟତୁ ସୁଡ଼ୁ, ଜାୟ୍‌ତି ଝାତି ଆରାତିକେଙ୍ଗ୍ ରିଏର୍ ମୁସ୍‌କୁପୁର୍‌ତି ଦୁଡ଼ୁ ଝାନିକା ଲାକ୍‌ତୁ ଝାଡେ;

୫ ଆବେର୍ ଝାକ୍ ତିଲାଡେ ନୋ ତାଲା ଆଡ଼ଗି ପାଡ଼ଡେ ମାର୍‌ଏ, ଦୁଡ଼ୁ ଝାନିକାଙ୍ଗ୍ ଇର୍‌ଏ, “ସାତିଝାରି ମାଣାନ୍ ମିର୍‌ ଏନ୍‌ ଜିତିଝାନିଙ୍ଗ୍ ପୋଇଜିନିଦେର୍ ?

୬ ☆ଝାନ୍ ଇବେନ୍‌ ସିଲେନ୍‌, ମାତର୍ ନିଙ୍ଗ୍‌ତାମାନାନ୍ ? ଝାନ୍ ଗାଲିଲିଦୁ ମାର୍‌ଇଝାଲେ ମିଙ୍ଗ୍‌ ଇନିକା ଇର୍‌ଆମାର୍‌ଆନ୍ ଆକା ଏଡ଼ କିଦୁ,

୭ ମନୁସ୍ୟପୁତ୍ରଦିଙ୍ଗ୍ ଜେ ପାପି ଲୋକା କିୟୁସୁ ସର୍‌ପେ ଆଜି କୁସକାର୍‌ତୁ ସାଦେଙ୍ଗ୍ ଆନାଡ଼ ମାରି ମୁଣ୍ଡି ଦିନ୍‌ତିନାଣ୍ଡିଙ୍ଗ୍ ସାତିମାଣାନ୍ ଡେସିଜିବନ୍‌ ଆଜି ନିଙ୍ଗ୍‌ତା ମାନାନ୍ ।”

୮ ଆବେର୍ ଝାର୍‌ ଝାନି ବାକ୍ୟ ଏଡ଼ କିତାର୍‌,

୯ ମାରି ମୁସ୍‌ତିମାଣାନ୍ ଡେସିସୋର୍‌ଏନୋ ଏଗାର୍‌ ଲୋକାଙ୍ଗ୍ ନି ଆଇ ଝିଜେରିଙ୍ଗ୍ ଇୟାଝିଜୁ ମାଟା ଝେର୍‌ଡେ ।

☆ ୨୪:୬ ମାତିଉ ୧୬:୨୧; ୧୭:୨୨, ୨୩; ୨୦:୧୮, ୧୯; ମାର୍କ ୮:୩୧; ୯:୩୧; ୧୦:୩୩, ୩୪; ଲୁକ ୯:୨୨; ୧୮:୩୧-୩୩.

୧୦ ଇୟାକେଙ୍କ ମରଦଲିନି ମରିୟମ୍, ଜୋହାନା, ଜାକୁବରି ଆଇସି ମରିୟମ୍ ମାରି ଝେନିକା ଖାଲେ ମାନି ଆଇ ଆଇମେକ୍, ଇୟାକେଙ୍କ ସିସୁରିଙ୍କ ଇୟାଞ୍ଜିକୁ ବିସୟ ଝେରତେ ।

୧୧ ମାତର୍ ଇୟାଞ୍ଜିକୁ ମାଟା ଖାରି ଲାକ୍ତୁ ବାୟାଦିମାଟା ଖାଜା ଆତାଡ୍, ମାରି ଖାର୍ ଖାନିକାଙ୍କ ବିସବାସ କିଏତାର ।

୧୨ ମାତର୍ ପିତର୍ ନିଙ୍କ ତାନନୋ ମୁସ୍ତି ଲାକ୍ତୁ ଉରୁକ୍ସିସର୍ହାନ, ମାରି ପାଡ଼ିଗିଜି ବେସ୍ତାନନୋ ଖାର୍ ଖାତିଙ୍କଞ୍ଜିକୁ ସୁଡ଼ତୁନ୍, ମାରି ଖାନ୍ ଆୟା ଗର୍ନା ବିସୟତାନ୍ ତିଲାତାନନୋ ନିଜେଦି ଇଣ୍ଡ ସୋର୍ହାନ ।

ରିଏର୍ ସିସୁର୍ ଇମ୍ମାୟୁ ନାଟ ସୋଲ୍ସି ମାର୍ଆର୍

(ମାର୍କ ୧୬:୧୨-୧୩)

୧୩ ମାରି ସୁଡ଼ତୁ, ଆୟାନାଣ୍ଡିଙ୍କ ଖାରି ମାଣ୍ଡନା ରିଏର୍ ଲୋକୁ ଜିରୁସାଲମତାନ୍ ପୁରା ଏଗାର୍ କିଲମିଟ୍‌ରଦାନ୍ ଆକ ଇମ୍ମାୟୁଦି ନାଟ ସୋଲ୍ସିମାର୍ଆର୍

୧୪ ମାରି ଇୟାଞ୍ଜିକୁ ଗର୍ନା ବିସୟତାନ୍ ନିଜେ ନିଜେଦି ମାନ୍ ଖାର୍ଗିଜିସାଜି ମାର୍ହାର ।

୧୫ ଖାର୍ ଖାର୍ଗିଜିସାନିକା ମାରି ଲୋଇ ଲୋଇ ଖାର୍ଗିଜିସାନିଖାଲେ ଜିସୁ ଖାନ୍‌ଣ୍ଡେ ଖାରି ଲାକ୍ତୁ ଖାଜି ଖାରି ଖାଲେ ଦାପେ ଦାପେନେ ବୁଲାଦେଙ୍କ ଆସ୍ତାନ୍ ।

୧୬ ମାତର୍ ଖାରି କାଣ୍ଡୁକୁ ଇୟାଞ୍ଜା ନାମିତେ ମାର୍ଏ, ଖାର୍ ଖାନିଙ୍କ ଚିନିସ୍ କିଦେଙ୍କ ଆର୍ଏତାର ।

୧୭ ଖାନ୍ ଖାରିଙ୍କ ଝେନ୍‌ବାତାନ୍, “ମିର୍ ବୁଲାଜି ବୁଲାଜି ଏମେ ଞ୍ଜିକୁ ବିସୟ ନିଜେ ନିଜେଦି ମାନ୍ ଖାର୍ଗିଜି ସାଜିନିଦେର୍, ଆୟାଞ୍ଜିକୁ ଇନିକା ? ଆବେଟ୍ ଖାର୍ ଦୁଃକ୍ତୁ ମୋକ୍‌ମତାନ୍ ନିର୍ଆରୋ ତେବାତାର ।”

୧୮ ମାରି, ଖାରି ମାଣ୍ଡନା କୟାପା ଦରତିକାନ୍ ଅରେନ୍ ଖାନିଙ୍କ ଇରୁଆନ୍, “ଜିରୁସାଲମତି ଲୋକାରି ମାଣ୍ଡକୁ ନିନ୍ ଇନିକା ଅରିଦେ ଆୟାବାଡ଼ିଦି ଇୟା ଏସ ଦିନ୍ତି ଗର୍ନା ନେସେକ ?”

୧୯ ଜିସୁ ଖାରିଙ୍କ ଝେନ୍‌ବାତାନ୍, “ଇନି ଇନି ଖାଜାଦି ଗର୍ନା ?” ଖାର୍ ଖାନିଙ୍କ ଇର୍ହାର୍, “ନାଜରିତିୟ ଜିସୁଦି ବିସୟ; ଖାନ୍ ମାପୁରୁ ମାରି ଞ୍ଜିକୁ

ଲୋକାଦି ଆଗିତ୍ତି ପାଣିଦୁ ମାରି ବାକ୍ୟଦୁ ଅରେନ୍ ବପୁଦି ବାବବାଦି ମାର୍ହାନ,

୨୦ ମାରି ମା ପେରି ଜାଜକର୍ ମାରି ପେରିକାର ଏଣ୍ଡେସ୍ ଖାନିଙ୍ଗ୍ ସାନି ଦଣ୍ଡ ବଗାଦେଙ୍ଗ୍ ସପ୍ରେ କିଜି ଖାନିଙ୍ଗ୍ କୁସକାର୍ତ୍ତୁ ସାପିସ୍ କିତାର୍, ଇୟାଞ୍ଜିକୁ ବିସୟ୍ ।

୨୧ ମାତର୍ ଏନ୍ ଇସ୍ରାଏଲତିଙ୍ଗ୍ ଡିସିସ୍ କିନାନ୍, ଖାନ୍ ଜେ ଇୟା ଲୋକୁ, ଆକା ମାପୁ ଆସା କିତା ମାର୍ଥାପ୍; ଇରିଙ୍ଗ୍ ଇକା ଡିସ୍ତିଙ୍ଗ୍ ଇୟାଞ୍ଜିକୁ ଗଟାତି ନେର୍ଆନ୍ ମୁନେନ୍ ଆତାଡ୍ ।

୨୨ ମାରି ବା, ମା ମାଣ୍ଟୁ ଏସ ଆଇମେକ୍ ମାଙ୍ଗ୍ କାବା କିତେମାନେ; ଖାକ୍ ଉର୍ଲା ନାଡ଼ାକାଦେ ମୁସ୍ତି ଲାକ୍ତୁ ସୋରେଏମାରେଏ,

୨୩ ମାରି ଖାନି ସାତି ମାଡ଼ା ପୋଇଉତେନୋ ଖାଜି ଇରେଏ, ଖାକ୍ ଦୁଡ଼କା ସୁଡ଼ୁତ ମାରେଏ ମାରି ଆୟା ଦୁଡ଼କୁ ଇରେଏ ଜେ, ଖାନ୍ ଜିବନ୍ ମାନାନ୍ ।

୨୪ ମାରି, ମା ସଙ୍ଗ୍ତି ଲୋକା ମାଣ୍ଟୁ ଏର୍ ଏର୍ ମୁସ୍ତି ଲାକ୍ତୁ ସୋଲ୍ସି, ଆଇମେକ୍ ଏଣ୍ଡେସ୍ ଖେର୍ତେମାରେଏ, ଆୟାଖାଜା ସୁଡ଼ୁତାର୍, ମାତର୍ ଖାନିଙ୍ଗ୍ ସୁଡ଼ୁତାର୍ ।”

୨୫ ଆବେଟ୍ ଜିସୁ ଖାରିଙ୍ଗ୍ ଇରଆନ୍, “ଏ କାବାଦିକାର୍, ବାବବାଦିରି ମାଣ୍ଟୁ ଖେର୍ତିମାର୍ଇ ଞ୍ଜିକୁ ବାକ୍ୟଦିଙ୍ଗ୍ ବିସ୍ବାସ୍ କିଦେଙ୍ଗ୍ ଦିରେ ବୁଜାନିଲୋକ୍,

୨୬ ଇୟାଞ୍ଜିକୁ ଦୁଃକ୍ କାସ୍ ବୋଗାଜି ନିଜେଦି ମହିମାଦାନ୍ ସୋନିକା ଇନିକା କ୍ରିସ୍ତିଦିଙ୍ଗ୍ ଦରକାର୍ ସିଲେତାଡ୍ ?”

୨୭ ମାରି, ମୋସା ମାରି ଖିଜେରି ବାବବାଦିରିମାଣ୍ଟୁ ଆରାମ୍ କିଜି ଞ୍ଜିକୁ ଦାମ୍ବୁସାସ୍ତ୍ରୁ ନିଜେଦି ବିସୟ୍ତି ମାଟା ଖାନ୍ ଖାରିଙ୍ଗ୍ ବୁଜାକିତାସିତାନ୍ ।

୨୮ ମାରି, ଖାର୍ ଏମେ ନାଟ୍ ସୋଲ୍ସି ମାର୍ଥାପ୍, ଆବେଣି ନାର୍ ଲାକ୍ତୁ ଇତାର୍, ଖାନ୍ ମାରି ଆଗିତ୍ତି ସନିଖାଜା ଆତାନ୍ ।

୨୯ ମାତର୍ ଖାର୍ ଜିସୁଙ୍ଗ୍ ତେବାକିଜି ଇର୍ହାର୍, “ମା ଖାଲେ ମାନ୍ଆ, ମାତର୍ ଖେଡ଼ା ଆଜି ଖାଜିନାଡ଼ ମାରି ଖେଡ଼ା ସୋଲ୍ସିନାଡ଼ ।” ଆବେଟ୍ ଖାନ୍ ଖାରି ଖାଲେ ମାନ୍ଶ୍ରେଙ୍ଗ୍ ଇଲ୍ଲ ଲୋଇ ସୋର୍ଆନ୍ ।

୩୦ ମାରି, ଖାରି ଖାଲେ ଉଣିମାନୁ ବାସ୍ତି ଝେନକା ଜିସୁ ରୁଟି ଅତାନନୋ ମାପୁରୁଙ୍କୁ ଆସିର୍ବାଦ୍ କିତାନ୍, ମାରି ଆୟା ରୁଟିଦିଙ୍କୁ ରୁକ୍ସି ଖାରିଙ୍କୁ ସିଦେଙ୍କୁ ଆସ୍ତାନ୍ ।

୩୧ ଆବେନ୍ନୁ ଖାରି କାଣ୍ଟୁକୁ ସୁଡ଼ୁଦେଙ୍କୁ ଆର୍ତ୍ତାର ମାରି ଖାର୍ ଖାନିଙ୍କୁ ସିନିସକିଦେଙ୍କୁ ଆର୍ତ୍ତାର; ମାରି, ଖାନ୍ ଖାରି ଆଗିଡ଼ିରାନ୍ ସାଣେକ୍ତିଙ୍କୁ ଏମେନୋ ଆତାନ୍ ।

୩୨ ଆବେଟ୍ ଖାର୍ ନିଜେ ନିଜେଦିମାନୁ ଖାରଗିଜି ସାତାର୍, “ଏସ୍ତିଖାଲେ ସାରିଦୁ ଖାନ୍ ମା ଖାଲେ ଖାରଗିଜିସାଜି ମାର୍ଆନ୍ ମାରି ମାଙ୍କୁ ଦାର୍ମସାସ୍ତ୍ର ବୁଜାକିଜି ମାର୍ଆନ୍, ନାସ୍ତିଖାଲେ ଇନିକା ମା ଜିବନ୍ ସିସୁ କାସନି ଖାଜା ଆଏଜି ମାର୍ଆଟ୍ ନୋ ?”

୩୩ ତାନେଝେନକା ଖାର୍ ଆୟା ଦାପ୍ତେ ନିଙ୍କୁ ତାର୍ ନୋ ଜିରୁସାଲମ୍‌ତୁ ଡେସିସୋଲ୍‌ସି ଉଣ୍ଡେ ମାନୁ ଆତିମାନିକା ଏଗାର୍ ସିସୁରିଙ୍କୁ ମାରି ଖାରି ସଙ୍ଗତିଖାରିଙ୍କୁ ସୁଡ଼ୁତାର୍;

୩୪ ସିସୁର୍ ଇଜି, “ପ୍ରୁ ସଡ଼ନେ ନିଙ୍କୁ ତାମାନାନ୍ ମାରି ସିମୋନ୍‌ଡିଙ୍କୁ ତରାତାମାନାନ୍ ।”

୩୫ ତାନେଝେନକା ଇୟା ରିଏର୍ ଲୋକୁ ସାରିଦୁ ଆମାକା ଝିନ୍ତୁ ଗଟାତା ମାର୍ଆଟ୍, ଆୟାଝିନ୍ତୁ ଖାରି ଆଗିଡ଼ି ଝେରତାର୍, ଖାନ୍ ରୁଟି ରୁକ୍ନି ବେଡ଼ାଦୁ ଖାର୍ ଏଣ୍ଡେସ୍ ଖାନିଙ୍କୁ ସିନେକିଦେଙ୍କୁ ଆର୍ତ୍ତାର୍, ଖାର୍ ଆୟାଝିନ୍ତୁ ବିସୟ ଇର୍ହାର୍ ।

ଜିସୁ ନିଜେଦି ସିସୁରିଙ୍କୁ ତରାୟାଆତାନ୍

(ମାତିଡ ୨୮:୧୭-୨୦; ମାର୍କ ୧୬:୧୪-୧୮; ଜୋହନ ୨୦:୧୯-୨୩; ପ୍ରେରିଡ ୧:୬-୮)

୩୬ ମାତର୍ ସିସୁର୍ ଆୟାଝିନ୍ତୁ ମାଟା ଇଜିମାର୍‌ଇ ବେଡ଼ାଦୁ ପ୍ରୁ ଜିସୁ ନିଜେନେ ଖାରିମାନୁ ଖାତାନ୍, ମାରି ଇର୍ଆନ୍, “ମି ସାନ୍ତି ଆପିଡ୍ ।”

୩୭ ମାତର୍ ସିସୁର୍ କାବାଜି ମାରି ତିଲାଜି ଉଣ୍ଡି ଦୁବା ସୁଡ଼ୁଜିନାପ୍ ଇଜି ଅଡ଼ବିତାର୍ ।

୩୮ ଆବେଟ୍ ଖାନ୍ ଖାରିଙ୍କୁ ଇର୍ଆନ୍, “ଇନ୍‌ସାନିଙ୍କୁ ତିଲାଜିନିଦେର୍ ? ମାରି ମି ମୋନ୍‌ତୁ ଏନ୍‌ ନାମ୍‌ଏଣ୍‌ଗା ଲୋଇ ଲୋଇ ଖାରଗିଜିନିଦେର୍ ?

୩୯ ଇକାନ୍ ଜେ ନିଜେ ନାନ୍, ନା କିୟୁ ମାରି ପାଦାମ୍ବୁ ସୁତୁ, ନାଙ୍ଗୁ ମୁଟ୍‌ସୋ ସୁତୁ, ମାତର୍ ନାନ୍ ଏଣ୍ଡେସ୍ ଜିବନ୍‌ମାନି ମେନ୍‌ଲ୍ ମାନିକା ସୁତୁଜିନିଦେର୍, ଦୁବା ଆୟାଞ୍ଜା ସିଲେ ।”

୪୦ ମାରି, ଜିସୁ ଇକା ଇନ୍‌ଞ୍ଜି ଖାରିଙ୍ଗ୍ ନିଜେଦି କିୟୁ ମାରି ପାଦାମ୍ବୁ ତରତାନ୍ ।

୪୧ ଆଦେଙ୍ଗ୍ ଖାର ବିସ୍‌ବାସ୍ କିଏତାର୍, ଆତିଙ୍ଗ୍‌ବା କାବାଆଜି ଖେଡିକା ଆତାର ଆରିଙ୍ଗ୍ ଜିସୁ ଖାରିଙ୍ଗ୍ ଖେନ୍‌ବାତାନ୍, ଇବେନ୍‌ ମି ଲାକ୍‌ତୁ ଇନିକା ଉଣିକା ମାନାଡ୍ ?

୪୨ ଆଦେଙ୍ଗ୍ ଖାର ଜିସୁଙ୍ଗ୍ କାଣ୍ଡେକ୍ ଖାରତି ମିନ୍‌କୁ ସିତାର୍ ।

୪୩ ମାରି, ଖାନ୍ ଆୟା ମିନ୍‌କୁ ଅତାନ୍‌ନୋ ଖାରି ଆଗିଡି ତିରଥାନ୍ ।

୪୪ ଜିସୁ ଖାରିଙ୍ଗ୍ ଇରଥାନ୍, “ମୋସାଦି ନିୟମତୁ ମାରି ବାବବାଦିରି ମାରି ଗାତସଂହିତା ଦାମ୍‌ସାସ୍ତ୍ରୁ ନା ବିସୟତାନ୍ ଆମାକା ଆମାକା ରାସାତାମାନାଡ୍, ଆୟାଞ୍ଜି ପୁରା ଆଦେଙ୍ଗ୍ ଦରକାର୍, ନାନ୍ ମି ଖାଲେ ମାର୍‌ଇ ଖାଲେ ମିଙ୍ଗୁ ଇୟାଞ୍ଜି ମାଟା ଇର୍‌ମାର୍‌ହା ।”

୪୫ ନାସ୍ତିଞ୍ଜାଲେ ଖାର ଏଣ୍ଡେସ୍ ଦାମ୍‌ସାସ୍ତ୍ରୁ ବିସୟ ବୁଜାଦେଙ୍ଗ୍ ଆଟ୍‌ନାର୍, ଆୟାଉଣ୍ଡିଙ୍ଗ୍ ଖାନ୍ ଖାରି ବୁଦିଦି ସେରଲା ରେତାନ୍;

୪୬ ମାରି, ଜିସୁ ସିସୁରି ଲାକ୍‌ତୁ ଖାଜି ଇର୍‌ହାନ୍, “ଇୟାଞ୍ଜା ରାସାତାମାନାଡ୍, କ୍ରିସ୍ତ ଦୁଃକ୍ ପୟନାନ୍ ମାରି ମୁନେଟାନ୍ ସାତି ଲୋକାମାଣାନ୍ ଡେସି ନିଙ୍ଗୁ ନାନ୍,

୪୭ ମାରି ଜିରୁସାଲମ୍‌ତାନ୍ ଆରାମ୍ କିଜି ଡିଜୁ ଜାତି ଲାକ୍‌ତୁ ଖାନି ଦରତାନ୍ ପାପ୍‌କେମା ଉଣ୍ଡିଙ୍ଗ୍ ମନ୍‌ତିଙ୍ଗ୍ ଡେପ୍‌ନି ବିସୟତାନ୍ ଲୋକୁ ଡିକ୍‌ନାର୍ ।

୪୮ ମିର୍ ଇୟାଞ୍ଜି ବିସୟତି ସାକି ଆନିଦେର୍ ।

୪୯ ☆ମାରି ସୁତୁ, ନା ବୁବା ଆମାକା ପାର୍‌ମାଣ୍ କିତାମାନାନ୍, ଆକା ନାନ୍ ମି ଲାକ୍‌ତୁ ପକ୍‌ନା, ମାତର୍ ମୁସ୍‌କୁରାନ୍ ସାକ୍ତି ପୁର୍‌ଇ ସାନ୍ ମିର୍ ଇୟା ଗାଡ୍‌ତୁ ମାନ୍‌ଡୁ ।”

ଜିସୁ ମୁସ୍‌କୁପୁର୍‌ତୁ ସର୍‌ଆନ୍

(ମାର୍କ ୧୬:୧୯-୨୦; ପ୍ରେରିତ ୧:୯-୧୧)

୫୦ ☆ ତାନିଝେନ୍‌କା ଜିସୁ ଖାରିଙ୍ଗ୍ ବେତନିୟାଦୁ ସନି ସାରି ସାନ୍ଦି
ଅତାନ୍ ମାରି ନିଜେଦି କିୟୁ ପେରଜି ଖାରିଙ୍ଗ୍ ଆସିର୍ବାଦ୍ କିତାନ୍ ।

୫୧ ମାରି, ଖାରିଙ୍ଗ୍ ଆସିର୍ବାଦ୍ କିରୁ କିରୁ ଖାନ୍ ଖାରିମାଣାନ୍ ଝେରଏ
ଆଜି ମୁସକୁପୁରତୁ ସରଆନ୍ ।

୫୨ ମାରି, ଖାର୍ ଖାନିଙ୍ଗ୍ ମାଡିସ୍ କିଜି ନାଣ୍ଡ ଝେଡିକାଦାନ୍
ଜିରୁସାଲାମ୍‌ତୁ ଡେସିଝାତାର୍ ।

୫୩ ମାରି ଖାର୍ ଝିଜୁଦିନ୍ ମନ୍ଦିରତୁ ମାନ୍‌ଜି ମାପୁରୁଦି ଦନ୍ୟବାଦ୍
କିଦେଙ୍ଗ୍ ଆସ୍‌ତାର୍ ।

CXXX

ମାପୁରୁଦି ସବ୍ ବାକ୍ୟ

The New Testament in the Konda Porja Lanugage of India. Konda-Dora: ମାପୁରୁଦି ସବ୍ ବାକ୍ୟ (Bible)

copyright © 2020 The Word for the World International and Konda Porja
Translation Samithi, Dasamanthpur, Odisha

Language: Konda Porja (Konda-Dora)

Contributor: The Word for the World South Asia

ମାପୁରୁଦି ସବ୍ ବାକ୍ୟ

ପୁନି ନିୟମ, 2020

The New Testament in Konda Porja Language

The Word for the World International

This translation is made available to you under the terms of the Creative
Commons Attribution Share-Alike license 4.0.

You have permission to share and redistribute this Bible translation in
any format and to make reasonable revisions and adaptations of this
translation, provided that:

You include the above copyright and source information.

If you make any changes to the text, you must indicate that you did so in
a way that makes it clear that the original licensor is not necessarily
endorsing your changes.

If you redistribute this text, you must distribute your contributions
under the same license as the original.

Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

Note that in addition to the rules above, revising and adapting God's Word
involves a great responsibility to be true to God's Word. See Revelation
22:18-19.

2025-05-07

PDF generated using Haiola and XeLaTeX on 6 May 2025 from source files
dated 7 May 2025

506ae627-08e2-556a-b39e-5315f886d95a